


文
恭
集
一




叢書集成

初編

主編者
王雲五

商務印書館發行



文 恭 集
(一)



3 0649 7812 9

胡 宿 撰

本館據聚珍版叢
書本排印初編各
叢書僅有此本

御製題胡宿文恭集

久曾割裂得全難。四庫搜羅為復完。是書亦散見永樂大典中。經詞臣採輯復成完本者。如此立朝有本末。可教遺帙聽彫殘。既經呈覽斯予事。自與發潛令彼安。通集原應俾鈔錄。至文乃合命鐫刊。教坊致語寧忠告。道院青詞實異端。胡宿文筆頗佳。允宜刊以傳世。第集中兼及道場青詞。殊乖正道。且代教坊致語。及為內中侍御賀詞。則尤為瑣狎。自當存其正者。刊行。全集鈔存可耳。去取之間繫旌瘴。示茲大略付儒官。

乾隆乙未仲春

083
114
2:1884

御製題胡宿文恭集

文恭集目錄

卷一

賦五首

五言古詩十八首

七言古詩一首

卷二

五言律詩九十一首

卷三

五言律詩二十一首

七言律詩五十首

卷四

七言律詩七十六首

卷五

七言律詩二十七首

五言排律十九首

卷六

五言排律三十一首

五言絕句二首

文恭集目錄

083
112
—
1884

文恭集目錄

七言絕句八首

卷七

奏議十八首

卷八

奏議九首

狀十一首

議二首

卷九

表十三首

卷十

表十九首

卷十一

表十五首

笏記五首

卷十二

外制三十二首

卷十三

外制四十二首

卷十四

外制九十五首

卷十五

外制四十六首

卷十六

外制二十六首

卷十七

外制四十八首

卷十八

外制七十一首

卷十九

外制五十三首

卷二十

外制四十二首

文恭集 目錄

卷二十一

外制四十九首

卷二十二

內制十二首

卷二十三

內制十四首

卷二十四

內制三十一首

卷二十五

內制五十首

卷二十六

內制四十九首

卷二十七

內制九十首

卷二十八

帖子詞五十二首 上梁文三首

卷二十九

策問六首

頌銘二首

論辨二首

序贊三首

卷三十

書啓十首

卷三十一

書啓二十七首

卷三十二

書啓三十三首

卷三十三

書啓三十首

卷三十四

書啓二十九首

卷三十五

記九首

卷三十六

誌銘二首

卷三十七

誌銘三首

卷三十八

誌銘四首

卷三十九

碑表塔銘三首

卷四十

行狀二首

臣等謹案文恭集宋胡宿撰宿字武平常州晉陵人天聖二年進士歷官兩浙轉運使召修起居注知制誥由翰林學士拜樞密副使以太子少師致仕文恭其諡也事蹟詳宋史本傳宿立朝以廉直著歷事仁宗英宗多所獻納爲時名臣學問亦極該博當時文格未變尙沿四六駢偶之習而宿于是體尤工所爲朝廷大制作典重瞻麗上法六朝于韻語最長五七言律其波瀾壯闊而結響闕遠亦可直造盛唐闡闕

洵足雄視一時。迥出楊億、錢惟演諸人之上。宿集本七十卷。見于陳氏書錄解題。馬氏經籍攷。世間久無傳本。近人編北宋名賢小集。所輯僅寥寥數篇。厲鶚撰宋詩紀事。搜羅至博。而所錄宿詩。亦祇從志乘掇拾。皆未嘗得見全集。至金元好問選唐詩鼓吹。誤編入宿詩二十餘首。說者遂以爲唐末爵里未詳之人。今攷好問所錄諸詩。大半在文恭集內。且其中有和朱況一首。其人爲胡氏之壻。與宿同籍常州。具見所撰李太夫人行狀。確鑿可據。好問乃不能攷證。舛錯至此。亦可知金元之間。其集已罕覩矣。今惟永樂大典分採入各韻下者。哀而錄之。計詩文一千四百餘首。雖未必盡合原目。而篇章較富。已可以什得其八九。旣繕錄全帙。編入四庫全書。復恪稟睿裁。刪其青詞、樂語、詭于正理者。定著爲四十卷。授之剞劂。俾藝林好古之士。復見完書。且千古共知彞訓昭垂。凡是非彰瘡之義。無不卽小見大。更足爲千古論文者。立之準則焉。乾隆四十年二月恭校上。

總纂官侍讀 臣紀昀

侍讀 臣陸錫熊

纂修官中書 臣徐步雲

文恭集卷一

賦

正陽門賦

宋 胡 宿



有宋受命。惟皇建國。獲九金之神鼎。應五精之火德。將以定九廟之攸居。彌萬世而不易。陋洛陽之如掌。纔可以備離宮。謂函谷之扼關。不足以創宸極。于是卽房心之廣野。據神明之華域。得天帝布政之廷。命司空度士之職。申畫郊圻。繕營宮室。建萬雉之都城。順五土之方色。王畿千里。倅日徑之傍開。君門九重。法天關之上闕。粵藝祖之創基。逮永熙之御歷。戰壘尙多。寅車未息。方且法神禹之卑宮。循姬文之旰食。重長府之仍貫。惜露臺之勞役。惟此應門。闕乎盛飾。屬三葉之承祧。配九皇而比迹。受萬玉之會朝。覽四海之圖籍。老上修懽。日際來格。風德周乎四面。言語重乎九譯。天業暉昌。國財厚積。適廣先猷。乃籲衆力。謂皇居之偪下。虧萬乘之尊嚴。謂寶儉之過中。非四方之表則。矧帝閣之峨峨。圖天象之奕奕。一開一闔。于以順乎陰陽。不壯不麗。何以威乎戎狄。于是申嚴戒告。條具章程。運松石于海岱。下杞梓于荆衡。瓌材畢至。美礎森呈。詔將作之利器。按堪輿之祕經。天老推策。石師督繩。晝則瞻乎陽景。夕則攷之極星。雲漢

昭回正瑤光于神縣。山河表裏。裁寶勢于坤靈。築金椎兮堅重。置水滌兮端平。子來輸力。人謀獻能。千章兮俱度。萬斧兮並興。賦東山之悅使。造靈臺之樂成。挺庶物而首出。恍綠雲而上征。覆壓九軌。森倚萬楹。冠廣內以凝宇。標正陽而定名。寶篆鸞飛。耀煌煌之金刻。榮簷虬聳。壯翼翼之瑤京。翠兮天黨。屹若神行。麗譙橫互。磴道階升。雲梁布藻。煙瓦搖青。方疏洞開。璇題彪列。藹若鮮雲。蔽嬋娟之素月。鏤檻周施。彤欄鉤折。宛在半空。橫連蜺之雌霓。俯畢昴之中街。聳象魏之雙闕。觚稜上拂。隱日月之回環。輦道相過。瞰煙雲之明滅。綴以昆金。飾之和璧。塗腹澄鮮。榮光射激。離朱奪其目精。計然喪其心畫。形半起而還正。勢將翔而復抑。跂而望之。若太陽御六龍。升扶桑而耀色。迫而察之。若威鳳將九雛。下丹山而接翼。東虬兮西獸。交鎮兮左右。南箕兮北斗。夾照兮前後。赫瀨壤以周布。岌飛廊而卻走。刻雕辰象。按宣夜之渾儀。圖狀神靈。選尙方之畫手。偃佺飛步。來曝于南榮。曼倩凝睛。下窺于朱牖。瑰譎萬態。于何不有。雄昉兮赫侈。磅礪兮穹崇。彈壓兮萬宇。冠映兮九宮。如衣服之有冕。譬鱗介之宗龍。配天之業兮。巍巍而蕩蕩。〔案〕此下似脫一句鬱鬱而蔥蔥。俯太行兮卻倚。瞰洪河兮注東。漢圖五嶽之形。儼存于宇下。周制九丘之地。悉布于檻中。是知帝者之有爲也。闡元極。稽邃古。述作表聖明之功。擬議成變化之序。宅中肯構。法太紫之圓方。大壯取模。用高曾之規矩。故能御六辯。總羣綱。安天下于置器。尊人主以如堂。鼓協氣而中出。導靈風而遠翔。納物于崇丘之富躋。民于壽域之康。樹闕中天。闡三正之教法。建瓴高屋。制萬國之侯王。若乃分至御辰。清寧祝吉。攷太史之宏議。酌觀臺之故實。命保章之職。仰以占乎五雲。詔師摯之官。中以吹乎六律。此所以

察義易之時變。助箕疇之陰隲。又若禮罷神壇。詔回天蹕。御百常之豐樓。端九章之華黻。肆蒞案兮橫霞。植靈芝兮翳日。俯輪奐之神構。耀顛叩之聖質。樹子子之雞竿。降洋洋之龍綽。法皆赦于帝媿。效祝飛于天乙。感人之樂。悅發于鈞霄。呼歲之聲。喧踰于少室。茲又恢一代之典禮。俾百王而祖述。大哉三光之所照。九賦之所均。有宮室以安體。有衣冠而正身。穆穆中夏。眈眈紫宸。功崇則業大。德盛則禮尊。斯于詠于周家。落成百堵。建章營于漢代。麗極千門。況乃業包海岳。道格乾坤。踰蒼姬之拓統。超金卯之集勳。撫和曠俗。惠養齊民。秋毫皆出帝力。率土莫非王臣。盤臺偃師。靡務先王之武。闔廬蔽雨。施及吾儕之人。故得中外畢力。大小懷欣。胥靡之工。驩趨乎版築。斲埴之匠。投銜其風。斤役不愆。素事俱中。倫彼土階。載乎往牒。茅殿標乎舊文。或出墨家之瑣瑣。或主玉帶之云云。〔案〕或主。原本作或生。就文義。當是主字。玉帶之云云。謂漢武帝時。公玉帶所上黃帝明堂圖。今改正。緇以大中之法度。彼又齷齪而奚足論。若乃攷乎默定之理。剽諸故老之聞。正者所以建萬事之紀。陽者所以爲衆陰之君。鎮天安之路寢。壯帝宅之威神。豈人謀之經始。亦天意之冥存。蓋以恢久大之德業。崇燕謀于子孫。利正元亨。四德扶于君位。謳歌獄訟。萬年繫于天關。下臣委質盛期。棲蹤禁陌。睇閭闔之華峻。干青冥而烜赫。惕位貌之喧卑。悵威顏之疎隔。禁門引籍。非如司馬之朝臣。行在獻文。復愧甘泉之賦客。乃作系曰。煌煌特闡。明明哲后。樹華構兮無疆。建豐規兮可久。拂倚杵之寥廓。鎮方輿之博厚。拓基鞏固。將金狄以同堅。卜世脩長。配神樞而不朽者也。

建用皇極賦

在昔箕子贊于武王。演皇極建用之道。爲彝倫攸紱之綱。經以大猷。統九疇而克正。執乎至德。裕萬化而有常。故能立觀天之至教。爲經國之彝章。原夫立民必本于大中。治衆必由于至寡。旣抱一以行矣。實用九之大者。體元立制。將舉正以適中。極深研幾。乃立常而化下。豈不以皇者保大之至。極者處中之規。建于民則國之寶也。藏諸用則神而化之。肇修乎八政之紀。上律乎五行之宜。酌剛柔動靜之方。裁成大本。樹正直平康之道。表正丕基。義用遵王。仁符守位。慎過差之咎。取中庸之治。立乎大法。爲百世不易之規。綜爾羣倫。協一統無偏之義。功歸乃聖。道格惟皇。協九功而時敘。體五始而化光。保合太和。克御旁行之道。綜制萬變。統歸中立之方。去彼異端。謹乎常憲。六極所以垂戒。五福由之致勸。旣殊塗以同歸。由執一以應萬。亦同夫三辰上運。歸尊乎璇極之居。四氣旁流。取法于斗杓之建。無反無側。有猷有爲。處人上而欽若。正天下以宜其允。執厥中。仰稽古重華之訓。莫匪爾極。見思文后稷之詩。大矣上聖有爲。羣生作則。體風行而斯化。妙日用而不測。故能昭睿哲之元功。建中和之至極。

黃離元吉賦

黃居中而秉色。離含章而守柔。蹈至和而不競。統元吉以來求。粲兮有章。履文明之盛位。沖然處順。被謙益之鴻休。明兩之卦。聿陳黃離之象。斯得能居六二之位。遂配中央之色。有文在內。符聖人赫赫之明。守正于中。契君子溫溫之德。粲英華兮發外。迪清明兮在躬。安六爻而順守。執一德以內融。煥乃文章。發耀于重明之際。惡夫朱紫含華于正色之中。豈不以五采平分。黃者色之懿。八卦並列。離乃文之粹。觀一陰

之成象。統二美而居位。法之繼照。天光臻下。濟之功。執以嚮明。文德有化成之利。蓋由體無剛壯。道有休明。乘初陽而不憂于患。履大中之克立其誠。故能主斯文于易象。配其色于土行。昭明之德內融。虛而不耀。和順之猷中積。動乃咸亨。然則柔而不害者。物之所應。剛而自用者。衆之所病。既章明之在御。又沖和而守正。故得百祥由是而告休。萬福以之而協慶。履乎中道。守一色以惟醇。乘乃至柔。配休光而爲盛。精義惟隨。聖文有爲。雖垂言于麗正。俾觀象而緝熙。黃裳之所謂在中。誠非遠爾。白賁之但能无咎。奚足方之。異哉美質無華。至虛攸保。成茲顯懿之德。由乃黃中之道。宜乎重華光表之君。爲法式而是寶。

蒙泉賦

稽易中之奧旨。見山下之出泉。養蒙之體斯在。善利之功未宣。靜之徐清。藏用于濫觴之際。動而愈出。含滋于濟物之前。立言蓋自先聖。育德爰資上賢。原夫蒙之爲象兮。晦而未章。泉之爲性兮。導之斯出。將處順以待用。貴守蒙而不溢。況夫人事在養功未發之時。驗以物情。當習坎初來之日。發彼變盈之地。依乎藏疾之山。旣靈長之斯肇。豈利用以爲艱。守爾齋淪。備潛德于一源之內。待夫疏導。致成功于萬派之間。柔以居之。漸而著也。涓兮之狀初出。冽彼之容肇瀉。清而不撓。善淵之性居中。寂爾含虛。潏沸之容在下。莫潤乎水。受之以蒙。契木升于漸允。法井養之無窮。含德以居。蘊斯干之厚利。俟時而動。蓄上善之元功。則知蒙實俟時。泉惟立象。捨之則獨安于靜。用之則利有攸往。居乎善地。固不雜于下流。洩爾靈源。信無踰于朽壤。豈不以蒙之道。貴守其正。物之用。亦存乎時。善下之勳未舉。守柔之道攸宜。將萬物而浸彼。豈

一勺而取斯。澄乎秩秩之原。至誠自守。譬彼存存之性。果行無虧。異夫湛爾中虛。淵兮下據。思混混以致用。竭涓涓而至著。儻加乎疏導之功。庶滄溟之可助。

顏子不貳過賦

偉顏子之賢哉。亞聖人之上才。既知過以無貳。益閑邪之不回。秉先覺以觀身。幾微必顯。敦至誠而適道。悔吝何來。原夫處陋巷以屢空。冠孔門而博雅。能盡去于貳過。將動由于純嘏。事有未善。但見乎必先知之。改而後行。孰云乎不早辨也。然則過不可顯。貴乎內遷。貳不可長。防乎外宣。可離則且非乎道。有開則必辨其先。極深而研。在方寸欲萌之際。造形則悟。當細瑕未兆之前。守爾中庸。敦乎誠慤。去邪惟務于得善。達節更聞于好學。稽仲尼之無大。所謂前知。攷子路之喜聞。誠爲後覺。莫不慎乎幽獨。戒在防虞。既度思而不亂。諒憂患以終無。自同乎禹稷之道。豈比夫師商之徒。苟知恥以方迴。是謂過矣。既表微而克正。其殆幾乎。則知善乃貴乎。則遷過實重乎。勿貳自存淵默之境。不在彰聞之地。復爲德本。我則體復以終誠。幾者動微。我則研幾而繹志。故得改兮勿憚。去以無疑。蓋慎乎亂之生也。且殊乎人必知之。苟洗心而奉若。在滌覽以宜其。未嘗復行。諒無憂于祇悔。不可則止。豈有患于小疵。彼視履考祥。退思補過。皆已成。而是改。非未朕而能破。所以保中道之誠明。爲至聖之翼佐。

五言古詩

讌集

鬱陶倦煩暑。爽豁逢蕭辰。開樽有歡伯。傾坐得嘉賓。雕盤薦肥羜。寶刀鱠霜鱗。清談屏世務。善諠到天眞。須言燭可繼。莫訴盃行頻。至道諒在己。外物不關身。

雜興

嚴霜沾百草。不問菊與蘭。行觀秀色萎。坐使芳意殘。有酒聊自把。無萱良鮮懽。安得青精飯。爲駐顏如丹。

怨思

陰蟲思衰草。羈雌啼空林。盛秋授寒服。獨夜擣清砧。影孤隨月瘦。肌薄怯霜侵。平生託義分。夢想在容音。山頭憐化石。陌上重辭金。安得兩黃鶴。因之傳此心。

怨詩初調示龐主簿及鄧治中

我生豈不辰。貧賤亦偶然。讀書飯脫粟。差可樂餘年。藝麻室南端。種桑屋東偏。弱婦事紡績。丁男長力田。瓶儲苟不乏。安用三百廩。老翁飽食罷。日晏尙高眠。豈知天地間。陵谷有變遷。獨恨生苦晚。不在羲皇前。嘗聞父老言。醉鄉隔烽煙。安得盈觴酒。時復中聖賢。

碧樓

中條何峨峨。映我縹碧瓦。汾水望飛雲。參旂眺綠野。美哉山與河。河流疾于馬。

讀僧長吉詩

生民類能言。茲文特淵逸。精韞在希微。幽通資寫託。狀物無遁形。舒情有至樂。自非妙解機。誰抽神奧籟。
大士棲綠巖。門前卽台嶽。翠屏何峨峨。千仞拂寥廓。芝朮被諸峯。煙霞興衆壑。中安仁智居。旁研華竺學。
觀法識非空。了心無少著。人境旣相於。神明信超若。作詩三百篇。平淡猶古樂。于言雖未忘。在理已能覺。
天質自然美。亦如和氏璞。貯之古錦囊。訪我杼山郭。杼山空崔嵬。然公久寂寞。中間三百年。寂寞無人作。
何意正始音。緒餘在清角。山旁夏欲休。林英春稍落。吟登蒼卞餘。歸夢華頂數。駕言整巾瓶。仍前侶猿鶴。
誰言雲無心。還依故山泊。王君玉送歸句。有春風吹孤雲之句。願予禽鹿姿。繆此縻人爵。居常眩韶音。幾駭頓金絡。比將
親椒蘭。端欲甘藜藿。緬懷淨名庵。終尋香火約。

池臺

層臺遲夕娟。清池弄秋水。蟾明桂樹間。魚躍蓮葉底。如何惠莊津。乃在蒲城裏。

遠行

古有悲秋篇。遠行第三句。人情重辭家。客意倦長路。征馬陟前岡。栖鳥集喬樹。慘淡層陰生。號呼勁風怒。
匣琴徒自攜。杯酒與誰遇。衣帶緩于前。衣香非復故。

遊颺

晏宇斗澄霽。池臺始登臨。幽芳無艷質。爽籟有真音。閒雲乍明滅。寒忽鶴浮沈。青山晴好望。白道細堪尋。
疎蟬嘒急管。躍鯉應鳴琴。微風獵椒桂。快哉一披襟。

野廬

休舍松石間。外物不可必。一馬究微言。五禽治生術。仁智得所廬。吉祥來此室。

珍禽亭

仁人坐高齋。忘機宅真粹。魚鳥沐餘恩。樹石蒙善氣。珍哉島上禽。託身良得地。

靜齋

鈴閣侍衛稀。幕府文書省。石上試真茶。松間移小鼎。吏師所至清。仁者本便靜。

惜花亭

層陰養花天。亭榭多春色。午氣入衣香。東風吹酒力。睠戀冶城遊。黃金良易得。

寄題齋館

東南有仙人。玉案經近侍。爲愛飛來峯。翻然下平地。白雲相與栖。絳雪居嘗餌。日作冷泉游。時尋徑山醉。徑山有五峯。參差標紫翠。西山玉芝巖。縹緲多雲氣。巖間名勝僧。除館待公至。施樹得樞楠。開軒對松桂。啼鳥傍簷楹。鳴泉落堦砌。蘇徑闊三條。籃輿時一詣。汲井試茶腴。撥琴和松吹。榮啓老來歌。華胥午間睡。追隨支許遊。嘯詠羲皇治。武林賢主人。官儀斗樞貴。同是老成人。俱懷方外志。流水與斷塹。神交復心契。數幅伴山圖。三伏挂廳事。長謠紫芝曲。遠寄青霞意。他年狶赤霄。定挹浮丘袂。

題飲光亭

林風引石溜。席上清且寒。主人白羽扇。觴客水精盤。絃歌泛宮羽。酒面生波瀾。

送客

秋意不自適。況復登河梁。眷言送歸客。徙倚見斜陽。雜珮解席上。斑駁嘶路傍。風雲感素節。絃管思清商。菊殘餘老藥。蕙晚非新香。何以致叩叩。臨行持一觴。

邊思

勁氣初折膠。奔書聞插羽。寒金刁斗鳴。夕火兜鈴舉。霜威畫角雄。月思清笳苦。驟騎出鏖兵。輕車前确虜。一鼓繫名王。三捷獻英主。天山掛雕弓。玉塞休強弩。龍額近封侯。華堂盛歌舞。

彭山贈貫之

彭山隔重湖。落日見孤塔。揚舲入空曠。煙樹散鵝鴨。山中老臞仙。萬頃織芥納。乘風落珠唾。暝色遠相答。平生爾汝分。磁鐵契已狎。萬緣一笑空。箇處無剩法。方舟過谷隱。風雨寒雲雲。黎明帶星歸。尙及齋鼓踏。臨歧戒後會。梅熟新秧插。期我散縑楮。莫忘鷗盟歃。

七言古詩

謝御書飛白扇子歌

聖皇多才復多藝。包犧徒云造書契。坦然制作倅日星。煥有文章賁天地。太宗飛白入于神。玉堂四字標

奇勢寶跗一學造其精。聖祖神孫知善繼。萬幾餘力表全能。三紀體仁成至治。金壺貯墨奉嚴禋。往年大
揭明堂門。素龍鱗角儼欲舉。白鳳翅翼行將翻。八會遼邈不可見。六書細碎何足論。仁慈原廟多珍榜。河
漢黼黻輝朝昏。天公常勅六丁護。在在處處祥煙屯。邈英叨藉侍清切。浴蘭每歲逢佳節。鮫人海底織冰
綃。宮工天上裁紈雪。彌綸寶篋已珍華。泛灑神毫益精絕。紛如薄霧翳靈芝。淡若輕雲拂初日。免令常侍
登御牀。就降王人頒睿札。玉璽封題光姓名。孤臣拜手懽且榮。嗚炎扇喝昭慈眷。夙夜安民彰聖情。九門
纔傳妙墨出。三殿已覺薰風生。標章有愧參鴻碩。視草無能裨聖明。短歌莫盡形容美。微志聊依頌嘆聲。

文恭集卷二

五言律詩

早春

煥沐陽和盛。蒼筤老色濃。大明消積雪。青靄遍諸峯。遠浪浮蘋鯉。驚雷起蟄龍。去年南去鴈。薊北又相逢。

津橋晚望

徙倚津橋上。蒼涼樹幄中。江雲數峯黑。山日半規紅。菖葉深依水。蘭苕迴得風。零壇春服就。歸思羨沂童。

井桐

一水清無底。雙桐碧有情。銀牀翻晝影。玉虎墮秋聲。露葉遊絲斷。風枝宿鳥驚。隔簾人不寐。又送月西傾。

春晚郊野

岸幘坐前楹。天圍極望青。月華開嶺霧。風影碎池星。重露驚棲鶴。幽叢帶暗螢。塵機心久息。寧待據梧暝。

舟次江口

香吹生蘭渚。飛霜下荻州。月波清浸夜。天幕冷垂秋。遠嶼迎潮沒。寒烟護水浮。櫂歌來澤畔。知是採菱舟。

賦江臯

目睇蘭臯上。春波泛早暉。畫船人競渡。繡羽雉交飛。鳥樹殘潮落。汀花宿霧稀。短亭迷酒市。官柳綠依依。

西郊二首

高樓十二曲。倚逼到斜暉。天幕清無翳。溪雲凍不飛。斷岡殘燒盡。遠樹宿禽歸。久憶蓮華社。鐘聲隔翠微。遠籟生寒野。平蕪弄夕陽。天寒空鳥道。水落見魚梁。鳥樹風仍蕩。汀葭日映黃。津樓慵極目。杳杳白雲鄉。

慶雲寺楹

寶坊金布地。嘉木此含榮。吳帝留青蓋。湘神駐翠旌。月移香砌冷。風入夜琴清。若比東陽樹。婆娑意未平。

送臧寺丞赴建昌

新擢京司秩。初旌幕府賢。少年裁美錦。晝日撫鳴絃。山好當衙際。雲閒至榻前。庭中無一事。時間岳僧禪。

送君爲從事東歸

秋半飭歸艎。輕橈入水鄉。吳歌聞子夜。陶菊見重陽。月浦鯢收浪。霜空鳥拂檣。南冠歸未得。潘鬢莫蒼浪。

送孫從事

三十一仙科。同時升大羅。軒翔幾人去。淪譎獨君何。淮桂牽吟數。湘蘭寄恨多。且欣彈頰弁。策路未蹉跎。

送王從事赴漳州

再奉天官集。初登郡將筵。檄材磨盾妙。賓履躡珠賢。舊洞毛生竹。新池水映蓮。幕中多暇日。曳彩戲親前。

禁直晨興呈承旨侍郎

內殿已攢點。禁中漏盡謂之攢點。攬衣朝未央。月低銜禁樹。雲薄護朝霜。欲放魚文鑰。先含雞舌香。大昕鷄與鷺。奏事向明光。

館中候馬

紫陌歸鞍後。端門午鼓餘。銅池銜落景。鐵櫪掩殘書。水遠溝聲細。花閒壁影疎。去騶呼已遠。自笑守應廬。
〔案〕應廬二字未詳所本。宿又有上小謝學士啓云。更直應廬。當是指祕閣直舍而言。

近郊

信馬斗城外。芳郊秋物多。丹楓驚歲晏。華黍喜時和。野老醉相話。牧童閒自歌。牛羊稍覺晚。一一下層坡。

沙鳥

一啄樊籠外。蕭然烟水鄉。折蘆翻夕夢。急雨亂秋行。南澗漁波淺。西風菰米香。世無糜詰手。誰與入清防。

歲除

守歲薰爐永。迎年煦律回。仙人收臘去。木帝送春來。桂伴陰蟾隱。梅衝艷雪開。平明喧壽讌。柏葉奉懽杯。

鸚鵡杯

介族生螭蚌。杯形肖隴禽。曾經良匠手。見愛主人心。置在金樽側。來從珠水潯。陸機薦戴若思曰。明珠大貝。生于江壘之潯。願爲仁者壽。再拜莫辭深。

上苑

漢籞春來早。光風近太清。花深迷玉漏。霧遠失金莖。夾道青松密。周阿碧樹生。回瞻葱鬱氣。遙覆九重城。

山中

乘秋尋遠壑。偶到幽人家。濁醪釀秫米。香飯炊胡麻。微徑捫蘿蔦。高峯弄雲霞。餐和殆忘返。落景半規斜。

東溪早步

宿雨澄紛幕。高霞冠遠岑。青蓮護水色。翠竹結村陰。雪浪魚跳藻。風簧鳥嘯林。艤帆天末起。撩動五湖心。

水館

略約橫雲島。欄干瞰玉淵。雨汀翹睡鷺。風樹咽嘶蟬。綠髮莓苔地。紅衣菡萏天。夜涼三弄笛。月在釣魚船。

送徐晉卿東歸

夜來龍具冷。有客厭長安。去國朝衣緇。還家楚葉丹。雪情欺酒薄。月思拂琴寒。只待東風起。林鶯振美翰。

送旌德田宰

錦邑罷鳴琴。歸塗指上林。柳鞭饒醉折。山館勝遊吟。清譽時苗犢。離悰望帝禽。明庭趨覲日。優績簡宸襟。

招公儀小飲

官舍隱非隱。仕途才不才。棟閒秋燕去。籬靜晚花開。卓甕何妨臥。莊軒或自來。求羊疎我甚。三徑有青苔。

朱鳥航

浮航二十四，一一跨淮中。此地名朱鳥，當年踏彩虹。香塵迷舊路，寒水蕩遙空。日暮驚飛蓋，翩翩下渚鴻。

余山人居

一室閉春林，蕭然物外心。碁聲敲月重，屐齒印苔深。竹閣茶烟細，山園鍛樹陰。會當逃世網，來此締朋簪。

和人山居

翠柏蔭山莊，巖扃四序涼。歌攀牛角遠，嘯引鳳音長。夕膳烹葵熟，春杯切桂香。列侯生計在，千戶橘含霜。

山居

松韻笙竽徑，雲容水墨天。人行春色裏，鶯語落花邊。脩竹三間屋，清泉二頃田。了無官府事，雞犬莫登仙。

經朱氏郊居

東岡接釣磯，有客偃郊扉。繞舍喧流水，當牕識翠微。溪田香稔熟，霜樹晚桃稀。半日揮塵袂，停車不記歸。

送外表王植赴官嶺外

五嶺知何許，離懷豈易言。傳情無去鴈，驚夢有啼猿。溪思吳尊老，別墅在梁溪林香越槿繁。渠渠持美酒，計日望歸軒。

銀臺退朝

官事良爲少，人生初得閒。長吟聊擁鼻，薄酒且醺顏。春物行將晏，年芳尙可攀。此心同木鴈，材與不材間。

桃葉渡

悵望情人曲。空留此渡名。一條衣帶水。千古石頭城。艷歇雙桃色。歌沈兩槩聲。不堪懷古意。山外夕陽明。

春寒

三楚多寒地。憑山復大川。龍鱗橫雪隰。羊角起風天。酒價高平日。花期晚去年。白門無限柳。疎瘦未成眠。

蓬萊詞

瀛閩盛佳招。排雲下赤霄。水犀梳插鬢。火玉佩垂腰。鳧影朝青鳥。鸞音咽紫簫。鼇宮無夜色。豹髓未嘗燒。

寄合肥知己

離管回香轡。行舟動翠篙。夕魂惟是黯。春目旋成蒿。夢與楊花蕩。書憑燕子高。望中人不見。湖上首重搔。

題蘭溪

招提紫翠中。僧住最高峯。幾劫親諸佛。三生聽此鐘。早香依澗樹。高臘寄庭松。性海無窮願。金書字字濃。

師造大悲像。
著發願文。

景福殿緋桃

儉約蓬山客。閒尋芳樹蹊。晨葩鮮欲語。春色醉成迷。豔奪朝霞段。香傳冰麝臍。飄然凡境外。初有乳鶯啼。

暑夕水亭

曲檻瞰回塘。披襟對羽觴。蘋風微有韻。水月自成涼。嫩篠疎疎影。新荷偃偃香。么絃聊按撫。志不在滄浪。

新荷

一夜抽輕蓋。平明映曲池。水涼魚未覺。烟淨鳥先窺。露重心猶卷。風多柄尙危。東林應結社。祇待素華披。

惜花

試步向欄干。奇花正好看。乾坤增著力。風雨莫無端。彩筆題詩易。金刀下剪難。十分方吐半。猶喜夜來寒。

晴虹

霖野收雲雨。長光架一條。媧天初補石。乾鵲早成橋。日馭迷黃道。仙梯接絳霄。誰能乘六氣。萬里信扶搖。

邑宰惠花木

曉圃分花品。煙勑手自攜。未貪桃結實。且映李成蹊。瞥見香蜂集。仍聞好鳥啼。河陽春色晚。流過短牆西。

行次淮上寄何慈秀才

南浦傷離數。西州作惡頻。吟亭蟬送柳。宿枕鳥驚晨。鄴會疎沈李。吳懷豫憶尊。此心何用慰。前有杏園。

秦淮

厭勝踰千載。祖龍安在哉。寒潮平復落。幽鳥去還來。龍鑿功全異。牛山事可哀。不知終古恨。誰見劫成灰。

重陽日東園

沆瀣催時律。幽陰結夕霏。樓臺侵日上。山水送秋歸。海燕辭巢盡。霜鴻避弋飛。一杯元亮酒。聊以浣塵機。

宿白佛寺

下馬憩禪關。春苔一徑斑。歸雲尋谷口。倦鳥泊林間。山客收碁罷。龕僧數息閒。月高人不寐。隔嶺水潺潺。

甘露寺

寶勢窮吳地。寒流對楚邦。一峯擎佛刹。萬象入僧牕。落日銜遙樹。晴虹畫半江。海門秋色近。翠朶自成雙。

自詠

索米年來甚。伶俜祇自知。黑貂隨日敝。葆髮豫秋衰。舊產思重理。先賢恥逆施。呂虔刀未解。骨法謾多奇。閉戶無還往。端居廢禮容。花爲貧富餒。燕是舊過從。持屐對人蠟。綻衣看婦縫。非同叔夜傲。切莫怪疎慵。

華陽逋客

小隱華陽客。山中不記年。酒中長有聖。碁下更無仙。授得廣陵散。注成秋水篇。吾纓今未濯。慚愧舊林泉。

瓦官寺

紫色嘗開國。金輝此界繩。火輪經壞劫。雪頂見殘僧。狂薜綠秋壁。深松映晚燈。哀猿不可聽。一一在巖藤。

題劉奉禮書齋

人尚西齋學。家承北第榮。錦囊添句重。蟾滴試毫輕。底法成新構。開書泣舊楹。丹山消息斷。喜見鳳雛聲。

和吉老學士召赴崇政殿試舉人

需宴經芳已。嚴趨奉禁宸。子亭參覆試。止輦奉周詢。詔釋累幸。泛覽試卷。玉取三燒粹。金求百汰真。自慚諸老意。多賴洛陽人。

清明日謝人送酒

寂寞揚雄宅。鷓夷載酒家。鑽榆試春火。切桂暖晨杯。芳藥何須菊。香梢尙有梅。自慚非叔夜。聊學玉山頽。

金山寺

寶勢中流起。香園此布金。鶴棲金殿冷。龍伏夜潭深。水鳥銜生食。江神聽梵音。上方聊送目。天幕杳森陰。

齊國大長公主輓詞

舊築王姬館。新開貴主阡。山林經駐蹕。烟霧隔飛軒。天屬尊惟孝。邦風穆以賢。鸞龍攜翰藻。昭德萬斯年。

兵部尙書贈司空侍中晏元獻公輓詞三首

俊老三階後。高華四紀中。朝廷用文治。廊廟得才雄。雞樹前陰改。鱣庭舊跡空。生存華屋處。零落恨無窮。

公早被章
聖願遇。

川嶽淪精氣。風華喪傑才。典刑留大雅。文象坼中台。聚窟香難破。鈞天夢不回。只應之帝所。鳴玉侍丹臺。

太尉文肅鄭公輓詞三首

儲極元寮寵。公貂盛策班。寧神依大隗。結冢近陘山。鼓吹春風裏。麒麟夕照間。寄言川上水。何事不西還。

西北謀元帥東南出雋儒。上前曾借筮。闔外復投壺。見器同安國。憂邊得亞夫。如何遡黃壤。不及播洪爐。公業關東望。夷吾天下才。辭鋒橫劍戟。詩筆走風雷。帥節行邊去。氏會獻地來。榮華一朝盡。埋玉使人哀。將鉞徵聯重。公槐賁典加。哀榮班襚袞。虧痛軫投瓜。朝露沾崇旆。秋風咽迴笳。英靈不可問。宰樹有棲鴉。

太尉侍中鄭國宋公輓詞三首

第一平津策。同時入洛名。配台升上相。宰漢得元精。國念靈龜喪。人嗟厚棟傾。容箝傷俊老。殊禮極哀榮。盛業元根古。高文早變風。墮鱣遺館在。浴鳳舊池空。卓馬辭丹陛。公以使相。還節。三公。薨第。騎箕向碧穹。琴等三月罷。鄭國愴賢公。

天上三台坼。人間一鑑亡。寧神韓土內。結冢魏山傍。槐鼎厭儀物。貂蟬秘密章。高賢同委化。茲理味蒼蒼。座主贈司徒侍中宣獻公輓詞五首

天下中庸德。人倫正始風。立朝周鼎重。當代禹門崇。注意深黃閣。收神杏碧崧。蒼生終古恨。尺璧在丘中。三陟贊樞鈞。殲良味上晏。幾傳分相史。終未立家臣。衛武徒虛語。巫咸不可詢。空餘山甫德。流詠在烝民。門盛三鱣講。書追兩馬修。朝評尊月旦。王法正春秋。革履聲長絕。緇衣詠獨留。從今非大醉。不復過西州。鳳德衰何早。蛇年識有開。斂衣班上袞。愍冊賁中台。綠鵠空存飾。騎箕不下來。棟隆今已折。僑壓可勝哀。鹵簿指西州。都人助紼謳。白雞亡謝傅。黃石葬留侯。霧薄旌銘慘。風長騎吹愁。神華何處所。流恨滿山丘。

禮部蔣侍郎輓詞五首

大雅時之老。高陽世有才。英名知四海。公議許三台。華皓辭歸去。蒼黔望起來。一朝嵩構毀。愍冊感餘哀。香案經爲吏。甘泉預侍晨。衣冠親雉尾。章疏動龍鱗。當世高人物。諸公滿搢紳。忽聞捐几杖。萬恨只酸辛。公再領。吳郡。桐鄉見愛深。峴碑偏墮淚。鄭瑟盡停音。蜀士知鄒學。吳兒喜洛吟。留意學校。在吳。精于。穎水重臨久。公再領。吳郡。桐鄉見愛深。峴碑偏墮淚。鄭瑟盡停音。蜀士知鄒學。吳兒喜洛吟。留意學校。在吳。精于。多傳誦。生前祠影在。寒霧碧山岑。

尺璧丘中恨。人間第一流。九原迷白日。萬壑怨清秋。風月高情盡。煙霞麗思休。故時芝館在。迢遞使人愁。茂苑來書跡。藍橋別淚痕。如何一交臂。不覺九招魂。東里嗟遺愛。西州哭舊恩。二孤猶在卯。未免懟乾坤。

翰林南陽葉公輓詞三首

方丈仙山地。承明帝所人。辭源長萬里。筆力重千鈞。草詔風雷暮。賡歌律呂春。如何巖雨望。奄忽棄生民。獻替依明主。周旋奉至公。直尋無枉道。方寸有孤忠。恥在瓶罍罄。嗟深杼軸空。蒼生猶未泰。夫子已先窮。遠策思開濟。孤飛易中傷。中途捨騏驥。少日鍛鸞凰。干鏑仍雙折。皇夔遂兩亡。公與故太尉鄧公。爲莫逆之友。不數月相繼。莫予實被二公獎。瞻。吾生知己矣。魂斷武丘傍。

題飲光亭

居易能藏氣。探幽復治亭。泉華聊自挹。澗響與誰聽。圓檜行依蓋。前峯坐對屏。一瓢吾道在。涼月此忘形。

晨起馬上口占

馬過津橋外。城臨金斗傍。金斗。城之名。肥早霜濃著瓦。落月半銜牆。暗水澄寒底。初霞漏曉光。疎鐘林下寺。煙景正蒼涼。

九月十五夜北樓望太湖

雲影消空闊。霜華拂杳冥。秋光不隱鴈。夜色欲迷螢。爽氣橫蒼下。涼波接洞庭。水仙當此夕。應化白龍形。

登潤州城

城壁起山根。樓梯易黯魂。雄風搖碧浸。畫角弔黃昏。一帶分江紀。雙峯點海門。東方瞻宰樹。秋色暝前村。

懷宣城會勝院二首

淨刹枕城隅。溪光清且虛。僧閒對馴鶴。客至數游魚。巖氣浮川上。林香生雨餘。南雲雖可望。長與沃洲疎。

城外尋僧遠。居常信馬蹄。移時取香飯。半日濯靈溪。白馬迎人下。清猿對客啼。亭前有封殖。試爲問紅梨。

仲春三衢道中

隔閏年芳早。天風泛暖暉。酒香迎社重。村語向蠶稀。林際新鶯出。楹間故燕歸。湖頭春在否。人去柳花飛。

贈少室玉山人

九籀祕仙經。巖巖玉骨靈。內書天上見。仙樂帝前聽。壺小藏仙界。槎高拂斗星。華陽陪夜話。多是說金庭。

送錢比部守盛山

家世稭書在。山河廟券存。烏衣出才子。朱轂滯王孫。過峽朝雲舉。辭梁臘霰翻。遙知巴子國。愛日有餘溫。

聞鶯

雙翎何睨睨。百喙更綿蠻。獨向芳林宿。多衝細雨還。低迷穿柳外。調笑入花間。肯比青鸚鵡。雕籠受閉關。

送顯忠上人歸吳郡

秋風隨處起。振錫不留行。卻背嵩雲去。迎看淮月生。禪通少林默。詩得杼山清。幾夕巖窗下。忘眠聽瀑聲。

文恭集卷二

五言律詩

芳茂山

此地橫青嶂。當年聳紫氛。晉時常有紫氣現。碧花巖下柰。玉葉嶺邊雲。寶勢三神秀。靈風百草薰。將軍精爽在。可解勒移文。晉將軍曹橫葬此。

浮石寺

溪碧照浮航。仁祠紫界牆。牕扉銜遠色。樹石納餘涼。升講林花落。拋生水鳥翔。逢僧談止觀。數刻盡牛香。〔案〕牛香二字。不經見。法苑珠林。有云。牛頭之香。生于海岸。此殆節用之。

送張著作任柘城

出宰分寰邑。修書得祕丘。青雲莫厭晚。翠柏最宜秋。舊學緇林散。前驢醉墨留。弦歌聊自慰。不足論全牛。

別墅園池

小池連曲圃。幽可滌煩襟。露菊凝秋艷。風荷結晚陰。碧蘆巢鳥重。青藻宅魚深。自是翰蹄外。罽塵豈易侵。

送曹生歸臨江別墅

氣入商中勁，人思廣上勞。滄江縈故國，涼月伴歸舸。麗賦憑烏有，清篇託畔牢。〔案〕畔牢二字，不經見名畔牢愁。此殆節用之。竹林溫緒業，天穀佇時髦。

寄善慧大師禪齋

金策巡方罷，齋軒俯斗城。池閒魚聽法，臺靜鳥窺生。社影香蕖白，禪陰碧柰清。昆灰多妙辨。〔案〕昆灰二

小閣

小閣閉春風，疎簾隔幾重。柳絲收未住，酒病太無惊。帶眼偏知瘦，基圖最信慵。隆中一覺睡，日影過高春。

悼往

昨夜西樓月，團圓似去年。鳳屏非復舊，虎枕未成眠。破恨憑湘耐。〔案〕湘耐，原本作相耐。致謝惠連用之。今改正。流哀寄蜀絃，葛華與參宿。〔案〕葛華二字，不經見。攷梁樂府前溪歌。此蓋節用其語。見恐無緣。

江樓

亭亭紫桂樓，渺渺白蘋洲。易斷傷春日，難銷假日憂。雙鳧仙子貴，兩槳美人愁。欲寄青泥訊，雲峯隔舊遊。

初赴楊子任

補吏承人乏。安貧得士常。半綸朝受命。數舍宿春糧。自閩陵抵儀真。數舍而近。楚地元三戶。騶奴亦一囊。空裁宣德頌。何路奏明光。

徐偃王廟

天下慢朝周。君王瑤水流。一朝規問鼎。千里御還驪。故國無歸日。叢祠幾換秋。洗洗耳孫慶。惟烈在仁柔。
邑人率多姓徐。云其苗裔。

清溪泛舟

家在清溪上。乘閒一棹歌。夕涼天有月。秋迴水無波。鷗鳥機心斷。鯪魚香味多。吾纓猶未濯。終是負漁蓑。
一年好景

早鴈

關樹來時紫。江楓到日丹。驚弦初月上。避弋太虛寬。野水涵秋色。霜雲結夜寒。終年南北路。未可笑離鸞。
寄懷尊師案尊師上似有脫文。

華陽道士朱尊師

多年疎法集。長夏憶齋房。桐雨生苔淨。杉風坐石涼。眞茶烹澗溜。滿飯取天香。何日揮冠冕。相期作道場。
閩苑花邊醉。知君是謫仙。姓名金簡上。官職玉臺前。碧海三奇藥。青梯尺五天。祇愁騰踏去。相望隔芝田。

紫薔薇

天上星垣貴。人間花品高。偷模頰象管。學剪費金刀。西母停雲輦。東卿駐節旄。曉軒無限思。香架近蒲桃。
晨入都省聞子奇。內翰宿太常。因寄口號。

相思禁林客。知奉太常齋。月落桐依井。風休絮滿階。歡娛疎勝集。申寫寄長懷。遙望牆東隱。朋簪杳未諧。
又陪公素舍人晨入西閣見紫薔薇初開

疎雨休前檻。新英艷小叢。且欣當夏日。不用憶春風。便可攜歡伯。相從作醉翁。回頭問塔藥。何處覓蔦紅。
題攝芳亭

有客隱東岡。珍亭號攝芳。仙壺分氣象。木帝借風光。淥水穿林遠。朱橋跨岸長。寶隣曾折桂。今是狀元坊。
攝芳主人。乃今副
關徐公之里閭也。

初秋

九夏困煩冤。逢秋似得仙。短牀便月下。長簟怯風前。露氣清羣木。雲稜澹一天。西江無限水。長嘯憶樓船。

七言律詩

大慶殿元會

殿裏爐香散彩雲。殿前旌仗從朝暉。后夔六樂調時律。太皞千春入御樽。神化還隨蒼震始。天顏卻映少

陽溫新年喜氣知多少。鬱鬱葱葱覆九門。

燕洞宮

洞裏青娥赤玉簪。香童迎過百花橋。身輕不待冷風馭。天隔難逢翠羽翹。仙醴四升誰酩酊。使鳥三足自飄飄。座中若話金庭事。記取真人是子喬。

張侍讀箋注太玄經義

陳書覆瓿久無憐。天幸名儒釋舊爻。準易一時遭客難。賞心千載獲神交。高情要在崇孤學。餘力猶能解衆嘲。誰道鳳凰難得髓。續絃今日見靈膠。

賞花釣魚應制

球檻靈芳濯露開。瑤津朱鮪復新來。三竿御水承垂釣。萬藥晨葩奉賜杯。春暖僊裳初霍靡。日斜芝蓋尙徘徊。柏梁聖作星躔麗。累氣蕪音愧仰陪。

咏蟬

柳條高處不須吟。正是螳螂負異心。已斷清腸悲玉露。更流哀響入瑤琴。長洲苑下風聲急。宣曲宮中暮色深。莫道齊姬無伴侶。海邊精衛亦冤禽。

登雄州視遠亭

誰將粉水掃天衢。萬里全開晦景圖。百尺凍雲飛未起。一筇寒鴈遠相呼。由來封略非三代。大抵漁樵似

五湖欲望繁臺何處是。繁臺不見見平蕪。予家在京城東南。繁臺之下。繁音婆。

送錢子文著作宰福陽

三政平反有惠心。民歌遙望邑中黔。桃翻浪影吳艎急。芸掩書香漢閣深。行訪名山須著屐。坐清器俗且橫琴。西州有客偏傷別。無密瑤華寄好音。

題承詔亭

開徑臨江有舊居。野亭于此狎禽魚。八才素擅高陽里。五返曾迂使者車。圯上早傳黃石略。隆中難戀武侯廬。主人今醉葡萄酒。籬下秋風菊自疏。

送清漳護戎王中立

賦別忽忽涕泫然。七閩封堠接蠻煙。山長水遠知何處。花落鶯啼又幾年。願我青衫隨吏牒。惜兄華髮事戎旃。風波世路相逢少。腸斷東歸下瀨船。

送呂昭鄰同年宰巫陽

清蘂君宜妙一臺。當年仙桂竝枝開。樓逢春雪嘗爲曲。廟近朝雲轉費才。遠字莫教雙鯉斷。歸期偏望二鳧來。巴猿蜀魄多離恨。猶喜圭田助酒材。

送李寺丞宰攸溪

短李祠堂世閱餘。少年從學馬融居。樓中質問無疑義。帳後傳藏有默書。茂苑卻尋花氣歇。家山重上桂

陰疏。弦歌莫嘆浮湘遠。纔是青雲舉足初。

寄題黃氏閒宴閣

聳飛迢遞拂秋槎。宴坐塵清道有芽。五葉對僧談妙果。一槍留客試眞茶。簷前暮景沈歸鳥。牕外晨暉泛早霞。衍篋文多休寄傲。月間芳桂正宵窠。

和遼卿館中晚入〔案〕遼鄉。原本誤作遼鄉。攷宿他詩作遼鄉。又韓琦安陽集。亦有和遼卿學士詩。今參校改正。

銅狄嚴扉大帝家。雨回天氣湛春華。牆頭落景半規日。樓外餘暉幾疊霞。風近天淵聞鬪鴨。煙開宮樹見棲鴉。端門漏密長廊靜。時見香英墜砌花。

朝罷

朝罷通中一覺眠。右銀臺路入西垣。日長易覺芝泥熟。風軟頻驚藥樹翻。朱檻帶陰難可倚。紫薇當晝不勝繁。何須更寄陶牕傲。自有餘涼在此軒。

送梅監丞宰山陰

春半朱航拂水輕。季珪佳邑得時英。民淳定見蹊田默。歲稔仍占射的明。太史舊遊書穴邃。右軍殘跡墨池平。何妨公外尋僧社。琴鶴相隨雅有情。

送集賢李學士赴荆臺

蓬島迴風此再來。當年俱重韜寧才。芝隨禁掖新泥熟。桃應仙源舊路開。金契旋聞臨外闔。雲屏仍是接

中台時丞相大學士
兼領書殿之職。專城四十前賢事。期歲行歸妙一臺。

子莊見求近詩以一闕爲介

半綸祗役謝英遊。牒訴裝懷思若抽。銅鉢任敲何所得。鐵盂雖缺豈銷憂。楚囚操樂寧忘本。蜀客攜辭祗傍愁。強挾巴音還首鼠。知君詩戶敵千侯。

送張從事

月毫揮檄愈頭風。屈佐初賓位未充。金玉擅珍須席上。蛟龍爲物起池中。叢雲絢彩人歌舜。綿竹攜辭客薦雄。一乘追鋒看賜對。虎賁千戟照瓊宮。

山居

老矣求田魚稻鄉。兒孫常要在余旁。提籃買菜須靈照。舉案齊眉只孟光。醫國有方三折臂。扣關無路九回腸。紫芝白髮秋風裏。悵望商山綺與黃。

寄子高秦州從事

雪裏詩筒至自秦。仲宣佳句樂從軍。谷鶯漸喜遷高處。塞鴈猶嗟失故羣。北闕舊遊孤似月。西州迴望遠如雲。一枝春色無由寄。手弄梅花卻自薰。

和曼卿館中夜直

右銀臺路逼僊盤。有客通中此宿官。鈞奏暗驚天上近。霞杯難制月邊寒。風來禁樹龍傳點。露下高梧鳳

戢翰更聽建章魚鱗動。水蒼朝珮響珊珊。

遠思

一片平蕪百尺樓。闌干橫絕點清秋。三年字與燕鴻斷。千里心隨桂水流。空對霜葭驚遠別。忍題雲葉寄牢愁。驪駒不見西曠迫。目眩天涯片席收。

和遂卿寒直

子門肅唱徹周廬。甲夜輕寒臘破初。樹底勸飛還類鵲。齋中酣夢欲成魚。三鍾賦粟才無取。五餌干時策已疎。天祿舊來名寂寞。更堪牕雪照殘書。

九日山陽驛作

飄泊年來憩下亭。雀羅秋靜掩苔扃。拂牕紅葉欺閒臥。倚檻黃花笑獨醒。盛憶林泉羞白石。欲持香火訪丹經。華陽小隱平生願。可分區區事挈瓶。

趙宗道歸輦下

淞牒相逢楚水湄。竹林文酒此攀稀。半甃未暖還傷別。一臂初交未解攜。江浦嘔啞風送櫂。河橋勃窣柳垂隄。明年四月秦關到。洗眼揚州看馬蹄。

送天章王待制再領陝州

愛樹重攀隔十春。召南遺俗至今淳。車邊野鹿依明府。鄭洪行春。有鹿夾轂。池上沙鷗識主人。園池之勝。甲于雍部。太

華遠峯捫日馭。洪河高派落天津。壺漿竹馬參歌舞。頓覺城中喜氣新。

咏鶴

獨立青田刷羽儀。朱研丹頂雪裁衣。賦來自合凌清漢。仙去何曾識令威。松蓋露寒應有恨。蓬山雲斷未成歸。舊巢寄在三珠樹。待與還丹作使飛。

舊將

曾上燕然勒漢兵。白頭麟閣見儀形。三朝自是山西將。百戰曾焚老上庭。已奉列侯歸北第。更籌深策破先零。〔案〕先零。見漢書趙充國傳。西羌先零注。鄭氏曰。彎弓擊劍平生事。不許兒孫授一經。

七夕

孔雀南來燕子西。銀河消息已驚遲。石城仙使飛三足。玉殿華燈焰九枝。暫拚星機同一笑。卻披雲幄重相離。杞天長在年梭疾。若比人間是遠期。

宛陵秋晚

誰道江南好物華。江南今日抵天涯。秋風只解吹桐葉。暮雨還來打菊花。寒水答砧偏響亮。迴樓飄角更嘔啞。舉頭試作長安望。惆悵青山遶郭斜。

海上

天幕紛紜海水浮。日車東上惡埃收。金鈎欲下靈鼈怖。鐵網將沈寶樹愁。自昔神仙嘗有藥。從來銀闕不

通舟燕酣餐盡蟠桃熟。會約琴高控鯉遊。

夏日舟行

箭激雲檣五兩輕。波光飛入射桃笙。山眉遠映羣鷗過。霞綺新和落照明。甘醴更無消暑意。文竿徒有羨魚情。飄飄若得乘羊角。直待銀潢上玉清。

送呂解元江陰禮席

玉人仍是紫芝眉。五世嘉占得鳳飛。果滿車中潘令去。馬盤樓下庾郎歸。東牀寄傲便便腹。北路騰裝粲粲衣。九燭夜堂開喜宴。畫鸞交扇接香幃。

送祝熙載赴金華主簿

數路收才漢得人。物塗聊試半通綸。宸廷唱第瑤光近。仙簡刊名玉字新。芳桂行吟關外月。香葩回夢苑中春。平時官下文移少。日涉閒園戲綵頻。

泛舟

瑟瑟涼波冷接空。恍疑雲物畫屏中。一篙海客乘槎水。兩槳仙人取箭風。秋色暗欺荷蓋紫。夕陽偷射桂旗紅。長來此地無窮樂。珍重筇筓與釣筒。

送王龍圖領赴荆南

南部行臺駐萬兵。繡衣歸路有光榮。龍圖往時領漕荆北。別墅復在武昌。鳴鏜虎豹林中避。吹角蛟龍水底驚。湘樹遠從

湖外出。峽雲時向馬前生。主人落筆多風調。應唱新辭徧郢城。

送陳鐸歸吳興

六篇高論吐虹蜺。報罷扁舟擊汰歸。地上麒麟須遠到。天邊鷹隼且卑飛。秋來茗下醪醅熟。寒去江頭鱸縷肥。莫嘆隋和猶未售。玉蟾濡翰待君揮。

寄題雄州宴射亭

北歷三關氣象雄。主人仍是紫髯翁。樽前樂按摩訶曲。塞外威生廣莫風。龍向城頭吟畫角。鴈從天末避瑯弓。休論萬里封侯事。靜勝今爲第一功。

送吳江知縣陳著作

南望湖山畫一屏。松江江水向人清。何如嶼嶼聊爲活。況是瀟湘謾得名。雙槩有時青翰遠。兩衙無事素琴橫。遙知惠政通和氣。乳雉馴鷗自不驚。

贈華陽道士朱尊師

卻餌英芝養道芽。赤霄曾輟絳雲車。眼看碧海成夷路。心記蟠桃結實花。東府靈方修白石。上清香飯給胡麻。兩雙條脫皆金玉。可是南山萼綠華。

仲夏有感

誤逐時英落穀中。拙艱爲吏悄無惊。鷄鶩已享鳴鐘賜。澁統焉知裂地封。西北晚雲長望闕。東南春畝久

拋農忽忽禹鑿當年事。猶待神雷起蟄龍。

上元禁樂

丙子歲

此夜重城鳳腦寒。放遊車馬接通闌。漢祠歌罷天壇冷。鈞奏聲沈帝所閒。紅蠟枉殘春色裏。青樓空占月明閒。仙壺定有尋芳處。公子雕鞍兩兩還。

暮冬離京師

雪中愁買出關符。又著青衫事府趨。燕市有金還貴馬。鄧林無樹可棲烏。鴟夷痛飲傾家釀。如意狂歌缺唾壺。朝野多歡天子聖。目瞻東闕步踟躕。

感舊

萬里青雲未致身。馬蹄空踏幾年塵。曾迷玉洞花光老。卻過金城柳色新。粉壁已沈題鳳字。酒壚猶記姓黃人。塢中橫吹偏多感。一涕闌干白角巾。

落葉

霜華昨夜拂秋林。翮落紛紛不自禁。清吹無時來檻底。紫苔相伴住牆陰。空餘倦鵲求枝宿。更剩殘螭抱樸吟。萬物歸根真趣在。卻緣江月識禪心。

嘲蝶

三春流寓寄花房。雌去雄飛過短牆。雙翅薄勻何晏粉。一身儉帶賈充香。風多苑後飛無數。日煖池邊舞

更狂。卻爲有情人愛惜。六宮皆作繡衣裳。

飛將

會從嫖姚立戰功。朔方猶畏紫髯翁。雕戈夜統千廬會。緹騎秋畋五柞宮。後殿拜恩金印重。北堂開宴玉壺空。從來敵國威名大。麾下多稱黑稍公。

公子

北第當衢戟有衣。巾帷鮮媚僕如犀。萬錢供箸鳴鐘沸。三組垂腰佩玉低。座上賦鸚窮處士。樓前盤馬小征西。去天尺五城南路。此去青雲別有梯。

古別

長道何年祖輟休。風帆不斷岳陽樓。佳人挾瑟漳河曉。壯士悲歌易水秋。九帳清油徒自負。一作貴百壺芳醕豈消憂。至今長樂坡前水。不啻秦人怨隴頭。

函谷關

天開函谷壯關中。萬古驚塵向此空。望氣竟能知老子。棄繻何不識終童。謾持白馬先生論。未抵鳴雞下客功。符命已歸如掌地。一九會誤隗王東。〔案〕隗王。今宋詩紀事刊本。說。曰。請以一丸泥。爲大王東封函谷關。卽胡宿詩句所本。刊作隗生者誤。附識于此。

文恭集卷四

七言律詩

塞上

漢家神箭定天山，煙火相望萬里間。
契利請盟金七酒，將軍歸臥玉門關。
雲沈老上妖氛斷，雪照回中探
騎還。五餌已行王道勝，絕無刁斗至闕顏。

湘夫人祠

翠華獨去蒼梧野，紅袖同沈楚水濱。
休把蘭湯招怨魄，空留竹淚憶明君。
風前有恨啼湘瑟，天外無言擬
峽雲。不比石城雙姊妹，帝家釐降有遺文。

隱客舊居

鶴版飛書到此山，海簪重拾更彈冠。
腕中紉佩荒蘭葉，石上移文蠹蘚癩。
蕙帳煙空胎化老，柏庭風起麝
香寒。至今門外潺湲水，疑是幽人賦考槃。

寄題公儀西溪

山公休愛習家池。自有清光滌一溪。川上好風跳鰈鯉。波中晴日浴鳧鷖。孤舟小嶼閒如畫。釣線輕緝靜可攜。更助吟毫無限思。落霞猶共夕陽低。

送莊賢良權之歸舊隱

過我東還鑑水湄。儻逢親友話襟期。書鉗紙尾丞真負。易在牀頭叔自癡。僕近學破扉數間將整整。踐更三載且遲遲。開書舖家有指僕爲暗闕者。○〔案〕註中暗闕二字未詳。無別本可校。姑仍原本。督郵少屈吾衰矣。三徑歸來未有資。

送向館使赴陝郊

陝服由來二伯居。使君新詔擁犀渠。門連象魏施行馬。地控崑函佩左魚。世德高華河裏舊。土風淳厚召南餘。政成期月須嚴召。行見追鋒走傳車。

送江寧監軍李舍人歸闕

假節彌年去玉墀。星郵傳詔紫芝泥。帳中密印交龍虎。麾下全軍解水犀。仙闕歸心春槩快。石城離思晚雲低。宣平貴里天姻盛。競爽行看對析珪。

城東別墅寄懷天錫

幾日歸心托暮雲。半氈牕下久生塵。水天雨氣霏霏斷。竹閣山花點點新。小苑鶯聲偏破夢。大堤花豔欲迷人。豈無躑躅青絲騎。不敢偷看城裏春。

送魏屯田出守山陽

左臺分契領東麾。入奏清廡幾刻移。三采綬章秦服志。兩轡朱色漢官儀。〔案〕雌堂二字。集中屢見。未詳所出。攷郡國志。太守所居。塗以雌黃。故稱黃堂。此名雌堂。疑卽取雌黃之義。今俱仍原文。綠野春耕駐使旗。盤錯寄才知不久。英輿六尺待飛綬。

和承旨尙書觀春物欣盛之什

紫陌年光天上回。東風吹雪放新梅。燕鴻卻背南雲去。楚鳥還迎社日來。半綠萍醅浮臘腳。殘紅桃豔弄香腮。山公知有登高興。樽下容誰獻壽杯。
書觀春歸雪意殘。三竿初日照天關。魚聲稍煦芳塘面。鵲語頻跳碧樹間。渠落禁中聽御水。閣凭空際數前山。柳黃梅白東郊近。未得攜壺一日閒。

江城春日

暮春江色映芳菲。雨後清和滿客衣。遊騎自穿官柳去。落霞常伴彩橈歸。錦鱗劈浪深深躍。翠羽迎風兩兩飛。因下短亭猶惜別。萬枝香雪在薔薇。

謝惠詩

君詩來。覓我難當。語帶誠齋句妙香。〔案〕誠齋乃楊萬里自號。此首疑南宋人詩。誤入集中。鮫室垂垂新下泣。蠙珠顆顆爛生光。魂飛錦里花爭巧。夢到池塘草又芳。早晚交遊逢大手。急將名姓爲傳揚。
送張著作任蘄水

家世南州擅席珍。君之先正。世踐甲科。斗城傾蓋底相親。誅茅三徑原同開。枕水雙扉重作鄰。翰墨初通文苑職，弦歌聊嗣武城人。楚詞舊學精章句，未得金門薦買臣。

和春卿學士登定力寺北閣兼寄絳倅富彥國監丞

玉山偷暇訪禪扉。洛社諸英昔所依。三鳳同時翔切去。二龍相繼得標歸。天聖中。春卿昆仲三人。同絳倅監丞。相次並登制舉。後數年。春卿復與之首。文勝今為美談。硯池終歲貪殘墨。講樹經秋長舊圍。更待碧紗籠美句。始驚韋布有光輝。

送李留後赴天平

留印高提駕伏熊。鄆城襟要此臨戎。四封土俗弦歌盛。九疊霜天鼓角雄。風月靜歸談笑內。山川遙入撫綏中。居多暇日溪堂勝。不廢投壺與釣筒。

寄浙漕晉卿李工部

名臣分刺十三州。君在東南第一流。郡國成風皆自化。朝廷安枕更無憂。江湖莫作多時計。山水何妨暇日遊。誰與二天相對飲。看看八月弄濤頭。

送兵部陸學士赴漕閩中

宣風一面得甌閩。丹舸乘流破月痕。玉色暫辭當牖坐。衣香初隔止車門。帝臺回望相竿遠。仙嶠重過射的存。君自會稽任。重赴使漕。會頌天禧金石刻。定應寬利賦朝恩。

送杜偉長學士赴漕河北

甘陵孤壘起纖埃。趨詔東南武庫來。天子此時知國器。生民從古寄賢才。神鋒立斷無留刃。籌筆先機有疾雷。行見司徒封露布。鄴城歌舞夾行臺。

送陸兵部赴漕湖南

甘泉司計署名高。出拜行臺帝綽褻。使節遠籠三壤賦。官儀清坐七兵曹。時平漢斧宣威力。歲稔湘帆繕貢勞。秋晚洞庭山水秀。定知懷古費宮毫。

送御史蔣公赴漕江東

簪筆天階柱下官。孤風凜凜振臺端。坐曹常佐甘泉計。奏事曾紆武帳冠。一日雕龍分使節。幾年驄馬避朝鞍。商功未是須賢地。荷橐行歸侍玉鑾。

送石舍人得告展省

先賢富貴重夸鄉。况復哀榮感履霜。三最詔書新予告。九原恩澤遠生光。老人競醉金錢少。稚子爭牽玉佩長。苟令池頭芳樹在。栖雞浴鳳日相望。

送石舍人入西閣見紫薇花盛開

西臺重見紫薇花。天上時時好物華。人向藥階升禁掖。舍人初上路從桃水入仙家。香英半落風前酒。高豔遙烘日際霞。卻憶後齋濃睡覺。芝泥初熟午陰斜。故事壓角

寒蟬

槁葉驚秋樹，幄稀嘶蟬猶尙警。寒枝玉琴可要傳，深恨珠露何妨剩。薦饑已伴風箏流，遠韻更邀霜纈散。餘悲清漳病枕無，惊久月夕煩君住少時。

三衢道中馬上口占

短亭疎柳映鞦韆，馬上人家穀雨前。幾樹槍旗茶蠶廳，一溪鱗甲水潺湲。爲期別後聞餘哢，古詩鳥嚶兮友之期。蠶候歸來見小眠，可惜西湖湖上月，夜來虛過十分圓。

送張待詔知越州

長安廐吏馭花驄，竹使遙分瀾水東。遠勢早推賢相子，太傅三當國柄，公常遠嫌避事。任誠真有古人風。稽山一鎮居封內，四鎮之山，會稽其一。阿閣三休聳禁中。長樂鐘聲偏怨別，何時同謁建章宮。〔案〕永樂大典載，胡宿寄會異云，不及臨滄陪置酒，憶君千里寄書筒，其前六句及小註，並與此同。今弗復存，附識于此。

送陳學士知常州

金斗城高二浙西，使君初拜武都泥。射堂五色開雲的，齊隊千兵衣水犀。仙閣舊香芸辟蠹，使軒新蔭李成蹊。下車定有中和曲，索米州民日倚輓。

覽朱表臣卷

烏巷名生卓不羣，階庭相伴玉枝薰。天邊禁樹開龍鳳，筆下清才墜鳥雲。三級火雷何日化，一堂金竹此時聞。牛心割炙探來嚼，爭得英瑤去報君。

覽孫祐甫卷

君家先正隱瓌材。巖石清聲動漢臺。地底何年埋玉樹。蚌中今幸產珠胎。氈書未挂千名榜。豆詠爭傳八斗才。荆壁夜來煩抵鵲。寶編三復翳瞳開。

南至之日。盞下書事呈正卿于高二同年

歲暮繁雲結夕陰。長安客舍費黃金。燭牕明暗翻歸夢。雪屋清寒著旅衾。寶騎傳呼三陌廣。銅龍飄點九門深。萬年壽酒無因上。陽蓋空傾向日心。

芙蓉湖泛舟

小湖香豔戰芙蓉。碧葉田田擁釣蓬。嵐氣欲飛山隔岸。秋光不定水搖空。翩翩雪鳥爭投浦。撥刺霜鱗鬪擲風。正是滄浪濯纓日。一竿多謝紫溪翁。

過李白墳

平昔馳名蜀道難。旅魂流落古苔斑。土中寶樹埋何在。澤畔靈魂些不還。醉後煙霞仍物外。吟餘風月尙人間。一哀弔罷頽陽暮。江北江南盡是山。

送致政祕丞

二紀青衫拂洛塵。桂香消盡故時春。徑爲天上乘槎客。厭作河濱託乘人。老筆工詩殊覺麗。清談傾座幾相親。臨滄送別多瑰藻。上榻太尉中憲左丞而下。敘同榜之舊。皆有詩寵行。三徑歸資莫歎貧。

送致政吳賓客

挂冕高辭九列榮。年如園綺尙康寧。水蒼乍解趨朝佩。雲母初開隔暑屏。商嶺紫芝歌幾曲。武夷毛竹夢頻驚。門前已見施行馬。更待沙堤接鯉庭。

寄致政蔣侍郎

八十礚谿用釣翁。丈人冰雪在顏容。乞身未及調綠鶴。濟世何當起臥龍。先覺令名伴大蔡。後彫遐福集寒松。憐才好客還依舊。終日清談綠酒釀。

和承旨給事寄酬南京致政杜相公

賢相辭榮髮未斑。濟川舟楫一朝閒。蒼生猶望安車起。使者空持拱璧還。去秋明堂大饗。優詔陪祀。辭疾不至。郢曲傳來都釐下。蕭規留在廟堂間。壯猷全德知難尙。後世高名重太山。

涼思

昨夜南星破暑威。月波浮動杵天垂。露華冷向三危滴。秋色新從一葉知。越水舊歌迷桂楫。楚江秋思遶蘭旗。桃笙碧滑人無寐。欲借鮫盤寄所思。

涼州

一從天寶陷涼州。路絕陽關數百秋。誰念弓裘侵紫塞。空餘歌舞在紅樓。將兵古有龍韜略。仗節今無燕頷侯。五鼎元戎方肉食。腐儒何者預軍謀。

送姚祕校歸嘗

茗溪曾是忝朱輪。鳴鹿當年預送賓。楚國頻嗟三獻璞。漢廷裁得半通綸。勞歌未免吟梁甫。作賦還應問大鈞。下澤乘車知道在。折腰那久滯風塵。

寄蕪湖吳殿丞

大花灘外憶琴堂。西北山長水更長。縮地何曾人有術。摩天不及鳥能翔。寒梅弄臉英英態。臘甕蒸醅滿滿香。悵望未休還悵望。夜來庭下月如霜。

寄臨淮蔣使君

漢臺分刺輟名臣。隼旆還臨磬水濱。殿石乍辭龍尾遠。印盤初結獸頭新。貫花佛會連香刹。種杏仙陰接寶鄰。荆府依劉心未獲。卻憐馴鹿伴行春。

和吳春卿早春卽事

臘過春雲尙帶陰。故山迢遞憶青岑。芸齋舊帙書籤冷。桂甕新香酒蟻深。複道風煙殊可眺。曲江花柳試偷尋。芳樽一笑真難得。永埒何曾有剩金。〔案〕永埒二字。原本作永埒。埒字義不可解。攷顏延之《白馬賦》。有角壯永埒句。此詩當本之。今改正。

寄龍圖李諫議

虎符兼綰鐵林兵。安輯南方十二城。昏曉星文通翼軫。陰晴雲氣接巫衡。江飄畫角蛟龍思。風獵干旗鳥隼鳴。誰伴使君紅燭宴。漆堂深夜促銀筵。

送林學士赴明州

綠綈騰檢出神州。又保東吳最上游。腰下金符分半虎。手中庖刃欠全牛。金尊酌月吳歛席。錦纜牽風越鄂舟。正是金華隆舊業。羣仙相望在瀛洲。

送施屯田守姑熟

臺城南畔擁油韜。四十名郎此夢刀。文陛入辭交戟密。太微回望積星高。醉羅定費齋中酎。吟管應催石上毫。莫戀江東佳麗地。歸來開院接金鰲。

寄江淮太守表臣職方

畫省高才滯兩轡。秋來依舊對淮山。一函星斗龍淵在。萬里風雲驥足閒。賦詠且裁紅燭下。卷懷聊寄綠樽間。次公治行聞當牖。二節如今卽召還。

送宗兄郎中守三衢

新舊盤囊兩獸頭。東南鄉郡得龍丘。朱丹侯轂聊行縣。紫翠家山更滿樓。高第郎官猶應宿。中材裨將輒封侯。浩然能養浮雲志。風月樽前且獻酬。

送譚寺丞守鬱平

金契爲州復侍親。卻從湖際訪仙村。花垂晚席傾家釀。柳拂春車過里門。關內已誇新組去。浦中仍見舊珠存。名園日涉庭無訟。絲管時時薦壽樽。

集賢石學士出守符離

日邊新擁兩朱轡，亦以斜飛試羽翰。巴郡詞人才藻壯，漢家循吏教條寬。明光奏事衣香在，麗正修書硯
滴殘。歲晚政成丹詔下，歸來天上作仙官。其後未期歲還臺尋登西掖

殘花

雨壓殘紅一夜凋，曉來簾外正飄颻。數枝翠葉空相對，萬片香魂不可招。長樂夢回春寂寂，武陵人去水
迢迢。忍將玉笛傳遺恨，苦被芳風透綺寮。

和承旨宋尚書告中之作

鵲聲頻繞大槐枝，鼉禁懽聞舊老歸。哆舌人間無翕贊，奎鈞天上有晶暉。西山五色分靈藥，南極三光接
太微。只待延英朝隻日，便應調鼎向黃扉。

橘

龍陽洲上密于星，紅實纍纍照日明。露濯曉枝金色重，霜封秋蒂粉衣輕。楚江未分萍如蜜，漢殿何曾蔗
析醒。誰道相如能作賦，詔園先熟是虛名。

送次道學士倅洛中

留籥初均相府勞，辟書先下得虔刀。黃圖氣象占龍闕，丹穴精神識鳳毛。集山景祐中侍宣獻公在洛一代策書承世
學。國朝大典出宣獻公手三川風月屬詩豪。山公更有通家舊，應許論文醉醪醪。

送周屯田倅南徐

瀾河分鎮壓東西。鐵甕由來重會稽。地勢頓驚江海近。天文全覺斗牛低。鳴秋鼓角翻朱鷺。映日樓臺拂彩霓。綠髮名郎才韻秀。政成看捧紫芝泥。

送子思學士倅河內

左符通掌日邊城。幾蔭華棖奉刺經。直舍十年苔已紫。吟鞭一路柳初青。禁中夜閣拋行月。郊外春車駕屏星。河裏舊遊從古盛。好尋煙幌弔遺靈。

送薛監丞倅絳臺

故絳山川宰樹存。屏星分守出宸恩。官榮此去夸鄉組。家法從來式里門。別罍正憐黃菊綻。征鞍猶怯黑貂溫。守居舊號園池美。應伴山翁把翠樽。

贈梅聖俞試館職得賜進士出身

賦就甘泉客薦雄。獨攀仙桂向秋風。抽毫同列三英座。換骨纔爭第一功。瞥看靈鼈居水下。恍聞伏犬吠雲中。嫦娥應有憐才意。惟許詩人到月宮。出雪齋廣錄

卜居

自致青雲有壯圖。且尋詹尹卜幽居。一杯誰置元王醴。三尺休彈上客魚。足下已穿東郭履。胸中猶鬱茂陵書。漢皇夜御金鑾殿。豈便無人薦子虛。

淮南王

貪鑄金錢盜寫符。何曾七國戒前車。長生不待爐中藥。鴻寶誰收篋裏書。碧井牀空天影在。小山人去桂叢疎。雲中雞犬無消息。秀麥漸漸徧故墟。

送劉觀察赴襄陽

甲隊霜秋瑩武彊。萬兵都府去臨戎。習池峴首風流遠。漢水方城氣象雄。宴榭鳴鼙飄畫鼓。射堂棲鵲試雕弓。平時公子推能政。愛日遙知徧境中。

寄題徐都官吳下園亭

吳下新居樹石中。綠巖香葉一重重。潺湲枕上聞流水。縹緲簷間見好峯。山客對碁閒覓劫。野僧留話幾侵鐘。由來止足前賢事。他日何慚邴曼容。

長卿

買賦金錢出後宮。長卿文采冠諸公。梁園未至時名大。蜀道前驅使節雄。已託焦桐傳密意。更因殘札寄遺忠。如何一諷神仙事。卻得飄雲起賦中。

洞靈觀納涼

秋波不動篔簹融。松月悄悄透綺櫺。霜重井梧翻瘦碧。雨回塔藥墮嫣紅。彩鴛靜占銀塘水。乳燕涼飛玉宇風。秫酒易銷殘夢斷。卻疑身在廣寒宮。

天街曉望

長樂纔聞一叩鐘。百官初謁未央宮。金波穆穆沙隄月。玉樹瑤瑤上苑風。香重椒蘭橫結霧。氣寒龍虎遠浮空。嗟余索米無人問。行避霜臺御史廳。

寄昭潭王中立

高弦一弄武陵深。六幕天空萬里心。吳苑歌驪成久別。楚峯回雁好歸音。十千美酒花期隔。三百枯棋弈思沈。莫上孤城頻送目。浮雲西北是家林。

次韻徐爽見寄

五雨青絲帝渥深。平時可敢嘆英沈。侏儒自是長三尺。澣統都來直數金。寂寞死灰人喪偶。婆娑生意樹交陰。年來想見瓊枝色。久夢蘧蘧到竹林。

雪

屏翳驅雲結夜陰。素花飄墜惡氛沈。色欺曹國麻衣淺。寒入荆王翠被深。天上明河銀作水。海中仙樹玉爲林。日高獨擁鸚裘臥。誰乞長安取酒金。

城南

昨夜輕陰結夕霏。城南十里有香泥。初聞山鳥驚新哢。遙見林花識舊蹊。蕩槩遠從芳草渡。墊巾還傍綠楊隄。羅敷正苦桑蠶事。惆悵南來五馬蹄。

早夏

井轄投多思不禁，密垂珠箔晝沈沈。
睡驚燕語頻移枕，病起蛛絲半在琴。
雨徑亂花埋宿黠，月軒脩竹轉涼陰。
一春酒費知多少，探盡囊中換賦金。

宿秀峯寺

夕鐘初斷海鯨音，投宿香園半翠岑。
冰簟浸牀消客夢，水簾澄月伴僧吟。
雄風拂衽清涼極，珍樹交柯翠翳深。
一夜潢陰機事息，草堂虛論破煩襟。

太湖石

海岱鉛松妄得名，洞庭山腳失寒瓊。
漱成一朵孤雲勢，費盡千年白浪聲。
誰向機邊逢織女，直疑巖下見初平。
年來賞物多成病，日透蒼苔幾徧行。

過桐廬

兩岸山花中有溪，山花紅白徧高低。
靈源忽若乘槎到，仙洞還同採藥迷。
二月辛夷猶未落，五更鴉白最先啼。
茶煙漁火遙堪畫，一片人家在水西。

憶薦福寺牡丹

十日春風隔翠岑，祇應繁朵自成陰。
樽前可要人頽玉，樹底遙知地側金。
花界三千春渺渺，銅槃十二夜沈沈。
雕盤分筭何由得，空作西州擁鼻吟。

次韻和朱況雨中之什

蒼野迷雲黯不歸。遠風吹雨入巖扉。石牀潤極琴絲緩。水閣寒多酒力微。夕夢將成還滴滴。春心欲斷正
更一作霏。霏。憂花惜月長如此。爭得東陽病骨肥。

沖虛觀

五粒青松護翠苔。石門岑寂斷纖埃。水浮花片知仙路。風遞鸞聲認嘯臺。桐井曉寒千乳斂。茗園春嫩一
旗開。馳煙未勒山亭字。可是英靈許再來。

淮南發運趙邢州被詔歸闕

天臺封詔紫泥馨。馬首前瞻北斗城。人在函關先望氣。帝于京兆最知名。一區東第趨晨近。數刻西廂接
畫榮。正是兩宮裁化日。百金雙璧拜虞卿。

文恭集卷五

七言律詩

雪後登祕閣

消盡層陰上盡梯。雪餘官瓦弄晴暉。碧簷交照虬爭聳。朱闕相聯鳳欲飛。日向金溝春溜動。風來珠樹曉寒微。帝家池籞饒芳物。白鳥翩翩接翼歸。

謝叔子楊丈惠詩

老子詩名久廢閒。喜君步驟少陵壇。句敲金玉聲名遠。韻險車斜心膽寒。傾出囊中和月露。皎如盤底走珠丸。苦藏難沒詩家事。會看塵冠早一彈。

又和前人

作者傍邊好見聞。速來就汝作比隣。詩中活法多無子。眼裏知音有幾人。爾許精奇花燦筆。豈容塵俗海翻銀。老夫幸有千機錦。尙欠江頭一浣新。

侯家

洞戶春遲漏箭長。短轅初返洛城傍。彩雲按曲青岑醴。沈水薰衣白璧堂。前檻蘭苕依玉樹。後園桐葉護銀牀。宴殘紅燭長庚爛。還促朝珂謁未央。

秋風

瑟瑟新聲脫綠槐。半寒天氣日相催。西樓夜色吟偏好。南國朝雲夢未回。翠影暗牽蘋葉動。清香遙獵桂枝來。重陽漸近松醪熟。白菊如何爲放開。

送馬少卿赴襄陽

冰操從來畏四知。漢江南畔擁藩麾。地經謝守開油幕。人憶山公倒接羅。風入射堂飄鼓吹。雨隨行縣濕旌旗。前朝叔子流遺愛。拂藓應看峴首碑。

送寶應李尉

曾飛麗藻清堯問。猶屈長才尉楚城。官是神仙標秀領。縣因靈寶紀嘉名。西崑已挾凌雲譽。外戶全消擊柝聲。早晚聲名來謁帝。會看雙壁賜虞卿。

竹

修篁百个靜無埃。億共山僧競日栽。天矯翠虬身欲化。婆娑青鳳尾全開。風含爽籟依朱檻。月鏤青陰覆翠苔。曾爲檀欒衝雪看。玉枝相亞曉皚皚。

送周學士歸永嘉

三最初承予告恩。致校有校正之最。一雙青翰出都門。關繙舊乘人多識。橋柱前題墨未昏。南國歸雲聊送目。河梁新月暫消魂。玉山丹府重來日。好拾風謠奏帝閣。

送新學士赴闕

臺召西來二節榮。清江浮舸鴨頭平。十行受詔龍綸重。五兩占風鳥羽輕。目送華林春雨色。夢隨長樂曉鐘聲。佇看隻日延英對。九墨宮毫屬長卿。

送張學士赴邵武兼過吳中別墅

青藜香地掩殘書。越絕東南駕隼旗。紫陌花期經祓禊。清淮潮信待蟾蜍。鳥聲百疇春芳際。蠶候三眠夏葉初。吳地吟朋如見問。爲言江令憶鯢魚。

寄張唐公學士

朱航東下忽經春。藏室離居作惡頻。簡上蠹蟬終日在。唐公受詔同修南北史。未訖。有請磨之行。樹間靈鶴至今馴。唐公前。有鶴棲止庭樹。久益馴狎。北宮自有咿嚶客。天祿誰同寂寞人。昨夜西牕有佳月。此心迢遞思冰輪。

千葉瑞荷花

絳蘂層層吐翠羅。水妃冠重曉峩峩。應嫌菖本開花少。卻鬪榴房著子多。含露自知芳意在。偃風無奈落英何。更憐玉骨藏深怨。暗結千絲在綠波。

題漣漪亭

檻底凝漪碧漫天。角巾東路主人賢。汀花照席供春醉。沙鳥窺簾伴晝眠。何必馭風追汗漫。不妨乘月弄潺湲。流杯若做山陰事。兼有蛙聲當管絃。

津亭

津亭歌闋戒棠舟。五雨風輕不少留。西北浮雲來魏闕。東南初日背秦樓。層城渺渺人傷別。芳草萋萋客倦遊。平樂舊歡收未得。更憑飛夢到瀛洲。

有懷松江

多年襜被玉山岑。鬢雪欺人忽滿簪。鴛馬雖然貪短豆。野麋終是憶長林。鱸魚未得乘歸興。鷗鳥惟應信此心。見說新橋好風景。會須乘月濯煩襟。

寄題齊氏山齋

有客稽山岸角巾。寶書盈笈日怡神。雲銜別嶺搢笻久。月上前峯隱几頻。牕上蘿陰猿警旦。塢中茶候鳥啼春。一經鄒彥能傳世。子舍于今兩綬新。

送崔諫議都運河東

行臺西北接參墟。仗節重乘駟馬車。水是晉君沈璧後。地經唐叔賜圭餘。蕃會重足虔條教。部吏承風畏簡書。武帳歲終還奏事。康侯三接聽新除。

送益州運使田學士

劍棧秋旗拂過鴻。行臺西去撫蠶叢。民間幼艾餐和氣。徼外西豪偃德風。巴漢靜歸籌筆內。岷峨閒入畫圖中。時平幕府無留事。樂職何妨頌聖功。

寄題蘭皋亭

亭下春芳接楚波。金堤勃窣路相過。牕中霽景煙姿遠。簾外晨香露氣多。紅頰倚牆花竝蒂。綠陰翻檻樹交柯。朝陽定有浮杯樂。醉墨何妨記永和。

採蓮女

碧蓋細葩映素秋。此中蘭楫好銷憂。相將共挈青絲籠。一笑同迴翠羽舟。日暮鳴榔隨下瀨。夜深歸櫂怯中流。東方自有羅敷婿。不願江邊越鄂州。

送柳先輩從事桐廬

甘櫻離會酒初醒。還赴東侯拱壁迎。江上桃歌傳樂錄。坐中鸚鵡占賓榮。仙車過洛人偏識。繡騎還邛客盡傾。後夜嚴州臺上望。紫雲西北是神京。

寄杭州子文屯田兼簡真公上人

目斷江南佳麗城。欄干樓角幾長凭。越人抱膝吟偏苦。吳客觀濤病未能。此地旂檀多勝剎。一時龍象有高僧。知君暇日尋猿鳥。閒上靈峯第幾層。

寄題王舍人書齋

此第當循拂斗魁。竹林清暑似巖隈。將壇緒業傳金版。文苑新書集玉杯。數篋龍拏藏寶刻。一泓蟾滴試烟煤。好辭戴鵝飛千牘。東武原從禁衛來。

霜野

啄兔青散直下飛。霜雲慘慘楚楓披。秋林月迴開樵斧。晚市風沈見酒旗。江上敗荷無限柄。雨中殘菊不盈枝。物華怨盡仍傷別。塢笛聲中一涕垂。

送陳諫東歸

顏詩摘錦有高文。席上經年未聘珍。鵠板乍停公府詔。貂裘還敝洛城塵。雪園授簡誰爲賦。煙渚歸艎不待春。何日子虛聞夜誦。尙方給札對嚴宸。

送華濤東歸

江上丹楓墮夜霜。式微愁思豈禁傷。壯圖萬里青雲在。舊徑三條碧草長。匹馬歸來江練白。惡氛收盡楚天涼。大明繼照光華旦。提筆相期翰墨場。

五言排律

郊祀慶成

齋輅虔郊報。祠宮就國陽。繁雲猶待族。霽日忽迎長。圭璧紛佳氣。粲盛馥異香。人情欣眷祐。天意益端莊。

被袞侵寒霧。升壇躡早霜。左方虛小次。午陛卻中黃。六樂乾祇格。三登海宇康。千官森劍珮。萬里走梯航。神筭膺符命。天壺飲福祥。從今瓜瓞慶。鼎業熾彌昌。

關前紫薇花

高髻美人髻。妝閣一何鮮。迷路來春後。開花近日邊。居當澆御水。動欲絢非烟。分潤從仙掌。流薰自帝絃。雅常翻藥地。繁極曝衣天。花至七夕猶盛。色映芝泥熟。香交蕙炷燃。吟殘秋蘂脫。睡起午陰圓。應笑憑欄者。相看已幾年。

陳生遊金山兼簡世昌師

寶勢嵐光秀。濃春物景鮮。飛峯凌巨浸。精構起中天。鳥畏雲濤險。僧安石室禪。貫花應作偈。望月定陳篇。不爲青霄桂。同裁白社蓮。羨君飄鶴舫。獨自號神仙。

狀元張監丞倅陝郊兼之閩中省親

藻袞御中楹。詳延得世英。賓鄉具三物。題塔冠千名。玉擅崑山價。篋兼仲氏聲。平淵二龍躍。碣石一鴻輕。慈宴堯廚洽。宸章禹律鳴。入辭瞻翠葆。去候過朱櫻。贊治嶠陵險。歸寧蜀棧橫。都門百壺送。宿館五漿迎。帝所銜標雋。親前戲綵榮。勒銘知有作。叱馭肯辭行。桂色宵煇秀。棠陰蔽芾清。期年隨詔入。脩路接瑤京。

歲晚禁直呈承旨侍郎同院五學士

廣內施重闔。承明敞直廬。上清通帝所。方丈擬僊居。漢帝前釐席。淮王重報書。時宗登賈馬。暮召得嚴徐。

公諸玉至光秦璽秦璽和氏。珠來照魏車。高文參正始。密旨奉權輿。王澤宣從綽。天香對滿裾。論思皆藥石。欬唾亦瓊瑤。弱水滄波在。然山老墨餘。容篇朱鴈刻。三朝御什。宸翰白龍攄。太宗飛白書。寶肆還容礫。珍林誤植樗。匪躬無審審。每食有渠渠。寒日分宵直。繁雲向歲除。九門催鑰下。三殿警籤初。北斗低層掖。明河拂太虛。求衣欽德盛。襪被省才疎。多病長思越。知非晚學遽。煙霄叨步武。江海隔樵漁。榆性誠為鈍。葵心但欲舒。日祈同舍進。躋俗到華胥。

次韻曼卿冬直因以勉贈

八舍嚴周衛。千門肅漢閨。金胥催遞宿。玉羽伴歸棲。禁樹驚寒斂。僊雲拂夜低。星河紫牆外。霜月碧城西。汲字紛難整。鈞音悅易迷。有人歌白雪。此曲妙清溪。文獻初登亮。君王益徇齊。因知函鼎器。那復久烹雞。

后土觀瓊花

楚地五千里。揚州獨一株。香名從此貴。芳格灑然殊。國艷何勞粉。天姿不掩瑜。濃薰霏麝氣。細藥列蜂鬚。雲朵垂三素。仙衣著六銖。吳中休插柰。天上枉栽榆。神物疑長擁。靈根此未枯。人間如定價。百琲睡龍珠。

石曼卿學士輓詞

才出羣英表。文推一代雄。靈蛇操掌上。雲夢納胸中。醉墨千峯立。吟毫八極空。居官疎皎覈。處世倦磨礱。綠酒常埋照。清琴自寄通。昌言曾拂治。密疏早談戎。曼卿天聖中建言。武備宜置土兵。始行其策。天子知亭伯。時人重孟公。何言執戟滯。便到闔棺窮。鴛鳥巢門止。驂騑揭櫪終。芝筋留御帳。神道碑。石本奏御之日。

開。有司以曼卿不起。簫賦落王宮。〔案〕簫賦原本作簫武。義不可解。攷漢書王褒傳。則洞簫賦非也。上深嗟惜之。此詩蓋兼引二。元帝爲太子時。令後宮皆誦之。文選載共文。則洞簫賦非也。原本作武者誤。今改正。薄葬依莊叟。殘書付所忠。惟餘身後得。凜凜是英風。

射熊館

別館拋雙闕。飛除鎖一方。黃山縈蹕道。青檜遶宮牆。緹騎千羣合。周陔四面張。管絃繁欲沸。旌旆鬱相望。走馬長楸密。更衣別寢涼。星飄肅慎矢。雪擁羽林槍。懽樂何曾極。盤遊不可狂。吾聞堯舜治。垂拱在巖廊。

將家子

北地良家子。山西舊將兒。新從羽林射。得赴鴈門期。橫死人無比。微行世不知。長安偏重俠。趙國素多奇。照地連錢錦。迷春鑿落卮。喝盧燕市客。顧笑楚臺姬。烟樹黃山路。霜雲白草時。雕弓孤月滿。騁馬一塵隨。應手雙雕落。回頭赤日移。卻歸東第去。高宴九燈枝。

詔福聖宮燒香

微道西華內。觚稜北斗傍。神靈安肯構。思澤賜燔香。渤澥通驪窟。崑崙拱畫梁。清壇浮早景。碧瓦霽初霜。甲帳嚴如在。丹簷迴欲翔。隆姿瞻漢后。餘烈畏軒皇。埋劍橋山遠。游冠閣道長。白雲迷處所。仙掌鎖相望。五岳扶封域。三辰緯典章。升歌留寶鼎。刻號在神房。盛德尊原廟。遺仁睦鬼方。聖文名善繼。百世溢流光。

歲除

暝色凝無際。寒雞悄未晨。莫枝將換朔。斗柄漸歸寅。水火猶分漏。龍蛇尙蟄身。四時寧有暇。萬物又勞春。

樹喜丹葩秀，人愛白髮新。明朝趨寶殿，誰是奪重茵。

送楊中允宰常熟

丹舸傍江潯，嘔啞遠鷁音。新科持片玉，能政引孤琴。美進宮坊秩，榮歸里閭心。名參天下雋，歌著邑中黔。地志連香徑，家園帶武林。吳山幾屏秀，楚水一篙深。晚鼓停餘疊，秋帆臥半陰。平時接方驥，後夜望橫參。陶菊何妨醉，江毫且剩吟。悠悠河上別，千里鬱朋簪。

郡齋招子美

月色初藏桂，年芳漸有梅。人情欣臘破，天意許春回。陰雪迎風解，寒澌向日開。午杯宜試著，卯甕好嘗醅。寓興題紅葉，乘閒步紫苔。長吟溪上曲，偏憶洛中才。絕墨凌崖石，高文拂斗魁。詩鋒無敢犯，酒戶少能陪。綠髮裁方鬢，丹心未肯灰。琴書聊偃仰，魚鳥暫徘徊。蔚豹雖藏霧，蟠螭已得雷。只愁騰踏去，相望隔蓬萊。

送晉陵王宰銓調

盤錯才無滯，弦歌政有聲。及瓜青紙詔，謁帝紫微城。節竝霜松峻，心同冰玉清。十槩行色貴，三府辟書榮。驛樹紛紅葉，江蘋老紫莖。祇應中宿路，雙節急歸程。

送祁陽黃宰

邑控三湘遠，帆經百舍遲。天文瞻翼軫，江色泛漣漪。丹闕傾心戀，蒼山舉目疑。歡杯憑稅米，騷思託蘭旗。竹律寬無害，琴堂靜不欺。期年行奉詔，虎帳對堯眉。

上客

上客何爲者。平生富義名。飛鈴師鬼谷。談笑敵神兵。然諾千金重。交游萬戶輕。平臺置酒召。碣館側身迎。士缶邀秦擊。銅盤劫楚盟。縱橫三寸舌。厭飫五侯鯖。龍種騰長坂。霜雕刮太清。誰能彈劍缺。北海有長鯨。
北海一作夷路

送黃推官

秀極武夷峰。清才氣所融。香名傳日下。勝範迪時中。大對承三道。清篇滯半通。新吟池草綠。故事幕蓮紅。參畫文無害。沈英位未充。談高起廢疾。檄壯愈頭風。圭璧嚴書殿。房心敵帝宮。行頒上方筆。客特薦揚雄。

早秋

金商纔換暑。雲葉早驚秋。大火宵中散。清光日下浮。涼心遺翠簟。遠夢繞滄洲。蕙圃殘香薄。筠溪碧蔭稠。小牕聊寄傲。虛閣鎮端憂。帶眼渾移盡。還同沈隱侯。






33
14
:1884

文
恭
集
二





叢書集成

初編

主編者
王雲五

商務印書館發行



文 恭 集
(二)



3 0649 7808 7

胡 宿 撰



文恭集卷六

五言排律

明堂大禮

路寢尊嚴配明廷。攷舊圖。房心通氣象。太紫狀規模。翊衛多儀縛。齋祠至信孚。籩羞甘菲薄。鼎味卻鮮腍。日月垂天象。鸞龍奮寶跗。樂均諧睿律。禮蒞潤宸謨。劍珮千官拱。梯航四海趨。謙恭虛小次。登降謹黃衢。德盛三靈格。恩流萬物蘇。甘泉陪法從。千載喜歌虞。

禮畢慶成

路寢凝中宇。星文直大辰。總章裁往範。齋駕奉明禋。惟聖能嚴父。於皇重饗親。永懷深肅儉。昭事極精純。鍾律咸韶古。衣冠黼黻新。九金徠貢職。萬玉儼朝倫。夷夏觀殊禮。乾祇享至仁。參祠七世廟。再降六天神。萬寶成秋野。千祥擁禁宸。睿恩覃四海。壽域躋斯民。

召赴天章寶文閣觀御集賜御書飛白扇子美玉殿錫宴

阿閣藏仙籍。英輿侍睟儀。珍函開二典。聖藻煥重離。河洛斯文在。盤盂乃訓垂。寶跗親許視。瑞物徧容窺。



白鳳隨毫舉。蒼龍應墨奇。好文逢漢后。觀象值庖犧。溢幅榮分賜。班觴曲示慈。柏梁晨煦洽。仙莢晝陰移。和樂韶音美。承平鎬酒遲。再陪瑤水宴。千載慶茲時。

館中錫宴

紫殿程書廣。鴻都校籍成。宸心睠儒學。慈宴詔樞衡。供帳來金闕。臚傳下玉京。三山開祕宿。七閣敞修楹。革履趨朝暇。華貂映席明。弁繁星錯落。佩雜玉鏘鳴。爐靜飄芳蕙。圖開識禁橙。近有恩旨。降瑞橙一本。付之秘閣。壺均天所酒。鼎薦帝餘羹。夏屋彰仁洽。循樽樂治平。丹樓晨唱近。碧樹曉寒輕。宇內年書有人間。月就盈。非煙舒渥旨。愛日助皇情。鳧藻深歡意。魚蒲溢頌聲。蕭斯蒙湛湛。露彼仰英英。故事留東觀。崇恩自上卿。何言挈瓶陋。亦玷舉觴榮。已重高門地。還歌食野苹。微生徒聚鈍。弱植但葵傾。就日欣逢旦。瞻河喜見清。更期紆翠葆。千載詭登瀛。

詔祀西太一宮

至道希夷內。神威造化中。行基延羽駕。推策敞琳宮。祕寢觚稜峻。嚴扉坐狄雄。天人凝睟表。日月在方瞳。離坎精神集。房心氣象通。中黃安戊己。遙翠拱輶嵩。陪享衣裳盛。登羞火棗豐。層壇霏顯露。甲帳肅靈風。波靜流寒瓦。霜清入曉銅。廊虛鳴尺蠖。樓迴倚晴虹。行馬依芳樹。棲禽占碧叢。游光宵自燭。雕甍晝常濛。大壯親規近。甘泉舊典崇。平時闢閭闔。盡日訪崆峒。綵仗交輪兔。祀醮科儀。野長迷七聖。庭闕舞千童。禩鬯歆惟德。笙歌悅亶聰。蟠螭負金石。翔鶴下絲桐。法度昭神祖。祀醮科儀。野長迷七聖。庭闕舞千童。用雍熙之舊。文章炳鉅公。鼎期扶更

遠山瑞委無窮。用九乾元正。生三太極空。木龍雖有寓。芻狗本無功。迎氣陽郊始。均禧宇縣同。權衡樞極。右號令斗杓東。滂哲虔時祀。施生道化工。正辭除祕祝。承詔謁孤忠。仁與春膏動。恩隨臘霰融。天和傍星鳥。地惠及昆蟲。受記神司職。齋居帝飭躬。因知耕鑿力。誰解識淵衷。

郊丘侍祀

太極生真主。中原有聖人。圜丘尊上帝。大旅合羣神。行馬帷宮肅。乘龍法駕馴。禮容光日月。文德動星辰。劍履陪祠古。威英作樂新。東方虛小次。午陛徹華茵。吉土繇誠享。高穹以道親。燭壇光景集。升燎福祥臻。寒霽三冬日。恩融四海春。萬靈今受記。長此奉堯仁。

奉貢殿山亭奉詔觀橙

弄色金橙熟。朝元玉軼襄。寶奩登美實。齋蹕駐清光。高葉參雲碧。繁苞壓樹黃。鮮明當早旭。採摘有新霜。原廟已云薦。大家猶未嘗。分頒顏在咫。捧拜手盈香。凡果深何幸。孤根遠見將。五行舍戊己。二水出瀟湘。來植清琳館。叨升白璧堂。更依仙掌側。日夕近芬芳。

西園櫻桃

一春紅日色。刻意借鮮妍。露葉深成翳。風枝猛欲燃。黃金爲彈重。赤水得珠圓。甘實行宮薦。香名麗賦傳。色欺丹魄上。味出紫梨前。玉果誇珍實。何曾入象筵。

和蔡君謨閣前紫柏

秀植登中禁。靈根記大方。纖枝乘十雨。勁節誓千霜。雲幹仍稠直。煙華稍鬱蒼。綠陰疎未合。翠鬣儼相望。育質從新甫。標名壓豫章。三休依寶構。一溉引天潢。瑞露通晨泄。靈風繞夜翔。蠶蟬驚閣爛。啼狄憶巖光。地惠覃行輩。人情樂樹楊。保無禽鹿踐。知免斧斤傷。遠勢興毫末。孤標出衆芳。寒葭寧可倚。幽草固難藏。庭鶴宜留側。臺烏莫近傍。未經鸞隱葉。不使麝居香。松操同凌雪。葵心共向陽。故情存澗壑。生意屬池隍。晝景斜臨石。禪機俯映堂。頌傳商廟桷。材入漢家梁。此世隆三代。何時構九房。瓌姿天所產。工度未應忘。

後苑觀雙竹

瑞植昭天產。祥枝感帝臨。均承元化力。同抱歲寒心。異稟笙簫質。全包律呂音。孤根皆出地。勁節約成林。蒙潤非煙近。含滋御水深。風前交吐籟。月底互翻陰。秋實思威鳳。春條宿綺禽。留觀停翠葆。託賞集華簪。蒼震猶乘卦。商巖近作霖。天支從此茂。長覆玉山岑。

昭應宮小桃

艷冶如無罪。何由謫絳宮。不因輕阿姥。卽是小仙公。丹臉翻啼雨。飛書卻寄風。春溪迷柳曲。午影過牆東。密葉輕籠翠。繁陰半露紅。誰驚幽鳥散。千片觸簾櫳。

吳興秋晚郡齋長句

霽色初休雨。寒梅稍欲霜。崦嵫驚日晏。嶼嶼喜年康。菰米迎冬熟。萍醅破社嘗。響聲寄檻冷。卞色入樓蒼。弱援垂榴臉。幽叢亞菊芳。牛羊馴沃野。鴈鷺悅滄浪。水市能爲楫。田家乞有漿。溪音拏競去。村語醉相將。

自昔分天塹。茲州介水坊。貢絲標禹土。錯繡接吳疆。佳麗南朝後。鮮明茂苑旁。風華在安石。交物有東陽。
柳客詩名馥。顏公筆勢翔。山川爲吐氣。日月欲爭光。異代虛墳柏。逢辰濫郡章。壤歌知自化。符守信非良。
勇爵思長劍。高謨乏智囊。葵心拱宸極。藿食念巖廊。西戍方疲陝。中原久患羌。邊人思李牧。天子問中郎。
臣僕今三世。腥羶彼一荒。山西雄占隴。河曲斗分潢。漢始城張掖。秦初地朔方。限戎深得策。遮寇大爲防。
小雅亡于晉。中興屬在唐。太宗神且武。貞觀粹而王。都雍三才直。安西萬里長。聲明冒葱雪。亭堠徹甘涼。
聖術初無敵。孫謀本克臧。未塗虧繼守。駿命亦頽喪。上帝歆炎宋。真人奮大梁。鑿乾分上下。操斗運中央。
殺氣西刑馬。妖氛北隕狼。三關收朔漠。兩鎮復河隍。龍虎其文炳。雷霆我武揚。商球傳聖弟。夏鼎授儲皇。
託付神規遠。彌綸治具詳。四維嚴幅正。八柄謹低昂。地廣蘖芽出。海深神怪彰。遺雛偷嘯聚。雜種學跳梁。
王者輕分土。仁人重納隍。猶如棄鱗介。不使易衣裳。禍亂收凶器。昇平隱上庠。躡林通好固。狡穴送誠忙。
圭幣修歡聘。金行戢怒芒。生民去湯火。塞土徧耕桑。月窟頒正朔。雲封刻美祥。大璜貽燕翼。下武寢明昌。
區外蒙冠帶。天中布典常。三雍宣雅頌。九譯走梯航。仙致昭華玉。神來弱水香。路車均奕奕。朱帝賜煌煌。
南面存亡國。西平拂肯堂。虎臣無備禦。狼子有包藏。竊欲屯蜂蟻。私相署犬羊。癡言天可上。愚謂日無亡。
傳箭招廬帳。推鋒逆頡行。〔案〕推鋒二字。見漢書吳王濞傳。原本誤作推鋒。今改正。三河煩調度。六郡苦痍傷。旅力雖疲曳。游魂
尙顛顛。寢謀思汲黯。禽敵想陳湯。多士皆方領。孤生特面牆。荊官尸禮闈。檠職玷文房。無策均宵旰。何階
致富強。分從高閣束。敢避要途當。鈴下居無事。樊中脫未遑。鱸魚知味美。鷓鴣信機忘。濩落才何取。支離

臂自攘。雖貪紆紫樂。豈免頓纓狂。感慨乘軒鶴。吁嗟拒轍螳。山河賞吳起。社稷歎童汪。華夏崇基本。朝廷總政綱。弓偏宜舉抑。琴緩在更張。陽德銷羣慝。天元乘至剛。偃兵誠未易。用武亦何妨。雪近思王國。雲閒憶帝鄉。何時聞露布。稱薦萬年觴。

題沃洲亭

句水聲東轉。昭山勢北回。三洲環白浪。一徑踏青苔。牖對遙岑敞。門迎別嶼開。鷗鷺如舊識。蘿桂是新栽。野氣霏霏入。川華剌剌來。老猿偷熟果。馴鴿下生臺。樵斧鳴岑寂。魚扉映曲隈。觀濠立莊惠。結社坐宗雷。格磔歸禽亂。嘔啞去櫓哀。看雲秋徙倚。弄月夜徘徊。珠且矜圓折。犀休銜辟埃。沃洲應祗爾。何用憶天台。

荷花

露夕僊葩卷。風晨寶艷開。妖蔡夏庭出。禍水漢宮來。玉冷埋秋骨。珠寒斂夜胎。河分龍浪灌。月借藥淵栽。神機能凌水。僊裙不惹埃。文魚纔可戲。鳩鳥莫爲媒。卻死熬香釜。延年刻壽杯。息媿今不語。猶尙怨荆臺。

菁菁在中泚

周雅傳遺詠。菁莪播淑聲。育材方被化。在泚自敷榮。得地徧蒙潤。乘時竝擢英。託根分曲渚。入學隸司成。行葦仁同洽。山萊詠可并。聖恩均雨露。挺質愧微生。

釣臺

遺魄知何許。孤風不可攀。星辰歸碧落。道德寄青山。堯舜錙銖內。巢由爾汝間。草萊升御榻。韋布揖龍顏。

圭組無由屈。煙蘿卻自還。幾峯雲冉冉。數里水潺潺。孤竹清何隘。磻溪老未閒。獨留冰雪操。千古凜人寰。

送黃孝先

日下東京旅。才華變世雄。高門真偉器。正始得遺風。鳴玉來江表。英聲滿洛中。銀鉤專墨妙。犀柄擅談叢。一札公車詔。千鈞翼相弓。卿才歸樸斲。英毅入牢籠。佛寺題名塔。天家奏試宮。鶴鷄有短羽。亦恐附鴛鴻。

送校理薛學士

帝設英雄轂。朝多俊乂官。玉羈收汗血。珠網獲飛鸞。仙籍分丹桂。香名藹秀蘭。新從平樂試。入奉柏梁歡。辨色趨霜戟。催班近露盤。開芸開縹帙。堤柳據歸鞍。詩就雞林買。書成太乙觀。行閒延體貌。坡上有金鑾。

和原甫侍讀從幸後苑觀稻之什

稼殿秋香熟。煙畦早景鮮。玉虬乘暇日。銅雀報豐年。壓地黃雲重。含風寶粒堅。三登繫帝力。一豫俯天田。幸廁標章譜。仍陪從蹕宣。賜禾知禮厚。視草覺恩偏。學士兼侍讀。乃預此召。釐席思前問。經帷惜外遷。後漢楊秉出尉黃瓊借其去。上言勸誘權輿。不宜外遷。留拜光祿大夫。妙詩深雅意。王政食爲先。

送梅堯臣宰建德

縣枕秋江側。銅章滯雋旄。長安去日遠。單父戴星勞。口水遙通楫。嵐峯欲妒袍。文絃一琴古。仙鳥兩鳧高。家樹喧朝鵲。鄉亭寂夜燄。土風清是楚。才意苦于騷。訟少停徵索。吟多費健毫。平時洛中社。相憶醉含桃。

送劉學士出守衡陽

需奏登中掖。除書出上臺。獸隨朝帶結。隼映使旌開。地接朱陵近。人從藏室來。蠶蟬侵舊帙。浮蟻入離杯。嶺勢遙連楚。星文卻視魁。雲依蒼野住。鴈隔楚峯回。夕夢驚湘瑟。春心託隴梅。南方本寬教。東里復多才。新勝試吏多在勝中。駟馬榮星駕。千金慶壽壘。未應嗟遠守。素志在循陔。

送蘇賢良之任豫章

三道膠西策。詳延俯瑞冀。帝臨宣室坐。人拱太微庭。捷思誰加點。危言自據經。文成洛紙貴。詔下武泥馨。〔案〕武泥二字。不經見。當卽是漢時武都紫泥封詔事。戡用之。起草分宮筆。監州駕屏星。心存雲氣闕。夢繞斧文屏。南國標江紀。西山占地靈。檻泉通水府。牕戶接巖扃。涼月依滕閣。孤風泊孺亭。案書休犯慮。齋酒且忘形。界道宮牆紫。規蒲禁地青。歸來開院直。鼈頂架滄溟。

送刁總赴句容簿

佳邑控江湄。春來赴牒歸。波平雙槳渡。日上亂鶯飛。狎野晨耕早。踐田晝訟稀。縣圖標地肺。家巷接烏衣。沼靜窺珍羽。樓閒數翠微。山香蒸飢熟。溪蘂摘蓴肥。有客懷金社。因君拂玉徽。嵩雲南去遠。猶向柳依依。

送劉閱東遊

臯壤乏生涯。羈遊越絕踪。一區揚子宅。四壁長卿家。困粟知誰指。囊錢苦自嗟。秋林驚脫葉。夕枕怨啼鴉。海月隨孤棹。天風曳落霞。山城饒露蔓。水驛遍霜葭。孝子蘭方秀。先生菊未華。楚轅無久滯。把酒待回車。

江城立春

天上陽旛舉。人間漏箭長。稍驚池面綠。初覺柳腰黃。遲日延三舍。條風振百昌。酒凝前臘味。梅帶故年芳。雪意思王囿。雲情憶帝鄉。青門行樂處。漸近好煙光。

賞花釣魚應制

平圃回天仗。昆池降帝輿。晨葩纔隱蝶。新藻復藏魚。露重香英濕。風長釣線舒。乳鶯遷谷近。朱鮪躍淵初。禹律鏗金奏。堯樽徧石渠。乘時覃惠宴。不是樂觀魚。

辛夷

百卉迎韶律。辛夷花最先。與春宜有舊。造物底無偏。棠棣先饒韓。山櫻未敢燃。倚風遙可愛。犯雪不勝妍。影亂梅花地。香迷豆蔻天。紅啼昨夜雨。紫妬曉來煙。上藥能全命。靈滋合永年。帝家瓊圃在。此物未應捐。

館中同舍城西小飲

信馬斗西城。芳郊春漸熙。早煙銷禁樹。初溜入天池。桃作新正臉。梅留故臘枝。甕香浮蟻日。村鷄浴蠶時。聊把今朝臂。同伸卽席眉。徘徊惜歸馭。風晚水生漪。

講畢周禮詔賜御筵

典禮惟周舊。經文在魯餘。西清開縹帙。東面授丹書。訪道前釐席。崇風厚石渠。研覃忘日吁。圖繪極霞舒。經中禮樂之器。詔圖粉其狀。千載逢亨際。三冬罷講初。聖懷輕璧馬。慈宴樂蒲魚。妙技通神細。清商按曲徐。爐香分漢殿。鼎味出堯除。諸先恩同醉。孤臣藝最疎。至仁何以報。忠義卽瓊琚。

丁巳歲觀玉皇册禮

寶册尊徽號。香泥潔武都。齋心期太乙。恭己答元符。玉輅嚴清制。琅函祕聖謨。竹宮陳帝拜。嵩極動神呼。
 彩霧霏三境。祥輝燭九區。況當精歲出。仍與上辛俱。正旦上辛。協吉之符。永接千齡統。長膺五老圖。清緝流景鑠。禮自百王無。

溪竹

可愛壇東竹。更籠清淺流。行根侵島嶼。脫籜滿汀洲。夜迴疑篩月。風多欲戰秋。紫莖同入畫。青石伴垂鉤。
 葉裏藏雌翠。陰中下戲鷗。秦松無用笑。千畝更封侯。

五言絕句

憶東園

越鳥戀南柯。春來怨別多。冷風如可御。爭奈簡書何。

橫山

此地橫青嶂。當年動紫氛。將軍精爽在。可解勒遺文。〔案〕此詩永樂大典失載。今據宋詩選本補入。

七言絕句

漫成

日醉風酣百卉開，錦韉爭躍大隄來。城東有客歌盆久，不敢將春上老臺。
齋祠小飲資政吳侍郎，以真如茶二絕句爲寄。

碧城齋禁放朝元，晚飲偷消白日閒。天上高真潛詞得，因將瑤藻擲雲間。
寶刀玉尺裁佳句，雪溜雲腴試早芽。睡魄頓消清到骨，一成僧味似僧家。

劉開府

京口劉郎是穆之，風雲未作苦棲遲。金盤一石檳榔贈，可得當年是諱饑。

館娃宮

犀甲三千越騎雄，平明來襲館娃宮。君王不得西施去，萬戶那能住甬東。

自嘲

雪梅連日礙層陰，昨夜銀臺瑞霰深。待詔多年無履齒，牕間猶作洛生吟。

弄雲亭

自知無業致吾君，只向空山弄白雲。已共此山私斷定，不須轉轍重移文。

函谷關

寂寞函關鎖未開，田文車馬出秦來。朱門不養三千客，誰謂雞鳴得放回。

文恭集卷七

奏議

論郊丘定配

臣竊以國家乘火而王。火于五行。其神屬禮。漢書天文志曰。火禮。以此而言。國家常須參考典禮。以順火性。伏觀京師。自秋不雨。綿歷三時。聖心焦勞。臣下隕越。思所以消救之道。未知所出。伏惟陛下明德恤祀。虔恭郊廟。宜蒙福應。乃遭災旱。古者祭天神無二主。禮專一。所以奉天帝之尊。明不敢瀆。三代兩漢之盛。莫之敢易。唐初始有兼配之事。垂拱中。禮官希旨。郊丘諸祠。遂有三祖同配之禮。開元十一年。明皇親饗園丘。禮官建議。遂罷三祖同配之事。除此之外。未有一代三帝同配昊天之神。國家至道三年。詔書親郊園丘。以太祖太宗竝配。陛下卽位。景祐二年。詔禮部詳案典禮。辨崇配之序。詔書節文。自今以往。太祖定配二宗。迭侑。去年八月八日。詔書。今次南郊三聖竝侑。後次卻依舊禮。布告中外。咸體丕懷。未踰旬日。復有今後每遇南郊三聖竝侑之詔。竊尋詔旨。先後不同。此誠陛下至孝烝烝。虞舜之用心也。然有違典禮。未合天衷。致旱之由。恐在于此。臣恐欲望聖慈。今後南郊。乞且依去年八月八日詔書。及景祐二年禮官

所定太祖定配之典。追寢去年八月二十四日。今後每次南郊三聖竝侑之詔。告謝天地。以順火性。必蒙福祉之降。足消災旱之異。臣若心知不可。口不敢言。卽是長負陛下獎育之恩。沒有餘責。

論詳定官制

臣等昨奉敕爲翰林學士韓絳上言。國家奄有四海。承平百年。官制未修。方苦其陋。欲望討論唐百官制。及本朝官制品秩事件。量加裁定。正其名體等事。奉聖旨。着臣等。同共詳定。臣等累曾懇辭。不蒙允許。尋具劄子陳乞。且未置局。容臣等取前代官制。將今日各官職位。商度可改正者。可裁損者。可申明者。各條三兩事。先送中書門下。更加商量。若果有施行。卽置局辟官。次第刪定。奉聖旨。依奏。臣等今詳定到事件如左。

一、漢置丞相。其後改置三公官。皆公府。辟召掾屬。唐制以尙書門下中書三省長官爲宰相。尙書令。僕射。侍中。中書令是也。官品未至者。同中書門下三品。今平章事卽其比也。參知政事。唐初亦是正相。崔溫等嘗爲之。國朝之制。下宰相一等。若用唐制。正其名體。則四輔之任。當悉用平章。依漢制。卽須立丞相府。

一、唐制。御史大夫一人。中丞二人。國朝之制。大夫不置。以中丞爲臺長。他官或以給事中。諫議大夫。權之。若欲改正官制。置丞相府。則大夫當復。輕重乃等。

一、唐制。無公卿爲樞密使。五代用兵。始與中書對掌機密。欲改正官制。當以院事。還中書及尙書兵部。

一、尙書省二十四司。旣爲虛名。所以官冗員衆。若欲正官制。當罷三司。二十四司。及九卿官。使有定員。其

郎官不在本省治職事者。竝以前資及散官處之。其在外任者。或依唐制置上中下等州刺史及別駕之類。陪官品任之。或欲輕其權。則曰知某州刺史之類。

一文武散官。及檢校兼官勳爵實封等。在開元以前。頗有實事。于今雖散。猶敍服色。粗繁輕重。其餘悉皆虛名。無益治體。欲改正官制。當例行省罷。若以假虛名而任實職。兼存亦可。

以上所謂改正者也。略舉一隅。若于今可行。卽推此類具正之。

一大理寺決天下之獄。刑部覆之。于事已足。又加審刑院。則爲駢衍。欲裁損官制。當以院事官屬。還刑部。一吏部尙書侍郎。分領銓事。則當差以輕重。分別流品。今審官院掌京朝官磨勘差遣。而流內銓次。惟典州縣幕職官。體制不倫。欲裁損官制。當以審官院職事。歸尙書銓。州縣幕職官。歸侍郎銓。

一羣牧司提舉司糾察司之類。皆古無此職。欲裁損官制。悉當省罷。還屬尙書九卿。

以上所謂裁損者也。略舉一隅。若于今可行。卽推此類具正之。

一左右史竝當隨宰相入立仗下。以記言動。今史官之任。不及聞前殿政事。故德音善政。多失紀錄。欲申明復此舊制。

一中書出制敕。唐制。竝經門下審覆。然後尙書出告身。經歷三省。比來惟中書發敕。虛置三省官名。今欲申明復此制。國朝令文具載。

一國朝近制。觀文殿大學士。惟待舊相。自資政殿大學士。至天章閣待制以上。其間多有無員數。除授淺

廣者。繇邊幅不立也。諸舊有員者。宜依舊數。未有者。宜差定其員。著爲久制。以革溢員之濫。

一唐制舍人六人。分判尚書六曹事。所以佐丞相。謹政令。欲乞申明此制。

一舊制九卿之職。不隸尚書令。卿監職事。三司關領者。宜取還寺監。亦省侵官之類。

一唐制左右丞相。判尚書省事。中書判門下省事。中書舍人判中書省事。國朝門下省權用近臣判之。中書省卽舍人年深者判。與唐制略同。准昨來言者稱。近臣判省權太重。考按唐制似不如此。惟常袞自以同中書門下事。卽當兼判中書省。是時崔祐甫以舍人判省。謂袞侵官。士論由此不平。袞也。

一三班自供奉官。至殿侍。差使之類。唐制武選皆無此名目。宜徙置于外。以區別華冗。

一朝廷若欲從改正之說。卽俟改正之後。設官分職。如周唐。乃可約六典著書。垂之後世。若未能如此。而欲著書。惟可將會要及諸司編敕并格令。刪繁取要。今日官名。粗書職分而已。

以上所謂申明者也。略舉一隅。若于今可行。卽推此類具正之。

論罷上元放燈

臣或聞臣僚上言。以今春開淘汴河。興役至衆。乞罷上元放燈。以防一切。放燈誠非急務。于公私無益。然罷之亦須有名。若以開河爲言。恐于體不大。今東南數路。災旱甚廣。穀價翔躡。民食飢乏。又河北水沴。愁墊未息。若惻然降旨。藉此而罷。則于名義甚大。四方觀聽。必喜聖心有矜憐窮困之意。或因晝日晴和。車駕臨幸。寺觀燒香。以祈民福。足以慰都城士女之望。伏候進止。

論人使詣塔燒香

臣等、今月十五日、同契丹人使、并三節人、從詣相國寺普滿塔下燒香。竊見本塔屋宇損動、四隅用枋木薦撐、環遶其下、吁可爲懼。退思延戎使燒香之意、本欲以浮圖之勝、誇示遠人。若不繕完、恐非壯觀。如惜軍國之物、重爲之費、卽乞將泗州塔下等處寺院、施利錢物、早與修完。及其未傾墮、易爲施力。若其摧圯、所費益大、取進止。

論臣僚進對密陳機事、卽時外傳、乞賜防閑。

臣聞爲君難、爲臣不易。易大傳曰：君不密則失臣，臣不密則失身。春秋譏漏言，以爲至戒。君上不可不察也。伏惟陛下躬大聖之姿，體至仁之量，推誠接物，降心求治。每臣下進見，莫不霽威嚴、和顏色、問民俗之利病、詢朝廷之得失。此虞舜好察邇言之意也。然其間樞機所發、禍機或隨。臣下不可不慎也。比來羣臣進對有所密陳、往往卽時傳之在外。豈非防閑之道未盡其要。今後臣僚上殿、欲乞嚴屏左右、以防漏泄。若此則忠言益進、聖聰彌廣、無機事不密之害。仲近臣盡規之忠、謹具奏聞、謹奏。

論楊懷敏不當除內侍都知

敕入內侍昭宣使眉州防禦使楊懷敏、除入內侍副都知。臣當草詞者、臣聞昔懷敏先任入內侍省副都知、管皇城司公事、宿衛不謹、致逆徒竊變、震驚宮闈、嚮非宗廟社稷之靈。陛下乘輿幾殆、及逆徒旣獲、又不坐死、致規滅姦人之口。天下之議、罪在懷敏。楊景宗二人而已。臣每念此事、痛心扼腕。陛下仁聖、

不忍加重誅。止解內職。令居外任。今因奏事。忽有此命。若再復內侍名職。且赴本任。是不久將復入內侍省之職也。若再居內省。則宿衛之變。復未可知。兼條制內臣。都知副都知之職。有過降充外任。更不許再居舊職。所以防一切之微。深遠之法。制也。伏望陛下。令有司檢詳舊制。追寢今命。法制一壞。復之良難。有此遠礙。臣不敢草制。其中書送到詞頭一道。臣輒封還。伏候進止。翊日上謂宰相曰。前代豈有此故事。不草虛把制書。近年富弼。亦曾封還詞頭。上意解。改命舍人草制。臺諫論列。皇祐元年十一月二十九日。以昭宣使眉州防禦使懷敏。充三陵副使。

乞楊安國改官

臣竊聞侍講學士楊安國。近有奏劄。理會磨勘轉官事。或聞安國改官。已得四年有餘。中書爲安國會因舉官罰銅。隔住一年。至明年三月。方該轉官。安國授經老臣。年近八十。桑榆暮景。光陰幾何。況久侍講筵。與其餘侍講不同。緣此月十八日。講畢周禮。宜因此時。欲乞陛下。面賜安國改轉。宣中書施行。以爲老臣授經之榮。兼彰陛下重道之美。書于記注。實光聖德。芻蕘之獻。惟賜採擇。取進止。

論差三館都監不合辟

臣伏以三館圖書之府。朝廷育材之地。用內臣爲都監。典領事務。自來差除。或許判官及館職自舉其人。貴得謹良。以接英俊。近差下三陵都監任從禮。充其任。近已身亡。朝廷尙未除人。竊緣判館之職。罕與內臣相接。縱有所舉。亦未周知其履行。今後三館都監有缺。伏乞朝廷精擇其人。以充取進止。

繳進李康侯廣律判辭

據前權知滄州軍州事判官李康侯狀。昨在任日。著成廣律判辭十一卷。通四冊。念康侯數年用心。尋究律意。根援典禮。伏狀繳奏。進呈者。右具如前。臣等竊以吏道之本。法令爲師。凡厥士人。旣霑利祿。雖勤几案之決。罕精律例之微。前判官李康侯。早登詞科。深好法學。因傳經義。條爲事辭。著成廣律判辭十一卷。以廣律意。志勤可采。學尙足嘉。幸值盛辰。弗遺小善。臣等謬承朝委。典司銓集。復叨近侍。敢壅上聞。其李康侯撰成廣律判辭十一卷。共四冊。謹具狀繳進。或稍有觀采。伏望聖慈。候刑部大理寺詳覆。斷官有缺日。特許先次除注。勘會本人。歷任竝無過犯。在朝亦無親的骨肉食祿。見在銓參選。謹具狀奏聞。伏候敕旨。

論殿試攷校

臣竊見舊制。攷校御試舉人卷子。不過五六日。催促了畢。即便放榜。誠是太速。恐有未精。近制御試許限半月日。攷校。蓋欲詳加掄覈。務在精當。然而采之衆論。亦有未便。或聞初攷與覆攷二處。各限五日。攷校須候日滿。攷盡卷子。定了等第。方得次第關發。如此。即便覆攷與詳定所。端開多日。卻成留滯。況近來間歲科場。人數卷子。止千二百。欲乞將來御試。且依舊存半月日限。攷校。外降聖旨。令初攷覆攷所。更不限定日數。但攷絕卷子。定了等第。即便關送與彌封所。令彌封所發往覆攷等處。若于限內攷校了畢。乞便放榜。不須候滿半月。兼免日久有所漏泄。及免禁中久留。燈火不便。取進止。

論換巡尉

臣竊觀今夏四方州郡山水發溢。至入城郭。漂廬舍。壞棧道等。在五行。水曰潤下。爲害若此。是失性逆理之象。在易。坎爲水。爲盜。宜敕四方州郡長吏。及逐路轉運使。提刑等。常切謹視盜賊。應採取金銀銅鑊及鼓鑄錢幣。聚集羣衆之處。宜密設方略。常爲警備。部內巡檢縣尉。捉賊使臣。如有情病昏昧。及弛慢不堪居職者。宜令具姓名體量。聞奏。下三品流內銓。選差有材武勤幹之人充替。或部下監當使臣。有材幹之人。具被體量者。內有未至全然昏昧。可以監當場務。許令權且對換勾當。是縣尉未至全然昏昧者。亦許于判司主簿內。選擇對換勾當。一面奏聞。乞從朝廷指揮正差。若巡邏得人。則能教習武藝。整齊部衆。遏防之道。伏候進止。

論弓手替換

臣謬奉朝寄。預司民政。今有管見。輒敢敷言。臣竊尋國朝舊制。天下縣邑所置弓手。本防賊盜。選人才會弓弩者充。初無年限許替之文。蓋欲其役年深。習慣武藝。又周知山川道路險易。姦寇窟穴之所。若有盜發。易爲擒獲。編救節文。弓手惟老弱貧乏乞替。本縣保明申本屬長吏。體量差替。亦慮縣邑受倖。至天聖明道中。江淮饑饉。妄有替換。故立此制。以防其弊。然朝廷遣使安撫。右司諫范中淹奏。乞今後弓手及七周年者。許替歸農。七年滿。情願執役。身手強壯。能捉賊盜者。州縣體量。依舊執役。尋范中淹所奏。蓋因災傷權宜。建白。以竟一時之勞。係令有司銓揀其弓手強壯者。不得一例差替。自後諸處縣邑。爲有上項指揮。有司乘此受倖。不問貧富老少。勇怯。纔及七年。本縣便一例差替。多是不申州長吏體量。其間未及七

年者甚多。非徒新募弓手生疎。不堪捕盜。一爲弓手。則不能力農。非勸農敦本之意。反爲良善之患。欲望聖慈尊祖宗成憲。勿輕改易。庶幾倖門塞而天下安。取進止。

論北界點集事宜

臣聞近日契丹于燕代之間。點集兵馬。聲言西討夏國。恐非其實謀。兼前來國書商議未合。近日橫使不至。虜情難測。忽此點集。有可疑慮。兼廣南蠻賊狂盛。陷沒州郡。朝廷方誅討用兵之際。契丹不宜有謀。若二寇並興。四方可慮。國家貴權以濟事。欲解紛難。不可循常理也。若旬日間。契丹不遣使來。臣欲乞聖度詳度事體。選差能專對近臣。往使北戎。與議定國書。固其鄰好。雖事之成與不成。未可決定。亦可以探得虜中動靜。若果蓄異志。必有違言。便須大爲之防。以備邊境。伏候進止。

論詰責言官言事涉後宮之親

臣聞聖主悅至言。好崇諫。所以廣治道。防一切之未然也。臣以螻蟻。竊觀陛下特稟上睿之德。能聽大度之言。數賞諫臣。比耀臺職。推誠含垢。美盡君人之量。堯舜之用心也。近日聞臺官言事。爭涉後宮之親。出于風聞。有旨詰責。臣愚以謂諫官御史。朝廷紀綱所寄。雖有過謬。可且優容。昔漢文賢主也。袁盎直臣也。帝所幸慎夫人。盎掌諫。爭言涉不遜。初雖怒。終不加罪。後慎夫人聞之。復賜盎金五百斤。慎夫人所以能保榮寵者。以能賞袁盎之直言也。漢元帝時。馮野王。昭儀之兄也。德行高妙。推爲第一。時御史大夫缺。公卿多薦野王爲之。帝曰。吾若用野王爲之。天下必以我私後宮之親。昔德宗謂李絳。比諫官論奏不實。欲

出其尤絳曰。此非陛下意。必儉人以此營誤上心。自古納諫昌。拒諫亡。君尊如天。臣卑如地。于不測之禍。雖開納獎勵。尙恐不至。直士杜口。非社稷福。臣願陛下鑒觀前史。開納至言。臣不勝區區之情。

論兗國公主議行冊禮

今月二十一日。草福康公主特進兗國公主制。竊聞議行冊禮。然于事體。頗有未便。祖宗以來。公主長主。未有行此禮者。昔漢明帝封皇子。悉半諸國。明德馬皇后曰。諸子食數縣。不已儉乎。帝曰。我子豈敢與先帝子等也。唐貞觀中。太宗長樂公主將出降。帝令有司資送倍于永樂公主。魏徵曰。不可。引漢明帝之言爲對。且曰。天子姊妹稱長公主。加長字。示有所尊崇。或可情有淺深。無容禮相踰越。太宗然其言。入告長孫皇后。后遣使賜徵金帛。陛下卽位以來。累曾進封魏國楚國二大長主。亦不曾行冊禮。今施于兗國公主。是與大長公主相踰越。兼以貴主之故。賢妃亦蒙殊典。有旨令進諭告。不行冊禮。是母子之間。一行一不行。禮意尤不相稱。書于史冊。後世將有譏議。必謂陛下偏于近情。虧聖德之美。臣願陛下采漢明之言。開文皇之聰。遵祖宗舊典。如國朝公主曾行此禮行之。粗且無嫌。如其不曾。則宜且罷。臣以陛下好忠諫。納至言。臣職在論思。不敢不言。

論太湖登在祀典

臣竊見吳中太湖。卽禹貢震澤也。廣三萬六千頃。其水利漑蘇湖常三州之地。而蘇湖爲多。去二郡亦近。湖中大小山七十有二。洞庭林屋福地皆在其中。商帆賈楫。日相上下。二郡各有湖廟。而常州無廟。蘇州

廟在洞庭。湖州廟在大錢口方。俗目爲平水大王廟。是也。二郡小小叢祀皆祭。而太湖獨不祭。蓋由祀典失載。因循忽諸禮。境內山川諸侯當祭。國家儀文咸秩。靡祀不崇。其太湖欲乞下湖蘇常三州。登在祀典。春秋差官致祭。取進止。

論伐鼓于社當在正陽之月

昨觀六月之朔。日有蝕之。禮官奏行伐鼓于社之禮。某受詔告祭大社。是日雲氣擁護。太陽纔食數分。隱而不見。至晚復有雷雨之應。然自此數月。陰雲相繼。淫雨未息。攷之書傳。竊有感焉。謹按尙書季秋辰弗集于房。瞽奏鼓。此則夏禮伐鼓之始也。又按春秋左氏傳。唯正月之朔。慝未作。杜氏注正月。夏之四月。謂正陽之月。日有食之。天子伐鼓于社。責羣陰也。諸侯伐鼓于朝。據傳而言。它月則否。穀梁救日之法。陳五兵五鼓。亦在莊二十五年。六月辛未朔。亦正陽之月也。書傳交戾。典禮不同。太社主陰之神。有國尊奉。非當鼓之月。而行攻責。書傳二說。禮在可疑之間。淫雨之來。或恐緣此。竊見太陽禮院告報。准中書劄子。奉聖旨。分遣臣僚詣宮觀寺院。燒香祈晴。謹按祠令節文。霖雨不止。祈社宜。因此祭兼祈太社。太稷以息淫雨之沴。祠令所載。於禮無嫌。謹具狀申中書門下。

同劉敞孫抃論四后配食

臣等謹按春秋傳曰。大禘者何。祭也。未毀廟之主皆升。合食於太祖。是以國朝事宗廟。且百有餘年。至禘之日。別廟後主皆升。合食。遵用以爲典制。非無據也。此皆更聖祖神宗盡心極慮。制節垂法。以貽子孫者。

也。未易輕改。且宋家宗廟之禮。參用歷代。因時施宜。不專取於周唐。何以言之。如太宗真宗二帝。並配三后。孝章嘗母儀天下。而享於別宮。淑德以元妃正嫡。亦享於別宮。原其憲章沿革之始。似出聖意。自有所在。若規以一家之學。則紛然皆亂於上矣。且行之已久。祝嘏宗史。既守以爲常。若一旦輕議損益。恐神靈不安。亦未必當先帝意也。議者乃謂四后之主。於合食則貴有所屈。於別享則尊得以伸。然則且不疑於黜遠四后。而獨豐於昵乎。他年有司攝事。四后皆預合食也。今陛下方欲躬齋戒。奉祖禰。而四后見黜。不亦疑於以此禮之煩而不能事其先妣乎。受命之君。以創禮革典爲急。繼體之君。以承志遵法爲美。先帝創之。革之。陛下承之。遵之。臣曰可矣。宗廟之祭。至尊至重。苟未能盡祖宗之意。則莫若守其舊禮。疑文偏說。未可盡據。傳曰。祭從先祖。又曰。有其舉之。莫敢廢也。此之謂也。臣恐以謂如其故。便。

文恭集卷八

奏議

論征蠻

臣竊見前代征討蠻寇。所以爲難者。以其保聚巢穴。掠害邊境。興師深入。則有山林之阻。久屯則有瘴霧之毒。兵不得戰。人多疫死。此其所以爲難也。今者邕士蠻賊。盡率反黨。遠棄窟穴。頓于廣州堅城之下。平地之上。已六十餘日矣。退則歸路至遠。進則大軍已集。以臣料之。賊氣必沮。或聞廣州雖有山林。不至深險。賊久留不進者。此天亡之機也。今涼風方至。瘴氣已息。賊處平壤。官據堅城。士卒相依。弓弩得用。天時肅殺。宜行誅討。江西等路。雖苦水旱。計其小熟。及茲西成。猶足以調撥贍軍。助國討賊。臣以此觀天時地利人事之形。王師誅逆。宜及秋冬。不可逗留。更無機會。楊旼謙默不伐。深沈有算。兼其忠孝出于天性。誠堪屬以南伐。總茲師律。陛下宜申勅諸將。稟其節制。則軍衆有所統一。號令得以施行。今因賊亡之機。與天時之利。參定滅賊之策。勿貪一時之功。戒之以在和。訓之以持重。多方設巧。燒其船艦。使賊不得下海。賊若下海。攻陷瓊管。以爲窟穴。卽介在海外。王師無由致討矣。乘間竊發。入寇腹心。則嶺南諸州。被害無

有已時。更復遷延至春夏。或誘合鹽賊。或煽動羣蠻。則江西諸路。疲轉漕之役。失耕稼之業。大軍有疫死之懼。懷思歸之心。久則變生。一切雖在發生之候。必用誅伐之威。夫逆天時。虧地利。失人和。三者舉事之忌也。臣愚狂妄。輒謂方今之計。宜先料賊之多少。計兵之衆寡。若賊有萬人。王師須有三倍之勢。料擇精卒。習用長技。品配其衆。番休與戰。彼寡我衆。彼勞我逸。利則督士苦戰。不利則斂兵且止。如此者。三時待其衰困。各懷去就。乃可申購募之典。赦脅從之罪。則人思效順。衆必離散。然後合勢大舉。以圖殄滅。若失機會。恐逆黨愈盛。而後患滋大。昔者食菴之人。猶憂疆場。負薪之語。或益廊廟。狂夫之言。聖人擇焉。謹具奏聞。伏候敕旨。

乞留三御史劄子

臣竊以御史者。天子耳目之官。所以上廣聰明。下防威福。若有畏懦無狀。緘默不言。卽是尸祿素餐。負陛下之任使。罪之可也。若其不畏強禦。糾發姦違。可謂能言。是其本職。旌之可也。近聞臺官彈奏。事連宰相。陛下不置詔獄。按問。止令開封府訊狀。憑劉宗盟一面單辭。黜三人御史。于朝政有損。于人情未服。昨日聞御史差敕留中。未下。外議皆謂。必是聖心覺悟。不黜臺官。人情莫不喜悅。剛猛御史。自古難得。今若遂去。須別舉人。所舉之人。未必能勝此也。近日謫見未息。姦宄須防。古人有言。猛虎在深山。藜藿爲之不採。猶言直臣在朝。姦臣遠避也。臣欲乞降旨。留三御史在朝。以警姦邪。臣作晚蒙宣召。已曾面論此事。欲乞聖慈。更賜詳度。

乞慎選省府推判官提點刑獄

臣聞漢制刺史奉詔條察州秩六百石至卑也。委之察一部者。意在秩卑無所顧惜。敢刺舉耳。某年初置刺史部十三州文武名臣。欲盡委察。今之轉運使。大抵漢刺史之職也。陟黜臧否。與利除害。莫不係之。國初用官亦輕。選才則重。其間外計多著能名。古人有言。引一代之人。理一代之務。不借才于異代。若謂方今乏人。是誣一代之人也。願朝廷所選用。何如耳。若欲天下轉運使盡得其人。莫若慎選省府推判官。提點刑獄。此三道者。取才之要。比來夤緣用人。忽略此職。一概置親厚之吏。或假借橫勢之家。故外計之任。有以資敍而入。往年葉清臣在三司。判官不才者。奏罷數人。當時物論是之。今稍稍復用矣。天聖景祐之間。屢降大敕。舉提點刑獄。頗亦得人。近年多沿差遣。敕上帶入。選舉之法。格而不行。又罕見顯拔循吏。爲之省府。陛下惠綏元元。勵精政治。近制川廣知州。通判知縣。並須選差。所以重遐方而矜遠俗也。況轉運使。提點刑獄。表率部吏。宣明風化。可不慎擇哉。宜得通民事綽有才望者居之。若按舉稱職。風績較然。或增秩再留。或移莅劇郡。俾久其任。以伸厥能。諸積久累官。秩高而才下。素望不著者。不可使居其任。恐墮職事。且非陛下求治之意。

論除授宿衛帥臣

臣竊以殿前馬步軍等帥臣。統陛下爪牙之兵。爲陛下心腹之佐。宿衛宮省。拱扈宸極。凡所進任。固先出于聖意。然後參訪大臣。公議旣同。方可除授。近來內外臣僚。多舉武臣管軍。此非臣下輕可論薦。漢宣帝

時丞相黃霸薦侍中樂陵侯史高爲太尉。帝使尙書召霸曰：樂陵侯高帷幄近臣，朕之所自親，君何越職而舉之？尙書令丞相霸免冠謝罪，數日乃決。霸爲丞相，薦高爲太尉，以職事言之，未爲過舉。猶見詰責如此，豈非以太尉掌武之官耶？陸賈有言：將相相和，則權不分；權不分，則士豫附；士豫附，則國家安。以此而言，宿衛帥臣當選謹厚樸忠之人，以總禁旅，不宜輕用論薦，以收私恩，或任非其才，則開隙生事，國之利器所宜慎重。

論河北邊備事宜

臣聞地有常險，而國無常地。此古今得失之勢異也。古者北有盧龍之塞，白檀之險，隔限南北，中國得之，控扼北狄。今此二險虜反有之，河北地形無險可守。自河南北達于澶淵，平壤二千里，景德中一旦虜騎至河上，當是時去祖宗纔四十年，兵強將勇，習知戰鬪，至煩章聖親駕虜始懼而乞和，河北名將帥楊廷昭、馬知節、李允則、何成矩、孫全、有盛名，扈駕則李繼隆、石保吉，內臣則秦翰，皆數經戰陣，自河決商胡，失橫隴故道，中國亡大河之險，虜乘虛擣滄景，則山東危，願用張宗益、郭申錫言，割濱缺，德博以隸滄，別爲一路，屯兵以扼虜衝，備不虞國之福也。伏望聖慈，特詔大臣講究速行。

論邊界守約束

臣聞憂患之來，多藏于細微，而生于人之所忽。自邊臣趙滋舉行界河，打魚刈葦，一切禁斷，由此漢兵多與北鬪，累年不絕，和好之體，一旦至此，怨隙之開，亦不在大。去年八月庚寅大雨水，今春彗孛謫見，上天

不言以文象示下。陛下宜思內外憂患，彌縫其缺。蓋有備則患不能深，無備則亂不能起。界河武思、趙用、輩雖時立小忠，皆不達大計。宜密行戒約，臣觀景德詔安撫司，皆防微慎重。自景德以後，詔書數更，北人打魚安于積習，邊吏弛職不復譏呵。及至舉行舊條，而淵魚見察，衆狙皆怒，履霜已深，堅冰且至。願大臣早爲之備，國家承平百年，與敵通好者六十歲，內外無患，前所未有。近年邊遠來上，不過侵誣尺寸疆候。此夷狄之常態，縣寨之本職，移文足以辦之，何遽至興甲兵哉。今搢紳中有恥燕薊外屬者，若天時未與，人事未至，而欲妄意難成之福，不如講和息民，擇良將以守邊，選能臣而修聘，外固歡和之形，內修守禦之備，羈縻不絕，守真宗仁宗法度，以惠養元元，則天下幸甚。

論西夏事宜

臣聞漢武收河南地方，朔方開置河西五郡，中國得之以隔絕羌胡，不得相通。前世謂之斷匈奴右臂，今盡爲夏國所有。夏國主諒祚，恃犬羊之衆，濟凶父之惡，去年不願誓詔，燒劫秦鳳、涇原兩路熟戶，肆行殺掠，滿意而去。邊臣畏懦，按兵不出，朝廷降詔詰問，拒使者不之納。及賀正人至，以壕外地屬戶爲說，此地慶歷中西蕃溪洞所獻，檢據甚直，詔答已詳。近日延州按撫司復奏夏國乞遣使齎狀乘驛詣闕，其意無他，止是申尋前語，圖起爭端。臣恐疆場之憂未息也。如聞西人常有闕秦中同家堡一帶，蕃部正扼西賊來路，涇原若失此險，無所隔闕，賊馬一二日可至古渭，可至古渭，則秦中搖矣。雖聞今年歲在東井，爲關中之福，星家說鎮歲所在不可加兵，然五緯盈縮，進退不常，難可恃也。彼若不畏天道，輒來犯順，盈縮

繫于天道。成敗先于人謀。若止是論議。理境外地界。朝廷必無開許。彼見不許。有必爭之舉。大集羣醜。以撓諸務。如聞西賊尙有窺伺邊隙。結納熟戶之意。欲望聖慈。明戒邊帥。豫備不虞。綏靖鎮撫。明遣間探。講練軍政。以佚待勞。彼知我有備。決不敢遽起事端。

論邊事

臣竊以景德二年。遼人乞和。章聖深維遠慮。務息邊氓。俯屈至尊。下柔獷俗。繼以仁宗聖德。順成先志。彌縫間隙。得羈縻勿絕之義。自爾邊境。長無風塵之警。父老不識金革之事。大德至恩。在民深矣。國家承平百年。其間通好。居六十年前。世所未有。近日戎人。移建舖居。侵越代州疆界。吏止之。奮兵與漢兵鬪。又雄州奏契丹人騎兩過。拒馬橋南。伐去柳栽千餘。放箭射歸信縣尉。又界河舊制。北人不得取魚。雖素有禁防。或聞私亦曾採捕。舊不聞有鬪爭之事。近年禁禦太密。鬪爭不絕。亦曾射傷巡檢。殺死邏兵。邊臣恬然。曾不爲怪。朝廷奏報。視爲閒事。未審鬪爭不止。其末如何。皆積不相能。馴致此釁。履霜之漸。堅冰且至。誠懼章聖和戎之策。從此而壞。國家居常備陝西。次及河東。未嘗深留意于河朔。陝西河東兩路兵官。經朝廷選。所得差多。極邊城寨。都監寨主之類。則又許帥保薦。頗得土人。曉識山川險易。習知蕃戎情態。又有內屬蕃部。爲之障蔽。土兵蕃落。保捷之屬。皆便弓善戰。以一路兵力。得良帥制之。寇至可以戰。可以守。河東險固。去年西賊燒劫涇原秦鳳熟戶蕃部。迄今環慶賊馬鈔掠未已。然今年歲在東井。東井秦分。爲關中之福。星家之說。鎮歲所在。不可加兵。宜勅沿邊諸將。嚴兵爲待。賊若大舉犯順。我得天道。不宜縱敵。兵

法所謂敵加于己不得已而應之者。謂之應兵。兵應者勝。彼自守窟穴。無所侵軼。不宜提兵深入。自違天道。前所謂朝廷未嘗深留意于河朔者。豈非恃盟好。重改作。防虜人之疑乎。方今之計。莫若外固權和之形。內修守禦之備。且河朔地形無險可守。自雄莫以南。平壤千里。往時黃河流入虜境。無慮五七里。自河決商胡。不由橫隴。故道河北。水流散漫。失中國大河之險。不能限隔戎虜。盛冬冰合。胡騎可過。虜人若以精騎擣滄景之虛。長驅南下。則京東搖矣。河北雖有塘水城壁。利兵堅甲。無所用之。臣非能知前後通邊事者言之多矣。朝廷以北虜無釁。未暇經略。今來邊釁已有萌芽。防于幾先。姦謀自破。今陛下聖德日躋。神機天挺。燭知萬事之統。坐照四夷之情。廟堂之上。俊乂大臣。皆有文武全略。通知三路利害者。豈臣愚瞽。擗聞所能究知。然而負薪之語。有益廊廟。況預聞政事。稔知邊患。敢默而去乎。欲乞令中書樞密院檢取前後臣僚上言章奏。相度可否施行。

辭免尙書禮部侍郎劄子

臣近蒙聖恩。不次遷秩。傳聞之始。隕越于下。尋具劄子。懇叩乞行追寢。而高邈之聽。未照卑凡。樸訥之辭。不蒙開允。今早亦嘗面奏。親奉德音。仍遣中人奉宣宸旨。促令祇受。押赴告謝。以聖慈堅重。天語丁寧。不敢有違。尋已授訖。然而公議可畏。私懷未安。須至縷陳。重煩聽覽。伏惟仁宗皇帝。以仁聖至德。臨莅天下。四十載。東宮虛位。大本未立。知陛下有聖賢之量。建爲皇子。付託大器。天人之望。宅心有所。四海之命。始有攸屬。一旦入續聖統。中外晏如。厥初大憂感慕。聖體雖小有虧和。而神靈護持。終獲勿藥之喜。是祖宗

基德之厚。仁宗知聖之深。在于羣臣。何力之有。豈敢貪天之功。橫受寵命。自省甚熟。衆議謂何。況臣衰殘。無所云補。未能引退。已負兢慚。儻竊崇恩。更尸厚祿。必招譏議。恐致咎殃。伏望睿慈深亮。恐懼。追停渥命。庶安危抱。取進止。

狀

舉臺官狀

准敕。限十日內。于外任太常博士以上。會歷一任通判成資以上。或歷通判一年以上。堪充三院御史。保舉兩人。聞奏如三承內有合該磨勘者。亦許保舉。仍須自來別無賊濫。忠厚淳直。通世務。明治體之人。如朝廷選擢任用之後。所舉人犯入己賊。竝當同罪。其餘賊私。及不如舉狀。亦當連坐者。一員。某處任官。黃用朝廷選擢任用之後。所舉人犯入己賊。竝當同罪。其餘賊私。及不如舉狀。亦當連坐者。一員。某處任官。黃用任所一員。某處任官。同右謹具如前。臣伏見上件官等。竝是直諒多聞。堅正有守。資于風識。濟以文采。堪充三院御史。臣今保舉如朝廷選擢任用之後。犯入己賊。并其餘賊私。及不如舉狀。竝依所授敕命指揮。甘當同罪。連坐。謹具狀奏聞。伏候敕旨。

乞楊開充大理少卿狀

臣等伏見國子博士楊開。材資敏通。檢履端約。深達時務。尤長法律。先曾刪修銓司敕條。至今行用。稱爲允當。昨日知絳州。服除。赴闕審官。三班院見。各奏辟刪修。本司條貫。觀其議法詳平。正而有守。臣等今保

舉堪充權大理少卿公事。如經朝廷擢用後，犯正入己贓，及不如舉狀，竝甘同罪取進止。

兼侍讀學士舉官自代狀

臣伏蒙聖慈，除臣兼侍讀，準敕合舉官自代者。竊見尚書戶部郎中、直史館、張瓌，博通古今，練達典故，有國僑博物，胥臣多聞，可以進讀羣書，入奉大對，臺閣久次，朝廷具知。若以代臣，允協公議。

論增經術取士額狀

臣等竊以六經傳先王之道，教化根本。舊制試進士，止以詩賦策論，簡拔才俊。其實少有專門名學之人，諸科雖能誦記章句，復又不通大義，施于有政，則又面牆。所以前後論取士者，常以此科爲言。景祐制書節文，始令禮部貢院舉人通三經以上，進士諸科過落外，許自陳嘗于某處講授某經，貢院別試經義十道，直取聖賢意義，解釋對答，或以詩書引證，不須全具注疏，以六通爲合格。講誦精通，具名聞奏，乞差學官，或御試覆試得中，具對義粗通取旨。此則聖朝扶進經術，漸復兩漢射策之舉也。慶歷六年，應詔者四十人，合格者八人。進士諸科各四人，皇祐元年，應詔者八十二人，合格者七人。進士五人，諸科二人。今年投牒進士七十七人，諸科五十人，凡一百二十七人，比之嚮來，數目倍多。豈非詔書開勸使然而利祿誘導之至也。條制每科不得過五人，比再經覆試，又須通落，獎進之路，似未開廣。恐學者稍怠懈，美業中止。臣等欲望聖慈，稍增人數，以勸來者。四方聞朝廷參用此科取士，莫不靡然向風，潛心經術，則彬彬之舉，兼成于前代矣。臣等見精加攷試，須至具狀奏聞，伏候敕旨。

代中書密院傳法院罷堂奏狀

臣等伏蒙聖慈。以傳法院譯乾元節新經罷堂。就本院特賜臣等御筵者。千載挺生。屬感符而毓聖。五天駕稅。慶繙貝以成書。仰契真乘。永延壽歷。方繕寶函之目。將升綈几之觀。梵教旁流。增演觀花之義。宴慈申錫。更均在藻之仁。臣等叨預鼎司。竝游譯館。祝後天之洪祉。參問佛之勝因。彌愧空疎。薦霑膜飫。

奉使北朝先狀

備完使傳。取道治封。趨賓館以無階。辱珍函而猥及。瞻言勤意。但切感懷。夙馳星馭。已講于慶儀。復次樂都。遽承于染翰。卽披光範。深愜鄙懷。

叨備使華。已通邦好。載馳輶傳。俯屆藩垣。遽辱緘滕。但深銘鏤。

將命宸庭。修聘鄰壤。征輶夙駕。將次于會都。賓館爲容。卽瞻于台座。豫爲歡怵。曷罄言陳。

參聯華隰。修講鄰歡。飾輶傳以載脂。將臨于會府。望門牆而延脰。卽覘于台儀。豫此欣愉。實爲榮幸。

信書將命。恭修邦聘之儀。行傳戒塗。適次都城之壤。辱榮函而俯及。荷謙德以彌沖。卽詣賓階。豫歡私悃。

議

代中書詔定大樂名議〔案〕宋史定大安樂名。在皇祐三年。禮臣王堯臣等上共議。

准今年二月二十三日敕。准今月二十一日詔。敕中書門下。朕聞至樂之大。統和天人。奮雷先聞。萬物蠢

若聖人觀象于豫。以崇薦配。百代之興。咸有制作。眇觀載籍。旁採緯牒。詠功象德。率著號榮。若顯魯題。根英之文。陶虞紀明。紹之美。三王殊憲。稱謂炳焉。降及後世。鮮克遵尙。惟東漢命以大予。開元自云唐樂。雖距古未遠。而雅于言道。希風咸夏。朕所慕焉。故前詔執事。訪圖博採。將以立度出均。攷音正律。謹權審量。備器協舞。以定本朝之述。作用彰祖考之謨。烈夫名生于義。義出乎實。名正言順。然後事成。而禮樂興焉。庶幾光輝。永昇來裔。其令兩制及禮官。參稽典制。議定國朝大樂名。中書門下審加詳閱。稱朕意焉。故茲詔示。想宜知悉。臣等謹議曰。臣等賤僮。不足以明國朝大樂。竊尋前志。探觀往古。受命而帝。聖功告成。守文之君。治道大備。濟斯民于富厚。流至化于洽平。鮮不攷合中聲。序正雅樂。效法功德。章明祖宗。宣之于鐘石管絃。著之于干戚羽籥。乃復揣稱治象。形容德美。度曲以颺其義。立名以統其實。崇薦郊廟。允諧神人。感召至和。以降嘉生。咸池而還。作者代有。韶夏大濩。從來尙矣。允屬熙盛。詎宜曠闕。伏惟太祖皇帝。謚武而聖。大度且仁。燮伐拯于橫流。揖讓馭于歸運。平殄僭閭。掃除荒屯。天地號爲重開。區夏繫其再造。一戎底定。萬世以基。太宗皇帝。以聖域優入之姿。膺神器傳歸之重。協承駿烈。紹敏武功。越人奉圖以歸。忠參墟銜璧而服罪。正朔所隔。亦旣來同。文告是加。無思不服。廣英材之教育。盛王官之辯論。審克邦憲。祖尙人文。俗阜刑清。官修政舉。太平之盛。于斯經啓。眞宗皇帝。體全上睿。道合至眞。昭前之光明。而濟之以文采。化下以清淨。而納之于忠厚。謹任吏之法。嚴取士之規。爲官擇人。程才濟物。規安億姓。撫和諸戎。荒服遂要于衣裳。老人不識于金革。符命紹至。封禪勒成。咸秩上下之神。垂矜大小之獄。倉廩充實。囹圄空

虛炳焉聲明。絕于稱謂。伏惟皇帝陛下。欽明燭治。仁厚好生。躬至德而若虛。求昌言而如渴。懷柔異俗。休息邊氓。繼好躋林。納附河外。簫勺羣慝。弓矢載戩。屏弋獵之娛。稀囿游之幸。升世室之配侑。同戚藩之禁樂。刑書用其中典。民賦從于薄斂。積四聖之致治。逮百年之勝殘。山川鬼神。亦莫不寧。蜚魚麋卵。皆有常禁。海內蒙德。薰蒸太和。于斯時也。樂典未章。號榮不立。此有司之失。弗能究宣。陛下開至明。發深詔。敷求識微之士。逮及承學之列。求端中黍。造始黃鍾。攷律和聲。稽器定制。五音六舞。各得其準。習隸樂府。以竟三聖之功。德莫盛焉。臣等申被詔書。參定明義。謹按太常天地宗廟四時祠祀樂章。凡若干首。以安名曲。尋其義也。豈非本道德政教嘉靖之美。亦沿神靈祖考安樂之故。名旣素定。義足欽承。詩美率由舊章。記稱孝莫善于繼志。書言惠莫大于安人。臣等議上國朝之樂。宜名曰大安。乞宣付中書門下。審加詳閱。謹議。

代中書密院覆議大樂名狀

功成而樂作。治定而禮興。百王之隆。道雖同貫。六代之盛。樂皆殊名。示沿革之匪常。明制作之遁出。移風俗而美教化。薦上帝而配祖考。以成功而告神明。非甚盛德。孰能預于此。往者。唐失根統。倒持罇柄。蕩無維御。遂至陵遲。日尋戈兵。時悼塗炭。九土分裂于下。三光錯繆于上。鬼神失其常祀。天地發于殺機。甲子一周。閭位五姓。天而旣棄。唐德且厭。華亂故駿。命集于我宋。伏惟太祖皇帝。英武挺出。歷數攸歸。屬天道之與能。膺神宗之內禪。懲艾僭暴。顧嗟溺喪。奮耀霆斷。龔行電討。芟除不軌。勤恤有生。經啓人倫。靖一天

字。兵賦悉還于公上。權網不假于近習。除吏歸于尺一。立法約于三章。尊本京師。維制方夏。陶甄獨運。禮樂自出。全安諸國之後。崇立百神之祀。象緯宣精。人神享德。規模宏遠。基圖篤厚。開濟萬世。卓無與倫。太宗皇帝。天人宅衷。謳歌在聖。嗣膺神寶。續立武功。薄伐晉人。遂夷并壘。提封畢入。象譯具通。敦先儒雅之風。周咨政道之要。時文載郁。俊民用章。置讞刑之官。建藏書之策。講求世務。矜恤民隱。賦斂蠲其重法。更徭著于輕科。黎庶安生。刑罰幾措。眞宗皇帝。續戎二后。神容昭通。率由民彝。躬行儉約。勤勞機政之總。愼重刑賞之施。選舉廉能。賓與俊茂。右文崇術。勸農恤刑。德讓興行。吏治循厚。深恤民之愛。講和戎之利。戈革弗用。疆陲底寧。瑞命宣臻。頌聲翕作。始奉符而行事。乃昭姓而刻號。諸神受記。羣望咸秩。炳焉之美。同風三代。皇帝陛下。體慈上聖。迪惟前憲。臨下崇于舍垢。在宥本乎好生。博愛無私。甚德而度。紹修戎好。銷戢武蠶。事郊廟以肅祇。撫宗藩而敦睦。肅若舊典。祠于明堂。升侑尊先。泛澤勞下。積累聖之忠厚。滲生民之骨髓。物罔微而不遂。澤靡遐而弗臻。上下相安。表裏悅穆。思欲播祖宗之洪烈。揚雅頌之正聲。光施尊名。章示後嗣。同符韶舞。常爲稱首。故深詔執事。博延識微。乃者造計秒忽。攷聲立均。通鍾律之和。正干羽之綴。申命近列。制名大樂。俾援典禮。參加詳實。臣等欽惟藝祖之戡暴亂也。安天下之未安。其功大。二宗之致太平也。安天下之旣安。其德盛。陛下之承聖業也。安祖宗之已安。其仁厚。又享祀時至。神靈嘉樂。故郊廟樂章。大率以安名曲。臣等以謂國朝大樂。請如兩制及禮官所議。名之曰大安。

文恭集卷九

表

中書賀南郊祥瑞表

報本申虔。奉符展窳。天心顧享。福應宣章。瞻列象之殊尤。浹羣心而聳抃。中伏惟皇帝陛下。德兼巍煥。運格清寧。敦慈寶以庇民。握道樞而裁化。念大事之在祀。逸典竝修。本至誠以感神。精心弗墮。比者因天心之紀至。就陽位而卜郊。惟洛櫃之祕文。乃霄晨之丕貺。戒嚴法衛。茂對鴻靈。爰自翼室齋居。清場宿設。躬致芬馨之薦。允迪純嘏之祥。十輝昭融。延和于北陸。五雲絢藻。垂蔭于宸中。旋整駕于殊庭。用致恭于真祖。圓靈載廓。素魄徐升。聿昭三善之猷。迴發重輪之彩。諒皇穹之鑒佑。著睿感之敷聞。胥契亨辰。茲爲至瑞。臣等幸陪禋祀。預覲嘉徵。慶躍之誠。倍異倫品。伏望宣付史館。以播英聲。

代中書樞密院賀司天臺奏壽星見表

臣某等言。伏視司天監奏。丙位上。占見壽星出見。光明潤澤。謹按景祐乾象新書占曰。老人一星。在弧矢南。一名南極。主帝王福壽者。月旅陽中。星昭丙次。前告壽星之兆。迴含明潤之輝。凡遇亨嘉。同歡瑞福。中賀

伏惟皇帝陛下、廣淵成聖、聖穆居尊、恭己當陽、順大中之五事、撫辰育物、協通政之四時、裁成七政之和、嚮用九疇之福、先青祇之中候、見南極之上躔、彌紫宙以收氛、臨黃衢而泛彩、老人垂象、俾下土之觀文、太史獻占、慶後天之膺壽、有光聖日、增煥祥編、臣忝冒近司、預聞嘉應、奉億年之瑞貺、均萬宇之歡心、永保無疆、光昭不朽。

代賀立后表

臣妾言、恭以紹興大寶、崇建長秋、凡在幅員、孰不欣抃、伏惟皇太后殿下、慶鍾沙麓、光協壽房、蘊四德以兼徵、契千齡而偶聖、玉衣之夢、素協于奇祥、金穴之華、早膺于妙選、屬大橫之纘服、奉榆翟以正名、抑有典常、允歸謠頌、永正軒龍之體、長扶璇極之尊、與乾同休、配坤惟厚、臣妾無任歡呼屏營之至。

賀奉安三聖御容表

臣某言、伏聞南京鴻慶宮成、奉安三聖御容、禮畢者繼、敞新宮、續成先志、鼓鐘所落、鳧藻相歡、臣竊以別寢之興、蓋尊王業、原廟之設、實廣孝思、稽克構于聖功、兼表崇于文教、光昭宗祏、慶洽天人、伏惟皇帝陛下、凝監太清、紹休聖緒、觀文闡化、握河洛之坤珍、受命宅中都房、心之星次、惟藝祖肇基之地、經先皇駐蹕之巡、特創琳宮、阜安鼎邑、殊庭中廢、宸慮載凝、濬發德音、勃興寶構、森倚萬楹之盛、仰延三后之靈、孝子求神、固非一處、先王不寐、迺懷二人、奉漢寢之游冠、尊軒臺之睟表、龍舟夙發、羽葆親臨、申命禁林之臣、奉寧法物之駕、神明氣象、胥接二京之間、朝野頌聲、共歡千載之際、臣遠守郡土、久去國門、方童觀之

時阻窺朝美。與壤謳之俗。竝樂時康。

代僕射寇相讓恩第一表

絲綸誕告。有命自天。冰炭交懷。跼身無地。謝中竊以宰相之職。政本是毗。寅亮天工。翊宣人紀。上以應泰階之耀。下以副巖石之瞻。當一人注意之求。處百度仰承之地。是故明詢于衆。昆命爾龜。周建公棨。不敢必備官之制。漢虛相府。用以待遠方之賢。蓋倚任之絕崇。在授受而斯允。如臣者。本惟常品。素昧遠圖。幸以遭遇先期。忝塵邈列。偶繼協華之旦。彌敦敝舊之私。爰立巖廊。對掌衡軸。違戢干之在運。獲視承平。慙借箸之無謀。蔑伸毗贊。內惟孤直。終荷保全。矧又總職樞庭。聯榮鼎坐。奉循成憲。欽率乃司。齷齪無稱。容容茲愧。猶復授以元戎之旌。纛佩以丞相之印章。節制十連。董齊千乘。離宮司鑰。仍膺冊畢之恩。專閫剖符。更委含岐之壤。名數增盛。眷命有加。實儒素之極榮。豈生平之所望。自知甚熟。享大爲憂。惟恪守于攸箴。亦絕聞于報政。宴安厚味。荏苒流暉。企員闕之百常。居懷就日。奉細書之一札。但謹宣風。比者聖詔遐臨。皇慈俯被。曲承持節之召。俾展執圭之儀。獲面威顏。深諧志願。豈謂遠頒恩制。復委台司。忝西臺內史之崇。升天官常伯之貴。明敷有著。峻舉徽章。聽命以還。撫膺自失。蓋念臣久叨重位。過沐鴻私。論報無階。踰涯旣甚。種種之髮。復因病而得衰。諄諄之心。彌畏滿而招損。敢復昧進。重增其尤。豈可再以樗材。玷于柄用。非止尸官充位。瀆乃朝彝。固當速戾傷年。戕其生理。實貪生于盛世。須瀝懇于露章。伏望皇帝陛下。垂諒。恐驚見矜。悃款念隆。器之無假。寢茂渥于已行。別擇良能。實諸丞弼。如此則微臣保量力之訓。庶道人

言公朝得授方之規無傷國體傾祈至切戰悸無從

第二表

伏蒙聖慈以臣陳讓恩命特降批答不允者。怔營之懇。虔仰于至聰。溫密之言。曲形于優諭。捧讀惶灼。罔知所裁。中竊以讓爵于朝。前經之垂訓。假人以器。往聖之攸箴。矧惟台宰之崇。實居衡軸之地。儻茲虛授。曷允具瞻。如臣者。識味遠猷。材惟常品。獲遵亨嘉之會。濫塵顯重之資。被眷兩朝。承榮四近。踐陰陽調燮之任。莫代天工。贊夙夜宥密之謀。無裨晝訪。充位之譏。攸集嚮明之願。彌敦乃至授鉞齋壇。建牙戎翰。廟星階之著象。仍玷台儀。剖麟契以長人。蔑揚闡政。洵易鑽楛之序。載深存闕之誠。一節以趨。猥承于君召。介圭入覲。方覲于帝暉。豈謂皇帝陛下。靡間疎庸。曲推圖任。特頒揚庭之命。再升調鼎之司。忝八柄于西臺。冠六卿于會府。洪惟真館。欽奉仙宗。式峻使名。用優寵數。聆深辭之誕告。撫疲質以載懷。神福于謙。實害盈之可畏。民惡其上。且致寇以是虞。爰瀝丹心。仰通尺奏。未動穹旻之聽。益增冰谷之憂。須更露于由衷。冀必回于渙汗。伏望皇帝陛下。念僥榮之太甚。察量力之不遑。申飭攸司。亟停前詔。庶使廟堂高位。免貽不稱之羞。犬馬微軀。更荷曲全之惠。

代宋狀元謝及第表

〔案〕宋庠及第。在天聖二年。宿卽是勝進士。

太常試藝。謬參籍奏之榮。法坐第名。濫塞言揚之選。沐清光之下濟。仰華旦之親逢。祇荷寵靈。伏增欣懼。中竊以羣材博舉。鴻化肇先。慎簡乃僚。紀歷代之寶訓。譽髦斯士。垂大雅之美談。克樹泰寧之基。允爲盛

德之集。若乃右賢撫運。左籥隆文。率由上聖之姿。規恢前帝之憲。伏惟皇太后淵猷冠古。景鑠在躬。軒曜儲靈。有成湯之骨法。坤儀納順。茂太姒之音徽。鋪昭正始之風。述宣中壺之化。而自鴻階紹建。寶統嗣興。授玉几之願遺。財成樞務。總金聲之條貫。登翊聖真。率循豐茂之規。迄用緝熙之典。故得九清乃睠。萬寶由庚。諸福之物竝臻。至治之隆胥洽。靖共庶位。招致羣廉。舉師俊之彝章。下發中之溫詔。旌賁之命。相望于巖中。物色之求。駢臻于闕下。申飭辨材之制。謹嚴飲墨之規。輟邦直于中司。簡朝英于上笏。光昭盛節。委重斯文。如臣等涉獵有年。削靡無狀。士鄉充賦。偶承乏于計偕。英穀須才。固絕希于聖選。撫空疎而增惕。備程品以奚堪。豈謂宸造曲成。容思狎至。褐衣賜對。肩帝宇之凝嚴。容藻躬臨。竦天姿之溫穆。薦登茂級。獲寘榮塗。錫再命之身章。曳婁有煥。頒十行之言綽。雅奧增華。席鴻濡以寢深。委賤質而奚報。臣等敢不慎修履素。惕奉紳書。慕漢吏之惟良。副堯心之在宥。恪居官次。益敦宿業之方。懷畏簡書。彌勵夕冰之節。少酬覆露。共誓捐糜。

湖州到任表

空乏之才。坐塵于册府。輕凡之質。驟忝于列城。郡望閒華。朝恩光泰。尸承在始。隕越無從。中謝伏念。臣奮自孤生。略無異操。偶階末技。始籍中銓。曾大以來。門業不振。平素所望。器分有涯。叨于誤知。會其乏使。拔從凡品。寘之道山。太平養棟之庭。茂彥發礪之所。名臣輩出。卿幹森呈。而臣風識素淪。藝文特誦。納汙在上。竊吹其中。抱槩十年。無裨至治。挈瓶一介。有玷大猷。頃從舟乘之還。嘗奉銓曹之領。番休延閣之直。趨走

亦墀之塗。亦在序之通階。有宿官之緒業。非不知書筵暇豫。臺職優崇。相與淵雲之徒。樂道堯舜之事。而臣母老垂白。人意戀生。不勝懷土之情。遂有祈天之奏。乞從閒郡。自効薄軀。展其烏鳥之心。慰彼寒泉之思。伏蒙皇帝陛下。賜恢仁覆。推廣孝心。不違之顏。煥生于咫尺。曰俞之命。驟霈于穆清。輟七閩之遠藩。授三吳之近地。俯鄰州曲。介在江湖。風土平調。道塗夷近。得以行過廬冢。奉侍版輿。人子至榮。紆蒙少輩。君親大義。論報末階。臣已于今月二十三日。赴上訖。初宣臺劄。稍見城黎。諭聖心在宥之仁。視雅俗如傷之意。而茲土差沃。去歲汔康。比及春來。頗有飢者。未到任前。通判虞部員外郎劉琦。奉若勤恤。虔于救存。廣施振業之方。幸無流亡之患。今夏蠶既多縷。麥亦有秋。諒開豐懋之占。深洽熙平之化。戴盆之下。胥燭于天光。鑿井之餘。同均于帝力。而臣下車甫始。去國迢遙。孤于外官。不勤金革之習。任以煩事。又爽宮臺之能。獲守偏方。預班寬詔。勉圖拙者之效。庶逃候人之譏。惟竭愚衷。以對靈施。

蘇州到任表

江海腐生。本惟一介。東南守將。併忝二藩。循幸已多。祇榮惟懼。竊念臣在器凡近。于才樸疎。起自後門。奮從末校。清閒之始。天穀賜收。空乏之間。書林見育。幸預遊于時雋。得仰齒于朝闈。行避蹊邪。志希樹立。終寡適時之用。曷殫當世之宜。亦嘗出領倅車。再懷守紱。竭一心而營職。展四體以從公。幸奉官箴。不累刑史。而門戶多難。年志早衰。入麗正以校書。忽踰五閩。任奉常之博士。凡涉七霜。去歲甫畢喪期。僅存皮相。間關歸國。黽勉服官。會收累稔之勞。且旌羣吏之治。太微郎位。獲登一臺。司會計官。比更兩局。有尸廩稍

之入。無裨泉賦之贏。然而職業優游。保無玷缺。朝廷寬大。足養資名。清光在瞻。榮塗可企。但以亡親朽骨。久滯攢塗。微臣槁骸。常憂先露。幸中吳之闕守。復故里之與鄰。因瀝血誠。仰干宸聽。伏蒙皇帝陛下。大恢仁憫。深照丹懇。滌發天慈。下從人欲。藩城之任。旣席厚恩。臺觀之名。尙塵前職。遠離都輦。訪問路岐。自淮以南。雨水時若。維夏之際。蠶麥善收。便道過家。去月至郡。井絡繁庶。土物清佳。款太伯之遺祠。高風如在。望闔閭之故里。喬木猶存。廡舍凝虛。俸入優腆。茲獲寧于血屬。前足治于親喪。秋毫之微。皆出帝力。夕冰之操。彌厲臣心。敢不肅奉詔書。慎司刑典。更徭之役。務恤下貧。輿賦之期。用勤公上。勉圖薄效。用答至恩。

兩浙運使謝上表

祇荷詔除。就承使乏。用過本量。恩越常均。忖己無堪。銘襟增悸。謝竊念臣才能有限。資名素輕。直由腐生。端遇聖日。因乃末技。玷冒周行。升預書筵。無訂正之益。進參計局。乏鈎校之勤。絕補事經。空尸廩稍。加以不天。遘閔。蚤歲喪親。至使遺骸。久在攢壤。常憂先露。貽累後昆。幸蒙曲慈。往俞更郡。俯鄰州里之境。通治閨門之私。申錫告文。聽歸襄事。前後十稔。內外六喪。取資圭田。與耐真宅。釋犬馬之負。頓覺累輕。撫螻蟻之生。未知死所。況非木石之偶。豈普丘山之恩。方還本邦。復布前誥。寬大之意。一體上仁。簡易之方。仰遵治要。庶奉三年之計。或收一日之長。不圖大恩。超使本道。就頒臺札。加賜庫錢。光照里閭。色動車馬。歷守二吳之地。皆是藩城。就宣一面之風。不離鄉部。以布衣徒步之賤。有畫繡前驅之榮。寵旣至而忽驚。感且極而興歎。何則。提封廣斥。與賦繁并。持按察之權。居澄清之任。方于爲郡之體。不可同日而言。民隱難于

究知官邪資于發摘。游交聯絡于屬郡。親戚布滿于故鄉。人倫則有義有恩。正道則無偏無黨。一斷以法。人且疾其少恩。稍寬以私。衆必譏其弛職。已行之命不可免。至愚之資何以勝。任重才疎。功微賞泰。此蓋伏遇皇帝陛下。天光均燭。雲澤就施。罔遺孤外之臣。謂可東南之使。大君有命而見用。雖出誤知。小臣操心之甚危。敢忘圖報。誓將灰隕。以答寵靈。

代趙漕謝轉運副使表

忽奉中俞。備使外計。人共駭其非據。臣亦慙于罔功。臣猥以謏才。濫膺煩使。一持使節。三易歲華。以其承命之勤。委以救荒之政。凡捐除租賦。使無追呼之擾。與振發食廩。以消流亡之憂。皆聖訓之所裁。顧臣勞之安有。方自陳于疲薶。庶少竊于安閒。成命再加。初心有愧。況臣孤根難植。小器易殫。自顧缺然。無左右游談之助。其誰致此。盡聖神特達之知。恩大難酬。感深以泣。恭惟堯仁宅下。舜智察倫。謂著在三尺之文。莫非寬大。故差擇百城之寄。要在廉平。不維迂儒。亦玷華選。臣敢不祗承德意。遵奉詔條。期在富民。敢較米鹽之細。謹于律下。誓懷冰檠之清。

改左司郎中表

考課四期。增秩二等。寵光游集。榮懼交懷。中竊念迹本單平。性惟介拙。起于凡品之末。遊此聖圖之亨。猥用徵才。遂叨非據。內廷視草。蓋出于誤知。左掖握蘭。亦緣于虛授。仍尸史局。兼侍經帷。久玷高華。日重大官之費。三蒙宣召。晚躋浴殿之深。榮遇罕階。忠誠自信。上不欺于仁聖。內無愧于神靈。然而才匪患多。學

惟寡要。徒軋抽于制命。莫宣暢于神規。以至審克刑章。講修牧政。皆上資于聖斷。徒謹守于詔文。無所建明。有慙曠素。加以方愚向國。孤遠立朝。本無左右之容。不爲朋黨之計。貴游可憚。近習罕親。常憂三至之言。有感四聰之聽。方虞幽黜。敢冀寵遷。豈謂記錄年勤。推行恩典。進左行之首秩。沛內史之榮章。竊愧負乘。益增隕越。此蓋伏遇皇帝陛下。曲加金度。深諒樸疎。施及孤臣。擢茲顯級。敢不勉思深訓。飭厲薄躬。務在守官。不敢遺力。期仰酬于覆露。當永誓于私捐。

轉官乞回贈祖父母表

臣某言。今月十二日。閣門告報。蒙恩授臣兵部員外郎。依前充職者。超霑崇恩。越遷茂秩。聳聞成命。增悸幽衷。懷感之餘。無言以寄。中謝。臣聞天以監觀而爲德。其聽孔卑。君以威感而受人。所愛惟溥。矧至仁之御世。務廣孝以導民。敢率丹懇。仰干神睿。難寢叫閭之欲。預增惴谷之憂。竊念臣地緒本寒。人資至劣。謬操孤技。端遇盛辰。獲躡仕階。造叨從蹕。薄才緜力。曾裨補之未施。厚訓深辭。願演裁之莫暢。日禡禁林之被歲。尸長府之錢。豈圖誤簡清衷。旁稽陟典。愍爲郎之久次。特升秩于七兵。勞則素愆。恩惟加厚。當卽虔于制命。然內迫于私誠。臣曾大以前。不及進官。歲時所祭。未有名稱。亡祖臣某。祖母某氏。越在幼蒙。卽承誨育。早從厚岁。常慨先慈。而臣遘會亨嘉。尸承禁近。盡事君之節。卽受教于樸忠。推本祖之言。忍獨專于榮寵。臣欲乞將聖恩。欽授兩資官。回贈臣祖。祖母。一官一邑號。庶伸愚志。獲賁幽局。伏望皇帝陛下。滂發天慈。俯從人欲。收曲恩于上閣。漏麗澤于重泉。魂而有知。應當淪骨。臣雖不肖。敢忘捐軀。

文恭集卷十

表

代中書樞密院陳乞御製明堂樂章表

近奉聖旨。令臣等分撰明堂樂章者。崇饗之初。方修於闕典。登歌之首。宜冠于彌文。敢冒大猷。不勝至願。竊以明堂謂之世室。政教所班。大饗寓于郊宮。理則未正。聖惟善述。道乃從隆。伏惟皇帝陛下。純輯羣元。欽修百祀。馨香嘉粟。以虔郊廟之思。祇戒靜專。以篤神明之接。比承天表之德。大擁時邁之休。然猶增秩。無文益追來孝。企總章之嚴配。卽太寢以薦誠。稽參厥宜。著定其當。合祛天地。參侑祖宗。迴臻變禮之方。溶出淵衷之慮。有司得奉于隆旨。若時絕企于清光。而又度曲制名。納言發德。親承沖旨。爰命具臣。俾牽軋于非辭。將登參于雅奏。內循疎拙。曷足形容。恭聆明詔之音。一時增惕。深惟盛德之事。千載罕逢。至于賓延泰尊。哀對元聖。必資睿律。用播樂章。乃可以交三靈之歡。導百順之祉。甘泉故事。開元舊儀。咸著歌辭。具存篆冊。粵若章聖受元符之錫。祇答榮號。時則徇弼臣之請。親作法曲。一十六章。近則陛下當景祐之隆。聿修祀典。居常因聽政之暇。亦製雅歌六十八章。隸習奉常。流傳樂府。以承上下之祀。用膺穹厚之

祥乃今五室既嚴。九筵是度。人祇翹祀。神瞽佇音。睿作有先。工歌難曠。其明堂大饗。天地三位。及祖宗三位。酌獻樂章。欲乞聖慈。特從御製。用稽前憲。俯照下情。暫授寶跗。載摛容藻。薦功祖考。揚德天人。俾肅雍來享。錫之以難老。與猗那長發。摠之于無窮。

代中書樞密院乞乾元節用樂第一表

今月二十七日。入內都知王守忠等。傳宣中書樞密院。爲魏國大長公主薨。將來乾元節。更不作樂者。外館在喪。感深于聖性。誕辰廢樂。昭發于德音。博稽降服之成。參酌祝筵之慶。輒沿衆欲。須冒主聰。伏惟皇帝陛下。錫類積戎。寶慈立愛。率堯仁而陸族。諧舜孝以導民。敦叙成風。濟惠和于天廚。慎徽流化。格忠厚于人倫。徇齊蓋本于生知。淳至匪由于外獎。近者魏國大長公主。虧和感疾。收視凝精。診淵慮以焦勞。形至誠而懇到。候間旁午。禳禱駿奔。特紆法駕之尊。躬展家人之禮。泫然流涕。親爲舐腫。極周文之小心。無漢后之難色。掩前王而特出。較至聖而孰能。秦臺終迫于上賓。沁水俄從于東逝。訃聞屢悼。往臨盡哀。五日廢朝。頻卻大官之膳。千秋彌節。豫停韶樂之音。馳遣近璫。諭宣沖旨。尋禮官之獻議。原主黨之致哀。已除功慘之喪。得承吉祭之事。旣立文之有素。于用樂以無嫌。況復華渚誕期。綿區至慶。相趨萬玉之會。大設九賓之朝。重譯所通。遠方皆至。輯瑞之藩侯。陪覲執珍之夷使。在廷稱薦。萬年之觴。宣覃一日之澤。薰鬯待奏。絳羽侍儀。如停金石之音。懼缺天人之望。形容盛德。本資羽舞之蹈揚。感召至和。實賴鹿鳴之宴樂。伏望皇帝陛下。勉遵彝典。稍抑至懷。收旣往之盡傷。順無疆之祝頌。濡然遷慮。許一奏于成英。鏗爾發

音用參和于夷夏。不勝至願。實望曰俞。

第二表

功服遘慘。誕節卻音。嘗貢奏函。冀回沖旨。比奉批章之答。未蒙從欲之俞。聆命載兢。仰高增跼。伏惟皇帝陛下。孝思天挺。容德日躋。履陶唐光被之資。躬天乙懋昭之美。體慈爲寶。撫邦族以威和。立愛自親。穆朝風而歸厚。近以齊國大長公主。案前表在未追封日。此表在已追封後。故魏國齊國異稱。在晦明生疾。奄忽冥升。棄集鳳之故臺。邈乘鸞于層宇。陛下悼深尊屬。念積諸姑。緬懷賢懿之風。增重穆清之感。亟傳聖誨。申敕具臣。俯當甲觀之誕期。趣罷宸軒之奏樂。雖天懷之嘉慕。有越常均。而邦典之孔明。未違往制。非止正期之絕服。已經外次之致哀。比及宴辰。累踰旬浹。以禮文而取正。于樂事而得施。自貴主之愆和。比上賓之復魄。乘輿再駕。冠蓋相望。積齋吁之焦勞。虔靈祇之請禱。理迷與善。氣迫歸真。淵衷足貫于神明。至孝增光于列辟。況復誕彌之節。實居朝慶之先。臣工就望以揚休。夷夏駿奔而歸福。安可以闕英莖之薦壽。停金石之備儀。伏望皇帝陛下。勉循至公。少寬寧戚。采容臺之上議。許樂府之奏音。慰天人欣載之誠。副臣庶祝延之意。惟垂開可以釋翹危。

湖州乞爲太傅謝安置守冢禁樵採表

春秋之記。太上立德。其次立功。謂之不朽。聖人之制。能禦大災。能捍大患。則必見祭。至于封表闋墓。禁止樵採。尋所來而蹇繁。蓋難得而疏舉。雖聖賢相去。事業有間。迹其大指。所以褒德旌功而已。竊見晉太傅

諡文靖公謝安。挺生江表，忠存王室。甫從衡門，未解韋帶。已積台弼之器，便繫蒼黔之心。及起東山，相簡文帝。摧桓溫九五之逼，破苻堅百萬之衆。名蓋當世，功濟諸華。號文武之偉人，爲風流之稱首。張文規所撰吳興錄，稱安墓在長城縣南六十五里。初葬建康之梅山，爲陳始興王叔陵發其冢。裔孫夷吾爲長城令，徙于縣南三鴉岡。按長城卽今長興縣。臣昨受詔除出忝州任，到官之日，遂移本縣訪墳柏所在。據大理寺丞知縣事裴大亮狀，于縣南萬安鄉三鴉岡訪得安冢，履地十畝有畸。古老相傳謂之謝墓。田路去縣，與吳興錄所載略同。墓傍社戶十六，歲時祭拜，舊有叢祠，不堪其陋。臣量破公省錢，委大亮移置佳處，重建祠堂，凡屋十二，遣工往塑其像，冠服儀衛，悉用當時之制。然祠墓差僻，人迹罕至。若無給復之守，恐罹樵牧之患。昔信陵濁世之公子，漢初蒙守冢之給，介推霸者之陪隸。晉復啓環山之封，況如安者，高德卓然，雖人隔本朝，功訖前世，穆然清風，猶在庶物。臣每見郊丘所肆赦，前代忠烈立廟所在，莫不申飭長吏，嚴加虔奉，欲乞聖慈，特降敕旨，于安冢旁，申禁樵採，給復五家，以備洒掃守護之役。敕州縣官吏，歲時祠祭，以明聖朝紀元功，褒有德之意。臣預頌詔書，無補風化，干冒冕旒，臣無任祈天俟命，激切屏營之至。

代中書謝詔書止絕內降表

宸襟燭理，明詔宣音。杜邪枉之險踐，歸公平之正路。欽承睿旨，抃切愚衷。謝中竊以王道之興，必由正直。國柄之本，實繫賞刑。賞信則內外服焉，治功日起。罰中則羣下肅若，姦慝不生。屬在睿明，張茲紀律。伏惟皇帝陛下，敷施治具，總攬政綱。有聖主廣被之資，恢王者無私之度。信賞必罰，濟庶績之熙凝。昭德塞違，廣

百官之臨照。勳修前憲。率繇至公。克守盈成。遂底嘉靖。然而承平浸久。涵養益深。儉薄之俗匪敦。進躁之心易動。紊公朝而幸進。趨私路以祈榮。或蹈匪彝。自罹常法。規于貸免。陰務營求。實繁內出之文。深瀆至聰之聽。廓然聖斷。嫉此澆風。以爲制治之元。大于一統。蠹政之弊。戒在多門。因成饜于合宮。訖宣恩于層觀。中坦明之定制。塞流弊之濫源。或許自新。庶幾且格。實契澄清之理。足消貪昧之風。臣等忝備近司。親承隆旨。雖無才見。每誓樸忠。敢不仰稟訓言。恪謹條約。交相勗勵。期在遵行。

代中書樞密院謝瑞竹圖表

今月二十二日。使至中書。蒙恩賜臣瑞竹圖一軸者。翠本交枝。駢生于禁囿。細圖設色。首降于叢霄。啓鈿軸以相鮮。閱青珥之對聳。圭衡兼映。巾衍增榮。祇賀恩頒。彌驚寵賚。謝中伏惟皇帝陛下。惠孚動植。化洽平成。朱草不絕于史書。行葦見歌于詩雅。生物咸遂。本資始于至仁。沖氣爲和。乃薦榮于祥植。瞻言平圃。蔚產脩篁。擢豐壤以同根。出珍叢而異幹。扶疎竝秀。知造物之有功。託寓致靈。表太平之無象。慶昭絲賦。瑞等駢柯。有穆宸襟。興憐妙物。降丹輿而留覽。集華組以臨觀。命繪事以傳模。敷德音而錫與。臣等預瞻秀拔。仍拜章施。懽逢旦暮之亨。交勗歲寒之守。永惟祕奉。益切昭銘。

代中書謝改官表

宗紹明堂
泛恩改官

臣等言。近進劄子。以蒙恩改官。乞寢成命。伏奉今月十三日手書所讓。宜不允者。恩推異等。事出常均。比控丹愚。冀收華渙。終祕允俞之旨。復形敦諭之音。閱琳札之丁寧。被絲言之郁穆。敷誠莫克。祇寵逾驚。謝中

竊念臣等器非宏通。才惟凡近。起白士縫衣之賤。遭丕后席圖之隆。寢竊時榮。遂階弼用。處輔佐綱維之任。當表率士臣之先。雖夙夜戴君。勉竭自公之志。而安危在相。曷膺注意之求。固以聳曠素之深譏。憂負乘之至咎。幸遇竄聰至治。若古攷文。復五室之肇。歷廣六天而合祭。纂戎率義。侑祖及宗。齋戒有初。已卻大官之妙饌。登降攸恪。復虛小次之燕居。故得精志通幽。正陽升景。重陰屏沴。協氣宣和。三神鑒德。以孚休。四海述職而來助。泛加恩澤。洽被庶工。首從當軸之甄。渙發揚廷之告。參榮幸路。進秩升宮。雖君命之當度。顧人言之可畏。矧在具瞻之地。敢貪橫施之名。懼校議之或興。非家至而能曉。嘗首陳于底裏。亦面叩于規中。祈寢前恩。庶存小亮。而螻蟻之懇。不能動天。葵藿之誠。徒知向日。猥頒書詔。中諭旨辭。謂汗令之已行。形袞褻而彌渥。承命益增于隕越。循牆但極于凌兢。此蓋伏遇皇帝陛下。樂在均釐。釀于覃賞。湛蓼蕭之澤。及本芻狗之仁。深超從進律之遷。彌積在梁之刺。敢不欽祇休命。永昂忠圖。庶有答于曲慈。或少逃于清議。

謝敕設表

伏蒙聖慈。以臣入院。賜敕設者。視草充員。方躋于坡禁。班觴示惠。復儆于詔筵。羅方丈之肴羞。融膚寸之醪蟻。才林盛集。彙從畢臻。示恩禮之兼常。被光榮而加腆。此蓋皇帝陛下。嚮儒恢化。稽古上文。厚玉殿之詳延。深複門之睠遇。賜收萬品。召置禁局。逮涓日以祇官。復需雲而覃渥。大官先置。宴豆有加。關鼈署之靚深。增麟樓之赫昉。寵靈過泰。徒醉飽于太平。文采勿昭。詎章施于盤誥。惟圖勤悴。以答褒嘉。

辭免翰林侍讀學士表

臣今月初二日。閣門授到告敕二道。蒙恩除臣翰林侍讀學士者。祇奉褒遷。不任驚灼。竊以參侍帷幄。進讀典文。本優名儒。兼采時望。如臣者。末學庸受。一介野生。無他異能。但逢聖獎。謬加書名。曷暢代言。近以昏瞶。乞補閒郡。嘗傾奏懇。終寢俞音。忽被曲慈。擢升邈列。學術淺陋。職位高華。實匪至愚。所可充選。忸然承命。森若負芒。惟乞聖慈。歷簡耆明。改授鴻碩。庶安危抱。以穆僉言。

謝翰林侍讀學士表

冠居綸掖。久玷清司。參侍經帷。驟羣大雅。仰祇寵渙。伏積兢榮。中竊以入奉便朝。進敷往策。膺穆清之顧問。預禁奧之趨翔。無嚴徐之才。不足承于應對。有褚馬之學。乃可奉于諮詢。如臣者。性業顛蒙。才資底滯。記問爲學。曾莫究于言筌。篆刻攻文。絕無裨于治具。端逢亨會。漸竊榮階。歷右史之服官。辱西臺之書命。當彌文之盛際。獲忝代言。乏爾雅之深辭。無施潤色。久聳濫巾之誚。居懷襪被之虞。幸遇皇帝陛下。留好藝文。垂精道術。觀邈英之講勸。廣衢室之訪臨。延集諸儒。究研羣典。豈謂腐生無狀。上容誤知。升厠近嚴。預陪進讀。陳倚相丘墳之典。參張酺帷幄之臣。職近地親。材朽學陋。將何以助稽古道。開益聖聰。撫末學以空疎。臨多文而眩惰。徒尸清職。莫稱厚恩。伏遇皇帝陛下。恢闡堯文。循持禹律。探觀前史之載。昭鑒是圖。敷求承學之臣。謬延遂及。豈茲庸淺。足副束求。惟當采摘善言。鋪陳往行。庶虔資于一覽。期祇慎于官箴。

授侍讀學士舉官自代表

右臣蒙恩授侍讀學士。準敕令舉官自代者。臣伏視尙書兵部員外郎。天章閣待制兼侍講趙師民。學以爲己。善不近名。道術通明。德行純備。有多聞直諒之益。在正始中和之流。久侍講筵。兼聯制閣。儻甄升于禁職。俾進讀于祕書。是能滋廣睿聰。充副德選。

謝宣召入院充學士表

臣某言。今月六日。翰林待詔費瓘至臣所居。奉宣聖旨。召臣入院充學士者。王人俯降。天旨就頒。召置承明之廡。解去邇英之籍。寵褻驟至。榮戀兼深。謝中伏以渙號所孚。禁林爲重。漢家待詔。因金馬以名門。唐世尙才。自鑾坡而移院。官貴近而少輩。地清祕而罕階。深惟視草之難。宜得燃萁之敏。豈伊葞陋。足玷禁嚴。竊念臣材拙且疎。器凡而近。出自羈單之緒。違于熙盛之辰。進忝士科。預尸東觀。守符再假。漕節一持。孤于外宮。介在東鄙。分當文俗之使。絕希翰墨之游。出而誤知。矜其久次。沛然降劄。召言還臺。辱右史之珥形。玷西垣之書詔。進裨治體。無爾雅之訓辭。坐冒職儀。乏相賓之名實。乃尸朝委。兼攝中銓。僅遵唱注之規。蔑著品題之目。遽從給省。入侍經帷。陪諸儒之竝游。預羣書之進讀。欣屬好文之會。舉迷摘句之方。訖無忠言。裨于上聽。方虞襍被之汰。遽承出綍之遷。召拜北門。延升近署。申加邇職。參蒞史闈。兼二官之至榮。盡一時之清選。瑣材極陋。寵數踰涯。此蓋伏遇皇帝陛下。假借用人。曲成遂物。誤采頑愚之質。知無左右之容。以其嘗踐掖垣。經爲明命。亶無他技。竊有前勞。擢于禁奧之司。復責演裁之效。矧上清之冊府。倅

方丈之仙山。將何以寓直禁中。備穆清之訪對。誕敷天下。約雅奧之代言。始承命以若驚。終捫心而失措。惟當服勤緒業。率厲愚衷。恪遵四禁之規。祇守十思之慎。用殫志力。以誓粉捐。

舉呂溱王洙自代表

臣蒙恩除翰林學士。準敕舉自代者。臣伏觀起居舍人。知制誥。知杭州。呂溱。蔚登首舉。綽負宏文。尚書工部郎中。知制誥。充史館修撰兼侍講。王洙。號稱俊儒。通明經術。嚮聯詞掖。同掌命書。灼見猷爲。雅欽才望。願停茲命。回授若人。則公議有在。時談允穆。謹具狀奏舉自代。以聞。

代中書謝爲伏日早歸第表

伏日歸休。雖存于告令。中曦趣下。蓋軫于慈襟。祇荷寬優。交增榮棟。中伏惟皇帝陛下。紹隆炎歷。凝監太清。茂遂萬物之宜。變成四氣之順。因天地長贏之盛。化洽乘離。屬金火伏藏之初。仁深扇暘。降王人于禁奧。傳天語之溫淳。閔以服勞。許之夙退。獲遂燕申之適。彌昭曠素之慚。

代中書樞密院謝譯經院賜御筵表

節近繞樞。方翻文于竺館。仁深推食。俄示惠于詔筵。聿荷需恩。彌慙曲寵。中伏惟皇帝陛下。研幾衆妙。繹志大猷。本上聖之多能。繇中天而稱號。混并書軌。崇護宗乘。重九譯之語言。旁開梵學。正五天之文字。祖述聲源。遘誕節之祝延。奉祕經而演潤。揚妙音而伊始。資睿算以無疆。臣等迹玷近司。才疎了義。臨真筌而曷暢。對豐豆以攸慚。

代中書樞密院傳法院罷堂賜宴表

竺館翻文。慶猗蘭之紀節。句筵參義。譯貝葉以成篇。介上聖之元祺。續大雄之慧命。雖獻如山之祝。未登程石之觀。梵夾修書。愧棲毫之乏潤。臚傳散宴。驚兼豆之逾豐。臣等匪究真筌。空塵譯綴。徒尸承于飫賜。彌隕越于愚衷。

代中書樞密院謝題明堂御書後書名表

伏奉聖旨。許臣等所請于御書明堂之門額後。各書其名者。千齡罕值。二寶親逢。復得請于曰俞。獲附名于不朽。榮兼常等。感集幽衷。中伏惟皇帝陛下。炳發彌文。紹修宗祀。合大神而右饗。卽祕寢以告虔。泛瀛百金之毫。出于聖思。冠絕六師之體。表厥雲費。迴極奇蹤。實昭能事。允爲歷代之寶。式嚴清廟之藏。臣等修輔乏能。違辰爲幸。猥承冲旨。獲署珍闕。仰欽至聖之眷懷。益慶具臣之遭會。相期勗勵。圖報容明。

代中書樞密院謝賜御篆明堂飛白明堂之門表

羲畫垂文。奎鈞賁采。降王人而頒副。窺神迹以究奇。仰服異恩。同懽榮遇。中伏惟皇帝陛下。聰文攸縱。神容多能。嚮闕九房。攷制五室。並侑祖宗之靈。大合郊丘之祀。紹興能事。濬發精衷。聖藻裁篇。首發歌于寶鼎。宸毫結字。復漬墨于金壺。揭華榜以相高。參飛蕤而並麗。選工禁署。寓刻祕珉。肖鸞龍翔翥之形。盡金石昭銘之美。恩頒位位。榮及圭衡。臣等並違千齡。獲承二寶。慙無裨于台宰。誓永屬于昆雲。

代謝御筵詩表

靈畢疏恩。方啓示慈之宴。寶跼叩寂。忽傳正始之音。竦禹律之鏗純。布堯章之巍煥。百拜同歡于幸會。諸生絕企于清光。靈寵便蕃。營魂隕越。謝中伏惟皇帝陛下。紹休丕緒。總攬懿綱。聖能之才。蓋本于天縱。光明之學。不待于月將。昭大德以建中。酌彌文而稽古。鶴書赴隴。樂得殼中之英。鳳戾臨軒。親詳天下之士。需隆恩而普洎。豁大度以兼收。爰伸晞露之燕胥。載錫起風之宸唱。訓辭深厚。式玉度以彌堅。容制坦明。倬雲漢而竝麗。莫究人神之妙。益知游聖之難。臣等猥以頑疎。遭茲全盛。鈞天之樂。九奏已獲。聽聞春山之寶。萬金更容緘祕。敢不述宣聖憲。祇奉洋謨。銘在盤盂。用謹勅天之命。勅于金石。永昭茂世之規。

文恭集卷十一

表

代中書樞密院謝賜三朝寶字訓鑒圖表

天光燭臨。王人降莅。神毫映發。繪事照陳。獲凡目之榮瞻。增愚衷之慶忭。謝中恭以國家自一戎之變伐。經五代之荒屯。文匿采而弗昭。武淫威而未戢。太祖皇帝。削平多壘。式遏橫流。中區始混於車書。生民得去於湯火。太宗皇帝。纂戎以睿。右治在文。躋俗中和之隆。同風巍煥之盛。真宗皇帝。靜淵疊穆。緝熙光明。協于二后之華。粹乃一王之體。厥初締構。以屬盛盈。聖算成功。彌文盛德。洋洋盡美。蕩蕩難名。至於裁決繁機。奮耀英斷。署鳳毛之尾。擒犀管之英。莫不墨寶相輝。神鋒迴拔。居然鸞鶴之翥。蔚有龍虎之威。祖宗多能。固天之攸縱。聖明善述。歷世而彌光。伏惟皇帝陛下。道德昭前。聰明時憲。規恢祖服。務廣先猷。攷合神書。搜羅遺藁。奇蹤畢獲。顯跡槩探。留聖思于勒成。命侍臣而類次。形于方版之鏤。參諸設色之明。序以宸章。置之禁坐。蓋將訂盤盂之作。況几杖之銘。式遵燕翼之謀。用慎起居之戒。茲惟不朽之事。以永無疆之休。臣叨預宰聯。親逢盛際。禁嚴趨召。已覲寶跗之文。祕副辱頒。有踰拱璧之賜。誓榮藏于衡華。永傳奉于

昆雲。

代中書樞密院謝許御製樂章表

近上表陳乞御製天地祖宗樂章事。伏奉批詔。所乞宜允者。上睿作歌。冒適于章。請至聰垂聽。申答于詔。音恭聆曰。俞。相趨載躍。伏惟皇帝陛下。紹休基緒。獨運陶甄。修闕典而勃興。奉先猷而善述。恢張治具。皇建極于大中。總緝禮文。邈同風于魏煥。多能攸縱。衆志必通。天翰載飛。妙龍鸞之翬。宸章有作。麗河漢之昭回。鑽仰難名。範圍莫大。屬講儀于宗祀。方詠德于我將。尚祕淵懷。且諭沖旨。敕邇臣而咸述。哀衆議而匪安。以謂紀綱四聲。必資于睿律。章施萬物。當賴于慶雲。因露需頭之封。竊祈元首之作。昭明盛德。冠映衆篇。太陽回光。不遺于微。葦秋風發詠。許挾于秀蘭。告成祖宗。對越穹厚。韶盡美矣。行覩于來儀。禹無間然。允彰于致孝。天人胥慶。策牘相輝。臣等竊遭亨嘉。無施贊補。獲奉批章之答。併增度曲之榮。

中書乞賜御製表

西清繹志。東壁垂文。幸諸物覩之榮。竊冀恩頒之寵。輒茲披露。倍極震惶。伏惟皇帝陛下。駿惠在躬。宣明宣業。總郁彬而成化。宅淵靜以凝神。堯德始于欽明。被于四表。湯聖由乎修紀。正厥萬邦。克念惟勤。允恭若厲。洪惟元嗣。夙茂英徽。上庠之典式。觀載崇術教。內豎之詢弗匿。攸踵溫文。且復歷探前世之規。躬扞有章之作。聿申慈訓。益懋凝猷。而又儲思濩燮之中。研幾繫象之表。索至精之理。智同于萬殊。宣尙要之辭。體包于三變。金聲迭振。緹帙相輝。與經義以備陳。居爲代寶。兼天常而廣布。用厚民風。而臣等備位。

黃樞侍觀綈几。珠躔逖仰。慚測管以非周。瓊蘊悉披。慶出圖之期偶。竊懷聳抃。彌激傾虔。恭祈容照之私。庶適傳家之願。其前御製伏望聖慈各賜一本。所冀洗心祇誦。以獲于漱芳。清室謹藏。永期于承式。

中書謝宣赴清景殿觀御書賜宴表

紫闈沖深。綈囊充積。實元儲之善訓。許下士以恭窺。久奉宣游。游蒙示惠。仰懷殊遇。內積至榮。中伏惟皇帝陛下。疊穆御邦。哲明稽古。蘊多能而乃聖。臻大定以無爲。承孚佑之祥。奉之虔。鞏集累仁之慶。俾厥熾昌。爰崇建于東闈。用固安于大本。若乃孝恭天賦。敏惠日躋。自稟夙成。非由外獎。而陛下深敦慈勗。茂闡良規。攷述作之大方。垂容明之諄誨。復以章天之御藻。藏府之前編。聿昭齒學之風。竝示賜書之寵。載形中旨。悉念邇臣。趨祕禁之凝嚴。侍威顏之咫尺。瞻璧日重輪之曜。慶偶亨辰。踐玉山四徹之塗。鋪觀典宸辭。綺煥仙翰。雲飛若龜負。以攸傳。豈管窺之能測。足使上庠崇術。更廣于多聞。步障題篇。遠慙于懿戒。矧惟邃宇。邈處層霄。飛闈連延。華題照灼。山擬蓬而轉遠。池象壁以縈流。杳絕世氛。負真境。乃開宴凝神之地。蓋齋居味道之庭。羣帝下觀。百靈潛護。居然物外。理絕階升。猥沐詳延。仍容泛覽。塵眸乍刮。俗骨疑輕。恍若夢于鈞天。飄如乘于鸞駕。而又沛風發唱。堯酒分甘。徵繼屬于良康。決懼愉于酣滑。鍾千齡之契遇。極三接之便蕃。臣等謬忝近司。無裨至治。荷顧存之尤異。申答效以何階。

謝賜衣服鞍轡馬表

伏蒙聖慈。以臣授前件職。蒙恩賜臣衣一襲。金腰帶一條。金鍍銀鞍轡馬一匹者。祇荷寵榮。伏增悚覲。竊

以輿馬之錫。用以飾恩服物之章。茲焉旌禮。瞻言近侍。抑著通規。惟華光拜職之初。均禁林加惠之厚。衣冠御府。馬出王閑。耀韉轡陸離之光。被帶環精麗之飾。亶屬思文之后。稽若前猷。寵綏承學之臣。昭茲異數。自匪博通之選。曷膺渥異之恩。如臣者。謬以瑣才。尸于禁掖。莅事積惟煩之誚。不學有將落之譏。實無補于演裁。俄有叨于進讀。已玷近嚴之職。仍兼賚予之榮。乏鄒彥明經之能。慚漢臣稽古之力。徒成妄施。冒報曲慈。

又謝賜衣服鞍轡馬表

複門天近。遂獲兼榮。二閣神深。更容再至。仍拜便蕃之賜。益深俯偃之懷。竊以車服之章。以旌稽古名器之分。戒在假人。自非閎博之流。莫膺蕃庶之錫。如臣者。性未入道。學不經師。語人地則遠孤。論才質而空劣。撫草茅之藁質。偶值時來。參筆橐之禁聯。豈繇德舉。已叨官于玉署。復增職于金華。仍稽加惠之文。且厚敷經之眷。延英開閣。御府賜衣。上駟之馬。旣閑。載華韉飾。裏蹕之金。有赫。增耀帶環。顧疵賤以奚堪。在寵靈而過泰。曳斐弗稱。彼己爲慚。誓捐一介之軀。以答九乾之施。

謝兼侍讀學士表

命出曲慈。恩加舊物。邈英之籍。絕而復通。禁林之聯。榮而兼綰。省躬非據。承寵若驚。中竊以訪道觀書。聖人之高致。執經摘句。儒者之難才。自非直諒多聞。宏通精識。疇膺顧問。參備侍宸。如臣者。性質樸疎。器能隘薄。起一介之白士。逢千載之亨期。粵自脫巾。寢叨非服。遄從右史。亟踐西臺。蒙甄書詔之勞。嘗忝敷經

之列。才不足以宣暢明命。學不足以開益睿明。甫參西序之榮。驟被北門之召。一去金華之業。寢廢研覃。久汙玉堂之居。更慚空素。固常襍被。忽奉如綸。再陪大雅之羣。重侍便朝之讀。自惟膚淺。曷奉討論。職思其憂。心焉如灼。此蓋伏遇皇帝陛下。特回簡照。收採方愚。許入廁于衆賢。伴嗣修于前職。欽惟將聖。稟自賈聰。羣下莫企于清光。分寸曷裨于淵智。敢不申尋緒業。溫繹舊聞。用磨衰鈍之姿。少答高明之選。

乞贈李昭述官賻卹其家表

臣等伏以甄德表行。紀功恤逝。聖王之仁政也。竊見故翰林侍讀學士尙書右丞李昭述。德範純深。夙性耆俊。行修而才敏。氣沖而節和。然以賢公之孫。名臣之子。奕世濟美。弱冠立朝。臺閣典章。多所該識。中外事任。莫不厭服。竭盡近職。晚侍經緯。志慮益恭。年力克壯。近緣齋禁。嬰疾臥廬。遘蒙告恩。許還私第。寢以絲劇。遂至隕喪。臣竝叨講讀。同籍祕嚴。常僚之情。實憎楚館。愍章之飾。輒有控訴。伏望聖慈。許依近例。優贈昭述一官。賻卹其家。魂而有知。死必無恨。誓將結草。陰報漏泉。臣等無任祈天俟命之至。

辭免端明殿學士翰林學士兼侍讀表

臣今準閣門告報。降到告敕各一道。蒙恩授臣兼端明殿學士依舊翰林學士知制誥兼翰林侍讀學士者。恩雖特出。事本彙征。降命自天。處躬無地。敢叨妄施。須叩至聰。竊念臣器質隘疎。天資樸訥。以一介之固陋。值千載之休明。起自腐生。羣于大雅。寢叨非服。盡出曲慈。待對承明之廬。進讀邇英之閣。徒循持干章句。莫開廣于聰明。文翰之司。一登于方丈。禁嚴之地。四對于浴堂。每惟介拙之才。久閱翹英之路。未能

引退敢復僥榮。豈謂謬恩申加近職。況寵靈之過泰。豈名實之相賓。若冒榮章。彌速公議。伏望皇帝陛下。濬開俞旨。追寢命書。俾爰極陋之姿。得安至當之分。免詒謗累。更益過尤。惟竭孤忠。以酬鴻造。

謝兼端明殿學士表

祗膺寵渥。伏積兢惶。竊念臣性本方愚。才非秀特。早遇洽平之治。猥塵禁近之司。繼忝崇恩。益升祕職。荷榮名之華疊。愧庸品之孱虛。此蓋伏遇皇帝陛下。敍進羣才。甄揚衆職。遂俾至愚之質。亦叨加惠之恩。惟當竭頑庶幾圖報。

謝授左諫議大夫充樞密副使表

伏奉聖恩。授臣左諫議大夫。充樞密副使。蒙降批答。不允。仍斷來章者。丹赤露中。願收于妄施。穆清在上。終祕于俞音。承命難逃。省躬愈慙。中竊念臣性慚機警。識匪該通。以斷斷之餽生。遴巍巍之至治。謬踐仕版。寢竊書林。器無可養之姿。材非致遠之具。太平樂育。廣施成造之恩。英俊竝遊。最處遠孤之目。以庸受之學。兼體弱之文。擢在絲庭。召置坡禁。參邇英之進讀。濫端殿之兼華。盡出誤知。繼而非服。僥榮尸職。重遇丘山。論功計勞。訖無毛髮。方懼必行之黜。敢冀非常之恩。忽被命書。俾陪宥席。聞詔而循牆以走。撫躬而喘谷如臨。矧茲斗樞。實本兵柄。上贊幄中之畫。密籌徼外之情。必也敏謀。與夫碩望。乃堪聖選。始允師言。今則弗然。屬之不肖。違陳危懇。仰叩至聰。冀寢謬恩。別咨時傑。控祈雖切。批諭莫從。但俯偃以滋恭懼。負乘之致寇。此蓋伏遇皇帝陛下。至仁博愛。大度兼容。察其方愚。亮茲狷直。知中立之寡黨。憐左右之無

容出自聖心。委之機任。退省孤臣之分。何勝明主之知。惟當勗勵忠圖。期殫愚筭。若虞機括。當戒于纖微。不出戶庭。更遵于慎密。庶將盡瘁。圖報曲成。

謝傳宣入伏早出表

景炎朱火。氣匿庚金。伏日早歸。雖聞著于漢令。中曦促下。乃特軫于堯仁。忽降使璫。俯傳天語。荷承恩之下暨。欽渥旨之曲全。謝中伏惟皇帝陛下。若古凝猷。對時孚化。愛溥將之靈命。躬博愛之至仁。眷乃近司。釐茲庶務。當炎帝承離之盛。矜此服勞。推夏王扇暍之慈。案扇暍據淮南子是周武王事。此殆因借對炎帝。故云夏王。俾爰夙退。去公門之煩滯。獲私室之燕申。臣等謬以庸虛。叨斯密勿。竊樂舒長之化。彌欽寬大之私。

謝羊酒表

臣某言。伏蒙聖慈。以臣生日。特降詔書。賜臣羊酒米麪者。王人傳詔。天語宣恩。捧戴有初。兢惶無措。謝中竊念臣出于單緒。起自孤生。曾乏異才。本絲白望。寢竊禁嚴之職。造叨內密之司。半策靡施。寸長莫效。徒尸稍食。重費殮錢。加以享大官之珍甘。叨內府之賚予。夕冰之懼。每積于愚心。秋毫之微。莫非于帝力。負乘爲愧。幽黜是虞。豈圖當辰之尊。特記設弧之旦。餼率加賜。醪酒俯霑。申以粢糲。光于圭華。此蓋伏遇皇帝陛下。容慈曲施。宸照周融。未捐曠素之臣。特舉匪頒之典。誓當殞瘁。以答寵嘉。

又

伏蒙聖慈。以臣生日。特降詔書。賜臣羊酒米麪者。使驛馳臨。詔綈俯降。辱彝儀之豐腴。加旅物之便蕃。拜

賜爲榮省躬知幸中。伏念臣腐生少賤。曲士至愚。端遇重華之辰。進竊內樞之任。智謀淺昧。曷陪坐幄之籌。廩稍優豐。益取伐檀之刺。惟名器之踰分。虞負乘之致災。式是仲商。屬茲誕日。設弧感往。列鼎念親。永惟罔極之恩。重愧無庸之質。豈謂伏蒙皇帝陛下。慎隆國體。加惠近臣。醴酒餼羊。籩粢豆米。併爲異數。賚及私庭。等乾坤之施。愧無以報。戴嵩衡之賜。懼不能勝。惟堅忠藎之誠。少答睿明之施。

乞解罷樞密院表

臣某言。近以年力衰疲。目矇昏乏。乞還機政。嘗貢表函。勿奉詔批。未愈章請。常言加飾。聖度兼容。葵藿寸心。徒知向日。螻蟻微志。未能動天。有迫愚誠。難祇冲眷。竊念臣本惟空劣。特出單寒。自縫掖之諸生。參持橐之近侍。章句末學。不足以名家。篆刻小文。何施于治世。徒以樸疎受性。孤遠立朝。恥朋比之事君。愧浮沈之遂俗。介然自信。軋者固多。誤緣仁廟之知。屢奉浴堂之對。拔于詞禁。置在機庭。未嘗伸幄中之籌。不知更闡外之任。豈能坐制千里。通知四夷。幸賴安平。偶容曠素。伏惟皇帝陛下。入纂聖統。肇嗣寶圖。優假舊臣。寅恭初政。臣每因奏事。親奉德音。患太平含養之深。懲流弊因循之久。垂訪一時之策。規恢萬世之模。盛德難名。清光絕企。而臣少壯之齒。已不如人。衰穢之年。豈能圖國。以至聖之主。責甚愚之臣。夕惕爲憂。任重且殆。仍以犬馬齒戴。鐘漏景侵。因陳昧死之章。冀丐餘生之逸。得從謝事。姑遂養疴。而璇指未回。玉音尙祕。彌荷包荒之德。益昭圖舊之仁。然而知止足者。道家之至言。潔去就者。儒生之常分。久貪曲寵。終速多言。伏望皇帝陛下。哀矜陋軀。保全孤節。俯從私欲。俾退仕途。別選耆英。用參機劇。則進退臣節。得

休息于筋骸而本末主恩更薰酣于骨髓

笏記

代中書樞密院謝賜飲福大宴笏記

三神歆鬯甫畢于嚴禋百福在壺式均于愷宴敷宸恩而載洽慶亨會之斯逢伏惟皇帝陛下乘榮居尊宅中建號直房心之華覆卽太紫之祕庭擬制合宮崇饗上帝三后纂戎而竝侑百神啜食以在旁聖志幽通靈貺來答旣成祀而昭孝復式燕以示慈縱魚龍曼衍之觀陳金匏翫庶之樂籩羞棗列觴醴旨清在上之威顏弗違同伸就望助祭之臣工咸在莫不懽康但醉飽于太平益謳吟于睿聖臣等叨膺宸眷謬備宰司獲上萬年之觴不勝千載之幸徒尸飫賜莫補大猷

謝兼侍讀笏記

祗膺華寵伏積驚惶竊念臣篆刻攻文膚受爲學居自慚于曲士進不至于醇儒幸遭盛辰偶緣末技寢升華近稔服禁嚴預裁內史之書復視北門之草常虞弛職敢覬謬恩忽參進讀之聯彌積兼榮之愧此蓋伏遇皇帝陛下早矜介拙曲賜甄陞惟圖竭盡之誠以答優殊之眷

中書樞密院謝春宴笏記

臣某等言乘執規之春令爰舉舊章示折俎之天慈式陳廣宴展湛斯之晞澤慶樂只之逢辰伏惟皇帝

陛下順斗頽常對時覃惠凝容思于黃屋惟以靖民均凱樂于春臺未嘗在己屬政機之暇豫因節物之韶妍稽象于需修惟在鎬以謂人神之心洽則天地之氣和大會雲龍之庭高張金石之樂融天壺之御醴溥洽羣臣回日角之睟容俯暉萬物恩既孚于上下禮亦協于沖和臣等忝列近司欣階幸會邇清光而尤密戴至造以何勝

秋宴笏記

嘉觴備物正得秋而萬寶成法辰垂衣居其所而衆星拱粲然盛觀生于太平此蓋伏遇皇帝陛下鴻慈自天湛恩濟世洽茲德禮燕及臣工臣等備位何能蒙澤已渥願介萬年之景福共傾三祝于華封

代中書謝秋宴笏記

西成協歷慶歲物之順蕃廣宴班觴示宸慈之昭錫爰修鎬飲允洽需恩伏惟皇帝陛下化穆中區仁孚羣品設衢樽而勵物厚鼎飪以需賢俗阜刑清號網魚之云漏氣調時豫聆銅雀之載鳴華黍由庚景風通正誘淵衷而載懌宣愷澤以咸周金石具陳纓綵竝集妙伎高尋于撞木清歌上遏于雲門瞻黼幄之宸暉已慚形穢聞霓裳之法曲更覺魂驚同歌既醉之篇欣遘寢昌之運臣等忝司樞席叨侍詔筵愧無云補之能但積屬厭之辱

文恭集卷十二

外制

曾公亮可充史館修撰制

敕夫西臺書詔東觀約史三長所寄二職竝華。選諸彙從之賢。得于綸省之老。某奕世學史。名家通經。體行安于粹和。器用本乎冲厚。博我道術。執經侍于便朝。代予語言。秉筆贊于書命。講聞正論。丕變深僻。屬史氏之缺員。思世官之服采。惟乃踵向歆之美。可以嗣南董之職。噫。立言不朽。書法無隱。傳言後世。勲濟前人。豈不美歟。尙思勉此。

宋祁可依前右諫議大夫充史館修撰制

敕具官某國之大典。莫尙于策書。世有史官。實顯于筆削。思立言于不朽。用垂法于將來。宜屬耆英。迺尸述作。以爾學通今古。文擅宗師。識可貫于動微。才足經于治本。擧代言于掖省。復定草于禁林。盤詰之風。炳于三代。訓辭之體。厚厥二京。歷近輔以政成。睠邇英之籍舊。疇咨勸講。召復近嚴。屬撰次之缺員。冀選掄之任職。絕踰雋碩。參寄編摩。制度文章。用煥一時之美。才流職業。更增二惠之華。有若世官。實惟家學。

尙倚敷經之善。勿忘書法之良。

王洙可守本官充史館修撰制

敕具官某。朕日者被飾舊章。修起宗祀。文繁禮緝。德厚流光。乃訪雋儒。使志盛典。思謹合宮之述。用垂來世之傳。以爾經術深明。才辭典茂。居邇英勸。講之近。參東觀討論之勤。博洽多通。精明適用。實膺詔書之舉。通覽奏篇之登。敍次有條。勒成得法。有煥緝熙之美。用嘉刊述之勞。卽太史之書筵。正開元之撰職。仍侍朕講。往踐乃司。

孫抃可依前禮部郎中知制誥充史館修撰判館事制

敕。史官尙矣。歷代有之。述春秋五例之餘。顓邦國四方之掌。必也書法。使善惡昭于前。其次立言。用文采表于後。惟是撰著之美。則宜俊碩之流。具官某。篤行直躬。高文強學。達夷吾治體之要。有壺遂君子之風。曩從西臺。服在禁署。視淮南報賜之草。作伯禽封拜之書。行于諸侯。豈惟謨訓之厚。置諸太史。亦緊職業之長。加復同官之僚。率取一時之望。對執南董之簡。遞煥唐虞之文。緝熙予猷。往踐乃職。

傅惟幾可兵部郎中直史館制

敕具官某。專使一面。將漕之職。修稽最貳期。疇庸之典。舉有嘉顯迹。匪限常規。爰命寵甄。式頒異數。以爾性度和厚。才理幹明。早膺選于駿良。常肆勤于內外。經術飾事。參于儒學之優。法令爲師。尤號吏資之敏。瞻言南服之地。簡求外計之臣。圖其練更。委以按察。招綏有序。控帶得宜。徭俗底寧。邊氓休息。方切仗才。

之寄。宜從增秩之留。進屬中臺。佐夏卿之爲政。入聯東觀。預太史之修書。竝服華峻之資。就示褒優之典。尙凝來績。勿墜前勞。

張昇可集賢殿修撰制

敕。進書殿之職。褻藩翰之良。用旌正人。且賞稽古。具官某。高節特立。直躬無徒。試之吏文。則肅給而無窒。任以綱錯。則方峻而不回。嚮者有司。坐以薄罪。迫于連茹。委之班條。久從外遷。頗鬱中議。詩不云乎。靖共爾位。正直是與。爾有直諒。多聞之益。中立不倚之風。始寵麗正之名。別上朱方之計。惟是朕意。不忘而忠。

孫甫可起居舍人制

敕。王者言動。世有記注。雖二史之任。差弛而一時之選。愈華。非得名流。不允清議。具官某。學精識遠。才美行方。辯論有餘。介特不撓。擢在延閣。任之諫垣。鯁議讜言。未嘗吐茹。清規直質。不見緇磷。屢易守符。再典漕事。風政彌舉。器望益嘉。差用久勞。稍遷右史。尙倚將輸之舊。就虔褒擢之恩。

錢彥遠可起居舍人直集賢院知諫院制

敕。具官某。夫納忠之先。莫若箴王闕。興治之美。無如任諫臣。爰推渥茂之恩。用獎正方之士。質之公論。咸曰職修。以爾風議。旣周才謨。兼劭以富平之德器。出太伯之世家。紹休前人。協比介弟。聯對大策。著聞本朝。敷奏其言。咸有補于世務。參試以政。復無害于吏文。嘉其行能。任以言責。議論慷慨。退公委蛇。獻納旣勤。旌陟宜及。古史之任。參記言動。麗正之學。領校典文。舉用二職之華。進增七諍之重。爾其勿念後悔。無

廢前勞。審思諸宜。勤補不逮。讜言切至。朕罔拂焉。

李兌可起居舍人同知諫院制

敕具官某。夫有言責者。思其忠。有官守者。修其職。保氏之任。則主進諫。右司之業。則司書法。均是二職。皆拾遺補過之臣也。自非忠正之士。疇勝左右之選。以爾莊修有素。方介不撓。比膺憲屬之選。進處臺端之嚴。糾肅朝聯。切劘治體。間陳得失。頗見納用。有嘉已試之效。且酬久次之勞。寵以記言。委之諫職。爾其往服休命。數進苦言。深圖薦替之勤。勿爲拱默之計。周爰補察。以好來忠。

陳升之可右司諫制

敕某。朕設置諫臣。所以箴已闕。詢求正論。所以廣治道。以爾蔚有文采。參以風識。更試外服。則材彊濟而有餘。察視中司。則體端直而無撓。比奏方幅。數進忠言。能切劘于事經。多鐫拂于時病。適會諫員之缺。超從憲屬之選。往踐厥官。亟修乃職。至于刑政之得失。言動之過差。悉意以聞。無有所諱。

呂溱可右正言制

敕具官某。漢儀以諸吏給事于中。唐制以兩省供奉于內。惟是右垣之選。則拾禁闥之遺。自匪髦良。參濟風議。朕未嘗輕以授之。以爾神遠而清。體重且粹。繇繇異等之舉。遣置禁林之華。參職朱轡。再珥彤筆。一遷秩於祕局。久藏器於高墉。介然有常。議者爲滯。茲用擢汝。置之諫聯。行圖記載之勞。勉思獻替之最。

李執中可著作佐郎制

敕具官某、國家設攷課之法、立準才之品、較實有狀、陟乃近明、進懋以官、賞則無濫、以爾早中辭策、嘗參賓籌、間緣保任之章、來稱敏濟之用、使幹茗局、參預縣章、質其滿歲之勞、合於班賞之格、京司進秩、書省爲清、俾升刊著之華、無廢操修之素。

呂誨可著作佐郎制

敕某、昔爾大父、相太宗真宗、厥功茂焉、惟時穆若、以爾有裔孫之裕、策雋科之秀、率循士範、參試吏文、任宰字而有勞、歷終更而無缺、監司薦狀、鉤覆應條、擢佐修書之筵、且光名相之閱、圖濟前美、滋勉來勤。

向安可著作佐郎制

敕某、本縫衣之流、預入穀之選、早服名教之樂、亦尙文辭之爲、幕府參謀、首在公匪懈之敏、藩房授道、有惠訓不倦之勤、覽大宗之上言、合公車之衆奏、在勞可紀、于法得遷、俾領著于祕丘、尙竭誠于親邸。

高師說可著作佐郎制

敕某、朕以吏員實繁、治迹難究、故設保任之法、委諸按察之官、旣得公車之章、復經選部之覆、審若薦狀、差以恩遷、以爾用軍從事之秩、辟在幕府、時則留司、乃吾舊相、薦爾沈密有守、強幹克舉、一德之重、可以取信、故特命引對、不與他事、比擢任京局、領佐史筵、往慎爾修、以永來譽。

宋敏修可著作佐郎制

敕某、著局有佐、隸修書之任、故事到職、作名臣之傳、非擇才者、疇稱官美、爾之先正、歷居史任、爲一時之

宗匠成兩朝之典冊。不朽之立。厥功茂焉。爾承前人。能世家學。二惠競爽。見推於時。來質歲成。兼優最日。差用陟典。擢預史筵。往知朝恩。取大門業。

張演可著作佐郎制

敕某。選部之條。黜陟有序。清能見拔。滯淹者振。器乃無廢。才則弗遺。以爾少有俊名。早中科選。家世高于閩錄。閱閱滯於中銓。浩然之氣。老而彌壯。羣隨越絕之檄。預參賓幕之籌。薦任交章。終更無缺。擢佐史筵之著。尙繁文繹之餘。虔我茂恩。勉而甘節。

路保衡蕭汝礪竝可著作佐郎制

敕某等。國家以治世之典。宜崇寬簡。故延尉之屬。必選仁平。爾等階升俊科。兼練法學。比參府畫。亦約縣條。徇公不私。以文無害。被所知之章薦。閱已世之案文。悉通爰書。且有比例。對選列署之秩。竝居詳讞之曹。勉思盡心。以稱朕意。

張子方萬稹竝可著作佐郎制

敕某等。曩繇賓與。早擢科等。比會都銓之集。屢試吏牒之煩。咸用節尙之修。胥被已知之薦。治縣著迹。幹局有勞。略其往疵。攷以今課。宜寵祕丘之秩。往佐修書之筵。勉推精誠。務對恩典。

范道卿鄭夔金君卿竝可著作佐郎制

敕某等。佐著有局。本隸修書。令名雖存。舊職已廢。猶曰美秩。必用清流。爾等體行交修。才辭參劭。竝繇茂

士之選。號爲從事之良。或賦縣條。竝葢局事。或因滿課。來集都銓。實無尤爲。多有慰薦。旣合攷法。仍中賞科。命除此官。且申吾信。切近朝藉。益思官箴。

周岐可著作佐郎李昭錫可大理寺丞制

敕某等。夫華原濱雍。有秦之遺俗。故號爲難治。趙城近晉。染堯之深迹。故稱爲易化。爾等端莊有立。廉敏自將。長治二邑之民。操決一同之政。雖劇易殊貫。而功次略同。復有薦任之函。合于甄陟之典。以文而進。佐祕丘之撰著。治經以仕。參列卿之丞屬。均自清要。往哉慎修。

陳亢可著作佐郎邢裕可大理寺丞制

敕某等。漢之法。有最課而得遷。晉之令。坐優舉而乃陟。國家開薦任之例。委監司之官。擢敍則精。才否尤辨。爾等。或用材質之美。揚于王庭。或以經藝之優。糜我人爵。佩縣銅墨。爲郡紀綱。治有愛利之風。官無逋曠之事。需章雜薦。選部修聞。領著祕丘。決平讞寺。竝爲磐陸之漸。勿忘風矩之修。

周約可著作佐郎郭灝可大理寺丞制

敕某等。同升茂士。分踐俊科。比沿牒以肆勤。識治庖之效智。樹風遠邑。綰務要津。政條以修。局事無壅。監司之薦。應法銓審之較。中科入著。祕局進丞。讞寺竝居美秩。咸服茂恩。

陸絳可著作佐郎張靖鼎堯竝可大理寺丞制

敕某等。邑大夫司百里之命。郡督郵秉一州之綱。二者之任則均。三人之行各異。以爾絳。名有幹局。得諸

才施舉將爲多。治縣有迹。以爾靖。通法家之學。以爾堯。本經術之明。吏資竝深。官簿無缺。終更赴集。鈎攷應書。參丞理官。用信吾賞。有以自效。勿替厥修。

何世昌可著作佐郎陸若濟劉寅張齊古竝可大理寺丞制

敕某等。嘗升論秀之科。亦階任子之法。竝濟公路。數調銓臺。懸臨樅木之酷。胥及連敖之掌。或絃歌而字邑。或書檄而從軍。咸能飭厲廉規。敷宣敏力。交章入薦。計最居高。賞格具存。陟恩宜沛。佐修書者。祕丘之美秩。承治讞者。列寺之要官。榮序有開。班朝孔邇。勉固後凋之節。以期遠至之塗。

宋垂範可著作佐郎王堯臣杜松張知常竝可大理寺丞王景華可衛尉寺丞制

敕某等。大選之法。六歲坐優舉。乃得從有司鈎攷。便坐臨覆。隨其功狀。陟之京司。故才弗及遺。而器無滯用。爾等或廉茂進官。或高華取資。從政郡邑之間。服勞事局之次。治有最目。課應陟書。覽薦牘則居多。視素履則無缺。祕丘領著。列寺爲丞。竝日美遷。尙期來效。

吳英可著作佐郎陳世卿可衛尉寺丞楊希古沈紳孫祖慶竝可大理寺丞制

敕某等。或預楊庭之選。或藉高門之資。同入銓流。分幹吏治。參畫著敏。撫字有勞。善勾邑版之稽。能盡地力之教。外則大使之薦。雜之最迹。內則選部之覆。審如計文。終更若茲。褒勸宜爾。入領史官之佐。往服廷尉之丞。進參衛屯。胥列京局。宜慎榮塗之漸。勿令素履之渝。念報已知。當虔吾訓。

孫諮可著作佐郎王師旦王震朱彭竝可大理寺丞夏侯維可衛尉寺丞制

敕、國家著定攷法。差進銓流。壹責監司之官。參稽保任之法。省審既正。遷陟乃宜。以爾等、或州舉升科。或世資補吏。除軍從事。爲郡決曹。領算商車。典臨茗局。職修課舉。行敏節廉。按察之薦。條聞鈎校之司。覆實書省有佐。卿屬置丞。竝從臺格之遷。益虔朝寵之茂。無易而守。更效其來。

前石州方山縣令王佐可著作佐郎前泗州盱眙縣令吳天常陸州司法參軍前監温州在城商稅務傅燮竝可大理寺丞制

敕某等、久從掾令之職。咸有幹廉之稱。使者交章。攸司覆實。言爾最狀。甫應遷科。朕親御便廷。嘗相其質。可以才使。因而敝遷。進屬上臺之聯。益思良吏之守。

王度可太子中允牛知新可著作佐郎張爽可大理寺丞制

敕某等、朕欲濟官政之宜。究吏人之迹。故責在保任。而壹于監司。爾等或奮藻賓興。或治經進宦。參被邦侯之選。典司都獄之繁。行己有方。服官無缺。薦論狎至。鈎校率同。差次資名。褻進秩序。惟承華之屬。通文石之朝。典著祕書。持平列寺。彙征以進。胥慎而修。勿蹈匪彝。益思自效。

郭評可太子中舍人李偉可大理寺丞制

敕某、春坊允僚。比東臺之封駁。秋卿丞屬。佐廷尉之讞疑。或顯用才流。或參選吏幹。以爾等、修辭入第。預軍從事之招。治禮得科。歷郡決曹之任。外章交薦。滿課終更。質諸銓條。灼有治狀。宜寵承華之秩。往司李法之書。彌勵來勤。勿更前守。


劉孝忠李允中竝可太子中舍人劉炎可殿中丞制
敕某等早階科等之升或緣蔭格而仕績勤官簿升屬法卿分守二邑之氓顓司一局之利條上最目協
應陟書宜進承華之僚入丞中盾之省益樹風迹以對寵靈





13
4
1885

文
恭
集
三



叢書集成

初編

主編者
王雲五

商務印書館發行



文 恭 集
(三)



3 0649 7804 6

胡 宿 撰

文恭集卷十三

外制

葛宗古可內殿承制制

敕具官某、緒惟將閔。班在禁墀。出護營兵。西遮隴道。奉上惟謹。率下有方。自白年勤。實中勞典。稍進承于中制。尙留過于外虞。勤就朝榮。益宣武幹。

劉吉可內殿承制制

敕具官某、少勵敏資。服從煩使。積諸勞最。班于禁嚴。屬觀請老之章。求援攷課之法。不令遺力。亦使寵歸。進承中制之聯。往服稍遷之渥。

劉仁用可內殿承制制

敕具官某、嶺服之外。窟穴黎庶。皆在朕臨覆之下。往時小醜。亦嘗跳梁山谷。勤兵遠戍。蓋不可廢。爾居警邏之任。識拊循之方。善遏士兵。不擾蠻蠻。封略粗定。監司來言。用旌外勞。進承中制。爾其務安遠俗。取稱吾恩。



37043

086

1124

2:1886

王文思可內殿承制制

敕具官某。迪知武經。擢任軍事。參典中涓之謁。往制樓煩之衝。式遏外虞。亶無遺力。嘉覽帥臣之薦。進承制旨之音。秩峻殿墀。寄深邊部。勉思忠果。取稱寵嘉。

鄭可度可內殿承制制

敕具官某。籍在廷臣。名有力局。數被乘軺之委。靡辭馳隕之勞。參幹事經。淹移年序。因其齋伐。推以陟恩。用升近陞之聯。且視外朝之品。益圖勤瘁。用對寵靈。

王知信可內殿承制制

敕某。定爲勁兵之處。扼北道之衝。爾監軍屯。歲上官伐。拊循控帶。頗適厥宜。強敏恪廉。復寡尤悔。通稽成課。參合陟文。稍用次遷。進承中制。就虔朝渥。尙勉武經。

凌瑜可內殿承制制

敕某。階食德之舊。服禁塗之近。繼銜使指。綽有才資。往筦列城之酷。來上宿官之伐。歲序勤止。迹狀信然。敘進內聯。參承中制。尙繫幹局之敏。勿忘率履之勤。

孫惟忠可內殿承制制

敕某。籍著殿中。班禁嚴之地。任居寰內。提警邏之兵。驅馳累年。肅清所部。參舊勤而自列。用攷法而當選。宜峻墀塗。進承音制。尙謹寇偷之視。無失士兵之和。

李琦可內殿承制制

敕某、朕以春秋之法。責于外家。以漢氏之恩。拜其諸子。以爾居然秀挺。資以粹溫。服在禁塗之華。蔚彰戚
曉之令。尋時前課。稍進內聯。方之常均。猶以未稱。宜入承于恩制。差用峻其資名。往虔儀品之勞。益效風
訓之美。

陳文壽可內殿承制制

敕某、早以修謹。預參內侍。復以開敏。典治劇事。近以營禁庭之別殿。奉列聖之辟容。主作有勞。落成不日。
宜伸旌陟。以寵幹能。超承中制之聯。對視外朝之品。茲爲異渥。尙勵勤成。

李評可內殿承制制

敕某、夫外戚之地。多徇紛華。而和文之庭。雅尙名教。以爾承祖德之茂。習父教之忠。不雜貴游。克蹈訓行。
近緣貴主之請。稍進禁塗之聯。俾漸邇于威顏。益遷承于音制。往修勝業。以對褒章。

李永恭可內殿承制制

敕某、天水彊藩。西遮隴道。羽林積弩。分屯勁兵。爾出監連營。且隸帥府。驛上勞最。朝案計書。戎政頗修。軍
法應賞。宜自近班之峻。入虔中制之承。尙加撫循。以對旌陟。

夏偁可內殿承制制

敕某、秦官謁者。典賓贊之儀。唐制攷功。校宣納之最。必辭令之尤練。與容範之交修。乃可以進服邇聯。通

承中旨。以爾習知儀式。綽有才資。早參上閣之嚴。久侍大廷之秘。善于音吐。恪在詔傳。有嘉累稔之勞。兼賞寡尤之履。稍遷近職。敍正美名。尙最乃修。勿懈于素。

李繼明可內殿承制制

敕某。蔚有世資。敏于力局。典司中謁。領護外屯。習辭令而精明。治符籙而肅給。積勞累稔。大比應條。稍遷音制之承。尙倚軍和之董。益思訓厲。用稱褒優。

王懷德可內殿承制制

敕某。惟秦中之雄。扼隴上之要。號曰勁兵之處。分領盛秋之防。爾提支兵。介在遠壁。仍關縣邑之治。頗得羌戎之和。列上勤庸。覆中攷格。宜進承于音制。尙就委于屯防。無忽稍遷。有以自效。

麥承信可內殿承制制

敕某。河菑衍溢。害中國者舊矣。爾以力致之敏。更材使之煩。繕完疆隄。習知水行。雖故道未復。而別都訖寧。留司以聞。勞勩當陟。進承中制。升視外朝。勿廢前勤。姑續來效。以對我褒遷之寵也。

王仲平可內殿承制制

敕某。爾以辭令之習。典吾謁者之任。以戎事之練。護乃外兵之屯。亦用使材。出將王命。得專對之體。有載馳之勞。還露封章。前援比例。夫賞國之典也。舉不越功。而忠是圖。吾賞何愛。中制之選。親承音旨。有以自效。無忽我褒遷之典。

劉永可殿中丞制

敕某、以膺敏之材、資潔慎之性、束脩無缺、蓋任有方、加駕倅車、關掌列郡、協宣臺禮之厚、導致海沂之康、休有勤庸、稽合褒典、進丞盾省之秘、尙委屏星之嚴、雖曰稍遷、勿忘欽率、

方安石可殿中丞制

敕某、國家以大比之法、攷庶功之能、計勞以遷、于賞爲懋、以爾濟世德之美、習吏資之敏、領邑寰內、著績官下、因歲成以報政、按治狀而應書、擢升內盾之華班、尙寄西畿之劇邑、勉條終課、取稱茂恩、

盧詠可殿中丞朱仲元可大理寺丞制

敕某等、進官以經術、臨履有操尙、或累預諸侯之選、亶無侮尤、或再終百里之更、具有功次、積勤可尙、攷法宜遷、超丞盾署之華、進備理官之屬、用旌勞最、亦振滯淹、服我茂恩、勉而來效、

李從善可殿中丞趙洙可太子中舍人制

敕某等、承籍世資、參服官使、比更郡邑之任、咸開節素之修、官下政成、臺中課集、參稽弗謬、擢敘是宜、用丞盾省之聯、兼備儲坊之案、益思慎履、無忝褒恩、

呂湜可殿中丞楊極高良佐竝可太子中舍人制

敕某等、或進繇經明、或仕以蔭入、躡從智效、竝用法遷、擢丞京司、典治刑讞、外稽出納之令、對宣宰字之條、局以幹聞、政用勤著、參稽成課、進懋陟恩、優以中盾之聯、預于儲禁之案、始陪朝拱、尙服官箴、

王希顏可殿中丞盛行甫可大理寺丞王詢竝可太子中舍人制

敕某等、或憑藉蔭格、或究研律學、參承京局、外握縣條、服在廉平、訖無玷缺、最凡所上、鈎校弗疑、進升盾省之華、擢預儲僚之選、竝班朝著、仍寄邑同、勉思聿修、有以自效。

張述任伯傳竝可殿中丞蘇盛項里周竝可太子中舍人制

敕某等、或早中臨軒之選、或嘗籍舊門之資、次補吏員、進丞京屬、更試力局、則牢盆之利甚饒、分宰縣同、則鳴紘之政居最、參稽來伐、協應陟書、對遷盾省之華、竝寵儲僚之秩、益思自效、無廢聿修。

周偕臧論道杜濟竝可殿中丞陸蕃可著作佐郎制

敕某等、以才辭之華、升預俊級、以力局之敏、進列京司、臨長遠服之民、賦宣劇邑之譜、割治無壅、控帶有勞、吏民便焉、歲月勞止、因稽齋伐之實、竝從進秩之科、丞盾省者洵且華、佐史觀者蔚然美、咸自修飭、勿忝褒嘉。

晏詹可殿中丞王登王康王允竝可太子中舍人王獻臣可大理寺丞制

敕某等、或出曲旂之家、而才質自美、或佩滿籛之諺、而術學素優、入踐王官之華、參從吏職之試、剖盤根而輒解、甘藟食以自清、驛上計文、臺中攷法、稍遷中尚之局、進預東禁之僚、竝通朝闈、亦丞卿讞、咸在修飭、勿忝褒升。

魚周物王隣臣竝可殿中丞周端李格竝可太子中舍人崔宗旦可大理寺丞制

敕某等、官令著最、臺賞有格、汎取三期之效、博勸庶工之進、爾等或得諸髦彥、或奮自經術、繇繇任吏之法、擢以讞丞之名、簽盛府之元僚、宰象雷之大邑、咸著善狀、悉上計書、鉤攷信然、褒進爲允、殿局之尙、參掌名物、宮僚之貳、通受令旨、乃自法卿之屬、竝爲官制之華、往服茂恩、益圖來績。

江中行可秘書丞制

敕某、惟士之髦、奮入英毅、用吏之敏、擢佐史筵、受委別京之曹、領行列掾之職、局無遁事、歲有成勞、攸司以言、著格應賞、通外朝之初籍、丞本省之清官、尙勉爾休、往虔吾渥。

李恂可秘書丞制

敕某、朕選敦樸有道之士、授經藩房、掌教宗子、資承風訓之益、嘉聞歲序之勤、宜推陟恩、且勸循誘、以爾策造秀之第、服清恪之操、淹通經蘊、究洽政宜、繇圖踐履之勞、擢居著撰之局、置在諸邸、敷訓羣言、誨接有方、褒遷宜及、丞于本省、號曰清官、勉服朝闈之榮、益虔宗屏之訓。

華參可秘書丞制

敕某、朕用偉人、鎮于右屬、復諭髦彥之辟、以參籌畫之功、若時居府、有課集臺、惟是元僚之賢、宜懋攷功之賞、以爾馳吳士之望、懷東序之資、雅有學尙、蔚負文采、數被諸侯之選、亦勾中司之稽、久隨輩而栖遲、能從事而黽勉、質成有典、覆視應條、丞第一流之官、任中秘書之職、亦緣文翰之故、且旌書檄之才、勿薄外遊、更佇來最。

張芻可秘書丞制

敕某、朝家官人之制。用恭以書代。沿閏以質成。著爲成科。抑存至勸。以爾學爲諸己。行高于時。俊拔有文。方雅成範。烝自髦士。置之經席。參備儒林之官。以傳先王之業。豈止建善。首崇治本。亦將厚經行之育。收器識之用。會誦說之最。中攷課之法。卽其本省。丞以清官。有著在庭。往踐乃位。

程昌言可秘書丞制

敕某、夫勸至則官修。賞行則吏奮。閏成而陟。用此物也。以爾烝自髦士。號稱敏才。參于賓籒。丞我赤邑。幹固畢濟。安和弗流。擢佐秘丘之員。外集熬波之利。邑無逋事。局有美資。州上積勤。朝舉遷法。自修書之美。職進本省之清官。有著在庭。勿懈于位。

張維可秘書丞制

敕某、賓興奮藻。膺敏牽絲。服士規而尤修。賦縣條而畢振。治成遠服。課進有司。稽功令以當遷。念弦歌之維慎。用擢丞于本省。仍臨長于舊封。有著在廷。勿懈于邑。

丁翼可秘書丞制

敕某、秘書官清。丞爲第一。非有才令。不以相處。今簡拔差異。而資望益華。以爾用文詞之優。兼材質之美。出于望冑。奮從賓興。訪之行能。則束修無缺。稽之官籒。則勞最有條。覆實攸司。遷丞本省。尙續名家之韻。勿替王官之箴。

李規何若谷竝可祕書丞制

敕某等、夫攷績用人之法、驗于已試、則效以實著、而官乃職修、甄賞之科、時則不謬、爾等以學力之敏、前致俊科、政績之優、入佐書局、外更吏治、復上歲成、審覆信然、褻勸宜爾、進班文石、對丞祕丘、就服清聯、益懷素履、

范中模張執中江楫竝可祕書丞制

敕某等、夫治迹連最、而朝賞不至、則盡力之吏、將何勸焉、爾等階進造之選、有彊濟之材、繇程薦任之優、參升刊約之局、外臨州服、對領縣章、計上勤庸、稽合勞典、卽其本省、丞以清官、秩則就遷、恩惟下究、以明急遐外之賞、篤勤能之勸也、尙進懋爾力、勿鄙夷吾民、咸慎箴規、取稱褻渥、

陳藻可祕書丞梁谷可左贊善大夫制

敕某等、夏口帶江、民俗喜訟、天水被塞、風謠尙武、莅其屬邑、尤資健令、適有成治、爰賦茂恩、以爾或進自丞髦、或任以承學、竝華史局之選、咸佩縣同之章、齋伐自陳、按書當陟、丞清聯于本省、躋榮序于東朝、竝撫寵甄、益勵端操、

寶彤王穆竝可祕書丞俞希及可太常寺太祝制

敕某等、或以才令之選、策于時髦、或以諷訓之修、育自門子、參試以事、往服厥官、列郡之政、修有司之職、舉歲勞均著、朝賞懋推、宜丞年省之清、往虔祝筮之告、勉而端節、服我褻恩、

邢夢臣可祕書丞韓公彥徐總竝可光祿寺丞杜子才可太常寺太祝制

敕某等、朕分建庶工、參濟羣務、謹旌陟之法、示開勸之方、計勞以升、限年爲得、以爾等或拔自俊茂、或蔭諸高華、率用才資、雜治邑局、所至職辦、乃今官成、稽參應書、差次更秩、進丞中祕、預屬內卿、逮于祝史之聯、胥服王官之次、咸思自效、勿廢聿修。

周大象可祕書丞任利有可殿中丞陳之損可右贊善大夫制

敕、國家制法以檢官成、計年而攷吏治、勞能者進、否劣知勸、具官某等、或策名以文、或籍資而仕、竝承風訓之益、咸聞節行之修、居邑者簡惠而不苛、領局者強敏而能力、以勞自白、在法宜遷、進丞祕丘、入預盾省、逮升僚于束禁、竝著籍于外朝、往哉欽承、務乃修綜。

龔鼎臣可祕書丞張瑤王鎡竝可大理評事陳知常可右贊善大夫制

敕某等、國家因堯典之舊、采周官之法、率用一閏、參比百工、著爲成規、汎存大勸、爾等早階文藝之選、或資胄緒之華、服在縣章、恪居利局、書伐來上、舉最當遷、擢丞祕丘、進陟儲案、胥及列卿之屬、對司理法之平、往荷茂恩、益圖敏政。

敕賜進士及第王九成可試祕校郎制

敕某、擢升俊科、方在穉齒、閱于補吏之格、退有待年之期、勝冠已登、攸司言狀、姑試發礪之刃、往栖勾簿之員、慎履在初、祇命無怠。

文恭集卷十四

外制

王珪可太常丞制

敕具官某。策府入遊。所以養器用之識。計局參領。所以試才敏之能。績效旣開。朝賞宜懋。以爾出文儒之舊。用才辭之優。奮取甲科。服在書殿。粹和以應于物。沈默不流其心。紬繹典文。多證正之益。牢籠征算。著鉤校之勤。財府無朘民之譏。天官按攷課之法。應書當陟。用例稍遷。丞諸樂卿。贊我邦禮。姑率舊職。無廢前勞。尙當勉之。識其遠者。

陳湜可太常丞制

敕某。選從茂士。初有美名。進服朝聯。分倅州治。自罹廷尉之法。解去奉常之官。屬吾名臣。越在憂服。以葭莩之聯戚。從草土而控誠。且云暗昧之愆。兼陳隕穫之狀。爲乞養親之祿。重違舊德之言。特出常均。俾還故秩。當念推恩之異。勉思復缺之難。

王昇可太常丞制

敕某、早躋俊等。寢服朝聯。長治劇邑之煩。介居左蜀之險。節廉既著。政敏亦修。條上計文。覆視官簿。勞最甚白。褒陟信宜。擢丞禮樂之司。尙委弦歌之宰。益思自效。勉績來勤。

董某可光祿寺丞制

敕某、拾青以經。製錦于邑。嘗學弊獄。能傳爰書。因于試于有司。俾決平于讞法。處文無害。麗辭有條。廷尉以聞。膳丞爲陟。抑存前比。勿替平反。

王泌可光祿寺丞制

敕某、登造秀之目。補察訪之員。莅吾寰畿。介在西北。密邇萑苻之黨。竊弄潢池之兵。能擒諸偷。以清闔境。都府言狀。有司覆實。宜寵京司之陟。入丞屯衛之聯。益圖來勤。用濟前美。

陳安石可光祿寺丞制

敕某、朕稽合年最。褒敍吏勤。勞弗外遺。恩亦下究。以爾策俊造之目。班宰字之條。撫介山之舊封。因陶唐之厚俗。鳴弦所化。蹊田自默。治有能迹。驛上計文。擢預內卿之丞。尙仍大邑之舊。益思自效。彌勉來勤。

李擇可衛尉寺丞制

敕某、仕以經藝。敏有材資。往字一同之氓。善詰四封之盜。施以方略。得其主名。就巢穴以悉擒。致疆亭之增肅。覽嘉勤績。仲用賞條。俾丞宿衛之司。具寵追胥之效。服茲旌陟。益在慎修。

馮安之可衛尉寺丞制

敕某、擢從勾簿。委以算車。校歲課而甚贏。應賞條而當陟。計司言狀。衛府進丞。尙敦廉飭之規。取稱褻遷之命。

曾班可衛尉寺丞制

敕某、朕惟人材之難。必儲備于無事。而待用于歲時。使所用出于所養。然則才者。豈其所自爲哉。嘉汝好學。文而能靜。匠事之周。以試汝能。益勵素守。朕將觀焉。

李式可衛尉寺丞制

敕某、習廷尉之律。優而入官。典京府之獄。敏于爲吏。局無留事。人用不冤。尹以狀聞。秩且歲滿。臺有賞格。府援舊規。遷任法卿之丞。尙寄決曹之劇。益思營職。勿廢前勞。

劉景可衛尉寺丞制

敕某、藉名門之資。有幹局之用。中銓調集。經勾簿書。外臺薦延。倚辦征算。頗聞精力之敏。且嘉課最之饒。主計條聞。大選覆上。宜申朝賞之信。俾丞門衛之嚴。往服漸階。勿墮前操。

陳仲通燕仲舉竝可衛尉寺丞制

敕某等、竝膺門第之育。參列廷尉之平。篋篋交修。弦歌出宰。奉法自守。舉最當遷。有司以聞。褒典惟舊。宜卽本寺。進丞列卿。尙敦撫字之方。益圖愛利之政。

王詔可衛尉寺丞商令聞可大理寺丞制

敕某等學優而仕服官勤勞或登佐于賓筵或近綏于邑政而幹蠱咸力廉飭有聞章薦嗣升銓格斯應擢丞衛府參讞理官率示寵遷懋于祇恪

周宗閔可衛尉寺丞王正臣可光祿寺丞寇誦可大理寺丞制

敕某等憑世胄之資承夙訓之益中參京局外服官聯政以敏聞課亦羨著歲勞自白最狀頗明光祿號內卿衛尉掌門禁大理平疑法諸丞皆屬官就服茂恩無廢甘節

毛維藩可大理寺丞制

敕某早階科選兼敏吏資赫從尉察之司舉臨筦樞之局置無遺力沛有羨緝迨滿歲而終更及有司之鈎覆審如功令宜信賞條擢任法卿之丞參司刑讞之典往祇朝渥彌服官箴

趙謹可大理寺丞制

敕某學通法家仕至郡掾曹事能舉履道益修監司之官保任獻狀終更之課鈎校應書擢居讞丞往傅平典益思潔慎庸對褒嘉

蘇有可大理寺丞制

敕某治經預選習吏有勞掾于都輦之煩通乃刑名之學博文無害援比當選閱府奏之條陳擢理官之丞屬尚委劄成之寄益留明慎之思

鄭宗勵可大理寺丞制

敕某、朕用天聖詔書、拔舉令宰、爾自尉察之任、被監司之薦、歷典二邑、訖無逋事、大率可紀、小如致疑、選部以聞、便廷以對、合舉將前後之數、除法卿丞屬之員、勿替官箴、往虔朕命。

李士昌可大理寺丞制

敕某、朕慎銅墨之寄、惜才錦之傷、特用詔書、選拔令宰、爾以資名應吾、舉力局、幹厥官、治不煩苛、居有愛利、因加褒寵、勿替厥心。

王尹可大理寺丞制

敕某、習通城旦之書、資入州網之任、外釐煩局、實賞牢盆、力營近監之饒、歲溢熬波之數、終更結課、遷陟應條、用除棘路之丞、往治竹刑之讞、足伸家學、益慎官箴。

張太初可大理寺丞制

敕某、辭中俊科、才號能吏、早隨選補之牒、嘗署尉察之員、近在東畿、居當孔道、剽輕聚類、椎埋作姦、主名起居、莫不究悉、根株窟穴、盡得剪擒、京府以言、臺格應賞、特丞刑讞之屬、且旌方略之明、勉服漸階、益圖敏用。

丁諷可大理寺丞制

敕某、爾以膚敏之資、被教忠之善、擢從卿屬、入真書筵、能服校讎之勞、亟聞精審之最、來援攷法、參敍宿勤、俾丞治讞之司、尚仍刊籍之舊、益崇門業、往服朝榮。

史宏可大理寺丞制

敕某、緒承簪紳、敏有局致、擢升衛府、列在京司、具緊遊刃之能、俾幹摘山之利、宜勤匪懈、底績有成、通驛奏以自陳、按臺規而當陟、遷丞讞寺、進屬法卿、就服朝恩、勿遺公力。

謝景祕可大理寺丞制

敕某、夫舉最當遷、增秩留治、西京良宰之故事也、以爾烏衣舊族、名臣之子、志行修潔、才章典蔚、登科在甲、治邑于東、風政修明、績伐來上、參用有司之覆、稍進理官之丞、尙懋來勤、圖濟光美。

劉誰可大理寺丞制

敕某、以學力之精、階于進宦、以吏資之習、服在賓從、亦用已知、薦臨利局、往幹牢盆之入、頗增近監之饒、滿課代還、攸司覈實、擢預法卿之屬、往操刑讞之平、惟服漸階、勿更初節。

趙丙可大理寺丞制

敕某、承列掾之乏、居被邊之衝、隨遠檄以忘勤、奉更書而無缺、多有舉將、參質攸司、悉中保任之科、宜膺擢敘之典、丞于列寺、佐乃法卿、往服褒遷之恩、勿渝正素之節。

李孝孫可大理寺丞制

敕某、早繇俊等、參列京司、倅邊壘之支軍、控林胡之絕塞、馳郡郵而上計、覆官簿以應書、稍進讞丞、通爲法屬、益懋終更之課、勉思臨履之方。

雷簡夫可大理寺丞制

敕某、出于名閥、資有敏材、領護渠防、習知水事、通谷口之派、溉關內之田、省疆堤捍固之煩、獲泉源灌浸之利、使者言狀、有司質成、勞實可嘉、秩久未進、特賞理官之屬、尙緊行水之勤、用振滯淹、亦旌強濟、

魏耆可大理寺丞制

敕某、宰字嶠南、發摘境內、敏有方略、勇于追胥、多錄赭裾之姦、大絕鳴枹之警、亶無遺力、休有厥勞、本郡以爲言、攸司曰當賞、丞諸列寺、佐我法卿、尙勉來勤、往祇顯拔、

楚泰可大理寺丞依舊直講制

敕某、朕選通經義、誦說有法者、勸導胄子、爾本學力、自致俊等、緣因祭酒之薦、置在詳講之員、通敍外勞、亦已久次、雖中坐細故而見稱、大臣參閱薦章、足驗素行、姑寵法卿之屬、仍敷學省之經、尙圖後行、毋倦惠訓、

楊南仲可大理寺丞知國子監書學兼篆石經制

敕某、朕以首善在學、至教本經、將遠塞于異端、宜圖刻于方礎、敷求毫法、緒正典文、爾緣被薦、延入預刊、正見稱篆籀之學、頗整字書之訛、亦旣肆勤、宜有開勸、進丞大理之屬、關知小學之司、勿替爾勞、往虔茲渥、

張初平可大理寺丞充堂後官制

敕某、法學本精、吏資兼敏、勲委銅章之任、尤著壺飡之清、屬宰士之缺員、繇銓流而膺選、按文參試、事條多通、擢爲廷尉之丞、寘于相府之掾、勉思勤篤、往服寵榮。

馬中民可大理寺丞充堂後官制

敕某、法學稔通、廉規尤飭、早從銓集、嘗預賓籌、會旅士之缺員、試案文而習職、擢升卿寺、祗局常塗、往服茂恩、益思慎履。

盧待舉郭宏竝可大理寺丞制

敕某等、治后蒼之禮、習蘇公之律、進服官政、更試吏資、或以郡督郵之名、典幹局事、或用邑大夫之舉、班錄縣條、上治目而應書、稽賞文而中法、對升刑屬、胥列京司、往服茲榮、勿更而守。

張闡王熙竝可大理寺丞制

敕某等、朝家以鹽茗二策、籠山海之用、置賞格以差殿最、舉能吏以謹出納、爾等竝以辭科之俊、兼吏幹之敏、更試大幕、薦領煩局、終更來上、羨饒居多、有司以聞、應書當陟、竝丞卿讞、胥列京司、往慎爾修、以服茲寵。

尹立李惟永竝可大理寺丞制

敕某等、或治法家之書、或階門胄之蔭、能謹風訓、善畏簡書、以至任紀綱于州曹、賦弦歌于縣寺、職皆修舉、政不煩苛、監司章言、銓審條白、胥應攷功之歲、竝遷治讞之丞、當虔吾恩、彌慎爾往。

費子卿李孚佑竝可大理寺丞制

敕某等、朕計大選之最、拔羣吏之能、才既畢甄、吏則胥勸、以爾等或修辭中俊級、或治經有師法、解經賦祿、沿牒服官、竝在諸侯之筵、對書從事之檄、薦延累牘、遷陟應條、擢居列寺之聯、悉備法卿之屬、益懷謹畏、往服褒嘉。

東莊王苟龍竝可大理寺丞制

敕某等、本用經通、悉中科等、逮奉官使、稔聞節廉、資名且深、慰薦亦衆、因終更而赴集、稽選舉而應書、領出納于要藩、善經營于劇事、自陳勞最、參覆計文、課吏之法、當選理官之屬、爲重、近于通籍、服在攸箴。

陳禹臣李輔竝可大理寺丞制

敕某等、或精法家之學、或藉門胄之資、入補吏員、胥奉銓集、尉于北部、著發姦摘伏之能、宰我寰封、有撫弱字孤之惠、公車交薦、京府條聞、居多名臣、是其舉將、足觀率履、宜沛陟恩、丞于法卿、平乃疑讞、尙服榮塗之漸、勿忘素節之修。

姚偁楊文仲竝可大理寺丞制

敕某等、周制計治而賞、漢法舉最以遷、所以勗官成而勸吏力也、以爾偁、治容臺之禮、中選明經、以爾文仲、出奕暨之甥、得任官次、施字人之縣譜、典犇命之軍書、力致稔聞、章薦交集、稽合銓程之格、擢居刑讞之丞、咸勉爾修、以對吾寵。

閻諤劉偃竝可大理寺丞制

敕某等、國家務勸治功、思究吏迹、取信于保任之法、視成于銓審之司、申陟乃勞、敍進其秩、爾等本階蔭格、亦起法科、交蓄敏資、參承幕職、逮終更而齋伐、咸被薦而應書、與對便廷、聯丞列寺、往祗茂渥、勿替清修。

陳仲舒周昂竝可大理寺丞制

敕某等、行己則修、習吏而敏、彛典別京之獄、亦班劇縣之條、訊刺得情、撫綏有惠、閱需章之交薦、質攷格以竝優、宜丞詳讞之司、更委平反之任、益圖來裕、彌昂攸箴。

劉汝言楊自周竝可大理寺丞制

敕某等、朕聞設張薦格、擢敍吏勤、勞弗外遺、恩亦下究、以爾等久從選部之集、參承幕府之籌、介特無瑕、幹固有力、交章保任、結課終更、質諸有司、審若衆奏、擢預法卿之屬、往服王官之箴、益慎爾修、勿忘茲寵。

徐高丁爲寶韓昌竝可大理寺丞制

敕某等、或治博士之經、或通法家之學、早階科選、久服仕塗、絜矩自將、履官無缺、睠言按察之吏、竝陳保任之章、參服中銓、胥應陟典、宜進列卿之屬、往居治讞之聯、祗服茂恩、益圖敏政。

吳彥先劉易簡張庚竝可大理寺丞制

敕某等、或進繇俊等、關掌邸閣、或任經宰理、歷試按文、或積有資名、濟以風力、參軍從事之畫、居邑大夫

之員。悉奉更書。來集大選。閱交章之慰薦。視齋伐之著明。咸契陟科。參丞法屬。階榮塗而伊始。堅素操而勿渝。

孫傑可大理寺丞馬中庸可衛尉寺丞制

敕某等。或以經拾青。或緣蔭隨牒。臨長邑室。參列版曹。字氓有聞。領局且幹。監司薦其善狀。終更集于選部。鈎校弗謬。旌陟乃宜。理官置丞。衛府有屬。竝寵京司之列。勿忘士矩之修。

孫薰可大理寺丞單鼎可太常寺太祝制

敕某等。奮繇蔭格。服在京聯。臨宰右蜀之民。典幹別都之帑。越從官次。列上年勤。適敦泛勸之方。爰用稍遷之法。讞丞進秩。祝史陞名。尙服箴言。交修節素。

杜諮可大理寺丞張文告可著作佐郎制

敕某等。或積資至幕。或被舉治縣。參畫有補。撫字弗苛。監司薦聞。銓覆應狀。祕丘領著。讞寺爲丞。尙勉來課之修。以對陟恩之茂。

綦愿劉濟竝可大理寺丞韓標可著作佐郎制

敕某等。或力文升科。或治經署第。習知爲吏之敏。舉遵行己之方。幕有婉籌。邑無遁事。薦書交于公府。滿課集于銓臺。擢佐修書之筵。進丞治讞之署。益思勉勵。用對褻遷。

朱達楊若冲竝可大理寺丞張安國可衛尉寺丞制

敕某等、夫薦任之開、所以拔能吏、攷法之舉、所以勸庶工、以爾等或治曲臺之經、或耕舊門之蔭、預籌幕府、獲佩縣章、亦參法律之曹、竝宣郡邑之力、交章以薦、終課而還、質諸有司、應乃褒典、用爲刑讞之屬、寵以宿衛之丞、胥日異恩、彌飭廉矩。

全余白祖或李秉竝可大理寺丞周復張熙竝可著作佐郎制

敕某等、朕欲選清能、拔寒素、故保任之法、專施監司、而課覈之方、一歸銓審、參覆不謬、褻陟乃行、以爾或奮由才章、或進以經藝、預籌大幕、頡治一同、亦從尉察之司、往釐筦權之局、竝委束脩之士、宜敷渥茂之恩、領著史筵、進丞法屬、悉近朝闈之陟、益宣公路之勤。

李真卿可太常博士制

敕某、夫賞以敍官、治勸吏力、有若名秩之美、而得才彥之良、乃允至公、不爲妄施、以爾少厲風迹、參服文雅、班我外著、丞于祕丘、出算商車、入奏計簿、校府緡而增益、質臺格以應遷、宜擢乃官、且申吾信、矧惟相薏之地、差近握蘭之資、尙當勉之、務識遠者。

章峴可太常博士制

敕、博士典相儀禮、贊導乘輿、今雖置員、溢于舊制、猶曰美秩、屬之清流、以爾某、聯郇國之華、有閩士之望、世用儒雅、顯政以風迹、聞會奉更書、還奏成伐、參質不謬、序遷有典、資淹中之學、講野外之薏、往祇褻寵、勿替厥修。

李復奎可太常博士制

敕某、朕以監牧之繁，沿使職之建，將協濟于厥務，亦參簡于乃僚。屬當滿課之成，宜敍懋官之陟。以爾奮繇名閱，綽負敏才。更倅州藩，頗厲風迹。逮預王閑之掌，時聞馬政之修。校齋伐而弗誣，進容臺而惟允。勿懈于素，尙勉乃求。

李師中李建中竝可太常博士制

敕某等、太常典禮樂博士通古今，必得美材，以相儀蒞。雖員品至隘，而資望益清。儒者所居，朝選爲貴。以爾師中，性無外飾，器有遠用。以爾建中，學力強敏，吏資肅給。竝策俊髦之第，咸稱風矩之修。或典校禁中之書，按行寰內之邑。或董司漕引之舸，兼握宰字之條。參敍成功，交中攷法。率從盾省，聯陟容臺。尙當勉之，以對我稍遷之典。

丁宗臣可太常博士丁寶臣可太常丞制

敕某等、國家試功之典，參任以職。攷課之法，質成于閏。用甄美效，亦存至勸。以爾宗臣，吏資強敏，器質莊重。以爾寶臣，文典而蔚，才敏且精。是惟天倫，竝入吾彀。所試有迹，厥修弗愆。或鳴絃以字人，或剖符而守境。竝時上計，據法得遷。入丞樂卿，進掌儀蒞。悉號朝閏之美，足爲家閱之榮。就服寵褻，益思勉勵。

張師中可太常博士游奎可祕書丞陳知德可大理評事制

敕、朕用閏成之比，計吏治之修。雖官有大小之差，而法無內外之異。所以均朝賞，壹臺制也。以爾師中，材

質粹美。風業修舉。以爾奎。南土之秀。以爾知德。舊門之良。稔服朝聯。升預京局。中幹事職。外握縣條。來上勤庸。參應褒典。西京重于博士。江左美于王官。至于詳讞之聯。竝爲進陟之美。欽祗無忽。褒勸在茲。

郭祐侯瑾竝可太常博士陳儼可國子博士侯訢可殿中丞制

敕某等。夫一閭之法。天氣小備。施于人事。故可以較官成。懋臺賞。以爾等拱治朝之次。有著在廷。宣外服之勞。弗懈于位。竭一官之智效。上三最而歲優。胥中陟科。差進榮秩。寵以博通之士。丞諸盾尙之聯。就服褒華。益思清約。

張絳可太常博士商體仁可殿中丞臧師顏黃仲英竝可國子博士制

敕某等。昔堯以職而試臣。漢用法而課吏。咸責實以觀效。亦累優而取陟。以爾等士矩尤飭。吏文滋習。謹政修之賦。則嚴而不苛。事裁局之繁。則敏而能力。績成所治。章下有司。較閱閱而信然。稽功能而審若。差進容臺之秩。參服上庠之聯。乃及盾尙之丞。并通表著之籍。往踐厥職。彌懋爾勤。

單煦可太常博士焦盛王傅張允竝可國子博士馬直方王延慶明穆歐陽炳張仲宣竝可太子

中舍人制

敕某等。或修辭干祿。或治經服官。亦籍舊門之資。早承食德之美。擢升門序。列置京司。參服吏勞。協宣公力。條陳滿課。鈎校陟書。豈有積勤。訖無通事。稍遷禮閣。敍進經庠。乃暨奉儲之僚。竝預班朝之籍。咸思砥節。用慰遷恩。

真毋沆可太常博士閻丘孝終張士明江正倫竝可太子中舍人制案真毋複姓。不經見。真字似誤。據制詞。以盾局

對容臺。又似閻丘孝終下。有脫文。

敕某等、或拔自王國之髦、或通乃師門之學、亦緣蔭格、參服廉規、臨政有聞、處躬無缺、竝上閏成之法、咸稱吏治之良、覆案信然、褒陞允若、容臺相儀典之重、盾局掌名物之煩、東禁奉儲、外廷有位、尙屬首公之敏、用虔進秩之榮。

武康可太常博士裴耕馬先張應符申屠會竝可殿中丞史珍薛端竝可守太子中舍人李巽可

大理評事制

敕某等、朕日者右饗合宮、咸澤庶位、竝甄一等之秩、用洽三神之和、爾等類偕曲恩、差進茂級、而滿課已上、攷格當遷、吏勞不可以外遺、王澤當令于下究、竝申後寵、匪隔前恩、往承朝綽之華、勿替王官之守。

潘夙可國子博士制

敕某、蚤班朝次、懸守嶠南、蔚有敏才、條郡邑之治、沛然精力、籠山澤之宜、銅冶以興、泉府攸賴、會奉終更之計、有嘉實至之勞、擢任儒林之官、參司胄子之教、益圖志用、往服品儀。

武宗元可國子博士制

敕某、爾藉外嫻之資、預中朝之籍、假以別乘、倅于方州、自挂刑章、黜臨利局、因今課之云集、授攷法以自言、進之成均、任以博士、宜思既往之謬、當服非常之恩、尙勵來勤、庶幾補過。

許恢李田尹偕竝可國子博士制

敕某等、夫賞者國之砥石、而官之利器、先王所以嘉善磨鈍、績用是生、法曰攷功、謂此物也、以爾等清修著聞、強濟有力、或舊德是食、或治經甚究、參施吏敏、胥服朝聯、竝修官下之勤、交中閏成之典、進遷學省、充預教官、在儀品以至高、尙箴規之相勉、

何夢昇可國子博士李甸可殿中丞制

敕某等、進以經術、守在廉隅、敏有吏資、善索民隱、參領軍和之壘、分乘州倅之車、悉上最文、交中襲典、用進經庠之秩、亦遷盾省之丞、有嘉治優、無忘節素、

牛拱辰可國子博士吳穆周諸陳舍竝可太子中舍人制

敕某等、竝達于從政、恪在首公、馴致法丞、參服盾署、或以弦歌之最、著厥縣同、或以征算之饒、淹于局次、有司獻狀、主計爲言、年庸有成、臺格應賞、經庠峻于儀品、儲案籍于班聯、竝爲茂恩、益樹勤績、

李元方可國子博士范袞郝大同竝可守殿中丞呂惟和崔象明竝可殿中丞黃延慶可右贊善

大夫制

敕某等、籍通王官、名任宰士、于規隨而尤曉、亦幹固之兼資、尤屬三宮之文、追復九房之祀、推行制度、省闕繁文、亦繫敏用之明、不爽先庚之素、勤庸屢試、泛等宜優、入典經庠、進丞盾省、逮儲坊之僚屬、皆朝序之聯華、往服褒遷、益思恭慎、

劉淵可試國子四門助教制

敕某、執方技之學、游貴要之門、且有薦言、乞從補授、宜試員于庠序、俾脫迹于閭閻、匪預銓流、尙祇朝渥、

樂永可試國子四門助教制

敕某、挾醫砭之術、精齊和之宜、事吾大臣、越在行府、章言謹幹之狀、參敍勤久之勞、就除學員、尙執方技、且從舊德之請、勿廢彛時之勤、

劉可久可試國子四門助教制

敕某、早挾方書、嘗游戚畹、在舊勤而可紀、屬遺札之爲言、用優經省之名、匪預銓流之集、往虔次補、益在勤修、

曹博文可特授太常寺太祝制

敕某、姻連椒塗、族漸河潤、早試理官之屬、尙拘選籍之名、誕節推恩、後宮著令、且有所恩之請、特從升秩之遷、遂列京司、往祇祝史、

孫琪可太常寺太祝制

敕某、早沿蔭格、嘗補匠員、造選親喪、謝去官次、尋外除從吉之始、在季秋宗祀之前、來援慶條、且有比例、宜遷榮于祝史、尙助志于政經、

姚預可太常寺祝制案太祝下常有脫文、制詞內有某等爾等字樣、一人可知、又有對、升儲宋語、非太祝可知、

敕某等、惟庶工之陟、用三朞之成、弗遺外勞、略存大勸、爾等竝通習吏治、底慎官箴、宣風力而有聞、飾士矩而無缺、縣條修舉、局課衍盈、灼有計文、合于賞格、對升儲案之秩、差進祝史之聯、參服褒嘉、交思勉勵、

聶平仲可太常寺太祝制

敕某、詞臣之後、年妙志美、食于舊德、綽有敏資、曷用正朋之名、出從外局之試、安和備于諸事、出納謹于有司、齋伐應書、賞勞申信、稍遷祝史之秩、且旌門子之良、勿頹家聲、當志于學、

魏纁可太常寺太祝制

敕某、早資蔭格、造正匠員、掌庾大江之潯、奏課高閣之下、質官成而旣效、攷歲比以當遷、用升祝史之名、稍進京司之秩、勉思謹節、用對陟恩、

裴士傑可太常寺太祝制

敕某、勾匠廚之稽、當庾氏之掌、能精出納之吝、頗聞臨履之修、臺鉞三期之勤、朝獎一官之效、稍遷祝筴、往服明綸、

陳京可太常寺太祝制

敕某、佐選外之邑、在勾稽之員、奉檄外臺、採山北境、歲有羨數、材以敏聞、質之有司、應于著格、在勤可紀、雖遠弗遺、擢預京司、往尸祝策、尙承舊貫、勉續前勞、

吳瑛方薊竝可太常寺太祝制

敕某等承舊門之資預大臣之薦參試事任善持箴規不蹈悔尤且正閱閱已實有司之覆宜從祝史之遷泛錄小勤勉圖永譽

張慶隨可中書主事孟可道可中書守闕主事盧克用可中書錄事制

敕某等敏有吏資服在公府練事經而克暢親几案以爲勤行檢竝修功次可紀或稍遷于右局或少待于缺員竝爲進陟之恩益務恪恭之守

陳叔度可大理評事制

敕某天水扼羌胡之衝据汾隴之勝虬秋在戌重兵留屯爾勳承賓籌參委邊糴能宣力政以集糧道穀既有備羌不敢動計臺舉最帥府言狀參覆不謬褻進是宜升屬列卿平亭疑法平亭原本站作平亭今據漢書張湯傳改正往祇恩陟勿廢節修

程旬可大理評事制

敕某家世在南擅吳士之望考服能政稱漢吏之循爾階綠任子之科馴致列卿之屬勳因薄罪之坐適領遠方之征課習有司法得遷秩用進丞于棘路往治讞于竹刑無忘聿修有以自效

張諷可大理評事制

敕某臺屬有薄勾檢稽失近制選任委之丞長爾以材被薦計書代期中司列言居職無缺賞有前比法當得遷姑擢廷尉之平尚仍憲府之舊往圖滿課勿廢前勞

張希甫可大理評事制

敕某、廷尉天下之平。丞屬所選。枉直攸寄。爾以華腴之蔭。試儲校之員。雖不積吏勤。而稍涉年序。加有外戚之請。宜佐法卿之評。驟列京司。益慎朝檢。

馬琮可大理評事制

敕某、籍門曹之資。預京司之列。尸于祝策。領我祠官。試諸事局之煩。聞其吏力之幹。年庸當陟。刑讞是評。不遺爾勤。往服吾渥。

俞祐甫可換大理評事制

敕某、早籍掖塗之資。遂階使級之選。頗開幹局。稍最輶車。求換職于京師。俾評刑于卿局。尚敦素履。無忝清修。

馬玘扈高王誦竝可大理評事制

敕某等、承世闕之美。號門子之良。參列京司。分條事職。以年勞而自上。稽臺格以當遷。用擢佐于理官。俾評廷于疑法。無替爾職。尚謹攸箴。

任永德可試大理評事制

敕某、繇因薦任之牘。擢爲宰字之官。邑在甬東。地連越絕。政惠且敏。節廉而修。代還中銓。條上初課。臺省明格。軍有從事。幸無草檄之急。尚寄鳴絃之舊。往圖後效。來究前恩。

路諫可試大理評事制

敕某、爾前以調補尉員督縣之盜賊。今以資中都吏。任郡之紀綱。掃擒寇偷。實著闕閱。所部上勞。攷有司舉賞格。功疑惟重。賞以申信。擢參幕裏之畫。脫去府中之趨。茲爲異恩。尙圖來效。

馬知良可司天監丞制

敕某、傳疇人之業。參保章之屬。祇勤無懈。占候有勞。俾攷績于攸司。命遷丞于本局。尙隸陵宮之職。往欽臺檢之恩。

丁濤可司天冬官正制

敕某、傳疇人之業。任冬卿之丞。思湛密而寡尤。術推步而多驗。有司較最。在法得遷。宜升和叔之聯。且寵石申之學。

周琮李用晦竝可司天中官正于淵舒易簡竝可司天監丞王士隆可守少府監主簿充翰林待詔制

敕某、言天之學。古有三家。粵若渾儀。昭合乾體。朕緬懷往範。恐失舊傳。因命究研。且令制作。遙觀成績。第用賞勞。爾等通甘石之經。深梓慎之術。能奉吾詔。咸竭乃精。克正規模。弗愆晷度。差進清臺之秩。并預禁林之聯。往服朝恩。無替爾職。

郝咸亨可少府監主簿制

敕某、習知方技、祇服禁庭、懸經慈祀之恩、猶滯勾稽之秩、慶條具在、匠簿是升、勉思官守之勤、姑對朝恩之茂、

王德悅可將作監主簿制

敕某、以勾稽之名、承庀官之乏、守在尉察、善于追胥、多獲椎埋之姦、有嘉強幹之力、疆亭息警、州部列言、較臺格而當選、用匠員而申信、往虔吾渥、勿廢爾修、

張潮可將作監丞崔公孺可大理評事制

敕某等、在寰輔之地、振津陸之要、惟是支局、分隸屬邑、爾以質幹之敏、上等課之成、征有羨緡、酌多餘息、放于末利、在道則非、恪于首公、其勤可錄、進升匠屬、擢任刑評、往祇甄敍之恩、勿忘修飭之素、

文恭集卷十五

外制

葛源可司封員外郎制

敕。國家沿挾銅之令。以收七福。因採山之法。用廣五銖。參選幹能。分泄經畫。屬敍稍遷之典。宜推加異之恩。具官某。材堪治煩。政有能迹。嘗更守于列郡。適分委于輶車。按南州寶冶之饒。佐縣官園府之用。宜勞于外。興利在公。章敍前勤。聯及今績。宜寵左曹之秩。用優主爵之名。就虔吾恩。益營乃職。

田京可度支員外郎元積中楊左竝可屯田員外郎胡世卿可國子博士制

敕。具官某等。夫勞之弗圖。治道或弛。賞以合勸。政體乃修。歷代攷課之規。所以聳善而旌伐也。以爾等敏有才具。蔚爲時髦。或文雅自將。飭士範而無缺。或法律可任。條吏事而有餘。參服治朝之聯。分持衆職之劇。有資優而望舊。或課最而職修。胥應陟書。差進清秩。稍遷支度。初拜墾屯。竝爲郎選之華。且旌文士之美。尙圖來績。庸對茂恩。

盧成可度支員外郎吳祕可屯田員外郎張珪可虞部員外郎陳象之可比部員外郎制

敕具官某等。朕沿三歲之比。稽庶位之勞。表顯治功。差升茂秩。泛存至勸。抑惟舊章。爾等體行莊修。力局開敏。參穆王官之序。分條吏職之煩。或擁傳巡行。按章覆讞。糾虔中法。平處弗冤。或守境寬平。監州敏肅。竝援功次之令。具條官闕之成。校最信然。進秩宜爾。支度要部。比勾劇曹。乃至虞衡之司。悉通辰象之應。尙懷擢序。勿替厥修。

吳授可金部員外郎制

敕具官某。任宰旅之士。稱公臣之良。總振諸曹之綱。習知決事之目。資有敏濟。號爲練更。適者攷制九筵。奉祠五室。惟禮文之繁。緝經几案之推行。令有先庚之明。事無愆素之闕。肆勤可紀。覃賞用優。稍遷應宿之郎。俾進司金之秩。往承褻渥。益務恪恭。

吳授可主客員外郎制

敕某。朕用閏成之法。稽官治之勞。矧乃宰士之良。任夫公府之重。練更有補。擢敘則宜。以爾行義俱優。力局參敏。選自銓流之美。嘉其士矩之修。寘諸堂塗。寵以朝秩。試右曹之劇。則書案弗留。委都目之繁。則事條畢舉。稽歲庸而懋著。閱府奏以敍陳。較然宿勤。協于攷法。春官有屬。建禮爲郎。仍序貴臺之廷。兼煥積星之位。益圖慎履。用對遷恩。

呂公弼可兵部員外郎制

敕某。官著攷法。雖審較于行能。職重首曹。亦參視于人地。以爾承世濟之善。有德器之稱。中握計籌。外按

使斧臨劇煩而自若。躬和粹而弗流。選自省聯。攝糾都獄。雖平反之尙淺。在審克而則精。更試之效已聞。稍遷之典惟舊。姑寵七兵之秩。用服一臺之華。往服茂恩。勉濟遠業。

張環可兵部員外郎制

敕具官某。夫振滯淹者。所以圖官次之效。獎沖退者。所以厚天下之風。仲以旌褒。聳夫流蔽。以爾敏文。強識。遠量直躬。履通介而能全。安醜夷而忘競。善處其厚。有隨和而弗珍。能裁諸煩。迎干鎔而立斷。中祕入直。外治數更。久次而不改其常。衆競而獨安于靜。朕心嘉此。議者賢之。特推躡等之恩。用獎秉彝之操。七兵之屬。秩峻中臺。三吳之佳。使優諸部。尙繫舊貫。勉緒成勞。

徐宗況可兵部員外郎陳旭吳奎可起居舍人制

敕某等。朕永思孝道。儀刑前王。卽路寢之祕嚴。修合宮之齋享。率義而尊配典。明德以薦馨香。神靈居歆。天人合貺。因以孚朝慶之典。時則厚諫雷之臣。以爾宗況。行義清修。志力強正。以爾旭。夙識經遠。學術研幽。以爾奎。方潔無渝。勁正不撓。竝以瓌望。而充本朝。或嘗冠惠文。論事有切劘之益。或入對制策。納忠無回隱之私。置之諫垣。補我闕職。復能奮繇直道。數進苦言。逮齋杖之陪祠。率嚴恭而服禮。熙成受祉。覃施澤勞。入妙一臺。進聯二史。往承茲渥。益思而忠。

張中庸可兵部員外郎高良夫可金部員外郎解賓王可兵部郎中石揚休可祠部員外郎制

敕具官某。朕格太室。還祀明堂。靡神不宗。惟帝是饗。至陽顯見。休景晏溫。受茲元祺。均爾庶位。以明祝釐。

之美。不欲專之。朕躬以爾等。選自臺觀之華。參裁都瑩之劇。奉若吾語。虔乃祠事。靖共在列。奏假無言。詩不云乎。奉璋峨峨。髦士攸宜。疇茲成勞。進爾茂秩。柱史職雖峻。臺郎選亦清。晷言四士之良。竝從一等之泛。益思自效。其在懋承。

麻溫故可職方員外郎制

敕。朕據閩成之法。校吏治之最。先期以勤遠。急賞而勸勞。以爾某。術學兼資。質文參映。躬清素之履。服澹退之尚。潛在郎署。曾醜夷之弗爭。孤于守藩。亦名教之爲樂。宜我勤約之詔。敷于豈弟之風。條上計文。覆應褒典。亦以久法。是宜稍遷。臺郎主于文書。職方辨于圖志。且獎弱翁之行。勿與顏駟之嗟。

陳巽可職方員外郎制

敕具官某。夫寬柔以教者。南方之俗。安靜不苛者。循吏之治。上計若最。進秩宜優。以爾擢從。駿良乃服。清素果于從政。篤在首公。以中臺之秋聯。委臨川之朱轂。績效著于列郡。閱閱集于有司。參校不誣。擢敘爲允。進司方志之掌。居爲名秩之華。往佐夏官。尙圖民瘼。

凌景陽可職方員外郎制

敕具官某。夫詳試政事。稽參治狀。因閩成以大比。用最法以次遷。亶無遺勞。姑用振滯。以爾著南土之望。服中臺之員。名有清文。濟以美政。來上滿計。交應陟科。稍遷右曹。且服前列。臺郎漢制。主作文書。職方夏官。掌領圖志。竝爲名秩之美。允宜才彥之居。尙懋厥官。往欽茲寵。

謝頤素可職方員外郎趙慎微可比部員外郎王得賢可虞部員外郎張擇仁可太常博士冀尙

王日宣竝可太子中舍人制

敕某等夫吏績成于外賞格著于中因閱閱之成勞速置郵而傳命就用遷秩以明亟賞爾等資承吏幹之敏參服王官之采肅將朝委領刺州疆或宣賦縣條或典幹事局有寬平愛物之迹無煩苛峻民之譏列上計文優中遷法臺職之劇則有主方貢司物計〔案〕此下似脫比部語句惟山澤之大緊虞衡之掌至于奉常儀蒞承華僚選咸用流品之入差次名秩之除旌陟在茲欽祗無忽

李郊可駕部員外郎元絳可都官員外郎李頎可太常博士林盛可國子博士制

敕某等夫陟典之寬則才路無壅攷法之密則課目難究歲以爲限時惟厥中以爾刻才敏政成習爲吏之術以爾絳文清行茂贊治財之策以爾頎風業修舉所至有稱以爾盛吏文淹通號爲無害竝條守宰之效參敍支度之勞治功較然恩典宜及承司駕中都之務進容臺太學之聯竝爲懋遷尙思來效

管朝宗可庫部員外郎徐峻可太常博士董壽范存竝可殿中丞呂公垂可右贊善大夫李需趙

昌王乾祐竝可太子中舍人制

敕某等書伐以期視成于閏攷合功令差進秩次使在位者得以勸仰而有力者無所忽遺爾等或擢自秀科或奮從力學亦階舊德之食參賦治民之經安靜無華廉平有迹類上三年之計進稽六敍之文據法當遷在賞宜信司甲待事抱藹相儀尙承典名物之煩儲案通表著之籍竝爲朝選之美就服詔除之

榮務推精誠，勉思政術。

劉杞可都官員外郎制

敕某，朕咨擇州將，出賦朝經，參置郎官，遙承臺務，差進秩次，褒勸治功，以爾本廉茂之升，資庸敏之用，比更試于煩事，適假守于劉城，政舉以修，計上曰最，義圖泛勸，法著稍遷，擢之秋聯，典我隸士，尙謹循良之目，以承甄寵之恩。

錢括可都官員外郎張師臯可虞部員外郎制

敕某等，夫堯之熙衆績，則曰明試以功，周之較羣吏，則曰敍正其治，咸所以攷政實，辨才否，然後論陟之也，以爾括階仕科而尙風業，以爾師臯任門籍而有幹資，竝馴致周行，亦更試煩事，或臨淮之劇，方駕倅車，或砥柱之艱，參督漕舸，來上歲課，胥協賞條，都隸進聯，澤虞陞秩，竝丞省局之務，且旌官閥之勞，勉服恩章，益敦士檢。

楊中和可都官員外郎呂惟簡可司門郎中制

敕，國家敍進庶工之才，均用一閏之法，雖閒劇之職，不類，而褒勸之典，略同，以爾中和，經術尤明，行能兼美，早傳先王之業，久居博士之講，以爾惟簡，承公族之舊，稔吏文之資，或引疾養和，請奉琳館，或剖符治遠，邈在銅梁，竝因官成，差進郎秩，典臨都隸之劇，掌司門籥之嚴，就服稍遷之恩，勿廢聿修之節。

楊延可都官員外郎李唐卿可太常博士許立可國子博士制

敕某等、朕敍進羣治、優先外勞、施則勝平、恩不遺遠、爾等以力局之敏、兼風矩之修、服在王官、參條吏職、或前更邸肆之掌、課有甚贏、或分樹郡邑之風、政號連最、有司獻狀、主計爲言、績計較然、賞固宜爾、中都擢序、儀蒞典司、至于庠學之聯、竝爲朝秩之美、益思砥節、尙勵忠勤、

李及之可都官員外郎董沔可屯田員外郎范微之蔡準竝可祕書丞制

敕某等、夫砥石之設、所以礪鋒鏑、攷法之建、所以聳行能、限年而升、惟官是懋、以爾及之、性理明決、資練更之敏、以爾沔、風識幹舉、參支度之劇、微之、以名門之雋、準、以幹時之良、竝奮繇藝文、而更試風政、休有最目、宜應陟書、秋臺都隸之聯、冬官墾屯之屬、進丞祕局、預班外朝、用服竝時之恩、悉號清流之選、益思淬琢、胥服褻華、

楊志可都官員外郎王正民可虞部員外郎呂協可殿中丞李述可祕書丞制

敕、國家振小大之職、壹內外之治、著定攷法、申敍衆功、勞之弗遺、善用是勸、具官某等、達于從政、敏在首公、或關握守符、或顯促漕舸、近沂二河之險、遠涉三湘之艱、陶穴古公之餘、羅池柳侯之舊、流風尙篤、遺詠未衰、雜治厥官、參茂乃績、鈎校如法、甄陟應條、稍遷都隸之曹、超敍澤虞之職、清臺第一、尙局有升、對丞郎署、竝籍朝聯、各修庖俎之方、彌慎簡書之訓、

彭思永可都官員外郎劉述謝顓竝可屯田員外郎柳三接可太常博士制

敕某等、計年校課、所以法一閩之成、進秩敍勞、所以聳羣吏之勸、寧失于廣、不傷其情、以爾等、竝南金之

英預臨軒之選。或辭章典蔚。或經術通明。飭諸行能。則體和而粹。試之政事。則財敏而通。官成較然。歲亦勞止。通用前勤之敍。竝從上秩之遷。都隸秋聯。屯墾冬屬。逮于儀蒞之典。竝爲官制之佳。咸慎爾修。往副吾詔。

危佑可都官員外郎李敏可虞部員外郎高靖可太常博士張大受可殿中丞制

敕某等。夫吏領外治。歲有成庸。若勞之弗圖。則善何以勸。爾等或挾文儒之術。或治刑名之書。延登諸朝。參試以政。外求郡邑之瘼。上布闕庭之恩。公力弗遺。治迹可尙。閱其來伐。應于陟科。都隸澤虞。曲臺盾省。進承建禮之務。升敍班朝之華。就服寵靈。益修風業。勉綏民隱。善持官箴。

張士燮可都官員外郎李九言馬仲甫黃鑄竝可屯田員外郎王仲可國子博士制

敕某等。夫信賞則官政修。舉勞則吏力奮。誼存開勸。法在考課。以爾等或用才章之秀。拔從時髦。有以經術之明。取于家學。亦藉舊德。咸序治朝。分乘倅車。領治和壘。謹牢盆之出納。總都吏之紀綱。節皆素修。才亦兼敏。沛然政舉。第以職遷。鈎校弗疑。旌陟惟允。進秋臺者。以都隸爲峻。陟郎省者。以墾屯爲初。至于庠學之聯。悉爲朝選之茂。恩不妄施。功以敏興。勉而來勤。對我斯寵。

竇平可比部員外郎景融可太常博士制

敕某等。有著在庭。服勞于位。或遠爲邛笮之守。或近倅關隴之城。對賦政條。參閱計簿。成績成勞之最。宜從考法之遷。進司計于中臺。典蒞儀于禮閣。竝爲茂秩。往虔吾恩。

馬仲可比部員外郎陳益可國子博士制

敕某等、朕沿功令之舊、攷官治之成、若乃倅列郡而有勞、宰東畿而能力、申懋厥賞、差進以秩、爾等、本食德之起、用治經之明、入服朝聯、更試吏事、治有勤狀、法得次遷、稍升比計之曹、益寘博通之列、進丞郎務、往服教官、勿替厥修、以虔褻寵。

王稹可比部員外郎李祐之可水部員外郎毋湜可屯田員外郎制

敕某等、夫任外員之郎、丞諸曹之務、秋局比計、額戶勾法、至于工起之屬、則有掌河渠諸水、領戶口墾田、竝爲右司之華、咸慎南宮之遷、以爾等、以藝文資術、進服王官、以法律教條、班行民政、咸有可紀、遙觀厥成、爰酬營職之勞、且示攷功之法、舉用參職、竝列壹臺、往祗躡等之恩、益圖來治之美。

周世南邢至竝可比部員外郎聶世卿可都官員外郎石洵直可屯田員外郎制

敕某等、文昌法宮、積星郎位、古之元士、職在中臺、若乃掌都隸、主勾計、胥乃墾田之屬、咸曰右曹之選、今釐務雖廢、而遷秩益榮、爾等、稔服吏資、練更民治、或班錄列城之詔、或分駕別車之行、績用自陳、閏成可攷、竝差進于前秩、尙留試于外勞、就虔吾恩、勉思乃職。

郭亨吳迪竝可比部員外郎馮溫舒可屯田員外郎張承慤可水部員外郎張仲莊可太常博士
寇玘李咸熙張景純竝可國子博士制

敕某等、昔堯以職而試臣、漢用法而課吏、咸責實以觀效、亦累優而取陟、以爾等、士矩尤飭、吏文滋習、謹

政條之賦則嚴而不苛。裁事局之繁則敏而能力。績成所治。章下有司。較閱閱而信然。稽功令而審若。差進中臺之秩。參服上庠之聯。資地本優。儀品兼峻。往踐乃職。彌茂爾勤。

張道可屯田員外郎制

敕具官某。國家均用一閏。大比庶工。所以旌吏勞。而懋官賞也。以爾選自造秀。濟以方潔。參試以事。果于從政。服在外朝之次。相我曲臺之儀。齋伐自陳。司蒞且久。有嘉臨履之狀。俾擢墾屯之曹。初升中臺。且應列宿。茲惟敘進之典。往服稍遷之恩。

吳仲可屯田員外郎制

敕某。征算之法。贍入縣官。功令之條。勸進吏力。以爾本髦彥之選。資強濟之材。百鍊不銷。器業兼韞。勳資游刃。委算商車。能梃下姦。善集公利。最效尤著。計部列言。合賞格而有餘。在陟恩而可愛。從司蒞之相禮。進起草之爲郎。往服墾曹。且信吾賞。

呂公孺呂公著竝可屯田員外郎制

敕某等。朕褻優治民。詳慎課吏。均用一閏。參比衆功。治最必甄。節廉者起。爾等。竝舊相之子。濟名門之美。率繇科等之奮。咸服吏資之敏。耿純獲試郡之請。仲舉被題輿之招。悉上計文。交中褻典。在勞可紀。于法得遷。郎有墾屯之官。時謂拜除之美。謝去相蒞。初得握蘭。足爲競爽之榮。益敦清勵之志。

王鼎鄭炳王微竝可屯田員外郎制

敕某等、夫賞不失勸、治功日興、勞有所甄、吏力彌奮、限年會課、計最陟能、所以旌已試之勤、聳來者之進也、以爾鼎政有風迹、以爾炳行無緇磷、以爾微出名臣之門、服清德之訓、竝班朝有素、而居官可紀、適因郡計之上、咸敍官治之成、參覆有司、胥應陟典、宜踐中臺之局、悉置副郎之聯、茲惟寵章、以對嘉績、無廢敦厲、往服褒優。

王中立可屯田員外郎李希逸可國子博士制

敕某等、或策偃商之科、或治臯蘇之律、飭修士矩、明習吏資、屢條民治之成、寢服王官之次、鞏洛都府、門握左符、濟隴疆藩、分駕別乘、胥上勞考、參質有司、灼著勤庸、差進美秩、墾屯丞于部務、博通領于儒林、竝爲儀品之華、尙敦風教之俗。

趙誠可屯田員外郎黃炳宋宏竝可太常博士制

敕某等、昔魏氏攷法、用京房之遺意、載在前史、傷于至密、朕因二典之舊、用三歲之比、旣簡且久、有勞弗遺、爾等竝志行端修、藝文參韞、果于從政、長于治民、績用適成、代還居最、質有司而不繆、延便坐而與言、急于信賞、勸諸勤能、墾屯右曹、臺美初拜、絲蒞清局、官重博士、竝佳時彥、用沛朝榮、尙慎周官之箴、往服漢儀之選。

張靖可屯田員外郎彭文紀崔鵠竝可殿中丞王瑜可大理寺丞制

敕某等、夫風化之原、參寄守宰、官賞之令、博攷治功、爾等率奉詔書、分長郡邑、履尙簡素、治乏煩苛、居官

有可紀之能。在法應當遷之典。臺郎初拜。以墾曹爲佳。盾局稍遷。得尙丞曰美。胥洎法卿之屬。尤爲列寺之榮。悉虔吾恩。無替乃職。

張輿可屯田員外郎。艾保卿沈遵竝可殿中丞。李昭慶可太子中舍人制。

敕某等。朕稽勞類能。博攷衆職。限年增秩。汎勸庶工。爾等。用辭學之優。或世資之舊。進服王官之序。屢試文吏之煩。關握符書。參布條教。居官之迹。可紀。課吏之法。當遷。第用厥勞。差進以秩。墾田司盾。東省承華。竝通文石之班。往服治朝之寵。益思自效。無忘稍遷。

薛仲簡可屯田員外郎。蔣祕卜仲竝可太常博士。馬仲旦可殿中丞制。

敕。朕考內外吏職。算計見效。累優以成陟。急賞以申信。故功懋者進。而節廉者起。具官某等。或奮從造秀。或蔭自官華。竝服王官之箴。咸從朝著之後。更試政事。參訪行能。或典守列城。流豈弟之化。或長治劇邑。宣愛利之風。條上年庸。申校吏迹。在狀甚白。于法宜遷。超敍右曹。實墾屯戶口之賞。稍遷禮閣。有贊導乘輿之榮。至于盾省之聯。竝號朝闈之美。往祗渥茂。勿廢操修。

劉錫可虞部員外郎。高賦可太常博士制。

敕某等。或治經階仕。或論秀升科。進序王官。參佩朝紱。長治州任。關握郡條。竝敍臨履之勞。來援遷陟之典。法當差級。歲已再周。質諸有司。則罔後殿。宜承郎省之務。往踐儀臺之華。離石近邊。資中遠郡。好爲政事。勤恤吏民。服我茂恩。期爾來效。

田化愚可虞部員外郎鄭偕可太常博士張當可殿中丞制

敕某等、夫守宰爲任、最親斯民、政伐有成、宜疇吾賞、以爾等、或仕緣鄉物、或進藉世資、繇官次之累勤、自朝聯而進序、劍外班政、迹著不苛、寰內字民、文稱無害、竝用年勤之茂、合于功懋之科、升領澤虞、典司儀蒞、至于盾省之屬、竝爲朝紱之華、就祇臺恩、尙圖官治。

路綸可虞部員外郎汲熙載可太常博士裴見素可國子博士馬璟可衛尉寺丞制

敕某等、賓興以文、入預吾彀、或沿家學之進、亦資世賞之延、稔服吏能、分從官使、關掌郡佐、參布縣條、領算商車、通著最目、有司覆實、彝格應遷、司訓虞典、襄勤野蒞、至于經序之選、均爲朝品之華、當思力公、勿爲官忝。

陳式劉充中蘇顥竝可虞部員外郎林克從可國子博士呂規王宗古竝可殿中丞制

敕某等、或經明家學、或地襲世資、操行旣修、風力兼敏、寢從吏事之試、參服王官之聯、分握左符、按行別乘、竝宣寬大之詔、綽有愛利之風、列上勤庸、胥合賞格、差進中臺之秩、超敍上庠之資、至于盾省之華、竝爲朝序之美、往虔茲寵、用愼爾修。

朱湜李隨竝可虞部員外郎劉襲禮可太常博士黃淳朱處約竝可殿中丞張赴可太子中舍人制

敕某等、詳試則吏職修、敍進則官治勸、攷課之法、若天下之砥石、所以聳行義、而激節廉也、爾等、或治經

素明而食惟舊德。或進以文雅而拔諸峻良。參服王官。分條民政。歷三期而成。最用羣吏之計。治鈎覆中典。差次命秩。進山虞以承務。陪野蒞而相儀。盾省入丞。儲禁升屬。且申吾賞。彌勸爾勞。

武周可檢校水部員外郎制

敕某。隨近藩之牒。預幕府之籌。參畫有勞。終更無缺。來趨銓集。援敍慶條。宜寵臺員之名。且申効演之信。往服褻渥。勿廢清修。

黃延慶可檢校水部員外郎充堂後官制

敕某。稔聞幹用。守在廉規。服從相府之嚴。主領右曹之劇。案文尤習。履尙兼修。升次宰旅之聯。用進堂塗之掌。且疇勞課。就服遷恩。

吳世長可檢校水部員外郎充堂後官制

敕某。材質謹良。志用開敏。服在相君之府。齒于宰士之聯。慎守箴規。習知事典。歷年霜而寢久。屬府牘之條。聞有嘉列。掾之良。擢序右曹之長。尙圖幹效。取對褻遷。

文恭集卷十六

外制

富弼可資政殿大學士依前給事中制

敕。朕設別殿之職。寵名儒之賢。資其學優。居乃詢于道術。倚其名重。出則殿于翰垣。惟吾體貌之臣。適寄股肱之郡。宜疇功次。益峻儀刑。以爾具官某。履正蹈方。秉文經武。才周通于治體。識迎照于幾先。勲復賢科。首躋德舉。籍甚朝廷之望。居然廊廟之姿。直質弗流。讜言罔伏。殊彊出對。挾無所憚之心。大節猝臨。有不可奪之色。高其忠力。嘉乃謀謨。擢亞內樞。屢籌前箸。愍勞久職。歷寄二藩。瞻言表海之邦。號曰東秦之重。教條班錄。恩信施行。流備自歸。苛慝不作。厥勞甚茂。乃睠方深。忽覽來章。姑求便郡。深惟舒緩之俗。方資控帶之才。況德刑已孚。難驟移于守相。而土風可樂。足奉侍于慈親。勲進貳于禮卿。復條陳于讓牘。雖高己節。終鬱朕心。是用褒進大名。申昭異數。斯協至公之典。以將東顧之懷。少煩撫臨。益在綏靖。惟當懋勉。以亮倚毗。

楊察可龍圖閣學士歐陽修可龍圖閣直學士制

敕、思文先朝游心往籍。因層構之建。設近職之華。所以寵名儒。訪治道。我圖俊舊之望。時惟鯁亮之姿。差進禁聯胥協公議。具官楊某。精白博洽。端粹正方。擢在禁林。復典謨而歸厚。置之憲席。處論議而不阿。具官歐陽某。識遠才長。文高行潔。篤于信道。不讀非聖之書。忠于本朝。屢條當世之務。並膺左右之選。歷官內外之勞。峻節弗渝。清議彌勝。用進祕圖之拜。且光舊物之還。旌乃名臣。敷于茂典。爾身在外。朕心弗忘。嘉竚來忠。勿懲前事。

施昌言可龍圖閣直學士制

敕、國家藏錄祕文。興峙宏構。並建禁職。參寵美才。用優承學之名。必取高時之彥。矧鴻都待制之久。兼外臺將漕之煩。積其成勞。進于近著。具官某。思理通敏。風業宏深。早宣績于本朝。造升名于內閣。歷更邊部之任。洵持漕節之行。董淮海之轉輸。濟京師之支度。仍歲勞止。厥績茂焉。有嘉經畫之明。用陟禁殿之等。品儀滋峻。恩數昭升。尙繁庸敏之才。仍寄劇煩之職。就祇茂渥。勉續前勞。

丁度可兵部侍郎張觀可尙書左丞制

敕、朕圖政弼之舊。嘉老成之人。進退無于間言。出處全乎美節。功庸前懋。朝野式瞻。特升爵秩之榮。益示儀刑之峻。具官丁某。志經道德。性合誠明。典冊擅乎辭宗。風業推于時匠。具官張某。材合厚棟。體合大圭。德好是民彝。仁以爲己任。並歷更衆職。宣暢本朝。承詔旨于鑾坡。備勸講于帷幄。匪惟授道。多所納忠。資其器略之賢。實在樞鈞之地。夙夜勞止。功效炳然。及解去于繁機。用優崇于禁職。並延升于別殿。或倚任

于輔藩時望益隆。朕心所簡，不有殊典。曷寵雋臣，天轄之崇。維正于八座，夏卿之貳。典幹于七兵，並用褒優。益彰峻重，當體尙賢之意。惟勤進律之恩，時我舊人，豈煩多訓。

禮部侍郎王淑可起復舊官制

敕具官某，喪雖至隆，禮有權奪。閔氏孔門之高弟，起而服戎。方進漢家之名儒，除以視事。蓋敦先于公義，難取究于私恩。以爾文號辭宗，學爲祭酒。善朝廷之大冊，識臺閣之舊章。祕殿入聯，備咨詢于政體。經帷參侍，倚勸講于朕躬。遵嬰陟謁之哀，越在倚廬之制。衰籟卒哭，焦毀過人。自解去于近班，實想聞于奇論。用復禁嚴之綴，當明挹仰之懷。弭痛茹荼，從宜腰經。尙修職業之舊，勉移忠孝之圖。往服朝規，無徇己志。

向傳師可光祿少卿制

敕賞以申信，治體所先。恩不遺功，勞臣用勸。具官某，才志強濟，行義純篤。資扶陽之世德，達仲由之政事。劇煩參試，明練著稱。日者京左之輸將，值朔陲之荒敝。而能虔尺一之命，體公上之急。輶車轉餉，流馬繁興。糧道有裨，績用可紀。賞許再期，而遷秩適以少列。而守藩爾勞，居多。朕言不食，夙期且及。襄效用甄，就進貳于內卿。仍宣條于岐下，官儀亞河海之重。故事掌宮掖之嚴，往服寵優。勉思云補。

呂士龍可衛尉少卿制

敕均二蜀之雄，通爲襟要。亢一方之任，舉屬才明。惟臨遣之著恩，宜褒嘉之進典。具官某，器資詳敏，性業淑均。早濟美于德門，又潛華于郎省。按外臺之計職，風政以修。佐司會之版征，事條乃舉。屬梓潼之缺守，

控梁益以須能。將寄遠人之和。無踰久吏之敏。列卿居棘路之重。衛尉掌門禁之嚴。用峻官儀。且光藩綬。勉著肅清之最。益昭毗倚之懷。

陳宗元可司農少卿制

敕某。漢制二千石。治有異迹。或就增爵秩。或入爲公卿。所以詳試治民。褒勸循吏。以爾公力幹舉。政事練更。比經莅任之方。抑推資望之舊。中臺久任。右蜀上計。灼存底績之效。舉合陟書之條。不有褒恩。曷勸勤吏。升亞列卿之秩。往司庶士之生。茲爲稷官。尙委藩棨。勉致庇民之效。務揚守土之風。鎮率吾恩。懋承而職。

張太沖可司農少卿制

敕某。稷爲大官。扈實農正。沿置九卿之副。濟成三務之宜。匪有積勤。疇亞尊秩。以爾賦外服之政。比更列郡。正中臺之秩。數遷右曹。所至則條教頗修。視成則閎閱可紀。超從司駕。進貳大農。已脫郎署之潛。勿輕軍壁之小。益當懋勉。無忝褒嘉。

韓絳可三司戶部判官制

敕某。四方計書。悉上會府。九畷經入。分領官曹。必擇僚職之良。參幹土圖之掌。以爾格量方厚。才章典蔚。善繼名門之韻。高取俊等之科。置在道山。試以都府。亶無逋事。沛有餘力。適資游刃之效。復委左民之煩。土均斂收。邦賦根本。非如末利而已。抑亦大計賴焉。慎簡乃才。往踐厥位。

楊敞可三司戶部判官依前置史館制

敕、財府之煩、分條于計職、地官之屬、參校于版征、必賴器能、以濟事典、具官某、謙退不伐、深博有謀、忠孝自將、歷險夷而不改、文武更用、當劇易而靡辭、久宣領服之勞、實靖邊隅之警、比資術學之力、擢參文史之筵、屬司會之曠僚、賴時髦之濟務、廣中外之更試、成久大之蘊崇、滋懋乃誠、勿替于素。

王罕可充戶部判官制

敕某、司會爲府、總集計文、地官有聯、參制斂法、協司泉賦、咨擇雋髦、以爾莊重、勿流開敏、胥濟早階、門業之勝、亟踐朝闈之華、居官不煩、去輒見愛、按章所至、多著平反、蔚有循吏之風、播厥與人之頌、攝居才局、倚辦詔求、自以避親之嫌、形于補外之請、主計之請有薦、選衆之議亦同、宜真領于版圖、往敷宣于風力、毋廢朕命、益懋乃官。

趙及可尙書左司郎中制

敕、漢家更試之法、皆攷治功、唐制侍從之勞、咸著最令、惟時延閣之產、佐我列藩之雄、奏計甚優、推賞宜渥、具官某、恬能持正、介不害通、屢有辭職之高、稔聞行己之美、勳圖澹退、就擢祕嚴、資儒者之多聞、俾參持橐、賴吏師之兼敏、尙委臨州、居多愛利之風、洽著休嘉之績、潛郎署而且久、質官簿而當遷、超從劇部之前、升冠都司之右、秩惟峻重、恩在褒嘉、尙圖滿課之成、庸對寵章之懋。

何知至可度支郎中制

敕某、朕總馭官師、博研行義、嘉乃沖恬之德、異于躁進之風、特越常均、用敷褒典、以爾率修士操、究治吏文、早懷膺敏之才、亟踐雋良之選、進升位著、更試政條、洽財府之煩、未嘗遺力、任計臺之劇、彌復竭精、在績效以章明、知性懷之澹退、官遷久滯、朝論僉俞、履尙可嘉、恩章宜及、中臺支度、特正于名郎、外部將輸、尙繫于大使、就服褻華之命、益宣清恪之誠、

張揆可兵部郎中制

敕、朕開邇英之講、延稽古之流、瞻言進讀之臣、久勞侍從之事、且優學力、用峻官儀、旣以懋功、亦惟重道、某深中篤行、強識博聞、詢事攷言、早延升于內閣、執經摘句、亦參侍于講帷、蔚有通儒之稱、雅著素絲之節、褻嘉有典、陟恪爲勞、超敍七兵之華、兼妙一臺之選、尙繫近職、勿替納忠、

張昂可兵部郎中制

敕某、朕日者旣祀明堂、還御層觀、因祖宗配侑之重、與天人交感之符、乃推曲恩、泛澤庶位、擢爾以秋官之屬、委爾以漕職之煩、雖新秩已遷、而舊課未陟、賞宜從重、勞則不遺、況爾承相閥孝謹之風、有書林清介之望、亦已久次、何愛一官、夏卿首曹、中臺妙選、併仲褻寵、益在欽祗、

周湛可刑部郎中制

敕某、朕攷內外吏治之實、合前後官籍之勞、率計閏成、差覆秩次、用孚恩格、茲謂彝章、以爾系承汝穎之餘、奮繇漢沔之秀、強記通于墳策、精力究于事經、比典漕于賦車、再部煩于財府、幹用肅給、最效著明、升

自秋臺之聯。仍從左戶之掌。坐本曹而則廢。領他部而有來。往虔朕恩。勉修而職。

趙良規可刑部郎中制

敕某。朕遠採漢官。設刺舉之使。參用唐制。攷將漕之最。以爾濟名門之美。預冊府之游。中校典圖。有辯章訂正之益。外宣條教。著監司按察之勞。賦輿衍增。方輸錯出。書林之次亦已久。秋臺之秩用以遷。進掌邦刑。增峻使範。尙倚臨于外計。勉成績于前勞。

廖詢可都官郎中馮振可都官員外郎制

敕某等。朕設課吏之格。較比民之績。申唐虞之簡舊。去漢魏之煩密。均用一閏。參比衆功。爾等體行清修。風力強濟。自服王官之序。屢試吏資之能。分握符書。臨長藩服。上計文而可紀。應攷法以當遷。宜正秋臺之聯。進丞郎省之務。取稱懋官之典。勉修良翰之風。

鄭有章可比部郎中制

敕某。朕以二蜀之地。介在坤隅。守吏有勞。計年未滿。聽先期驛上。就增厥秩。所以優遠吏。恤西人也。爾以政風之敏。兼操行之修。數領郡章。今握州契。著惠和之顯迹。應攷課之成法。惟秋聯之屬。有比計之勾。華于臺選。寵示官成。尙祗擢敘之恩。無廢操修之志。

劉立德可屯田郎中郭輔治可兵部員外郎制

敕。朕大比庶工之治。通視一閏之成。計勞以遷。在法惟允。以爾立德。精明肅給。吏文有餘。以爾輔治。清修

謹質士範無闕。竝絲俊茂之選。咸著休令之名。至于握守符、持漕節、宣我勤約之詔、通爲按察之官、校課既優、陟典奚愛。敍正墾田之秩、稍進外兵之員、胥獎成勞、咸服休命。

關詠可屯田郎中趙秉可職方員外郎制

敕某等、夫治以得人爲本、而守長尤難、官以稱職爲賢、而名實須允、我疇吏伐、第進省曹、胥獲美才、咸進褻典、以爾詠、性度閒遠、履尙清修、以爾秉、識致疏通、志用開敏、率自雋良之舊、屢試劇煩之能、進服臺聯、外握符寄、虔我典刑之守、濟于文雅之風、或海沂以康、賴堤闕之利、或徼外無撓、濟遠夷之安、列上年庸、稔于朝聽、正以墾屯之秩、職諸方貢之宜、竝號名郎、且旌良翰、益樹終更之課、勿忘甄陟之恩。

章參可屯田郎中趙永裕張肅竝可屯田員外郎制

敕某等、孝宣之治、信賞而衆職理、京房有言、舉功而萬化成、政平吏良、絲此物也、朕率由舊典、詳試庶工、褒勸勤庸、以風內外、以爾參、行義深篤、以爾肅、風節清修、以爾永裕、出舊德之門、有名駒之質、竝奮由士彥、而稔服朝聯、典城臨民、莅官行政、節以廉著、治用最聞、列上年庸、胥膺攷法、中臺之選、起草爲華、右曹之煩、墾田居劇、或進正員之重、或峻副郎之選、竝寵清流、茲爲茂典、益圖敏政、庸對陟恩。

職方員外郎董公產可屯田郎中比部員外郎馬中庸可駕部員外郎屯田員外郎黎持正可都

官員外郎國子博士司卞盛和仲竝可虞部員外郎太子中舍人張璿可殿中丞制

敕具官某、設官以等、則衆職舉、有勞者進、則羣臣勸、歷古爲制、茲道實先、以爾服在朝聯、夙推幹裕、歲月

之效。甫臨比最之期。閱閱之資。亦應敍遷之典。遞增美秩。用獎久勤。益念修方。以圖來效。

樂許國可水部郎中韓儼可都官員外郎葛禧可國子博士嚴慶孫劉世昭竝可殿中丞制

敕某等。夫堯之命官。咸試以職。漢之進吏。皆更治明。績用有成。實行不謬。以爾等或自致榮級。或食其舊德。率用力官之敏。進服班朝之聯。外賦政經。分幹事局。悉上計年之最。來援攷課之法。稽參無缺。旌陟乃宜。敍正司川之名。稍遷都隸之局。成均典教。中盾爲丞。竝疏褻勸之恩。尙勵端廉之操。

劉宏可三司檢法官制

習。敕某。夫士之秀者。節亦清焉。奉壽母以孝聞。參賓籌而名劭。朕以會計之府。事劇訟繁。傅致爰書。屬在能吏。會法官之來代。命銓部以選充。齋伐來聞。便與廷見。更試甚敏。操決稱平。俾居憲局之真。益究刑章之習。

文恭集卷十七

外制

高若訥可特授金紫光祿大夫行尚書戶部侍郎依前參知政事加上護軍進封北海郡開國侯加食邑五百戶食實封如故制

敕朕卽祕寢之嚴講總章之祀用鄭氏之說合祭六天廣周家之文竝配三后禮行而孝思服誠感而瑞應通惠我無疆之休肆于時夏之美實賴贊襄之助豈特寡昧之能我均蕃禧理先近弼具官某志經道術性合明誠通于古今之宜蘊茲久大之業嘗敷陳于往行預講勸于便朝亦刺直繩俾專憲席入膺樞筦之任而四鄙晏然進陪巖政之裁而三階穆若相予蠲潔于使劇煩賴多聞折衷之明贊先庚經置之敏事典無闕于素齋祓有加于精晷言陪輔之勞用疇覃施之典貳于左戶亞爲上卿參授勳階併疏井賦竝爲渥異之數且旌顯相之勤往承厥休益底于道

趙槩可特授尚書右司郎中天水縣開國子加食邑五百戶制

敕朕攷我將之詩以修宗祀奏成安之曲以虔右饗祖考來格于孝天地竝貺以福因以疇覃施之典于

以先拱侍之勞。具官某。德全于純。器本乎厚。有匪躬審正之操。穆乃朝言。有書命深淳之辭。孚于邦號。試以煩而竝效。視諸履而畢修。出以備于行人。遠自使材之美。還乃正于羣僕。翊成齋輅之和。佳績茂焉。熙事竣已。用敷純嘏之錫。以圖陟恪之勤。進席都司。兼衍真賦。竝爲褒等。如階級卽云茂級之異。益思宿業之方。

張方平可特授給事中。進封清河郡開國侯。加食邑五百戶制。

敕。夫孝莫大于嚴配。禮實重于宗祀。朕被飭厥典。著定其當。攷成命于頌。而合祭天地。稽奮豫于易。而參配祖考。惟神靈嘉饗之至。蒙天人信順之助。休成均貺。內外一焉。矧吾名臣。可稽茂典。具官某。學術通博。體識峻明。有雅健闕深之文。發揮典冊。有幾微精密之用。洽暢事經。曷自禁林。入都憲席。疇以偉望。總治計文。早宣濟于本朝。適倚臨于南夏。教條克舉。貢助甚勤。屬熙事之展成。思泛恩之均被。就仲向瑣之拜。兼圖體國之勞。勿替而忠。且欽吾賞。

狄青可安遠軍節度觀察留後。加食邑五百戶。周美可檢校兵部尙書。耀州刺史。充侍衛親軍步軍副都指揮使。耀州觀察使。加食邑五百戶。實封二百戶制。

敕。朕攷崇祀于古。行孝饗于朝。三神顯譔而降康。四海駿奔而來助。思與內外。均穆善祥。以爾青。氣節毅然。智略明甚。以爾美。寬能馭衆。勇善知方。竝積用邊勞。而更制戎要。留總後事。將我勁兵。參衛巖除。譏呵行在外。嘉綏靖之效。中圖拱翊之勤。咸因休成。第用甄表。進易翰垣之重。衍食井賦之饒。冠以勳名。茂茲

恩數往領朝賞益勵宏圖

曹佺可檢校工部尚書鄆州刺史充天平軍節度觀察留後加食邑五百戶實封二百戶張茂實可檢校工部尚書處州管内觀察使加食邑五百戶實封二百戶制

敕朕具法物之駕謁文祖之廟還卽齋寢遂享大神三祖侑焉羣元萃止委茲瑞福澤于臣工賾言綏靖之勞宜厚休成之慶以爾佺勳闕莫二雄毅自將以爾茂實志蹈厥忠材經于武竝曉暢軍事亦更試邊勞分提巖下之兵參領禁中之衛或撫臨藩服以宣外禦之勤或拱扈乘輿而濟中嚴之肅吾祀祇若爾庸茂焉用進勳名就更闡制益昭連帥之重且旌恩禮之殊勿替忠勞往承寵渥

李端懿可華州觀察使加食邑

〔案〕此食邑下文例之當有脫文

李端愿可檢校工部尚書越州刺史

充本州團練使加食邑五百戶實封二百戶制

敕某等朕宅房心之野實惟明堂卽太紫之廷紹修宗祀齋明嚴配肅雍永享乃獲神靈之休亦繫師帥之助會成熙典均泛祥釐眷言勤共宜有勞賚以爾端懿人地標勝德器邃沖以爾端愿性資淑均志局開敏竝爲戚畹之令早承慶閱之華歷侍近嚴見稱競爽竝峻觀風之使範咸奉列侯之內朝逮元祀之講修委親兵而侍衛能濟中嚴之肅亦伸外禦之勞乃庸居多吾賞斯進對易翰垣之重參升勳爵之榮滋峻等威咸服恩數

范全可檢校工部尚書解州刺史充本州防禦使加食邑百戶王凱可檢校工部尚書隴州刺史

充本州防禦使進封太原郡開國侯加食邑五百戶制

敕具官某等。咸以武幹。各總將兵。積用勳勞。遙分侯奄。屬涓成于元祀。乃泛舉于慶恩。遷領強藩。衍增真賦。仍益校聯之美。悉欽朝賞之華。

柳植可特授尙書刑部侍郎加上柱國制

敕。朕惟軒祖有明庭之祠。夏后有世室之饗。攷舊于古。制宜于今。炳緝多儀。齋明盡志。蒙神靈之右饗。因福嘏之來同。均霑泛恩。畢周庶位。矧茲近侍之舊。宜先慶典之覃。具官某。行本端方。體資質重。禁林之孚。號管預發揮。憲席之持綱。亦資糾正。比賦四方之治。屢上三最之文。淮海保疆。土田上錯。謹乃包茅之貢。助慈休燎之成。峻貳秋卿。參升勳等。若加階。卽云勳級。竝爲均施之美。且旌述職之勞。往承厥恩。勿懈于位。

張昇可特授尙書工部侍郎加上柱國向傳式可特授給事中制

敕。周以宗祀。來四海之助。漢以明堂。受諸神之釐。朕攷舊修饗。盡志告虔。祖宗孚忱。神靈昇祉。因以均曲施之澤。時則厚近省之臣。以爾昇。蔚爲吏師。資有賢業。以爾傳式。器行居厚。資術本優。竝以卿材之良。升于王國之選。或以奉公精力。屢治邊郡之輸將。或以濟物惠心。迭奉藩房之刺守。江西之計已集。橐關之最亦開。屬齋薦以承神。竝虔恭而述職。式霑熙成之慶。爰圖貢助之勤。進貳冬官之卿。入膺暮瑣之拜。參加寵命。優示恩章。往孚于休。勿懈于政。

曾公亮可加柱國制

敕朕思法令之出協方俗之宜命取舊文裁定新制且究一時之便用先三日之庚乃睠侍臣領茲近局適第成書之賞特旌覃思之勞具官某體識淹通才猷敏濟稔更文翰之職寢研法律之微赫被詔以修書能約文而從俗體我省方之至協茲下令之源閱刊定之有條在褒嘉之宜及進優勳等加示恩章

李球可內殿崇班李妃可內殿承制制

敕某等內寢之聯視諸朝秩外家之貴體自朕躬主于拜除宜在優異爾等戚畹貴種仙李真枝被長君退讓之風承鄧氏法度之教咸自修綜莫不柔嘉久從班籍之編名未稱小侯之立學宜峻近庭之秩且光左相之賢往服寵褒益思淑慎

霍保安可樞密承旨南班賈德明可樞密承旨南班小將軍制

敕某等夫樞宥惟重實總于幾微音旨所承尤資于篤慎以爾保安材敏而濟以爾德明性謹且和竝隸幾廷預聞密政蹈箴規而無忽習事典而有餘歲勞自陳府奏來上差進右曹之掌兼增武弁之榮用獎恪恭益思敦勉

馮易簡可內省內常侍制

敕某履尚謹溫資性沈密久服掖塗之祕屢當頤指之煩銜命必恭束身無過念施勞之累稔俾解籍于長秋特優內侍之名出次西聯之舊往祇褻渥勿替莊修

伊恕可御前忠佐制

敕某、少壯初服，果敢知名，積以功勞，使于宿衛，暮年行及，衰病日侵，尙嘉宿勤，差降下列，仍優刺部之重，亦承環衛之嚴，往服寬恩，勉伸餘力。

吳幾復張碩賈章蔡抗竝可加騎都尉張大初可加輕車都尉制

敕、朕以四方殊俗，萬事異宜，將體流水之源，以布巽風之令，俾爰立制，亦旣成書，有嘉編削之勞，用舉甄褒之典，具官某等，雅有學尙，蔚爲才髦，參奉詔文，對刊法制，尤邃科舉之習，竝通事典之經，適乃物宜，裨成治體，已擢升于器任，仍敘進于勳聯，往復茂恩，益宣美業。

單州團練副使范仲回可騎都尉制

敕、某勲以不修篋簋，嘗坐簡書，削茂秩于儲闈，降副車于列郡，涓成宗祀，泛施曲恩，宜加敘于聯勳，尙勉思于往過。

麥允言可景福殿使制

敕、國家沿祕寢之名，參置使範，寵信臣之效，增峻官儀，矧親近而有勞，在褒榮而惟允，具官某，才資畢給，忠力自將，領巖除宿衛之嚴，居惟無過，預叛壘討平之策，時則有功，爰當舍爵之初，已峻廉車之重，朕近乘國政之暇，因攷星緯之書，惟是渾天之儀，以及璇璣之法，曠年祀而不講，恐日官之失傳，因命討論，俾爰典作，匪愆厥素，適觀乃成，智思引于淵微，規摹造夫精密，覽嘉今績，圖用舊勳，益進殿塗之聯，彌光貂省之任，尙敦忠恪，哀對寵靈。

張亢可客省使加食邑三百戶制

敕。總章廢饗之已久。攸司倚席而不談。朕攷希闕之文。建廣大之祀。先格太室。還祀合宮。神靈居歆。天人竝貺。均布福嘏。泛澤臣工。具官某。策名時髦。授寄儒帥。功名已大。資雄略以爲能。富貴自知。蕪壯圖而有素。洵委制邊之任。洽聞禦侮之勞。夷險弗更。致爲可尙。屬覃朝慶。益行戶封。其在懋承。勿忘式遏。

向傳範可四方館使制

敕。朕選卿族之良。主禁闇之謁。宿衛久而無過。陟恪勞而未圖。會求試于藩房。念積勤于軒幄。思廣踐揚之美。用推委遣之恩。具官某。體韻詳和。識業明濟。早繇盛闕之選。入聯外邸之姻。造賴器能。擢居局禁。宣詔命而惟久。練事典而克精。比更衆職之煩。間修二國之好。專對不撓。絜矩無渝。屬安世有持橐之勞。而耿純興治郡之請。稍遷近職。用委強藩。矧方貢之是司。在使聯而則重。參領符竹。往賦教條。勉申汝能。益稱朕意。

綦史宣可遙郡團練使仍舊禮賓使制

敕某。別都分建。軍籍實繁。和壘訓齊。戎國爲重。爰進升于使範。用分寄于武鋒。以爾深厚有謀。謹孚無過。侍于禁近。早著宿衛之勞。嬰以劇煩。屢宣強敏之用。勲以敷施之地。屬當靈武之衝。俾領護于營兵。克底綏于邊郡。更書已及。陟典宜加。惟全魏之帶河。有離宮之管籥。就增戎秩。往涖兵鈴。益資更練之才。式爾倚毗之志。無忘亮節。益體茂恩。

張岳可東染院使張俱可禮賓使制

敕、具官某、朕睦典戎之臣、居被邊之任、有勞可紀、久次未遷、用均其恩、差進以秩、以爾岳、名有武幹、習知戎略、新秦介在河外、委之監軍、以爾俱、勇且知方、恩能撫士、常山臨控、代郡任以護兵、竝資馭衆之才、咸著綏邊之效、用旌軍最、爰正使聯、爾勞伐之勿遺、表寵臨之特出、尙圖忠力、各推精誠、

任守忠可宮苑使加輕車都尉宗志聰可左騏驎使加食邑鄧保信可右騏驎使加食邑武繼隆可臬城使加上騎都尉制

敕、祀所以孚誠、昭孝通神明者也、朕攷宗祀于古、復孝饗于朝、哀對上靈、昭升尊配、翁受敷錫、緝熙純嘏、則亦親信之任、有忠力焉、以爾守忠、性則謹孚、材本彊濟、以爾志聰、篤在誠亮、敏有幹局、以爾保信、精明適用、端粹自持、以爾繼隆、習練事經、休有風力、竝用勞舊、參試劇煩、入司宿衛之嚴、預我齋祠之事、乘輿所次、部分有條、行在肅如、拱衛顛若、逮成熙事、亶有勤庸、均穆祥釐、大伸茂典、竝優使範之陟、兼從井賦之加、且旌陟恪之勤、往服褻華之寵、

錢晦向傳範竝可東上閣門使加上騎都尉制

敕、具官某等、夫德盛者流光、文繁者禮縟、朕昭孝宗祀、續戎竝配、具法物之駕、奏成安之曲、神靈咸喜、天人竝貺、升燎之夕、協氣薰蒸、用均祥釐、宜先近侍、以爾晦、器用純備、材資敏通、以爾傳範、性業淑均、志慮沈邃、竝爲慶問之令、參侍朱閣之華、曉暢事經、嫻習儀矩、比膺專對之選、蔚有將命之稱、交試劇煩、悉昭

幹裕。逮九房之講祀。因千乘以闡儀。周圖親信之勤。委以譏呵之任。行能肅若。嘉績茂焉。會熙典之休成。推泛恩之均施。稍遷使範。益進勳名。用甄拱侍之榮。往服褒嘉之寵。

王中庸可引進使。王果。李中吉可東上閣門使。竝加輕車都尉。靳宗說可西上閣門使。英州刺史李珣可東上閣門使。加上騎都尉制。

敕。朕以季秋吉亥。循復饗典。續戎祖考。對越天地。告虔盡備物之志。委瑞有如山之崇。泛推曲恩。以澤庶位。王中庸等。或以材武膺器使。或以地胄參近侍。練更禁局之要。分制邊部之衝。資有策謀。交著聲績。迨熙成之均渥。睠禦侮之有勞。進增使範之華。申加勳等之授。往欽慶施。滋勗忠圖。

曹修可東染院副使兼閣門通事舍人制

敕某。遮扞外虞。在西州而爲重。宣納禁職。于上閣而特清。以爾家本元勳。世濟忠略。關隴懷于遺愛。羌虜懾其餘威。固原控邊。勁兵要處。爾則材武。繼其家聲。委以軍符。鎮茲戎壘。善拊循于士伍。能砥靖于疆陲。特寵禁闈之名。仍優染翟之介。勉思靜勝之算。當循武穆之爲。就服茂恩。思濟先業。

西京左藏庫副使高遵裕可依舊西京左藏庫副使兼通事舍人制

敕某。惟上閣贊司之職。蓋右列清要之塗。非夫材稱顯聞。不得兼領。以爾勳門華緒。內使宿名。久戍邊防。克奮忠毅。夙圖上略。嘗聞善謀。守固封疆。方收遠績。擢預典儀之秩。用增武爵之榮。益思盡規。以答殊寵。馬懷德可西上閣門副使制。

敕某、惟朱華之上閣。當太微之法宮。置副介之名。用承諸使。慎尺一之令。必取有勞。乃先外禦之圖。式稱至公之選。以爾俊雄。韞氣沈毅。有謀得牧。人馭衆之方。著憂國奉公之節。比更邊郡。參任兵鈐。卒乘講修。行陣和睦。士夫懷附。戎索底寧。予錄乃勤。命進以秩。遷貳禁闈之要。尙委列城之衝。職美于中。恩不遺遠。益圖忠槩。茂對褒章。

柴貽範可閣門通事舍人制

敕某、謁者之任。掌賓贊受事。攷功之法。用宣納爲最。必賴舊儀之習。乃揚近職之榮。以爾辭令敏修。力局幹舉。再隸朱華之閣。久侍赤墀之塗。篤在首公。勤于補過。曷圖專對之善。亦嘉更練之能。出講隣驩。導迎使聘。訖無通事。宜有積勞。特升贊于殿中。往服勤于朝次。勿忘勉勵。以對褒遷。

李推實可閣門通事舍人制

敕某、舊典通事。本隸西臺。近制建官。則領朱閣。非善音吐。有姿範者。不得預于此選。以爾出簪纓之後。侍軒闈之下。久典贊謁。十更年序。曷經陪祀之慶。依從升秩之科。願回霽恩。稍遷近職。爰念服勞之舊。特推從欲之仁。益升華近之聯。勿忘宣納之最。併圖肅恪。用對褒嘉。

孫用可左藏庫副使王日宣可禮賓副使王克讓任守素毛永保竝可內殿承制制

敕某等、夫護營卒。選邊警。式遏外侮。通爲兵官。稽歲勞。校軍最。差進茂秩。抑惟邦典。爾等膺材武之選。有力局之用。數更委使。見稱疆敏。齋伐自列。應書當遷。司帑別都。典客近局。或從耆定之峻。而承音制之重。

率由功次。咸用詔除。尙緊拊循。以底綏靖。

李緯可莊宅使制

敕某。夫守邊之吏。若篤在首公。則有國之規。亦釀于用賞。以爾選自材武。名有智謀。嘗治軍行。亦任城主。能均士卒之苦。頗得夷落之和。乃瞻朔藩。實爲裔壤。雖守和戎之策。尙厚宿兵之屯。適委撫循。自陳勞最。用篤疆臣之勸。特優使範之遷。今鄰好方堅。邊事不聳。宜修耕守之備。務先安集之方。當竭爾忠。何愛吾賞。

郭承宗可六宅副使制

敕某。承地胄之華。資器能之敏。參內庭之使介。練近局之事條。能寡悔尤。頗著風力。旣得處躬之善。復嘉營職之勞。疇用年庸。升亞使秩。往服褒遷之渥。勿忘臨履之修。

孫昂可宅副使制〔案〕宋有六宅副使。莊宅副使等官。此宅副使上。疑有脫字。

敕某。朕彞以右饗大神。咸澤庶位。覃厥休成之典。擢爾副介之名。仍聞守邊。業有滿課。詳觀閎闕之上。乃在詔書之前。重遺成勞。申加茂秩。用究臺恩之美。益聯使範之華。矧早負于忠圖。當益躋于遠略。底寧疆事。取稱朕心。

馮承用可供備庫使制

敕某。朕以洛宅之右。陵宮所安。永言孝思。分置官守。嚴奉歲時之薦。用均霜露之懷。以爾早勵恪勤。游膺

委使罄一心而營護。歷四稔以終更。實無尤違。前有比例。宜正名于大使用。率職于近廷。且旌灌柏之勞。當職出綸之渥。

趙滋可供備庫副使制

敕某。朕以山東土俗。勁悍多盜。臨淄負海。爲一都會。安輯勞來。高選時望。乃今守將。前吾樞臣。言爾警邏。彼方肅清。所部材勇可任。方略甚明。多翦兇渠。善遇士卒。嘉聞來薦。亟用賞勞。度越常均。超介諸使。益圖自效。就虔吾恩。

胡稹可供備庫副使制

敕某。通班朝寢。授任嶺隅。屬小醜之跳梁。提支兵而討撲。被堅能力。獲級有勞。還奉更書。來援勳籍。特寵使聯之介。且旌軍最之優。勉竭爾思。往承吾渥。

盧昭度可供備庫副使制

敕某。有著在庭。以能任職。頗立勤效。實應陟科。用遷副介之聯。式示褒嘉之命。尙圖忠力。取稱恩章。

李保信可供備庫副使制

敕某。預祕寢之聯。視外朝之品。比資武幹。適委邏兵。能謹視于寇偷。頗肅清于鄉部。通稽宿課。參敘今勞。擢居使介之聯。就壯軍行之領。尙圖忠力。懋對恩章。

劉允濟可供備庫副使制

敕某、睠彼關南，控于塞下。重兵留戍，夾河置防。爾早以幹資，給吾煩使。伺軍中之動靜，覘疆外之幾微。比及終更，多得要領。擢升副介之列，且旌馳奏之勞。

張德志可供備庫副使制

敕某、蹈謹畏之風，進承中制。資強濟之力，參服外勞。聿修無愆，所至有迹。屬計年之課吏，且齎伐以應書。擢升使介之聯，庸示朝恩之茂。益圖勤蠶，以對褒嘉。

許咸亨可供備庫副使制

敕某、籍在殿塗，是承中制。任居邊部，式遏外虞。善拊循于士兵，煩宣著于材力。修上最凡之目，合于旌陟之科。宜寵副聯，往亞諸使。尙謹將屯之重，勿忘繼武之和。

全克勲可供備庫副使制

敕某、敏頗有材，謹且能力。中承軒闥之制，外護州藩之兵。參敍積勤，亶無逋事。宜疇吏課之最，用優使介之聯。就服褒嘉，益圖勤蠶。

王文顯可供備庫副使制

敕某、通籍文陛，假守姚墟。以風矩之修，資力局之幹。德行頗舉，士兵兼懷。上計有司，應我攷法。寵內庭諸使之副，獎外屏守臣之良。就服臺恩，勉思藩政。

錢師回可供備庫副使制

敕某、職承內制、身服外勞、逸居江鬱之潯、近按島夷之悍、長茲遠服、撫我列城、能和殊俗之心、弗啓吾民之患、宜疇資格、入副使聯、尙惟忠力之圖、虔茲恩典之茂。

江從可供備庫副使制

某性質專良、力局幹舉、給吾左右之事、涉于禁奧之塗、沈密罕言、端修寡過、宣傳中制、稔服內聯、凝集成勞、參應陟典、俾升諸使之亞、且承劇務之煩、勿忘欽祇、益圖云補。

李允恭林宗普竝可供備庫副使制

敕某等、開敏自將、謹孚有裕、竝資器幹之利、參試材使之煩、藉漢省珥貂之華、洎周官司甲之職、局事修舉、績善著明、特正供擬之使聯、咸參副介之朝秩、且賴宿官之久、宜從增秩之留、往服褒恩、益圖來裕。

李琦可供備庫副使李琚李球竝可內殿承制制

敕某等、朕以浚泉在詠、懷聖氏之慈、渭水興嗟、增逝者之感、眷言諸息、洽被遺恩、以爾等、妙年自修、冲規可尚、參從貴里、分籍禁庭、罹蓼莪之在憂、服苴麻而居制、或聞摧慕、良足哀矜、覽遺表以泫然、稽舊章而允幸、擢升使介、進陟班聯、恩乃究于外家、義勿慚于前代、勉思樹立、姑務顯揚。

周應可西京八作使制


敕某、首列太醫、參領儲使、仍典水衡之職、兼司都苑之嚴、必嘗有勞、乃爲可紀、閱監司





3
4
1886

文
恭
集
四




叢書集成

初編

主編者
王雲五

商務印書館發行



文 恭 集
(四)



胡 宿 撰

文恭集卷十八

外制

張昇可兵部員外郎充天章閣待制環慶路都部署經略安撫等使兼知慶州制

敕朕選通經術有行義之士訪對制閣參典祕圖置在內朝之聯本惟儒者之職間咨策略分寄翰垣亦服采于禁嚴且推恩于臨遣我收文武之用往制羌胡之衝乃獲能臣爰敷茂典具官某有史魚之直稱壺遂之賢稔聞忠規嘗置罔錯端心向國處鯁議而弗回正色立朝臨至剛而不吐屬西川之闕帥惟安化之控邊言念戎翰之良無踰書殿之舊進參持橐寵升屬車臨長列藩表率本道噫左右薦替內外屏毗委仗則均安集攸賴書不云乎爾身在外乃心罔不在王室寬我西顧勉而求忠

劉沆可依前給事中充龍圖閣學士知開封府制

敕前世尹正之才難于三輔本朝都府之政刑諸四方我得吏師寄之京劇宜峻圖書之職往裁輦轂之煩具官某風業俊雄體識明遠早代言于掖省常賦政于藩方文采潤色而有餘經術飾事而不感委靈刑之審克多中典之平反咨乃讞疑副予欽恤試公才之敏百鍊不銷考績用之期一閏已效睠惟浩穰



083
1124
2:1887

之地實資強濟之能。剖析煩拏，推行靡密。自近庭而選衆，繇內閣以升名。往司獄市之繁，善體教條之意。使枉直有寄，苛慝不興。嘉竚治功，以光表則。

錢明逸可依前兵部員外郎充龍圖閣學士知蔡州制

敕京輦之政，誠處劇煩。狂獄之情，所當審克。既失防閑之理，宜從罷免之科。具官某，雅稱偉才，早奉大對。入典明命，作爲訓辭。擢預禁林之游，委司都府之治。失于馭吏，淹乃繫囚。久違弊斷之期，不勝楚掠之苦。以至踣斃，良用哀恫。而又日者庸狡之人，構造詐諉之策。冀望非福，震驚朕師。雖已正于刑書，猶未安于朝議。其上尹政，且領守符。仍優內閣之除，兼委近藩之便。尙圖敏政，勿替來忠。

劉沆可龍圖閣學士給事中知永興府制

敕朕以內閣圖書之職，資儒術行業，充備其選。全雍戎馬之地，用文武器幹，倚以爲重。既獲敷求之志，宜有臨遣之恩。姑示睠懷，且旌圖任。以爾具官某，才具明決，知識周通。自振藻于皇塗，實有聲于當世。作我明命，著訓暢于西臺。敷厥教條，勤撫綏于南夏。能去山林之藁，善得江漢之心。比奉更書，還參從蹕。委近司之審克，多中典之平反。刑讞靡留，朝言惟穆。會長安之闕帥，方四顧以須才。僉曰汝賢，協于朕意。左右獻納，雖志力之是圖。內外屏毗，在藩朝之均重。爰申茂典，益進榮名。用煩俊哲之行，參付德刑之計。噫，重兵所部，雜谷攸居。雖方略素明，無煩于多訓。而剛柔參濟，勉務于適中。往服茲猷，勉成遠用。

左中奉大夫權尙書吏部侍郎兼史館修撰周綰除集英殿修撰知温州制

敕近臣勇退。游控于忱言。王者閱勞。俯從于雅志。睠惟着艾。宜錫恩輝。具官某。學術醇深。行能高妙。登車攬轡。徧更外服之華。拖玉飛綏。晚上禁塗之峻。銓綜著天官之效。編摩光金匱之藏。方隆尙齒之時。遽有由衷之請。老臣是賴。申諭莫回。升麗正之崇資。畀永嘉之名郡。以優耆德。以示殊私。尙勉建于風聲。卽還躋于次對。

右侍禁折繼祖可西染院使知福州制

敕具官某。爾世蹈忠圖。族雄邊部。率和種落。懷附朝家。嚮茲伯氏之良。承濟前人之業。遏磧中之外警。委河上之列城。方倚拊循。遽嗟殞缺。覽疆臣之條奏。逮部衆之控祈。謂爾武幹尤長。純誠可任。習知戎馬之事。能識羌夷之情。宜襲舊勳。式俞來請。仲部符之朝獎。遂染翟之使聯。恩典有崇。名秩其慎。當善遇于吾衆。務謹守于先規。

李昭述可依前刑部侍郎充龍圖閣學士秦鳳路馬步軍副都部署兼知秦州制

敕二閣峙于內。職在圖書。六郡被于邊。任居戎馬。矧隴西之尙武。惟天水之稱雄。謀諸師臣。得于雋望。適倚鎮綏之略。宜推臨遣之恩。具官某。盛德名門。偉才良器。該典文而多洽。資志識而周通。居然敏猷。應乃郡務。幾廷進直。得安世愼密之風。北道倚臨。有翁歸文武之用。塞垣以肅。年閏比更。試乃秦中。濱茲河外。撫羌戎之雜種。制汧隴之勁兵。牧人其難。選衆斯屬。用寬西顧之睠。具急盛秋之防。兼疇制閩之勤。庸益進祕圖之禁職。憑賴所寄。內外則均。勉從易壤之行。嘉佇幹方之最。其聽朕命。不忘爾勞。

劉巽可主客員外郎知濟州仍賜紫制

敕某、究明經義、初預銓集之流、通曉吏文、遂膺宰旅之選、領校五曹之事、慎持三省之方、能寡悔尤、頗精比例、寢升朝次、屢易歲陰、用圖風力之勞、出寄符書之守、仍進握蘭之秩、復班染蒨之章、臨長吏民、宣錄條教、勉而善政、虔我渥恩。

李珣可文州刺史制

敕、朕考經術之文、見春秋之法、推親親以貴母黨、因善善而及宗支、況我外親、殞夫元舅、痛享年之不永、撫遺札以增歎、俾加惠于孤癸、示敦仁于戚屬、具官某、柔恭克存、通敏且材、侍子舍而無違、出后家而有裕、早任天闕之要、誠爲戚畹之良、險釁所鍾、哀摧在疚、尋推恩之有自、在進秩以攸宜、已陞右閣之華、兼刺列城之重、慰其孝嗣、思乃前人、式究哀榮、勉思法訓。

趙良弼自豐州刺史除撫州刺史制

敕、師賓之列、素用正人、牧守之任、必求良吏、具官某、資于忠信、文之禮樂、言詞詳雅、器識洪通、令問徽猷、摠紳推重、南宮起草、事著于彌綸、東吳授鉞、功存于制勝、中外之政、終始不渝、爰自休閒、尤彰操尚、宮垣選美、俾參調護之職、方鎮藉能、式委分憂之寄。

劉永年可寧州刺史制

敕某、夫刺史、古之方伯、爲國爪牙、任千里之尊、秉一州之率、威懷所寄、擢敍尤艱、以爾冑緒本華、才資兼

茂謹孚匪懈。敏濟有聞。歷內庭諸使之聯。申列部鈐兵之委。載環歲序。參敍宿勤。特升刺部之名。尙寄典士之任。廩給優厚。朝渥便蕃。勿忘俯偃之恭。更圖臨履之效。

張惟吉可果州刺史制

敕。謹質者。朕所倚愛。澹退者。人之難能。況夫參珥左璫。列侍中省。久居親信之任。弗矜委使之勞。宜舉褒章。且旌冲範。具官某。忠純有守。謙約自持。侍帷幄之起居。常勤陟恪。慎樞機之周密。能絕悔尤。比資強敏之材。屢任劇繁之職。曾驅馳之不憚。在俯偃而益恭。未嘗求官。且不遺力。安和備于諸事。恬晦簡于朕心。是用申敍積勤。褒遷茂秩。領劇部團兵之重。增昆臺近侍之榮。名數有加。寵靈特出。勿替謹孚之志。益昭毗倚之懷。

郭元乂可忠州刺史陳拱可昌州刺史制

敕某等。內統禁局。參領列藩。所以昭使範之華。重戎翰之寄。用甄勞最。式示褒遷。以爾元乂。材武是經。智謀在任。以爾拱。迪知忠果。服在勇方。竝高諸使之聯。分委護兵之任。絕甘有素。馭衆適宜。代北以清。嶠南且肅。嘉訓齊之輯睦。逮控遏之底寧。并升使竹之名。參壯和門之重。就虔褒典。勿替忠圖。

刑王孫宗望可遙郡刺史制

敕某。朕篤在展親。樂聞爲善。用進州藩之秩。且旌宗邸之能。恩出褒優。義存開勸。以爾本支秀發。環衛參居。滋承信厚之風。雅厭紛華之習。慕前良之楷法。試累牘之柔毫。獻狀公車。留觀天帳。迴臻體骨之媚。深

嘉芝墨之工。特升刺部之名。用獎臨池之學。勿忘美志。更懋令猷。

張中府可開封府判官制

敕某。漢制以御史監三輔。不法復有按章覆問之選。至于惠文柱下。皆獄法之冠也。不止于彈治而已。今都畿尹政之劇。獄市姦人之淵。隱僞干憲。屬之良吏。以爾治劇有餘。審固不撓。資其抑欲之利。與夫照姦之明。往裁諸煩。善輔于尹。

劉能可御前忠佐馬步軍副都領依前合州刺史制

敕某。勾陳之衛。參護宸嚴。尺一之遷。舉循功次。以爾奮繇行伍。通知勇方。頗積勤庸。遂有高爵。遙刺州部。近拱巖除。宜升環列之名。益佇樸忠之效。勿忘勵節。以答推恩。

譚嘉震可依舊內園使昭州刺史制

敕。內司苑監。遙制蕃職。所以壯爪牙之選。重襟喉之寄。矧幹方之惟舊。且扞邊之有勞。屬申委于兵鈴。宜兼榮于使竹。具官某。本惟將種。少有驍名。好慷慨以論兵。加深沈而多算。洵領偏裨之任。數當外禦之鋒。疆堠無侵軼之虞。軍行有輯睦之整。乃瞻安化。適控西戎。尤急盛秋之防。特倚勁兵之處。寵升刺部。雄示專城。勉踵世勳。益圖軍最。

王興可陵州團練使傅永吉可開州刺史孟元可普州刺史蔣偕可忠州刺史制

敕某等。夫舉不失功。則勞臣知勸。賞不遺外。則主恩下究。朕閱邊吏之瑣。因見疆臣之名。其間久踐戎行。

屢當寇禦。功名著而甚白。爵秩鬱而未遷。用振滯淹。特申甄拔。以爾興資。韞材武濟。以樸忠。以爾永吉。嘗
摧姦鋒。名有勇決。以爾元氣。質沈毅。部分精明。以爾偕文武。自將功名。已任竝曉。知疆事。而達練戎韜。矧
賴扞城之雄。比居控塞之任。種落畏伏。亭障底寧。今參委戎鈐。復分制藩任。軍陣輯睦。士伍綏懷。稽用舊
勞。申加褒典。進領團兵之重。參升刺部之名。出于朕心。旌爾邊最。各思自效。勿替曩圖。

石全彬可陵州團練使制

敕某。朕寵厚武材。竝建使範。乃眷軍團之峻。尤爲戎翰之榮。方寄外虞。式頒成渥。以爾操修無缺。幹裕有
聞。以謹孚之資。早服勞于官省。以敏洽之用。久宣力于邊關。眷雍部之控戎。惟匈奴之被塞。允號勁兵之
處。尤艱禦衆之材。資乃練更。委之鈐護。仍進訓齊之秩。用旌臨履之勞。往服茂恩。善撫吾衆。

劉永世可果州刺史充本州團練使制

敕。朕慎名器之分。懋官賞之宜。差次功能。擢敘武爵。旣篤先勞之勸。兼圖久次之勤。用遷滯留。宜伸甄拔。
以爾承胄緒之舊。資性質之良。遙分竹使之符。近總琳房之職。習事經而無缺。奉朝請而有虔。閱官簿而
則深。覽需章而乃實。爰紀恪恭之節。用升團練之名。尙洩威神之庭。往欽使部之寵。益思慎履。當體殊恩。

王從善可西京左藏庫使依前充果州團練使制

敕某。洛師之重。分置于官儀。禁帑之名。差優于使範。用甄往效。特懋茲恩。以爾勳閱緒餘。近庭陟恪。蹈世
忠而濟美。服王務以宣勞。矧者資素性之謹良。委禁垣之提警。雖宿衛無狀。俾出領于兵鈐。而疇昔有勞。

用稍遷于使局。示舊勤之匪棄。尙褒典之是承。

余靖可左神武大將軍遙郡刺史。州鈐轄差遣制。

敕某。陟罰之典。竝體于至公。甄敘之恩。用圖于曩效。張敞起于亡命。安國擢于徒中。資以前勤。抑惟往制。以爾博于古學。濟以敏文。自致秀科。優入制等。常游冊府之祕。邁升辭禁之華。煩使有材。首公能力。懃因往咎。中見譎居。越在南服之荒。多歷徂年之所。尙分留籍。已進亞卿。朕以爾久侍近班。三使絕域。念勞可錄。在宥弗忘。擢居環衛之嚴。遙刺列城之重。無以名器之小異。當問才略之何如。起圖而忠。往服朕命。就司鈐護。當體敘收。

李瑋可起復雲麾將軍保州團練使制

敕。朕感先慈。早棄長世。眷乃元舅。適及外家。享命弗融。遺恩宜厚。具官某。義方被教。退讓陶風。稟詔令以兼資。處紛華而匪雜。躋膺選尙。方俾進修。屬遭親喪。例推權制。用正軍團之秩。兼升環衛之名。式慰孝思。俾參朝請。庶幾進見。特示眷懷。勉遵肯構之規。宜亮奪哀之意。

溪洞新州知州彭師政富州知州彭師晡竝可銀酒監武知本州軍州事制

敕某等。越在辰溪。欽我朝化。善固封守。多歷歲年。有嘉成勞。且敘前化。崇階美秩。勳等憲聯。竝命詔除。益圖忠效。

溪洞寧州知州彭師鴈可銀酒監武知寧州制

敕某能慕聲明善固封守附陳前比求敍上恩嘉其輸附之誠仲以褒優之命崇階茂秩華紱命章併示寵綏益圖欣戴

曹正可袁州司馬制

敕某爾幹局無缺第課當遷具有奏封乞從歸老聽解算商之任爲除司武之名往服優恩俾從素志

追官勒停人屯田員外郎蕭廔可萊州別駕制

敕某籍通省郎班在朝序簡書罔畏篋篋不修詐諛受賕鞠問得狀所坐狼籍談者諠譁宜正刑書奪去官秩與之上介猶曰寬恩

解賓王可開封府判官閻詢可開封府推官制

敕某等古者京兆比三輔爲劇今之都府亦萬事所叢必簡乃僚協相厥務以爾賓王儒者之風志行修潔臺觀討論之職京輦煩拏之任稽諸行事已試之效孔明以爾詢髦士之良才本強濟緣中司薄罪之坐歷外屏左官之遷長于治民可紀之績甚白或就甄最狀升冠元僚或還錄敏資佐治煩局噫郵罰麗于事察獄必以情勉思是言勿懈于位

高良夫可依前主客員外郎充開封府判官石揚休可太常博士兼祕閣校理充開封府推官制
敕某等朕高選時望擢典京司妙簡才髦參備僚屬以爾良夫習于爲吏治有能名以爾揚休才堪決煩文甚爾雅或嘗操外憲之柄或久預中祕之游稽慰薦而有先試浩繁而已效是宜參濟京劇輔佐尹賢

爾其察人冤。謹吏黠。慎要囚之伏念。體庶獄之哀矜。務竭乃心。以稱朕意。

范純熙可鄧州節度推官制

敕某。習知吏事。領佩縣章。本于惠心。善撫黔細。沛有餘力。能制寇偷。支黨悉除。鄉亭絕警。州上勞迹。臺舉賞科。擢亞元僚之游。且旌健令之最。

凌起可昭化軍節度推官制

敕某。本造士之良。膺字人之寄。越在嶺服。肅治邑封。尤旌方略之施。多有寇攘之獲。閱計臺之言狀。覆憲部而中科。擢參賓謀。申示朝賞。

解賓王可開封府推官制

敕某。中畿尹政之繁。總司都輔。先朝景德之制。增至屬僚。參聽庶獄之辭。分裁一府之任。用釐浩劇。必選幹能。以爾學力淹通。性資純固。預儒館討論之任。更曲臺贊相之儀。用先行實之圖。且膺政務之試。強敏者乃其有濟。安舒者戒于後時。往承上官。勉修爾職。

鄧唐可懷州防禦推官張式可賓州軍事推官制

敕某等。往者職在詰盜。資入督郵。能修尉察之方。善厲追胥之力。寇偷就獲。墟落底寧。覽嘉勤吏之能。超用有司之格。擢從州簿。參預賓籌。往祗從事之榮。勿替首公之敏。

許震可試大理評事充威武軍節度推官制

敕具官某、循吏之子、清白承遺、緣蔭格而隨牒、階詔舉以字民、所守廉平、素行修整、代還有應書之、最次補以入幕之僚、尙寄弦歌、勉績功次、滿課之上、則有前詔。

張伯通可試大理評事充奉寧軍節度推官制

敕具官某、朕用天聖詔書、選舉令宰、賞格條目、端委詳陳、所以爲官擇人、廣施德于天下、比聞撫字、多獲善良、齋伐之來、恩典奚吝、爾以蔭籍、階仕版、以薦任佩縣章、滿秩有功、在法當陟、宜參入幕之畫、尙寄鳴弦之治、往欽無忽、汔濟有成、尙佇來勤、乃終後慶。

李益可試大理評事充徐州觀察推官制

敕具官某、任居宰字、介在邊隅、歲惡無聊、民起爲盜、能施設于方略、悉擒送于根株、縣部底寧、臺格應賞、乃睠彭門之劇、俾參幕府之籌、用錄前勤、尙圖來效。

劉義叟可試祕校充石州軍事推官餘如故制

敕某等、奮自髦彥、名有學術、義叟、早膺詔舉、獻策開邊、夏卿、擢自賓興、以文入彀、或試員于列寺、或隨牒于遠方、會置局以修書、俾和鉛而參職、觀所舉者、咸吾近臣、稔聞約史之勞、加有奉祠之格、熙成均慶、典領爲言、用升賓幕之資、對服書筵之舊、姑爲漸陸、勉濟成編。

張子庚可殿中丞依舊知縣制

敕具官某、夫春秋之法、先內而後外、繇近以及遠、爾早籍穀中之雋、適治寰內之邑、持身近厚、從政弗苛、

條上年庸協應賞格。進丞盾省之局。參預朝著之聯。于以風激四方。開勸勤吏。此亦先京師。後諸夏之義也。其襟承之哉。

劉槩可試大理評事充忠武將軍節度推官知邢州堯山縣制

敕具官某。爾曷奉臺詔。治茲邑氓。能體勤約之風。善賦惠和之政。終更無缺。旌陟有條。宜升幕府之游。尙寄縣同之任。勉修前績。姑俟後恩。

前守鄜州洛川縣令宋太可試大理評事充天平軍節度推官知潞州壺關縣事制

敕某。以敏給之才。推擇爲令。在職稱辦。于法當遷。列于賓席之聯。付以縣章之寄。益圖善治。以漸榮階。

張徽可試大理評事充節度推官知夔州奉節縣制

敕具官某。以軍從事之職。任邑大夫之政。秩滿官下。代還邊隅。較課中銓。升榮大幕。尙寄弦歌之治。勿忘簠簋之修。有佇來勤。以須後陟。

高汝士可山南西道節度推官知瀘川縣韓澤可山南東道節度推官知廣安軍新明縣制

敕某等。縣大夫之職。去民最親。朕用天聖詔書。拔舉清吏。付以銅墨。寄以弦歌。似聞元元。頗受其賜。脫有異績。何愛陟恩。爾等名在選中。治成官下。終更齋伐。鈎校應書。稍升幕府之游。重煩美錦之製。勉卒前課。具如賞條。

郭旦可依前祕校知單州成武縣公遜迪可試祕校知齊州歷城縣馬居方可試祕校知濮州臨

濮縣制

敕某等、邑大夫之任。以寄赤子之命。非有臨履善最。監司薦延。朕未嘗輕授銅墨。爾等居尉察之職。有追胥之勞。剪除盜姦。肅清鄉部。本郡言狀。有司覆實。在勤可紀。于法得遷。竝試守一同。臨長百里。有民有社。良足爲政。既能屏去苛慝。便當存撫細弱。脫有善迹。何愛存官。往正爾心。使稱朕意。

李舉賢可洛州曲周縣令制

敕某、以法學之明。糜我爵秩。以吏資之習。服我尉員。方略甚明。寇攘多獲。有司言狀。賞格應遷。嘉其敏才。擢以健令。勉樹庇民之績。且旌詰盜之能。

呂用賢可磁州邯鄲縣令制

敕某、勾稽名官。承乏比邑。檢簿書之謬。絕有毫差。督寇偷之姦。悉能株送。卿亭肅乂。民堵安安。所部條聞。厥勞炳著。宜示賞科之信。俾要健令之章。往服褒遷。益圖員補。

成吉甫可趙州隆平縣令制

敕某、中經生之科。隨大選之牒。守尉百里。詰盜四封。盡得主名。多獲支黨。留司上其最狀。憲部議其賞條。宜升佩于縣章。用勸登于吏力。就虔褒寵。勉務清修。

申陟可相州湯陰縣令李伾可兗州瑕丘縣令制

敕某等、名居尉察。職在追胥。任百里之佐員。詰四封之姦盜。根株多獲。閱閱條聞。宜旌印綬之榮。擢布弦

歌之政。用優力幹。且信賞條。務濟惠和。往綏細弱。

王昭可濮州臨濮縣令制

敕某、懸居尉察。嘗翦寇攘。尋稽臺賞之條。已結縣同之綬。綸函未拜。苴制乃嬰。適御祥琴。追申前詔。用復弦歌之治。益思篋篋之修。

趙貺可相州永和縣令制

敕某、調補都銓。追胥劇邑。善知姦穴之隱。悉得主者之名。株送甚多。邑居以肅。監司言狀。參覆應書。宜從健令之遷。且賞詰姦之效。益圖撫字。無替操修。

宋康濟可青州益都縣尉制

敕某、本繇褻博。嘗舉蹶張。預禽寇偷。遂有班籍。厭走一封之傳。求換半通之綬。俾領追胥。且從志尚。當善恤于民隱。務祇守于官箴。

种世衡男古可鳳翔府天興縣尉制

敕某男某、爾父、懸以將材。官吾邊部。著首公砥節之效。有典戎幹方之能。適倚扞城。不幸早世。覽觀爾奏。論列父功。因命憲司。攷驗實狀。事雖存于端緒。辭有涉于詐誣。尙念前人。舊著勤績。爲寬法律之坐。俾司簿書之稽。當體寬優。勿忘甄錄。

白舜元可莫州長豐縣尉制

敕某、名書班籍。年在東隅。厭乘輅車。願仕郡邑。亦以餘力。庶幾學文。俾除尉察之員。尙謹追胥之職。勿渝美志。茲懋來勤。

敕賜五經及第孫師旅可鄆州須城縣尉制

敕某、繇以經中美科。預選便殿。今以年合常格。得集中銓。可以試吏服官。詰姦禁盜。無替而學。尙慎厥初。謹視寇偷。善遇黔細。

敕賜毛詩及第王仲甫可光化軍乾德縣尉制

敕具官某、爾繇用專門之學。當中揚庭之科。曾失節宣。謝去唱注。今疴恙良已。而名錄具存。銓部以聞。尉察爲擬。當慎服官之始。勿忘絜矩之修。謹視寇偷。務恤黔細。

李從政可秀州嘉興縣尉制

敕某、繇者自廷尉史。除民曹掾。銓資甫入。書局遄留。會刊定之奏篇。用追胥而改秩。且甄恪效。益守廉規。

史館孔目官汪宗益可青州壽光縣尉制

敕某、經署版曹。留寘史觀。肄勤匪怠。習事寡尤。質選格而已盈。稽恩比而當補。外邊尉察。往務勉修。

尙書學究及第陳元良可永康軍司法制

敕某、爾繇者經明得科。齒幼未祿。今緇布已冠。而舊學尤通。可以入官。使之從政。往司三尺之律。初有半通之綸。善持丹書。務遵素履。

蘇澄可權蔡州支使制

敕某、朕以震誕在辰，賞延均渥。惟吾政弼之舊，來上公車之章。言爾早預親聯，冀霑朝寵。宜自勾稽之局，權居參畫之筵。尙慎聿修，無忝內舉。

東黃可成州同谷縣主簿制

敕某、蜀郡學者，等鄒魯焉。爾經藝淹通，喜爲諸生之誦說。士矩修飾，往被大臣之薦延。試秩蘭臺，授經石室。雖仕版有所齒，而稟祿未及賦。乃今州將之重，卽吾書殿之望。再形論奏，益堪取信。就補勾稽之秩，勉思教道之方。宜本先儒，以正後學。

孟永寧可新州新興縣主簿充翰林待詔御書院祇候制

敕某、恪奉嚴宸，頗精楷法。籍禁門而惟舊，成寶刻而有勞。特疏一命之榮，且獎六書之善。益專小學，往服茂恩。

御前學究及第李奎可河南府澠池縣主簿制

敕某、齒未及冠，經已中科。勳令待年，今乃應格。成宵雅肄三之志，服初命半通之綸。無忘愛民，其益修己。

曹宗壽可磁州昭德縣主簿劉復可陳州西華縣主簿制

敕某等、本縫掖之家，紆使者之紱。藝文略涉，志局方剛。不樂乘軺之馳，來求訟牒之補。爲除班籍，聽入銓流。分勾簿書之稽，尙勉箕裘之習。

進納梢草空名助教制

敕某、日者河流弛于故道。比詔都水議塞決隄。爾能輸下捷之材。〔案〕史記下淇園之竹。以爲捷。原本捷訛捷。今改正。以助有司之費用。補州藩之佐。且爲邑里之榮。

高永可試助教制

敕某、爾嘗以藥石事于宗藩。試諸方書。頗知倫脊。命學庠而試秩。去選籍之入流。往服榮名。益思謹力。

在京進納斛斗楚州等第戶房旺可將仕郎守本州助教制

敕某等、金布甲令。共給邊費。至于入粟補吏。皆漢法也。以爾本編戶之細。擅居室之饒。能捐我私。以佐公上。俾崇鄉里之化。往服朝家之恩。褒勸在茲。祇受無忽。

成有宗可河中府司錄參軍監汀州鍾賽金銅場制

敕某、比沿銓牒。經佩縣章。亦既終更。適從調集。以州網之列掾。莅金冶之別司。往服爾勞。用圖來賞。

明法及第廉正臣可陝州靈寶縣主簿段林可霸州司法參軍制

敕某等、本治臯蘇之律。或通鄒魯之經。對升科榮。各在年妙。今鈐格既及。則官使自宜。往勾邑簿之稽。參司邊掾之任。勉思乃職。勿替攸箴。

張永德可衢州常山縣尉兼主簿制

敕某、以籍在行人。名參上介。虔于秉事。號爲寡尤。愍其歷紀之勞。寵以莅官之命。往司尉察。勿忘廉規。

薛安期可益州司戶制

敕某、隸在公府。主發詔函。執勤累年。賞勞有典。授以路藩之掾。寵茲民版之名。用示優恩。尙仍舊局。

學士院驅使官羅整可梓州司戶參軍依舊供職制

敕某、隸周嚴局。服從煩使。在事條而頗習。奉頤指而有勞。來援舊規。宜有初籍。俾預銓流之補。且從禁苑之留。

新及第進士諸科李育等可幕職州縣官制

敕新及第進士李育等。朕自纂御以來。規恢治道。右文崇術。扶進學者。育材養器。登備時使。親加較試。多所成就。烝然髦士。參照內外。勸導之意。可謂至矣。爾等竝因詔舉。相與計偕。有司籍名。便坐臨試。旣第其辭等。復差以爵秩。爾其念進官之始。思臨履之難。善持官箴。無忽民事。咸自修綜。取稱吾恩。

文恭集卷十九

外制

皇姪宗懿可端州刺史皇姪宗述可右屯衛大將軍制

敕、國家承軒祖之詒謀。法陶唐之敦族。封爵同姓。體貌大宗。道在維寧。恩宜加腆。具官某。孝恭履德。信厚成風。具官某。性茂溫文。體資英嶷。並稟玉林之粹。悉含銀派之和。胥被寵章。參居環衛。奉朝惟恪。居邸有聞。朕濬百世之遙源。謹九宗之屬籍。惟時賢亮。司我本支。宜酬營職之勞。遞遷冢子之秩。特升藩刺。對總巖除。豈惟旌是似之美才。蓋以褒乃親之有德。惟欽擢敘。勿替踐修。

皇姪宗樸可貴州刺史皇姪宗藝可左領衛大將軍制

敕、分建宗屏。參陸本支。環設衛官。拱扈宸極。號爲要職。舉屬茂親。以爾宗樸。迴稟靈華。居然信厚。以爾宗藝。夙成體哲。樂善爲猷。並茲縣賦之昌。咸陸大宗之訓。師言是率。禮範攸循。屬敦敘以崇風。宜褒嘉而進秩。列城遙刺。大將超遷。且光閭寄之雄。兼衛巖除之重。宜懋遵于法度。用對越于寵休。

皇姪右千牛衛將軍士顥可莊宅副使制

敕某、宗子之良。見推才實。輟于環衛。寘我周行。往究汝能。毋忝予寵。

皇親男授官可竝副率制

敕某等、國家神明之後。本枝茂焉。爾等蔚爲文孫。適在穉齒。已勝衣而能拜。且就傅之有期。會嚴祀之涓成。覽大宗之條請。宜優初秩。仍錫嘉名。數從率府之除。滋厚宗藩之睦。

皇親賜名與官海詞可竝右內率府副率制

敕、國家祚出神明之後。慶席祖宗之靈。蕃育文孫。參映皇室。朕乘感誕之節。孚敦敍之仁。澤厚近支。體先異姓。閱大宗之言上。用諸邸之通規。昭揚嘉名。甫班初命。勉勤幼志。虔服茂恩。

樞密使王某親姪孫廷年給事中參知政事劉某親孫男子雅工部侍郎參知政事劉某親孫男

竝竝可守祕校制

敕、國家誕辰故事。推恩邇列。法得任于門子。禮特優于政弼。以爾等、年妙志美。體安節和。本諸惠訓之深。稔于宵雅之肄。宜有官簿。用寘京司。祇我恩章。勉于學力。

少傅致仕李若谷遺表奏泉州進士薛穎士可試國子四門助教制

敕某、韋布諸生。甌閩遠客。久託名臣之館。近罹東道之喪。素行無虧。遺章有請。用試員于學省。且略選于銓臺。俾有官稱。勿忘士矩。

太子少傅致仕任布孫拱之可試祕校太子少師致仕任中師姪孫元之可試監簿制

敕具官某孫某，朕因感流樞誕節之慶，優安車就第之老，賞其世嗣，延以朝恩。爾等挺生名門，滋承忠教，服士矩而允若，亦地勢之使然。宜有官聯，以漸時使，分從試秩，咸用起家。尙服初榮，益思自勵。

兵部尙書陳執中四從姪孫太初可試四門助教制

敕具官某四從姪孫某，惟爾從祖任吾大臣，曾高以來，丘墓在遠，若爲疏屬，尙夷平人，守護有年，掃除甚力，俞其章請，試以學員，且奉舊塋，匪敍常選。

故龍圖閣學士禮部侍郎劉筠從孫景純可守將作監主簿制

敕具官某孫景純，夫修廢功，援絕世，聖王之高政，春秋之美意也。以爾從祖筠，懿德大雅，殊行偉才，逮事章聖之朝，經爲禁林之老，朕初紹宅，稔聞納忠，朝匠亡身，支庶尋隕，烝嘗罔寄，門戶可哀。因命有司，推求近屬，爾少承緒業，親則諸孫，禮存出繼之文，世載爲後之義，俾員大匠，用續前人，往慎爾修，當虔吾詔。

故翰林學士彭乘男敏行可太祝景行可奉禮制

敕具官某男某，爾父號爲時德，服在禁林，遽嗟至哲之萎，且表諸孤之藐，緒言未泯，遺音可傷，用推延世之恩，式寄邇臣之悼。爾等稔聞勳學，滋被教忠，竝因聞禮之餘，差進奉常之屬，尙圖樹立，自致顯揚。

故翰林學士彭乘姪壻王寧可試將作監主簿制

敕具官某姪壻某，早服纓衣，屢干貢部，未有仕版，尙栖衡門，屬予侍臣，今者捐館，閱其遺札，爾則外嫻，來祈恩典之延，用補匠員之試，惟當以藝，無用選爲。

侍讀學士戶部侍郎王拱辰親兄拱安可試將作監主簿制

敕具官某、早列廷臣、屢馳使傳、屬誕辰之敷澤、因仲氏之貢章、求真京師、願謝班籍、方倚股肱之郡、用嘉手足之情、寵以匠員、宜茲門緒、往踐官箴之厚、益循士矩之良。

故翰林侍讀學士葉清臣遺表妻兄進士趙淳可試將作監主簿制

敕具官某、妻兄進士某、爾絃冕之餘、伏膺門業、已踰強仕之齒、未及進官之門、近者失吾名臣、弗克柄用、時則遺奏、爾乃外嫻、來求餘渥之延、特越常均之比、試諸匠屬、姑有仕階、尙當勉之、無忝逝者。

禮部侍郎致仕蔣堂姪之器可試祕書省校書郎制

敕具官某姪某、惟乃仲父、實予名臣、鑒知止于道家、還時事于宰旅、寢延酬賞、參澤近支、以爾業承清門、義均愛子、被風訓而逾劭、聞學尙之足佳、往試祕丘、初有官箴、懋勉時術、奮取世科、以爲慶閱之光、寵不亦美歟。

故工部侍郎致仕楊偕親孫景道可守將作監主簿制

敕某孫某、惟爾大父、若時名臣、方授禮經、謝去官政、如何不淑、奄至云亡、爾惟裔孫、朝有恤典、宜從匠屬之補、用推世賞之延、往服官箴、勿忘風訓。

司門郎中致仕樂安國男溫可試祕校郎制

敕具官某男某、爾父年老爲郎、章言還政、願回遷授之澤、以延嗣續之榮、爰試秩于祕丘、用承顏于子舍。

勿忘樹立益務勗修。

職方員外郎致仕王述男孝叔可試將作監主簿制

敕具官某男某、爾父剛于爲吏、老滯諸郎、以疾乞年、有章謝事、法得任子、意在養親、祿可奉于旨甘、誼足感于幼艾、匠員往試、門緒勿忘。

駕部員外郎致仕陳淨男枚可試將作監主簿制

敕具官某男某、爾父老在郎潛、表還官政、且厚引年之寵、用推任子之恩、試以匠員、續其門緒、卽宜祇命、勿替承顏。

都官員外郎致仕盧器男洪可試將作監主簿制

敕具官某男某、爾父著中臺之籍、預外朝之聯、來上奏封、求還時事、願回挂冕之澤、用爲肯構之榮、爾滋服義方、祇勤孝養、往參匠屬、庸示朝恩、且慰家嚴之情、勿忘子舍之恪。

都官員外郎致仕王琥男駸可試將作監主簿制

敕某男某、惟乃之父、有著在廷、嘗授經于藩房、旋倅政于州服、以疾謝事、援比乞恩、用試秩于匠員、俾承顏于子舍、慰茲挂冕、勿替爲箕。

虞部員外郎致仕王周男某可試將作監主簿制

敕具官某男某、爾父少從官政、晚寘郎曹、年及杖朝、表求解紱、願以歸休之渥、移爲似續之榮、稽用朝彝。

俾參匠屬往佩起家之寵。勿忘肯構之言。

虞部員外郎周德延男慶之可試祕書省校書郎制

敕某男某、臺郎員外。于法未當任子。朕愍告老之士。著推恩之令。使夫養者有祿。退者無戚。恩用延于似續。義足感于耆艾。爾父年合禮經。秩在虞衡。章言公車。謝去官政。舉用茲典。往試祕局。當思進宦之難。勿忘奉養之恪。

故王德基男咸有可閣門通事舍人許持服制

敕具官某男某、朕悼師帥之臣。殞邊隅之任。思究哀榮之典。併推似續之恩。以爾出自勳門。本諸忠教。著籍廷臣之次。典謁天墀之華。遘于閔凶。越在哀疚。覽遺章之所請。懷前人之弗忘。特升宣納之名。俾進近殿之列。聽從終制。勿替移忠。

河北都轉運使吳鼎臣遺表奏親孫男承規傳規竝可試將作監主簿制

敕具官某孫某等、彝選爾祖。使漕朔方。甫寄劇煩。遽嗟奄忽。覽觀遺札。采錄諸孫。用開允于緒言。俾鈞稽于匠屬。咸思祖服之重。往承朝渥之優。

夔州路轉運使楊文學男彥誠可試祕校制

敕具官某男某、爾父委之使傳。往恤吾民。章言公車。祈任及子。且勤巴徼之遠。用延世賞之榮。優以校文。試于祕省。茲爲漸陸。勿忘起家。

淮南轉運使李仲偃次男孝直可試祕書省校書郎制

敕具官某男某爾父久以清德厚行名稱朝廷方委將漕之煩來援任子之法爾滋承風訓瑩有神華宜試秩于祕丘用起家于名閥勉修遠業祇服茂恩

故寧遠將軍知棣州田彥晏長孫忠俊可溪洞都巡檢故知富州田承亮弟承喜可銀酒監武知

富州制

敕某等族依邊徼世奉闕庭能撫種人善靜吾鄙屬大門之殞〔案〕此句有脫誤得使部之奏陳寵以憲聯授之勳級當傾輸于忠力以承嗣于前人

故麟州兀羅族下班殿侍三班差使羅佑親男崖可本族副都軍主制

敕具官某男某以爾族居戎落代服忠圖內正聲明遠為保障閱守臣之通奏言爾考之淪亡用稽世襲之科俾錫軍幢之號益思固圉以美克家

滿濟置勒噶卜楚男置木磋沙克置伊實男吹置勒沙克置庸蘇男斯結斯清矩嘉奇正男戩巴

勒沙克置揚摩男細斯承續制〔案〕滿濟置勒噶卜楚原文作蒙家叱噶靛置木磋原文作尊毘落沙克置庸蘇原文作施家藥四卒沙克置揚摩原文作捨家也結四青矩嘉奇正原文作俱家款征戩巴勒原文作應彪沙克置揚摩原文作捨家養抹細斯原文作借四今並依〔案〕唐古特語改正

敕具官某惟爾之考奕世居邊內拱朝風外扞吾圉奄從喪逝良用哀矜閱本帥之奏陳求遺孤之承續

卽其戎落。授以軍會。咸率忠誠。勿墮先志。

集賢相宋庠妻淮陽郡夫人胡氏可成國夫人制

敕。朕慎調元之任。尊置相之儀。選諸具瞻。用正名于茂宰。迹其內助。復加惠于小君。且明朝禮之優。實旌壺則之茂。某官某妻某氏。矩儀淑慎。族望華腴。四德之教。婉從二物之經。參濟嬪風。以穆家事。用修惟乃夫子之賢。膺我弼臣之舉。義由協濟。恩用褒嘉。胙而成國之封。光乃慶門之合。采車進飾。象服益宜。往欽名數之華。逾奉箴圖之訓。

平章事龐籍妻彭城郡夫人劉氏可進封彭國夫人制

敕。朕以樞衡大柄。屬于耆俊之臣。乃用車服殊章。旌其賢善之室。蓋進弼之任重。則加惠之典優。詳按朝文。敷施邦采。迹通規而惟舊。昭惠問而則新。具官某妻某氏。柔正含風。開華表性。挺生勳閥。蹈四德而無遠。來歸德門。經二物而有助。勉用哲夫而圖政。已自小君而進名。胙之大彭。宜是象服。適中階之命。相惟內壺之配。台有升庸進秩之褒。昭積行累功之致。滋峻起家之美。進開成國之封。恩數益華。儀品參稱。當思名器之旌。禮尙勤圖史之詔言。往服寵靈。永孚嘉告。

故引進使果州團練使王克忠妻上黨縣君石氏可進封武威郡君制

敕。具官某妻某氏。爾之所天。嘗經事朕。忽成淪逝。良用盡傷。愍飾之恩。旣加于密印。疏封之渥。更及于帷堂。以爾族茂華腴。德彰韶令。服攸箴于圖史。躬乃職于組紉。攸遂靡譏。殲良遽及。特升榮于郡甸。慰銜恤

于家閔宜誓柏舟用虔綽命。

故引進使陵州團練使王克基妻張氏可封清河郡君制

敕朕愍親信之逝有懷若人推封胙之恩用慰其室具官某妻某氏挺于冠族躬乃柔儀作合公侯之門昭宣圖史之訓行無攸遂痛在未亡追用所天之勞申加益地之典進疏郡甸昭示朝榮彌敦正淑之規以對褒嘉之命

濟州防禦使張茂實妻劉氏可封彭城郡君制

敕具官某妻某氏出高華之族稟柔婉之風懿範交修憲言祇率屬巖下之衛方用乃良而闈內之封宜優異等特疏榮于望郡用申寵于名城往祇茂恩益敦淑履

參知政事高若訥姊陳宗古妻可封文安縣君制

敕親有立愛之言澤存及族之義況近司之預政爲同產以祈恩義有可嘉朕亦何愛具官某姊某官妻婉靜有儀賢和自飭從所天而不達誓己志而未忘覽仲氏之善言敍共姜之守節兼回感祀之渥冀得寵章之封析以縣田胙之湯賦往祇茂澤彌勉柔風

禮部尙書同中書門下平章事文彥博妹信安軍判官成偉妻可封永康縣君制

敕本根盛者枝葉茂焉慶旣發于名門澤宜覃于勝族以爾具官某妹文氏矩儀閒遠思理詳和歸于令人綽有賢範雖榮珠履之伉未徹粉田之封惟時哲兄任我元宰沿親闈喜愛之志移合宮進胙之恩因

求綽章願啓湯賦有美謙恭之尙兼圖孝愛之嘉特疏縣壤之腴俾獻慈堂之壽併伸前寵式表重榮

張方平女故殿中丞蔡天申妻張氏可封壽昌縣君制

敕某氏爾父德善在躬參貳機柄均勞于外得謝朝廷延賞致恩國有舊典爾徽柔莊靜嬪于慶門錫以邑封庸示褒寵思永燕譽宜其家人

長安縣君可封仁壽郡君制

〔案〕長安縣君上脫某官某女等字

敕具官某女某氏昔師臣張禹病漢文帝車駕臨問之禹以愛女爲言乃知常情之所不免也今吾肱臣所虧墨奏猶濕且有安昌之請求益石窳之封矧婉範夙成惠問有淑宜裂多城之壤用增湯賦之田欽對茂恩勉循懿矩

定武軍節度使承裕第六女遂寧縣君趙氏可進封長樂郡君制

敕某氏淑婉有儀嬪于良士同天之慶均逮宗親錫封名城用爲華寵

磁州防禦使承亮等女可竝封縣君制

敕某等穆有性範秀發天支已茂穠華之風猶疏湯沐之賦經祝延之紀節廣惇敍以推仁特啓縣田用招邦族往祗寵數尙勉柔儀

防禦使宗旦等新婦可竝封郡縣君制

敕具官某妻某氏朕以震誕之辰因祝延之慶旁均恩施近澤本支以爾族茂蔭華體閒性正少服公宮

之教居佩女師之篇。作合宗藩。協恭巽饋。遴樞縉之紀節。睦邦族以敦仁。用疏郡君列郡縣君佳邑之封。式允大宗之請。析而湯賦。虔我綽恩。

右領軍衛將軍克修所生母李氏可封南陽縣太君制

敕。惇敍之愛。所以睦宗藩。封胙之恩。所以厚邦典。以爾具官某母某氏。性爲淑哲。族本華腴。因乃子之祈恩。屬大宗之獻狀。特疏望縣。用錫美名。宜虔渥茂之思。益蹈謹良之戒。

左龍衛軍大將軍饒州刺史承翊親育母霍氏左金吾衛大將軍舒州團練使穎國公從謁所生

母鄭氏右千牛衛大將軍文州刺史宗敏所生母范氏可竝封縣太君制

敕。朕以扶厚人倫。糾綏邦族。爰及祝延之慶。宜推天敍之恩。以爾具官某等所生母。法度自將。矩儀兼勗。挺生宗哲。參茂本支。適因震誕之辰。來控疏封之請。且將崇孝。亦用廣恩。特優縣甸之名。姑徇藩房之美。滋敦柔範。益服寵章。

左監門衛將軍宗翰所生母劉氏可進封縣太君制

敕。天下之風。莫先于孝。門內之治。必本于恩。某母某氏。性婉而和。德柔且正。實生宗子。乃領衛屯。來祈湯沐之封。用順劬勞之報。胙之名邑。錫以命書。往欽茂恩。益修懿矩。

右江溪洞田州知州黃光倩母阿儂可封宣化郡君制

敕。某氏。爾服于遐荒。克有材智。料籍丁壯。勞勤顯聞。錫以命書。用爲寵勸。

皇弟安德軍節度使華原郡王允良乳母王氏可封永壽縣君制

敕具官某乳母某氏少率姆訓善治禮防于藩邸有保阿之功惟朝家敦崇睦之典需章有請舊恩弗忘宜疏湯邑之封姑徇藩王之願益圖淑慎進服寵榮

贈鎮江軍節度追封丹陽郡王守節乳母徐氏可封高平縣君制

敕某乳母某氏朕睦邦族之良愍宗藩之逝延錄保阿之舊申加封胙之恩析用縣田進爲湯賦尙慎柔嘉之履往欽褒敘之榮

貴妃大姑張氏可特授典正制

敕掖廷建職參縮內司宮正有僚分條近職竝圖才淑選侍宸嚴貴妃大姑某氏族茂高華德昭婉穆少服大家之訓早聞良袂之風入踐祕塗益彰柔範宜升司正之掌滋示寵名之華往服茂恩恪思慎履

貴妃第八妹張氏可封清河郡君制

敕具官某第八妹張氏挺生慶門參懿柔矩服憲言而有自謹姆教以無違通籍掖庭預長安之外戚選名輿地胙列郡之封君往欽湯沐之榮益懋柔嘉之德

貴妃乳母周氏可特封長安縣君制

敕某乳母周氏柔謹資性保阿有勤閱椒掖之上言求粉田之錫號移別恩而用授明前惠之聿圖胙以縣田爲之湯賦尙勉循于懿矩往祇服于茂章

德妃位聽宣夫人張氏韓國夫人張氏竝可封掌膳制

敕某等資承淑茂選侍禁殿欽柔範以無違躡祕殿而有裕親承音旨益慎矩儀用醕年序之勞稍進膳羞之掌茲惟褻渥勿替恪恭

魏國大長公主親外孫女錢氏可封壽安縣君制

敕朕惇敍之恩尤尊于外館彙征之吉宜擇于近支以爾某族本華腴性資韶令世素傳于帶礪言早服千箴圖屬貴主之爲言乃賢女之攸出宜疏湯賦用錫縣田往承渥茂之封彌服柔嘉之尙

文恭集卷二十

外制

蔣堂可禮部侍郎致仕制

敕、非達人無以蹈止足之美。惟賢者乃能潔去就之分。睠言舊德。適殿中兵。撥經禮以露誠。抗封章而還政。且優哲艾。用遂晏安。具官某。才粹而文。道沖且正。體風識而盡遠。懷資術而本強。進直計。樞之嚴。比歷藩房之重。老于政事。故吏道之可師。式是風華。惟名教之爲樂。績宣中外。治盛東南。引周任之有言。遵祁奚之請老。朕方希古忠厚。惜時耆明。稔聞歸志之堅。姑從繕性之適。閱勞煩事。就成美名。周官亞旅之聯。春卿宗伯之貳。峻是儀等。昭我恩章。勉爾嗇和。以永遐福。

王渙可太子賓客致仕制

敕、禮者齒尊舊德。所以尚賢存道體。厚仁俗。所以弼化矧吾謝事之老。夙懷經哲之風。前識表微。高蹈知止。屬茲成變之慶。命以增秩之甄。用獎耆明。且嘉澹退。具官某。懿德攸好。雅行是躬。起王國之烝髦。資名門之濟美。被服儒術。緣飾吏文。申翊宗藩。曾惠訓之不倦。艾服官政。固強力之未衰。時用欽于老成。世方

期于策進。而能獨拔昏俗。褫去華軒。率經禮之攸行。務名教之爲樂。固以昭正素之履。聳貪儉之風。惟朝廷嘉尚之恩。下歲時存問之詔。而神明克壯。志慮彌沖。會熙典之涓成。貺茂恩而進序。升宮朝之調護。適林岫之晏安。姑遂松喬之游。亦惟綺季之舊。往服休命。益御太和。

蔡黃裳可右贊善王稹可太子中舍人苗存可大理寺丞劉制可大理評事竝致仕制

敕某等。壯年遊宦。皓首棲遲。豈不爾勞。尙困于選。以年力之疲曳。厭王事之驅馳。自陳日侵。願謝時使。京師進秩。朝序升聯。竝增軒冕之華。且慰丘樊之逸。

許上達可太子洗馬謝元振可守國子監丞竝致仕制

敕某等。濩落暮年。間關常選。及此疲薺。願從歸休。意有嘉其自陳。禮難強其不及。聽還所任之政。兼圖旣往之勞。洗馬進聯。上庠丞秩。且旌沿牒之久。足慰挂冠之歸。

高牧可太子洗馬徐渥可守祕校竝致仕制

敕某等。調集中銓。參承列掾。或已及皓首。或稍厭折腰。竝附郡郵。願謝曹事。有嘉知止。用示寵甄。儲禁洗馬之榮。祕丘抱槩之美。式光歸志。宜體優恩。

劉忠信可太子中舍人致仕制

敕某。本治曲臺之經。屢更大選之集。衰遲已至。疲薺自言。願解一同之章。尤從三徑之適。嘉其審分。寵乃謝歸。進朝秩于奉儲。致官勞于娛老。

李備可太子中舍人致仕制

敕某、久從銓唱、參預賓籥、稍疲管庫之勞、且有挂車之請、少盡風力、老歸丘樊、宜錫寵恩、以娛晚志、擢參儲案、進服朝闈、足爲里閭之華、尙從廩稍之急、

艾介石可太子中舍人致仕制

敕某、早集選部、晚至綱曹、自陳年疾之餘、不堪官使之劇、願從謝事、當有推恩、特升儲案之華、用爲家閭之寵、姑從所欲、勉務自將、

楊令望可太子中舍人致仕制

敕某、少壯服官、衰遲作掾、能知經禮之訓、願謝紀綱之勞、止足可嘉、歸休宜寵、用冀宮坊之秩、往爲里閭之榮、佚老在茲、祇命無忽、

張隨可太子中舍人致仕制

敕某、本階經術之進、歷趨選集之勞、比至都綱、則已皓首、乞身有請、謝事爲高、用遷儲案之華、以慰里閭之式、尙思佚老、當體推恩、

孫可度可太子中舍人致仕制

敕某、爾少壯服官、久間關於銓集、衰遲仕郡、尙黽勉于綱曹、居多几案之煩、自陳齒髮之邁、願還初服、且寬至誠、

姜湛可太子中舍人致仕制

敕某、本由治經。早預從政。甫備列卿之屬。且蓋外局之煩。引疾自陳。謝事爲請。宜從藥石之便。難勉筋力之爲。寵以儲僚。慰其暮齒。尙勤補助。當體寬優。

韓松可太子中舍人致仕制

敕某、爾身爲絳簿。籍在銓流。已過亥人之年。頗嗟離盡之日。能自言于州郡。求歸老于田園。宜進奉儲之華。以爲挂冕之寵。足榮故閑。且慰頽齡。

趙維可太子中舍人致仕制

敕某、奮由一經。困於久宦。遠任州綱之劇。自陳年老之衰。求解所官。且還初服。能遵經禮。宜有朝恩。升儲禁之爲僚。寵家園之佚老。尙勤補助。往體寬優。

孟朝宗可太子中舍人致仕制

敕某、少超選格。晚至州綱。展公力而弗遺。佩官箴而無缺。自陳衰齒。求謝劇曹。審分可嘉。歸休足樂。宜進承華之秩。用爲故閑之榮。往服寬優。自從頤養。

張正可太子中舍人致仕制

敕某、治經中科。沿牒署令。久預銓流之集。自陳年力之侵。願解縣章。求返初服。愍輸勞之且久。在知止之可嘉。宜升窳于宮坊。俾增榮于家墅。

鄭崇德范振竝可太子中舍人致仕制

敕某等、進升仕塗、淹移銓序、或爲列郡之綱紀、或寄大邑之弦歌、竝迫暮年、自陳老病、愍驅馳于職事、聽頤養于精神、寵僚選于承華、服朝榮于故閑、用光晚節、當體優恩、

李逢可太子中舍人侯允恭可祕校竝致仕制

敕某等、或治經服官、或入訾署吏、亶無遺力、咸有積勤、至列郡之紀綱、任詞曹之參佐、自陳暮齒、且白髭、病難強、沒階之趨、願從挂冕之逸、特升僚于東禁、用試秩于祕丘、以慰歸與、且嘉勞止、

趙穆可太子中舍人馬宗諒可監丞竝致仕制

敕某等、除吏且久、秉事亦勞、尙滯中銓、俱以皓首、能量己分、自白齒衰、願辭印綬之勞、得從井臼之逸、聽謝官守、仍寵朝榮、秩以儲僚、丞之學省、俾茲燕適、往服寬優、

蘇維岳王敏竝可太子中舍人李克明可國子監丞竝致仕制

敕某等、早集大選、參服外勤、仕至右曹、長于劇邑、或引年知止、或援疾自陳、願歸休于田廬、求謝去于州縣、咸從今欲、併敘往勞、秩以奉儲、丞于太學、慰茲遲暮、便乃養頤、

韋陟可祕書丞致仕加上輕車都尉制

敕某、朕赫咎拜貺于郊、覃渥在位、爾時謝事、法當推恩、渙號早行、餘澤未究、宜遷勳級、用信教條、就虔吾恩、且慰而志、

呂佐可衛尉寺丞致仕制

敕某、粵從版授，真勾簿稽，以侵西夕之年，頗歎東隅之失，願還官事，歸老家園，特優列寺之丞，且慰挂車之意。

楊贄可衛尉寺丞致仕制

敕某、補吏以訾，上言稱疾，求謝遠方之牒，願挂下澤之車，用遷衛府之丞，俾就家庭之佚，聽而輔養，體我寬優。

孟元亨可大理寺丞致仕制

敕某、早趨選集，晚滯勾稽，自陳衰老之侵，且有乞身之請，嘉其知止，寵乃歸休，用升廷尉之平，以慰南岡之步。

皇甫采可大理寺丞致仕制

敕某、早集銓流，晚爲郡掾，不憚斗筲之役，頗用簠簋之修，自白暮年，願返初服，宜承棘路之授，且寵華門之歸，當服寬優，往從怡適。

吳旦可國子監丞致仕制

敕某、爾早集都銓，纔至諸掾，揣齒然之衰幹，識知止之大方，乞骸以歸，稅駕良善，宜寵上庠之秩，以爲舊社之榮。

鄭有斐可國子監丞致仕制

敕某、早從調集、晚滯勾稽、自陳齒髮之衰、願謝簿書之役、服勞有自、知止足嘉、用丞庠學之榮、俾遂丘樊之適、尙續以廩、勉修于家。

張太一可國子監丞致仕制

敕某、少壯從宦、遲暮倦游、來辭下澤之勞、願從初服之逸、進丞學省、參列京司、俾藥石之善持、聽丘樊之自便、往究餘齒、當體至恩。

石待問可太常博士致仕制

敕某、早以敏文、階于俊選、中嬰廢免、再用敍收、遂班文石之朝、已迫虞淵之景、進趨良苦、疲齒可矜、以其早會先朝、嘗承大對、特升司蒞之局、用光挂冕之歸、往服優恩、以究餘齒。

趙真卿可大理評事致仕制

敕某、嘗任勾稽之員、坐受雇更之入、自罹廢免、尋命敍收、掾于嶠南、辭以親老、來謝官使、願從家居、尙矜造士之餘、特寵法卿之屬、勿忘奉養、當體寬優。

翁詭可和州司馬致仕制

敕某、早入銓流、適隨掾牒、附郵引疾、謝事乞身、聽解網曹、卽授上佐、仍優廩給、當識臺恩。

吳高可撫州長史致仕制

敕某、少隸牙門。晚有班籍。以年力之疲曳。愍王事之驅馳。卽其本邦。授以上介。俾從安逸。當體寬優。

穆介可華州長史致仕制

敕某、早直祕寢之聯。嘗贊禁關之謁。中因罷黜。尋復甄收。自陳年力之衰。願謝斗筲之役。特優上介。當體寬恩。

李仲連可左清道副率致仕制

敕某、前朝近支。南國餘胄。早有庭臣之籍。比乘使者之輶。煩局所更。敏用無滯。自陳年疾之替。願辭時使之勞。副東京二率之聯。參屬官四品之列。嘉其知止。慰乃養病。尙體寬優。勿忘輔助。

張保和可右清道率府副率致仕制

敕某、名存班籍。年合禮經。能省己以自陳。願乞身而待盡。嘉其知止。率以副員。尙爲逸老之榮。往欽從欲之惠。

姚可久可左監門衛大將軍致仕制

敕某、執技以進。歷稔且長。嘗首太醫。邁正諸使。比閱奏封之上。自陳年力之侵。願謝見官。良合古誼。俾升環衛之列。仍假折衝之名。當體寬恩。以從佚老。

宋榮可左屯衛大將軍致仕制

敕某、早縻勇爵。嘗當軍鋒。奮士戶之積勞。用邊關之勤略。寘諸環衛。秩以折衝。自陳年力之衰。不任軍旅。

之役願謝時使。得從家居。閱煩宿衛之勞。聽遂燕申之適。益升屯衛。當體寬優。

錢子穆可左監衛將軍致仕制

敕某。服在內聯。綰于外務。繇然疲役。迫是暮年。因郡邸以爲言。求家園之佚老。聽還時事。尙寵衛屯。往服寬優。自勤納養。

耿從政可左領軍衛將軍分司南京致仕制

敕某。領使親宅。典戎近藩。早稱幹能。比更委使。閱奏封之來上。陳老疾之侵衰。願解兵防。乞分留務。愍年力之少盡。勉醫藥以自持。進升環尹之名。關領別京之衛。仍愈子舍之請。就卽縣齋之安。當體至恩。以究遐福。

陳允恭可左監門衛將軍致仕制

敕某。中預禁聯。外監屯旅。當番禺之卑溼。若毒霧之薰蒸。重隄成痾。步趨難力。表解近墀之職。言求環衛之名。願尋疾醫。且謝時事。竝愈所請。勉務自持。

柴貽憲可左驍衛將軍致仕制

敕某。世承累組之華。朝賴敏材之用。籍使聯之舊。早服禁嚴。司邦憲之平。屢當審克。頗著平反之效。稔聞幹裕之聲。衰疾自陳。歸休爲請。特優環衛之秩。用適燕居之宜。尙體曲恩。往怡晚節。

劉吉可右領軍衛將軍致仕制

敕某、少壯駟馳、晚暮疲曳、尙有最凡之目、未經甄陟之科、自陳齒衰、求謝官使、有嘉知止、爲敝前勤、優升拱衛之名、寬賜燕申之適、悉從爾欲、尙服茲榮、往遂嘉貞、益頤眉嘏。

文恭集卷二十一

外制

皇姪宗鼎可贈邠州觀察使追封新平王制

敕凋落近支。感深于邦族。追加愍策。恩究于國章。某信厚存誠。溫恭表質。克稟燕詒之慶。有光敦敘之風。鳴玉奉朝。剖符領郡。願年塗之未艾。在志力之允嘉。遽感疾以歸全。爲廢朝而興嘆。特襚觀風之印。仍班析壤之圭。用昭追遠之懷。茲示飾終之典。庶幾營魄。尙識寵靈。

故太子太師致仕任中師可贈太子太傅制

敕義重股肱之虧。禮尊冕服之襚。務崇恩厚。取究哀榮。矧聞政之舊臣。早秉鈞以陪朕。乞身未幾。復魄可嗟。追懷鶴髮之良。宜厚密章之飭。具官某。體行明潔。志慮忠純。有秉彝經哲之風。兼砥節首公之操。圖其宿望。屢煩方面之行。資厥老謀。嘗預幾庭之訪。比均勞典。還守本邦。曾是壯猷。亶無遺力。來謝時事。閱煩老成。俾參綺季之游。姑逸松喬之適。遽聞薨落。良用盡嗟。睠舊人之弗忘。挹餘芬之未泯。追加宮傅之秩。增慰壙宵之靈。恩禮若茲。營魂尙識。

故四方館使新州刺史王克忠可贈引進使遙郡團練使制

敕禁近之臣。嘗經于委使。哀終之典。當厚于追襲。以爾具官某。階胄緒之華。兼器幹之敏。歷更煩局。游聘殊疆。虔使指以無違。奉官箴而有恪。晦明生疾。奄忽收神。短歷可嗟。愍章宜及。進升使範。參領軍團。庶榮厚。步之遊。尚識治朝之渥。

故洛苑使任承亮可贈正任團練使制

敕具官某。褻恤信臣。匪常于邦典。追旌死孝。用篤于人倫。以爾行義修明。材謀敏勩。入祗禁奧。屢謹畏而寡尤。外治劇煩。資恪勤而能力。侍承親疾。踰歷旬時。藥必務于先嘗。目曾無于交睫。因剖其腹。遂隕厥躬。可謂殺身成仁。舍生取義。在竭誠之足感。何與善之可疑。特厚卹章。用嘉純孝。褻進戎團之秩。申寵壙宵之遊。庶幾營魂。尚識恩禮。

故文思使遂州觀察使史崇信可贈振武軍節度制

敕親倚之臣。忽嗟于殲落。追襲之典。用究于哀榮。具官某。材則敏通。性惟謹質。給左右之事。能寡于悔尤。服內外之勞。克宣於忠力。方任能于宿衛。俄遘疾於晦明。奄至淪亡。良深悲慨。追用節旄之寵。申加印綬之榮。在恩禮而有殊。尚營魂之無忽。

故莊宅使李希及可贈眉州防禦使制

敕崇讓之風。以損己爲美。愍飾之法。用襲先曰榮。具官某。性蹈謹孚。行稱篤實。嘗歷近嚴之侍。屢更煩使。

之勞。享數弗融。殲良已久。生有慶靈之積。蔚鍾似續之良。績考以忠。在朕之在。請回遷秩之典。求贈乃親之官。美志可嘉。恤章奚愛。追升軍禦之重。集增使範之榮。尙歆予恩。往告而第。

李懷贊可贈防禦使制

敕。奉使宜勤。旣凝于前績。念勞甄往。宜賁于厚恩。具官某。性本謹良。材惟幹裕。任乃居于親信。行則寡于過尤。遘疾晦明。收神冥漠。適予心之軫恤。覽而儼之控陳。進飭臺恩。追崇使範。惟稟靈之匪泯。尙禦侮之歆榮。

贈饒州刺史种世衡可賜成州團練使制

敕。朕紀疆臣之勞。愍戎翰之逝。載加賚典。用洽至恩。具官某。深沈有謀。勁幹能力。屢奉典戎之寄。頗著憂邊之勤。館舍早捐。鼓鼙增恤。已伸刺部之贈。益峻團兵之名。魂而有靈。歆我茲渥。

宋昱可贈供備庫使制

敕。某。彞以廷臣。委之縣道。會五溪之雜種。掠數雉之孤城。能率官軍。出支賊黨。不幸遇害。遂隕厥躬。有嘉死事之忠。已舉錄孤之典。曲加贈禮。擢正使聯。恩足慰於墟冢。義亦矜于孝嗣。營魂有識。名秩是歆。

故供備庫副使李隨可贈供備庫使制

敕。某。素推溫謹。早侍禁嚴。出護外兵。甫還南服。屬嬰無妄之疾。遽興不淑之嗟。有懷恪恭。載深傷盡。特推卹典。用正使聯。歆我漏泉之恩。慰而游岱之魂。

鄧惟素可贈供備庫使制

敕某、恩以恤往者、愛之殊、仁不遺舊者、厚之至、以爾夙將謹力、逮事儲坊、奉頤旨而必恭、慎言慝而寡悔、援乃纂圖之慶、比參侍幄之華、尋遷隸于外庭、俾亞承於諸使、勤庸有積、命秩未優、遽聞喪逝之音、良軫盡傷之意、特正名于使範、用紀績於銘旌、尙識納言、往歆漏澤。

貴妃母夫人曹氏曾祖旭可贈祕書丞祖靖可贈祠部員外郎制

敕、崇戚畹之賢、已胙封于成國、褒祖服之美、益寵賁于慶閣、具官某、履素蹈和、含章用晦、早怡情于丘壑、弗嬰志於軒裳、善旣積於家庭、慶乃滋於宮掖、推本源流之出、恭延恩施之隆、追建禮之禋、曹疏祕丘之丞、秩用示壙宵之寵、尙歆朝綍之榮。

皇后姪女婿故西染院使劉永清可贈諸司使遙郡刺史制

敕某、夫葛藟之蔭、旣原于本宗、則葭莩之親、宜延于異數、以爾材資通敏、性尙簡溫、介諸使而有聲、幹乃局而能力、遠圖未究、壯齒奄零、覽長秋之上言、乃中宮之外屬、宜優襲恤、用厚常均、持正直于內聯、復兼榮于列郡、庸示漏泉之澤、尙慰壙宵之魂。

故貴儀曹氏可追封賢妃制

敕、存著盛閔、沒有令名、念賢善之早淪、寢逾年祀、願褒榮之須稱、益峻品儀、以爾故貴儀、曹氏、參服憲言、交修懿矩、選自元功之後、嬪於禁掖之中、逮事先朝、早從後掖、收神惟寂、緬太素之何歸、留範彌芳、藹祕

庭而未已申修茂典。追寵列妃。用昭恩禮之殊。且旌才德之茂。惟淑靈之未泯。尙名號之是歆。

宜州刺史宗寶故所生母任氏可追封縣君制

敕。朕厚人倫之風。篤戚藩之愛。飾終有典。教孝爲宜。具官某。故所生母任氏。蹈履柔風。誕育宗子。曾享年之弗永。何先露之易零。大宗以聞。近支有請。宜疏名邑之贈。以慰寒泉之思。沒而尙靈。歆我朝寵。

德妃姪亡妻張氏可特追封郡君制

敕。某妻張氏。誕生慶閭。蹈履柔風。早歸舊德之門。嘗疏名邑之賦。稔彰淑哲。驟委韶華。託屬列妃。實有葭莩之戚。祈榮望郡。用開湯沐之封。式示愍章。且旌婉範。庶幾近魄。祇服追恩。

觀文殿學士尙書右僕射賈昌朝曾祖緯贈太傅可贈太師制

敕。人乃本于祖。郊以饗夫帝。故朕齋明肅儉。徧禠世室。淳濯祗慄。親祠泰壇。福旣降而孔皆。澤罔幽而弗暨。矧吾宰路之舊。宜伸祖服之褒。某首冠民宗。才經王體。文采表于來世。名聲動于前朝。蓋源深者流長。而德盛者慶遠。臧孫之善。乃有後昆。考父之恭。是開達者。惟燕詒之醲德。挺端右之令孫。光輔本朝。早追崇于前傅。會成熙事。用進陟于維師。寵乃曾門。優我時德。宜肅將於鬯酒。往祇告於文人。

觀文殿學士尙書右僕射賈昌朝曾祖母魯國太夫人栗氏可追封燕國太夫人制

敕。王假有廟。能享親以厚先。禮行於郊。大報天而尊本。極幽明之際。充覆燾之間。竝祝美祥。畢覃惠澤。矧惟舊德。懷乃先慈。宜更大國之封。以爲曾廟之寵。某氏出高華之胄。歸盛德之門。居穆言容。動循法度。服

共儉之訓。中饋是虔。垂賢善之風。後昆以大。時予舊宰。惟爾令孫。材居國棟之隆。慶表里門之盛。是宜象服。遂荒大東。會成報本之儀。益進追先之典。采蘋之詠。早契召南。析木之津。抑惟燕舊。申昭異數。尚賁淑靈。

觀文殿學士尙書右僕射賈昌朝曾祖母崔氏可追封秦國太夫人制

敕。郊以報其本。故高燎用升。恩以究于下。雖重泉無漏。所以承天地之竝貺。昭人祇之普施。矧吾舊德之宰。有懷曾妣之慈。宜厚飾恩。用追來孝。某氏挺生名閥。作配宗公。循召南之國風。能承先祭。佐夫人之家事。罔間內言。貴範留芳。後昆滋慶。令孫嗣服。曩時相予。嘗稽舊典之文。已進小君之號。屬成熙事。益舉顯章。介于山東。齊爲成國之大。胙夫關內。秦蓋故都之雄。尙歆加地之恩。彌篤高閥之祐。

觀文殿學士尙書右僕射賈昌朝祖璉贈太師可特贈中書令制

敕。昭孝息民。禮莫大于郊廟。保姓受氏。德必本于宗祧。熙事遙成。愷澤均被。惟中臺端右之重。資大門慶善之餘。用峻朝榮。聿崇人本。某深中直質。強學敏文。早彰秉德之彝。弗更爲善之度。行高前世。惜人爵之未充。慶在後昆。果棟臣之間出。謨謀三事。儀長百僚。勳用績祖之文。已寵維師之位。屬成大報。會泛茂恩。申納內史之書。進崇右相之秩。鳳池益貴。鱣序增華。尙歆告第之恩。足慰佳城之魄。

觀文殿學士尙書右僕射賈昌朝祖母胡氏可追封魏國太夫人制

敕。朕飭齋輅。祇見于清廟。備法物。肆類于后土。德產之致。精意以享。尊大道。配嚴祖。所以明事上之禮。敦

天下之孝。既翁受元祉。則敷施惠澤。不獨專卿厥美。亦使褒優其先。况我大臣。敢格舊典。某氏出高華之胄。歸名勝之門。躬四德之賢。少服從于姆教。經二物之善。早輔佐于君子。遺風尙穆。來裔寔昌。燕翼有孫。元者在望。彝正名于巖阿。已錫號于參墟。澤旣漏泉。禮宜加地。晉之始賞。魏則大名。參稽于朝。進胙而國。益峻褒封之典。尙祇渥茂之恩。

觀文殿學士尙書右僕射賈昌朝父注贈太師中書令特贈兼尙書令制

敕。朕裸于禰室。明發有思。郊于泰壇。升侑如在。惟天人相與之盛。有臣工協贊之美。言念乃考。豈不爾懷。矧吾揆路之賢。早承家廟之祀。宜褒先正。用峻追章。具官某。學洞本元。行中儀表。早振端朝之譽。蔚懷表世之文。藏用弗伸。早鬱王官之次。乃終有耀。挺生時棟之材。冠別殿之儀形。席文昌之端右。朕所體貌。爾有慶靈。爰當圖任之辰。已峻褒封之典。錫之右相。崇以維師。屬郊報之修成。在國章之洽舉。益進中臺之令。申賁壙宵之遊。彌表顯于家閭。尙欽祇于朝寵。

集賢相宋庠曾祖駢皇贈太傅可贈太師制

敕。朕攷慎才傑。緝熙政謀。得詩雅巖巖之瞻。屬以時柄。用春秋尊尊之誼。褒厥曾門。所以崇立輔之儀。厚追遠之典。具官某。曾祖某。履和含正。厚德秉彝。服展季之小官。恬弗以怪。韞次公之遠業。鬱未及仲。慶乃垂于後昆。時則生于上哲。屏藩左右。馮賴謨謀。彛總幾庭。已峻褒先之典。今升宰路。益疏進等之恩。賁寵維師。增榮私廟。往修一卣之告。尙歆八命之章。

集賢相宋庠祖母王氏可追封齊國太夫人曾祖母丁氏可追封魏國太夫人制

敕、夫孝必務于本。禮不忘其先。朕選棟材之隆。任以台宰。圖曾世之懿。峻厥儀品。雖褒賢之禮優。亦本祖之義著。具官某。曾祖母某氏。賢明異稟。法訓躬行。修祭職于采蘋。承其先祖。泣報囚于丹筆。裕乃後昆。時惟哲孫。都我茂宰。前陪樞幄之論。追用密章之褒。名爵既新。湯沐宜鉅。進胙東齊之壤。升優全魏之名。滋寵營魂。尙識恩禮。

集賢相宋庠祖母贈太師可特贈中書令制

敕、朕選有德。相大政。惟是名數之重。進都巖廊。則宜爵命之加。併崇祖廟。示慶源之所本。亦褒典之攸先。具官某。祖某。蹈道淳深。詒謀清白。浚都之賢好善。世則有聞。太丘之德可師。位曾未達。遺恩在物。留慶鍾孫。挺生時棟之材。進膺袞路之拜。用乂于我。實惟爾先。邁種之美所滋。裕後之祥乃茂。昔樞柄之云總。已賁維師。今鼎席之是居。益兼右相。褒榮偕峻。慶靈弗誣。歆此納書。保爾顯閔。

集賢相宋庠祖母賈氏可特追封楚國太夫人制

敕、亮天工者。政之先。尊人本者。義之率。惟國爵之重。彌大于孫謀。則家廟之榮。益延于祖配。所以厚民風。而昭國體也。以爾具官某。祖母某氏。賢有至行。穆著柔風。作合名門。盡虔共中饋之美。交修善道。得輔佐君子之宜。覆育垂慈。燕詒著慶。惟孫經哲。若時奮庸。進增湯賦之名。升薦密章之刻。句吳已寵。全楚用荒。尙歆告第之榮。益右充閭之美。

集賢相宋庠父玘累贈中書令兼尚書令追封榮國公可進封鄭國公制

敕相王室者德之盛。尊者廟者孝之隆。惟慶源之深長。則靈氣之回復。時乃冢嗣。柄吾大鈞。屬當贊策之辰。爰與納書之典。恩禮須究。名數乃宜。具官某。父某。位不配才。性惟合道。誠心恕物。仁何止于放廢。陰德在民。慶乃昌于納駟。挺生良器。用乂本朝。勳總率于繁機。已進襲于先烈。三師升冠。二令兼榮。今膺拜于文昌。益進疏于大國。遂荒原武。寔曰陪京。彌昭爵命之崇。滋厚烝彝之薦。尚歆禰室。益右慶門。

集賢相宋庠母王氏可追封越國太夫人母高氏可追封漢國太夫人母王氏可追封秦國太夫

人母朱氏可追封燕國太夫人制

敕巖路延登。有國繫其弼亮。親廟崇飾。故事著于追襲。誼惟繼嫡之均。時乃寵靈之洽。具官某母某氏。柔明著範。淑哲含風。以門閥之華。來嬪盛德。因圖史之訓。居法憲言。存著善猷。沒章遺懿。右乃哲嗣。踐于中階。妥當枚卜之初。彌積先慈之感。愍章前峻。胙典益加。攷按輿地之圖。進崇大國之號。用昭慶善。胥示恩榮。庶幾原烝之靈。尚識治朝之渥。

集賢相宋庠母鍾氏可追封晉國太夫人制

敕任天下之重。國以賢爲本。稽內治之則。母以子而貴。況存著慈範。而挺生傑才。時則相予。慶緣裕後。宜舉追襲之典。用旌賢善之風。具官某母某氏。出高華之門。蹈柔嘉之則。來儀名閥。承訓大家。間于兩社之占。實在哲輔。徒乃三鄰之學。遂躋大儒。屬當肇位之升。倬冠烝髦之首。粵從樞筦。入正台階。載崇陪幄之

聯。彌動累茵之感。褒章前峻。淑德益宜。進胙參墟之封。增昭親廟之懿。厥靈不泯。茲渥是歆。

吏部侍郎同中書門下平章事文彥博曾祖崇遠贈太保可贈太傅制

敕。朕崇饗九房。昭孝萬寓。馨香格于上下。德罔弗歆。恩施浹于幽明。仁斯爲盛。乃瞻同寅之輔。裁成右饗之儀。申飭愍章。褒崇曾世。具官某。素風傳世。美德在躬。行固重于本邦。位不配于高行。前言多識。被河汾舊學之資。惠政所孚。留蒲宓字人之愛。實啓貽孫之慶。孚膺上相之求。自甫正于中階。已迨甄于上袞。熙成有典。覃施及先。益尊帝傅之名。用厚台臣之數。慶餘所復。歆告其承。

吏部侍郎同中書門下平章事文彥博曾祖母宋氏可追封魏國太夫人制

敕。朕以孝饗熙成。靈恩均被。禮柄臣之重。旣孚號于大庭。尊曾妣之慈。復納書于私廟。具官某。曾祖母某氏。柔儀異稟。淑德少成。本育粹于名宗。早來儀于慶閼。躬采蘋之法度。先祭是承。茂來葉之燕詒。後昆以裕。令孫挺出。上宰冠居。薊膺枚卜之求。已攷胙封之典。逮茲均施。益用追先。俾來輿地之圖。優封大國之號。采章兼飭。名數載加。尙淑魄之有知。歆愍章之旣渥。

吏部侍郎同中書門下平章事文彥博祖銳贈太傅可贈太師制

敕。朕宗祀五室。合祛三神。廣蒸蒸之風。參侑于祖考。推尊尊之誼。施及于臣鄰。用加惠于大門。示本恩于上相。具官某。祖某。循持雅行。惠迪善猷。自州壤以推風。繇家庭之儲祉。孫謀詒厥。資狐突善教之忠。達者興焉。賴考父滋恭之德。若時茂宰。惟乃哲孫。早序正于台聯。嘗追崇于保訓。禮成宮廟。慶洽天人。益峻三

師之名。用厚九原之飾。惟慶靈之回復。尙營魄之歆承。

吏部侍郎同中書門下平章事文彥博祖母王氏可追封越國太夫人制

敕、朕追正郊宮之饗。涓成陽館之祠。秩上下以承神。通幽明而宣澤。發于膚寸。漏及重泉。矧吾邦宰之賢。有懷祖廟之配。曩慈所裕。愍飾宜加。具官某祖母某氏。淑哲成風。賢明可範。服箴圖而無斃。循法度而弗違。作合令門。穆嬪風而彌婉。詒謀後世。階慈訓以寢昌。時惟令孫。持我魁柄。自發揚庭之號。已施飾壤之封。賁象服之遺榮。申密章之時告。屬茲成饗之慶。永言來孝之追。覆按典圖。進荒土宇。增衍采章之等。究宣恩數之榮。燭于壙宵。歆我朝範。

吏部侍郎同中書門下平章事文彥博祖母郭氏可追沂國太夫人制

敕、祀者國之大事。孝者人之至德。明發齋栗。崇嚴配于合宮。滲漉涵濡。漏愍恩于幽窆。瞻言巖宰之重。有懷王妣之慈。稽若舊章。敷于異姓。具官某祖母某氏。族惟甲冠。德本柔嘉。啓遇觀之祥。占歸于夫子。積詒孫之善行。裕我弼臣。比膺注意之求。已飾追先之範。逮茲宗祀。覃及慶靈。益進胙于土田。用申昭于家廟。飾之象服。正以采蘋。惟營識之未淪。尙采章之歆受。

吏部侍郎同中書門下平章事文彥博父洎贈太師可贈中書令制

敕、德之醜者。榮裕于來裔。孝之大者。光昭于前人。朕卜季商。緒正宗祀。哀對六天之大。升侑三后之尊。孰相邦儀。時我巖弼。輔成世宗之享。厥有茂勳。申慰考服之恩。宜覃殊典。具官某父某。體仁居厚。尙德秉彝。

惠和濟賢者之風。敏達擅吏師之望。壯猷早謝。惜高位之弗躋。陰德所覃。宜後昆之滋大。蔚興世嗣。光輔朕躬。命爰立于巖廊。敕追甄于禰室。拜以三師之衰。刻諸八命之章。屬慈祀之均休。厚愍恩之追遠。益進鳳池之貴秩。用昭鱣序之慶靈。尙歆右相之榮。當識上台之渥。

吏部侍郎同中書門下平章事文彥博嫡母耿氏可追封秦國太夫人制

敕。朕將饗合宮。先格大室。旣虔鬱鬯之禋。還奉蒼璧之祠。妥侑尊嚴。用度人倫之孝。協共顯相。則繫邦宰之忠。永言顧復之恩。宜厚追褒之典。具官某母某氏。高華著族。柔正合章。賢德式于六嫔。嬪風經于二物。輔佐君子。尊四教之善言。誕育名臣。被三遷之慈訓。芳猷早閱。懿範彌昭。慶在身支。任居肱輔。惟亮工之攸賴。本諸祉之所滋。爰當正袞之辰。尤動累茵之感。追賚采芻之號。進加析壤之封。時享輔修。孝思增積。稽若朝範。刻用密章。胙茲土宇之美名。賁乃笄珈之盛飾。惟淑靈之匪昧。尙華渥之是承。

參知政事高若訥曾祖諭贈太子太保可贈太保制

敕。國家優于用賢。篤在教孝。故二府登仕。旣馮賴于猷爲。而三世追褒。必究極于恩禮。所尊人本之重。宜厚國政之咨。具官某曾祖某。節峻丘園。風行州壤。眷懷賢業。道不濟于當年。詒燕善謀。慶則蕃于來世。纘乃祖服。時惟孝孫。選自內樞。參我中鉉。勳以東宮之二品。舉用追章。今以天子之三師。升加愍冊。且明有德之後。式表褒賢之先。尙而靈承。虔我賁寵。

樞密使高若納曾祖諭贈太傅可贈太師制

敕國家置使典樞本兵總務重茲時柄之委厚有曾世之襲抑乃舊章斯謂殊典具官某曾祖某仁爲己任德秉民彝庶仕爽于生前餘慶滋于身後令孫載誕近弼是登寔資陪幄之謀用翊包戈之治載稽往策已賁上公益先本祖之圖彌進維師之重密章以刻鬱鬯是承庶幾私廟之靈尙識治朝之渥

參知政事高若納曾祖母王氏可追封祁國太夫人制

敕朕圖政軸之貳錄曾世之慈旣進律而熙朝卽納書而告第所以推迹先懿歸厚時風具官某曾祖母某氏柔範夙成善猷祇率族則衣冠之舊言惟圖史之箴正宗事是聿修垂孫謀而云遠挺生良翰滋大慶閎粵從基命之司預聞本政之議褒先有典益疏湯沐之封裕後顯仁彌表燕詒之盛幽靈固在愍飾其承

樞密使高若納曾祖母冀國太夫人王氏可追封晉國太夫人制

敕國家法樞置弼陪幄議兵策旣告于大庭恩卽覃于私廟進褒會配抑著朝彝具官某曾祖母某氏特稟柔風休有懿範詒孫謀而益遠流世德而逾醞祥發本支任隆基宥先胙封于郡望已加號于小君爰當班命之辰益舉納書之典按圖輿地拓土大邦升恩數以兼常昭慶靈之滋厚往歆褒典尙識茂恩

參知政事高若納祖審劍贈太子太傅可贈太傅制

敕義率下而重禮治上而尊章德表賢旣參聯于宰路本仁厚俗必追寵于大門具官某祖某文武自將智略寡二功名爲任嘗慷慨以忘家力命難忱終咨嗟于抱器雖貴塗則爽而慶閱以興字果驗于升卿

器有踰于安國。俾若予采。入預政聞。時惟任能。禮有異數。益進上公之秩。用纘乃祖之戎。冀而神靈。祇我印綬。

樞密使高若訥祖審劍贈太師可特贈中書令制

敕。國家經武須賢。纘戎在孝。絲幾庭而進輔。必祖廟以伸褒。所以旌哲表庸。尊先重本。著茲臺範。厚厥朝風。具官某祖某。力行體仁。時中合道。恕心是廣。曾醜夷之弗爭。陰德所覃。宜昆雲之有裕。惟孫抱器。若時登樞。探觀告第之章。前用維師之衰。益兼榮于浴鳳。仍賁采于附蟬。以明達者之興。且驗升卿之効。惟光靈之所屬。尙營識之是歆。

參知政事高若訥祖母追封扶風郡太夫人馬氏可追封澶國太夫人制

敕。厚民在孝。濟政須才。選賢以父于王家。褒功迺及于私廟。朝有著典。我惟儀圖。具官某祖母某氏。柔靖自將。賢和無遂。展如姆教之率。穆然嬪則之修。慈範早淪。緒風彌劭。惟令孫之忠力。預近府之政謀。參樞柄之云初。稽納書之惟舊。衍增湯賦之數。追褒翟菲之儀。神而有靈。詔其無忽。

樞密使高若訥祖母衛國太夫人馬氏可追封魏國太夫人制

敕。義乃率于祖。仁必厚其先。乃瞻樞臣之良。有懷王妣之懿。申加禮命。洽被恩章。具官某祖母某氏。生德業之門。著柔嘉之範。共儉以承于先祭。休昌乃集于後昆。時維令孫。弼我煩務。納忠先哲。方憑賴於高謨。追遠飾終。益褒崇于愍冊。溯服章之盛節。拓土宇之優封。昨以近邦。隆茲異數。章慶源之濬發。明慈覆之

遠垂永泯淑慝同歆榮渥。

參知政事高若訥父懷謹贈太子太師可贈太師制

敕朝家任賢倚重在于開政。臣子能仕推本繇于教忠。矧自幾廷入聯宰路。宜疇陟命。益峻褒恩。具官某。父某。仁厚存誠。才明韞用。世服義方之訓。家承孝謹之風。不偶數奇。鬱胸中之素蓄。自他有耀。集身後之遺榮。是似克家。思皇生國。方均參柄之重。宜從飾禮之優。追尊上公。申賁英袞。尙虔師保之寵。往歆印綬之崇。

樞密使高若訥父懷謹贈太師中書令可贈兼尙書令制

敕教之忠者子能仕。德之盛者宗必興。眷我名臣。付畀樞柄。參攷前人之力。用褻爾室之榮。具官某。父某。稟自誠明。樂于名教。含章抱璞。惜大任之弗躋。儲慶爲基。宜高門之有開。誕生哲嗣。用父本朝。擢參宰路之聯。已厚壙宵之賁。上公極寵。右相兼榮。今進翊于萬樞。益申褒于二令。顯臧孫之有後。庶李公之弗亡。式將印綬之華。往修圭瓚之告。先于而廟。永右厥家。

參知政事高若訥母追封河南郡太夫人閻氏可追封鄜國太夫人制

敕夫名顯而滋重。則禮從而益隆。若乃繇上大夫而典極。升小司空而謀政。爵祿彌厚于己。茵鼎不逮其親。竝宜按輿地之圖。書內史之策。進疏國壤。申寵壙宵。具官某。母某氏。賢善自持。柔明有助。謹召南之共祭。穆是嬪儀。喜京兆之平反。仁于母道。克家有子。舉國曰賢。已試本兵之司。復參制政之府。往嘗追于封

胙令增賁于號榮。顯爾誕哲之祥。伸我任能之禮。淑靈匪昧。華寵當祇。

樞密使高若訥母雍國太夫人閻氏可追封秦國太夫人制

敕。國家尊樞。弼重兵柄。登進髦哲。已孚號于治庭。推本孝慈。卽班恩于親廟。矧惟妣德。宜厚密章。具官某母某氏。仁淑有儀。賢和居正。從召南之百兩。作合名門。卜孟氏之三隣。勗成大器。陟岵之哀。遺遘累茵之感。彌深。自巖坐之參升。已陰堂之追飾。錫土山于成國。賁車服于小君。屬進總于繁機。爰申加于愍冊。紹開廣宇。改胙大邦。具慰寒泉之思。用示蓼莪之報。庶幾營魄。尙識寵榮。

右諫議大夫充天章閣待制兼侍讀張揆弟京東轉運使兵部員外郎集賢校理揆父蘊尙書司封郎中可特贈光祿卿制

敕。朕肅若舊典。祠于明堂。配侑盡誠。永懷三后之烈。褒榮追禮。覃及百工之親。矧吾從臣。兼相儀蒞。瞻言考服。宜厚恤章。具官某。宅性惠和。德基憑厚。位不配于高行。慶乃裕于後昆。挺生似續之良。馳稱競爽之美。敷經便閣。膺選才林。能仕本于教忠。善繼彰于錫類。愍恩所飾。故事當優。增賁列卿之名。昭示治朝之法。幽冥匪昧。滲澤其承。

文恭集卷二十二

內制

皇兄允弼特授依前檢校尚書右僕射充寧國軍節度使同中書門下平章事北海郡王加食邑一千戶實封三百戶仍賜推誠保順亮節守正翊戴功臣制

門下稽若先王制茲大禘謂四時之常祭未極孝思約一閏之小成誕爲精享朕詳按舊禮攷卜孟冬駕言屬車登享祖廟行朝踐之禮歌長發之章惟時親賢預我祠祀盡肅雍之美同悽愴之懷亦旣解嚴宜有褒賞用敷渥典式告大廷具官允弼地則茂親時惟明德繫二南之化躬兩漢之風表儀王家有嚴重之質導訓宗子得祇穆之和兼徵台司開賦王社宿邸彌謹奉朝滋恭而自先甲肇禋申嚴始事率郇滕之諸國逮魯衛之密親侍齋幄之深從昭鑾之近太室戾止廣樂繹如奉亞禩之升極其恭志正赤鳥之履亶無流心祖宗格思祝嘏告止歆乃孝享賜朕祥釐膳肉是頒用先兄弟之愛勞酒斯舉以澤公侯之勤優衍采田益疇眞食仍加功號之美竝昭名數之華國典攸宜家情允洽於戲同寅恤祀旣獲無疆之休夾輔慎徽益保有終之吉往欽厥命永孚于休

除皇弟允初特授特進依前檢校尚書右僕射使持節耀州諸軍事行耀州刺史兼御史大夫充感德軍節度使耀州管內觀察處置等使加食邑七百戶仍賜推誠保順翊戴功臣制

門下、百世必祀。德厚者流光。三歲乃祫。文繁則禮縟。朕訓四海之孝。合七世之靈。因時永懷。備物親享。禋容粲若。寶鎮在焉。來九服之朝。用六代之樂。于時藩岳伯舅。二三弟兄。助祭在茲。侍祠有恪。嘉饗云究。慶賜遂行。具官允初。體韻詳和。性質淳固。本賢王之後。資聖源之先。遙制侯藩。委高牙之重。留宿京邸。奉介圭之朝。能慕善猷。綽有淑問。自祖宗之講祀。由奉常以肆儀。結佩入齋。展幹從蹕。清廟在望。極駿奔之恭。朱芾侍祠。有肅雍之美。朕以皇祖右饗。大嘏告茲。熙事備成。景福來格。還衡肆眚。進律疇庸。乃眷戚藩。益開土宇。仍進表功之號。更升躡等之階。恩禮之隆。固先于異姓。名數之懋。滋表于辱親。於戲。承積累之祥。膺節制之重。齋祠參奉。靈寵洊加。益慎爾猷。往服朕命。

除皇弟允良持授特進依前檢校司空同中書門下平章事使持節鄭州諸軍事行鄭州刺史華

原郡王充奉寧軍節度使鄭州管內觀察處置河隄等使加食邑一千戶仍賜功臣制

門下、朕沿康復之慶。薦昭報之誠。合祀乾祇。大陳牲玉。先期祓乎路寢。申詔約乎郊丘。禮文昭明。儀體簡大。既執量幣。獲侑祖宗之靈。復因祭膳。以親兄弟之國。蓋合揚于貺施。用均布于福釐。矧堯之變時雍。始于敦族。而周之厚民德。由厥睦親。式是仁恩。揚茲慶號。具官允良。姿質淑茂。體行端莊。令問夙昭。善猷允履。戚藩云建。使節是持。按圖啓封。載擇膏腴之地。班槐就列。兼崇台宰之儀。入侍齋祠。居奉朝請。有陟恪

之敏得肅雍之和。朕享告成。爾庸惟穆。既飲斯至。乃澤厥勞。鄭伯列于近郊。滕侯先于異姓。班茲盛策。進以崇階。仍增井牧之封。益寵雲臺之號。竝爲異數。用洽至恩。於戲。訖是上儀。布茲大喜。羣工庶尹。既國典之是孚。至戚密親。在家情之允洽。益慎爾德。以對厥休。

除富弼行禮部尚書同中書門下平章事昭文館大學士監修國史兼譯經潤文使加食邑實封功臣散官勳封制

門下中樞治本。裁教化之宜。上相台光。長官師之任。用緝熙于百度。資燮正于三階。眷乃右垣。時惟哲匠。委政事而已試。攷名實以相符。誕揚大庭。付畀魁柄。具官富弼。任重道遠。性正德全。閎敏推于上才。博洽通于衆志。撓之不濁。偉量表于彌沖。簡而易從。盛業彰乎可大。首膺魁壘之舉。歷踐禁嚴之塗。蹇諤發于爾躬。啓沃盈于朕聽。繇由樞省。出殿藩房。名聲聳于遠夷。風采繫于諸夏。遂膺枚卜。實契具瞻。朝有偉人。物無異論。持重守正。參濟以和。告猷納忠。一本于治。屬以冢卿謝政。首鉉佇能。諏俊父之大臣。疇若予采。冠丞疑之上席。僉曰汝賢。是用升自政塗。處以師尹。仍進秩宗之重。復兼史觀之名。衍以優封。昭茲異數。用旌茂諒。允穆師言。於戲。播化鈞而理陰陽。操國柄而撫辰象。惟無心故能感物。惟以虛所以受人。格于太和。繫我真宰。往踐乃位。同孚于休。

除王貽永授依前檢校太師行尚書右僕射兼侍中充景靈宮使彰德軍節度使加食邑實封改賜功臣制

門下、升庸進等。蓋褒德之彝章，均逸待勞。乃優賢之茂典，眷言俊老。久總繁機，乃圖宣翼之勤。俾遂優休之請，對加尊秩。改治靈宮，詎以剛辰。告于列位，具官王貽永。志懷明勸，識宇沖深。逮事及于先朝，得尙榮于舊館。用絳侯賢子之譽，入纘世功。以征南武庫之才，擢居師列。粵予紹宅之始，嘉乃榦方之能。召置機庭，掌我兵柄。周旋一紀，密勿萬微。慕安世之典機，本于周慎。猶韓增之領事，濟以寬和。又牧政而修明，總武經而練達。納忠匪懈，宣力罔遺。遂兼台階，仍冠樞席。常益附蟬之飾，尋還浴鳳之聯。抑乃榮章，愈其謙請。式是耆良之望，深于眷倚之懷。比閱封章，聯辭機劇。敍晦明之嬰恙，因夙夜之肆勤。閱茲高年，累以煩事。聽還溫省之務，特寵殊庭之名。益升右揆之崇，復兼常伯之重。進褒功之美號，拓衍食之優封。有嘉舊勳，益昭異數。於戲，臣鄰之際，貴保于初終。進退之間，思全于休美。勉綏遐福，尙佇敏謀。

除張堯佐特授光祿大夫依前檢校太保宣徽南院使淮康軍節度使加食邑實封制

門下、祇修郊報。夙奉廟昭，告虔前人。裸鬱香之酒，大旅上帝。颺樞燎之煙，餽食洽于羣神。助祭來于四海，神人感悅。福嘏昭通，樂與臣鄰。均茲休祐，瞻惟近職。時乃內徵，亟酬從蹕之勞。參錄陪祠之勳，用頒慶賜。式示寵優，具官張堯佐。履尙淑均，器懷詳敏。早會右文之治，夙馳居業之稱。發策俊廷，膺斂才之高選。振纓公路，達從政之大方。寢服近嚴，稔更內外。委典京之尹任，峻司會之使名。總治要煩，滋見計籌之善。參圖勤濟，進聯徽鉞之崇。有若孟津，亶爲巨屏。陪我京室，控于河橋。用繫帥節之行，出委戎翰之近。憑熊成治，卓馬來庭。通文石之內朝，進班邈列。陪甘泉之法從，預相緝儀。志力允嘉，事爲咸濟。遠端門之遠軫，稽

大寢之策勳。崇以階聯。拓茲井賦。允爲異數。用示澤勞。於戲。郊爲國之上儀。有繫敷贊。賞乃朝之茂典。敢廢舊常。往服褒嘉。勉思欽慎。

除曹佾特授依前檢校尙書左僕射充保靜軍節度使加食邑制

門下。朕。夤。嬰。機。務。稍。煩。神。明。遂。滌。慮。于。大。庭。乃。味。道。于。虛。室。吉。祥。來。復。剛。健。無。虧。開。懌。羣。臣。慰。安。億。姓。蓋。二。儀。之。相。沖。子。乃。三。后。之。翼。曾。孫。惠。我。壽。康。繫。茲。保。佑。乃。嚴。祕。寢。合。祀。大。神。以。對。越。于。天。休。用。敷。錫。于。朝。慶。藩。岳。以。職。而。來。貢。臣。工。執。事。而。有。嚴。自。齋。濯。以。潔。誠。逮。瘞。燔。而。訖。事。禮。容。疊。穆。氣。象。晏。溫。驗。休。證。之。著。然。宜。祥。釐。之。錫。爾。眷。言。侯。度。用。舉。寵。章。具。官。曹。佾。識。局。夷。通。志。懷。敏。劭。夙。稟。德。門。之。慶。蔚。爲。戚。晚。之。華。入。義。府。以。敦。詩。時。惟。良。帥。登。太。常。而。紀。績。世。著。大。功。無。亞。夫。貴。倨。之。風。有。陰。興。謙。退。之。行。居。則。以。列。侯。而。就。第。善。不。近。名。出。則。以。良。翰。而。守。藩。達。于。從。政。近。易。東。秦。之。節。俾。臨。舊。許。之。邦。撫。是。寰。封。陪。茲。京。室。命。書。甫。降。祀。典。告。成。蓋。圖。守。屏。之。勤。參。錄。充。庭。之。上。衍。封。爾。宇。加。惠。于。朝。進。以。茂。勳。疇。其。眞。賞。孚。乃。王。庭。之。號。用。爲。侯。服。之。光。於。戲。賞。以。勸。其。功。祀。以。報。其。貺。惟。前。人。之。烈。已。頌。誓。于。河。山。惟。後。昆。之。賢。復。續。戎。于。茅。瑞。往。服。慶。賜。勉。思。忠。規。

除張茂實特授依前檢校工部尙書充寧遠軍節度使勳封食邑制

門下。朕。夤。以。日。中。聽。政。夜。分。觀。書。雖。禹。湯。求。理。之。心。未。嘗。敢。怠。而。黃。老。養。性。之。術。頗。有。所。虧。賴。穹。厚。之。惠。康。蒙。宗。社。之。敷。佑。善。氣。來。復。吉。履。以。強。恭。卽。路。朝。述。修。祀。事。以。虔。大。報。用。答。元。祺。藩。岳。底。貢。而。畢。臻。神。祇。

呈。祝。而。胥。穆。薦。享。之。夕。儀。物。粲。然。丹。燎。告。升。休。景。彌。燭。策。勳。有。典。頌。胙。著。文。眷。言。戎。翰。之。臣。用。孚。庭。號。之。慶。具。官。張。茂。實。誠。節。果。壯。志。度。深。沈。濟。美。本。于。勳。良。好。謀。通。于。奇。正。習。安。邊。之。將。略。善。于。拊。循。佐。絕。域。之。使。才。得。其。要。領。以。忠。謹。之。操。入。衛。于。巖。廬。以。武。毅。之。風。出。分。于。制。轂。牙。旗。云。建。師。律。有。嚴。十。國。爲。連。析。普。寧。之。奧。壤。萬。夫。觀。政。殿。上。黨。之。強。藩。封。守。以。安。方。貢。惟。謹。適。成。熙。事。均。賦。祥。釐。參。澤。內。外。之。勞。昭。示。幅。員。之。慶。時。惟。良。帥。崇。以。勳。名。仍。開。衍。食。之。封。益。示。陪。敦。之。寵。茲。爲。異。數。式。顯。茂。功。於。戲。邦。國。用。光。天。人。助。順。康。哉。之。慶。豈。獨。在。予。霈。然。之。恩。庶。均。維。屏。往。服。茲。寵。益。慎。爾。猷。

除李昭亮依前檢校太傅同中書門下平章事充景靈宮使昭德軍節度使制

門。下。總。戎。參。鼎。兼。名。器。以。爲。榮。易。地。建。牙。處。形。勝。而。斯。重。矧。惟。師。弼。之。舊。久。莅。幹。垣。之。煩。閱。是。服。勞。嘉。茲。請。覲。俾。升。藩。于。制。閫。命。司。職。于。殊。庭。參。懋。勤。康。抑。惟。彝。典。用。頒。明。制。固。允。師。言。具。官。李。昭。亮。器。略。深。明。誠。懷。沖。厚。稟。山。西。之。勝。氣。通。圯。上。之。祕。籍。粵。自。大。門。載。忠。規。于。奕。世。眷。言。爾。考。著。勳。力。于。先。朝。稱。辛。蘇。之。將。家。爲。摯。任。之。后。族。克。生。哲。嗣。聿。濟。美。猷。亦。嘗。榦。不。庭。之。方。有。禦。侮。之。力。入。居。宿。衛。提。利。兵。而。誰。何。出。護。將。屯。領。中。軍。之。節。制。勳。釐。符。籥。之。任。就。升。袞。鉞。之。崇。逮。滿。北。門。之。更。復。委。中。山。之。鎮。苛。慝。不。作。拊。循。有。方。久。去。闕。庭。頻。移。星。歲。宜。入。奉。于。朝。請。特。申。霈。于。寵。靈。換。上。黨。之。節。旄。分。壺。關。之。茅。土。益。增。眞。食。彌。衍。采。田。俾。司。典。密。之。都。仍。踵。太。清。之。職。體。貌。惟。舊。恩。禮。攸。宜。於。戲。眞。祖。在。天。實。右。慶。靈。之。祚。瓊。宮。置。使。必。先。台。宰。之。臣。嚴。奉。在。茲。往。欽。無。忽。

除曾公亮檢校太尉充樞密使制

門下經遠慮微。必慎制兵之術。折衝消難。亦資畫策之臣。是憲樞躔。聿崇使號。蓋政謨之攸寄。匪哲哲而莫居。適得其人。誕敷厥命。具官曾公亮。風業碩茂。志慮深純。學多貫于前言。性頗修于中道。有方重之德。可以梃躁而鎮浮。有明達之才。可以造機而成務。嘗講勸于左右。亦召置于禁嚴。敷我訓言。代予明命。間請臨于襄輔。遣擢置于京師。咸有治功。遂聞政本。通明練于百物。參和穆于羣言。貳公之司。久陪于論道。內密之任。宜正于筦樞。仍加傳道之名。更益陪敦之數。崇階馭貴。真食衍封。竝示寵章。式旌殊禮。於戲。典機之任。莫慎乎微。擊柝之言。蓋取諸豫。勿謂承平之久。益思備禦之深。祇服斯言。往踐乃位。

除田況特授檢校太傅充樞密使進封開國公加食邑實封制

門下本兵近司。參置于使號。經武大柄。允屬于材賢。日圖宣哲之良。用舉正名之典。定自朕志。揚于王庭。具官田況。誠志純深。茂才冲劭。寬粟發乎謨德。博洽本乎多文。策從三道之科。置諸四禁之地。得王臣匪躬之節。有國士無雙之風。參賴敏猷。數當大任。保塞蕩平之略。鎮蜀撫循之勞。明智不疑。淵謀善斷。間亦委之大計。試以周才。迎盤錯以皆虛。彌彰利器。汰精剛而不耗。自表良金。擢典內極之繁。稔聞前箸之畫。一乃心而匪懈。研諸慮以惟微。見于忠精。竄有成績。參圖俊德。升正機庭。仍傅上公。益疇多賦。崇階是陟。異數在茲。於戲。樽俎之謀。遙制于戎落。樞機之地。上法于斗宮。勉慎乃思。以輔予治。

賜梁適特授依前行尙書禮部侍郎知鄭州仍改賜功臣制

門下褫機政之煩。均屏翰之逸。左右修輔。蓋陟恪之久勞。內外肆勤。在眷毗之一體。爰正庭號。用告朝倫。具官梁適。局致夷通。性業開爽。入我英毅之選。參于棗從之華。召自複門。侍于邇閣。預贊宰于明命。備進讀于丘墳。嘉謨納于論思。敏用彰于強濟。曷圖制閫之效。擢貳本兵之司。職典樞機。地親帷幄。亟參開于政道。遄敷燮于辰階。出入五年。周旋二府。苛慝比作。變異重仍。噴有煩言。達于予聽。曾淑聲之莫建。在清議之弗平。屢上封章。求還印綬。朕思全進退之禮。務崇始卒之恩。參錄舊勤。尙仍前秩。以春官亞旅之重。莅黃圖右壤之雄。臨長鄭人。頒錄漢詔。於戲。台宰之職。任國之綱維。寰輔之邦。陪京之襟帶。往服茲命。尙體至恩。

文恭集卷二十三

內制

除韓琦特授依前工部尙書同中書門下平章事集賢殿大學士加食邑實封改賜功臣制

門下春秋大事載合食之文建武舊儀有親祠之典朕永追來孝邈企前徽因時物成攷古禘祭具法物之駕款神祖之廷儀采焜煌牲玉純潔殊方底貢羣岳入陪誠志孚通聖靈開饗遙成熙事誕賦祥釐翼我盛容時惟茂宰爰疇爾賞式告于廟具官韓琦秉志忠純蹈道夷正居然時傑之望司我大政之均有惟深之明以通于衆志有成德之美以弼于朕躬而自孝享矢謨先庚孚號總乃容臺之議協于齋殿之恭率籲臣工拱侍裸獻明發不寐朕深優然之思醞假無言爾有顛若之色自鬱酒之云灌訖丹燎之既升率履弗違右饗如答至陽顯見積晦開消還御端門飲至大寢益以褒功之號拓茲衍食之封實賦有加異數斯在於戲相予肆祀既格于休嘉勉爾亮工益思于輔拂時惟良顯往其懋哉

除韓琦依前工部尙書同中書門下平章事集賢殿大學士加食邑實封仍賜功臣制

門下亮成天功實繫于宰職緝熙王道尤寄于賢才矧久服于機庭且周知于治體俾正中階之象用膺

次相之文。旣攷師言。復涓剛日。式揚孚號。誕告庶工。具官韓琦。志度純深。才器高妙。行足厚于風俗。言必合于典常。立于本朝。毅然懷體國之色。訪以大略。直哉有匪躬之風。曩者。獷俗擾邊。勁兵宿野。始仗指蹤之略。邁升基命之階。間從書殿之華。就寵師干之拜。持中山之師節。臨大鹵之盛秋。寂無邊虞。深得戎重。召言還國。申命極樞。總是煩機。議茲舊物。謀而鮮過。慮不及私。備挹猷爲。罄宣忠力。文武參試。固亮節之卓然。台宰對司。在至公之允若。是用參之龜策。付以機衡。仍登書殿之名。更拓上田之賦。於戲。寅亮天地之化。調序陰陽之和。衡石無心。以平而爲體。囊籥有道。以虛而爲宗。勉思此言。同底于治。

除韓琦特授特進依前檢校太保充武康軍節度使加食邑制

門下。朕以天統上正。日晷長至。明發禋于世室。昧爽祀于郊丘。靡神不宗。虔乃有孚之享。登禮必答。擁我無疆之休。訖侍中之解嚴。趨太常而賜胙。時則儒帥。朕之名臣。董齊耳目之師。倚殿股肱之地。議勞惟素。頒賞宜先。用敷慶策之文。聿進崇禋之典。具官韓琦。業宇高邵。風德修明。卓爾傑材之宏。居然皇器之重。體侔金石。介然不易其常。量均江河。撓之莫見其際。更試文武。踐揚藩朝。乘是精忠。濟之明識。早著勳于西略。旋翼務于內樞。參斷幾微。交修久大。匪躬之故。慮不及私。造膝之謀。舉無遺策。迭更出處。交厚眷毗。常山臨代之衝。大鹵近胡之地。悉號勁兵之處。委臨制閫之雄。建以高牙。成茲安枕。會卜郊于三歲。庸薦禮于百神。列上計書。述修貢職。率先乎羣岳。旅次乎大庭。逮朱燎之訖儀。及玉車之還軫。孚休字縣。覃施臣工。乃瞻元侯。特崇貴級。用加地進律之法。申拓井開賦之恩。飲至勞旋。厥惟舊典。疇庸進等。茲示茂恩。

於戲、郊廟虔恭。乃承敷佑。君臣敕戒。惟是幾安。獲此康年。成于大報。思與俊舊。永底顯休。

除文彥博特授檢校太尉同中書門下平章事使持節孟州諸軍事行孟州刺史充河陽三城節度使判河南府兼西京留守司畿內勸農使加食邑實封制

門下、四輔居中。用緝熙于邦采。二伯治外。亦藩屏于王家。雖易地而略殊。在殿邦而迭重。眷言茂宰。求解冢司。有嘉靜退之風。特舉褻優之典。兼徽台鉞。誕告臣工。具官文彥博。格量沖深。體用安重。資疏通之明識。蘊強濟之敏猷。卓爾偉材。本克生于王國。居然奇璞。早見器于宰朝。拔自時髦。經我世務。歷樹風于方面。亟聞政于宰司。屬以盜發甘陵。氛生朔壘。義能首奮。師以凱還。名繫民瞻。功惟朕念。爰立作相。遂正三階之文。用乂于朝。乃總萬樞之務。速分垣翰。適授旌旄。開幕府于長安。委節制于全雍。眷求予弼。圖任茂勳。式序上司。復光舊物。居百度將明之重。比歷暄涼。在三事弼諧之先。尤彰夙夜。方篤仰成之眷。遽陳謝去之章。諭言且勤。誠意頗固。興化致治。雖資秉哲之良。均逸偃藩。亦廣養恩之義。姑從所欲。仍示寵章。榮以鳳池。輔之虎節。析孟津之茅瑞。委洛宅之符書。加衍土田。申崇功號。悉舉疇庸之數。誕昭懋賞之文。於戲。出處之方。竝揚于休命。進止之度。有美于庶言。往惟欽哉。無忘夾輔。

除文彥博依前檢校太尉充忠武軍節度使授特進加食邑制

門下、朕具法物之駕。自宮徂郊。崇精意之禋。奉特與璧。紹正鍾律。祓飾典文。哀對于上神。參佑于列聖。燎熏焜耀。雲景杳冥。降福協于孔皆。祝釐難于專嚮。矧惟時傑。早陟冢司。倚居夾弼之崇。領帥輔邦之重。宜

優羣后均沐靈休。具官文彥博。志度淵沖。體範明劭。抱公台之偉器。肖辰象之至精。際會盛期。迪宣遠業。沈機先于大蔡。勁節表于疾風。著投袂勤王之勞。清于朔壘。應吹沙作相之兆。變我辰階。迹美規隨。志存幹翼。避承疑之上席。委節制之中權。張我天聲。帥于雍部。圖金城之方略。參寄老謀。撫井鉞之師兵。坐資雄概。益重出藩之望。用紓西顧之憂。屬以清廟告虔。紫宮拜貺。述修祀貢之職。率循侯度之儀。夙尙忠圖。益欽志嚮。逮展成于元祀。惟肇敏于舊勳。賞不可淹。禮宜加腆。爰頒獎策。用進崇階。卽優衍之前封。廣陪敦之異數。於戲。乾祗開佑。乃歆至治之馨。潘岳屏毗。以底中邦之靖。益圖夾輔。永服休嘉。

除宋庠河陽三城節度使檢校太尉同中書門下平章事判鄭州制

門下古者謀帥必本于詩書。雅云憲邦實繫于文武。卷言後老久典煩機。比陳控避之章。宜舉閔勞之典。有嘉舊德。早正中階。宜升節制之榮。仍寵台司之重。誕揚孚號。頒告外朝。具官宋庠。爲時耆英。秉德純粹。通于道德之韞。濟以文采之華。擢自機廷之嚴。入正巖郎之拜。輔相厥辟。協泰象財成之宜。偃休于藩。得大雅進止之度。頃從列屏。召置首樞。咨帷幄之籌。賴樽俎之算。直清行己。粹密存誠。溫樹不言。奏章隨削。參萬幾之務。均三品之更。夙夜惟寅。耆艾斯久。出于兢畏之性。比形挹損之言。表解洪樞。請行外閫。是用輟從前箸。寵以命圭。崇利建于盟津。便均勞于鄭圃。師干之試。蓋寵于元猷。台鉞之崇。用褻于哲輔。優封拓井。真食加田。茲示便蕃。以疇密勿。於戲。左右陪輔。地雖重于二樞。內外屏毗。義則均于一體。往服朕命。以藩王家。

除宋庠特授檢校太尉充樞密使仍賜功臣制

門下效法斗宮崇建樞省翼萬微而置使必取傑才聯三事以兼司用優俊老抑惟舊物申告正朝具官宋庠博洽藝文休有道德方重而不倚直清而無徒蒼璧方琮追琢成于祕寶黃鐘大呂考擊見于正聲往在朕初得之首舉典策光于施命臺閣練其舊章啓沃善言進必依于義理束修雅行靜有補于風華嘗升號于機庭遺正名于中鉉性資慎重問溫樹而不言志在將明恥衰職之有闕謀謨日淺靜退可嘉偃休歲深素履彌劭屬以內樞闕職前箸待籌圖舊是先選衆攸舉登我碩德議茲煩機論道本兵在二司而均重秉文經武亦一德之參圖俾升台宰之名仍衍土田之賦崇茲掌武昭厥殊章於戲戎事維艱人謀匪易吉之先見蓋韞于幾深擬而後言以成其變化昭我舊德豈忘訓辭往體朕懷以全慎道

除賈昌朝特授依前檢校太師同中書門下平章事山南東道節度使進封許國公加食邑實封制

門下朕廼者夙興聽斷日昃劬勞三慎凝懷暫屏于煩慮九乾資氣過納于太和蓋穹祇之擁全繫祖宗之保固乃卜季秋之吉奉祠路寢之嚴始升薦于齋誠庸答揚于景貺執事有恪醴假無言升燎告成休氣來擁思與羣后均被蕃禧再崇進律之文宜先主籥之望具官賈昌朝材居邦傑德映民宗經術號夫通深謀謨推于閎博便朝講勸早授道于朕躬冢司弼諧嘗用乂于厥辟休有風業著之巖廊懸辭政軸之勞游委師干之總三階之象參耀于乾台二南之風載融于道化眷言朔土重莅別京當洪河渤碣之

流臨天街畢昴之次。屏毗王室。安輯戎疆。厥庸居多。乃望惟穆。屬鉅儀之云究。當慶賜之遂行。賞蕃宣之功。詩美申伯。賜文武之胙。傳尊齊侯。是用爵以上公。邦之舊許。仍徹上田之數。益崇井賦之真。舉是寵嘉。竝優哲艾。於戲。祭則受福。敢專在于眇沖。賞以懋功。諒無踰于俊老。往服乃命。永孚于休。

除賈昌朝行尙書右僕射依前檢校太師兼侍中充景靈宮使充鎮安軍節度使加食邑實封仍改賜功

門下崇器大名。必歸俊乂之德。繁機劇柄。重累元耆之賢。特推進律之恩。恩解持樞之任。仍伸舊典。用預殊章。涓乃剛辰。告示列位。具位賈昌朝。道器明遠。德範沖深。蔚爲儒宗。達于治道。隕然公輔之量。夙表大成。卓爾巖廊之材。早彰厚質。自膺枚卜。遂正阿衡。盛業著于規隨。嘉謨盈于啓沃。曩辭魁柄之重。再司留籥之嚴。撫全魏之都畿。領北方之節度。左右修輔。抑惟舊學之臣。內外屏毗。宜著老成之望。仍屢辭于尊秩。且益表于謙風。勳者渴見儀形。召還樞宥。彌罄同寅之節。逾昭秉義之忠。惟機務之煩然。且神明之勞止。本兵經武。雖深賴于老成。均逸代勞。姑寵綏于碩德。眷言舊物。申舉前恩。兼東臺常伯之名。正文昌右相之重。陪我京室。書社淮陽。仍總治于靈宮。益衍封于采地。用優俊老。式示寵章。於戲。羣務幾微。有嘉于匪懈。上卿進退。實美于無猜。惟我輔臣。往體朕命。

除賈昌朝依前檢校太師同中書門下平章事安國公充山南東道節度使加食邑實封改賜功

臣制

門下肅若齋輅。類于陽郊。合祛天地之尊。〔案〕祛字原本誤作祛。致漢書倪寬傳。今改正。祛從示。不從衣。今改正。陟配祖宗之聖。奠壁而精志達。升燎而瑞福通。還霈寵靈。均敷貺施。欽嚴主籥之地。我有宗臣。睠惟賜祚之功。疇先伯舅。宜頒獎策。以洽舊儀。具官賈昌朝。經爲儒宗。才乃朝匠。雅有威德之美。韞于精識之微。迪厥誠明。蹈中和而範俗。邃于術略。躬文武以憲邦。勳入冠于台司。實委成于魁柄。體有巖廊之重。志存王室之先。密勿訐謔。粲話言于三筴。逡巡退讓。穆風化于二南。進兼台鉞之崇。入儀書殿之重。再光舊物。還殿北門。撫茲畢昴之疆。安于常岱之鎮。底乃嘉靖。賴于耆明。甫修郊報之儀。首虔方貢之職。壯猷可尙。美志逾昭。屬熙典之迄成。顧寵章之昭舉。申加功號。開衍食租。胙井牧之眞封。竣雲臺之美稱。參寵持衡之舊。庸昭進律之殊。於戲。禮縟文繁。氣調時豫。惟帝享此。奚德致之。思元首之歌。幾微之必以戒。念成命之頌。恐懼而不敢康。獲成上儀。嘉與舊德。率由茲道。茂對天休。

除王德用特授依前檢校太師同中書門下平章事兼羣牧制置使充樞密使河陽三城節度使
加食邑實封仍改賜功臣制

門下內樞之地。上範於斗宮。前箸之籌。參寄于人傑。以經常武之事。是號本兵之司。圖冠厥名。疇總予務。乃眷元侯之長。早崇右府之聯。爰擇剛辰。復還舊物。具官王德用。志懷果烈。風概沈雄。通于奇正之謀。居然間傑之氣。春秋閱禮。韞義府以惟深。甲令書忠。載世家而有舊。比膺推轂。游歷干城。先十乘以臨戎。長萬夫而觀政。德刑具舉。威惠參施。能名播于外夷。沈機隱于敵國。勳咨俊望。擢典繁機。翼濟事功。迪宣忠

力孚乃識而匪懈。研諸慮以惟微。旋均基宥之勞。亟樹蕃宣之治。蹈險夷而一致。服忠孝而兩全。簡在朕心。洽于朝聽。是用升鳳池之寵秩。聯虎節之榮章。倚殿輔邦。用陪京室。屬右樞之缺職。咨羣岳以擇材。僉曰汝賢。宜弼予治。蓋天子二老出以居方伯之尊。寰內諸侯入則處公卿之任。抑惟曩制。舉是隆名。用起壯猷。使纘舊服。仍峻雲臺之號。兼增井牧之封。式厚耆英。有加名數。於戲。樞機發令。制戎事以惟艱。樽俎折衝。經人謀而匪易。往慎乃位。益思其忠。

除王德用特授依前開府儀同三司檢校太師同中書門下平章事充樞密使河陽三城節度使

進封魯國公加食邑制

門下。朕屬者穹厚降康。祖宗介福。三壇新命。見錫于壽臧。萬宇歡心。同均于愛戴。思答揚于貺施。乃祇祇于禁嚴。合祀大神。參侑先烈。四海駿奔而助祭。羣后肅雍而在庭。薦鬯而精意通。升燎而靈氣格。敢專享于純嘏。思均澤于庶工。爰舉寵章。宜先近弼。具官王德用。沈雄植操。明允抱誠。毅乎有師帥之風。侃然通軍國之務。出于勳閥。濟奕世之忠規。冠厥樞庭。擅本朝之宿望。以謹質而被倚愛。以慎重而典幾微。處進退而無愠容。歷夷險而有常德。中間謝事。尋還內密之司。久試益忠。能保後彫之賞。處節旄之極寵。兼台鉉之至榮。耆艾之節益堅。謙挹之心彌固。侍我祠事。煩茲老成。用圖陟恪之勤。參錄寅恭之志。加地進律。于以荒于大東。時德表功。茲用陪于多賦。益疏真食。舉洽至恩。滋寵壯猷。式頒獎策。於戲。君臣一體。有休恤之均同。天地合祚。宜蕃禧之康共。往服茲命。永孚于休。

除龐籍特授檢校太傅昭德軍節度使永興軍一路兵馬都部署安撫使兼知永興軍加食邑實封制

門下稽若前王拜于太師。或跪而推轂。仲其制閫之才。或齋以設壇。崇茲授鉞之命。矧惟迪德之佐。抱乎全器之能。載涓日策之良。爰委師干之試。頒夫明制。告于廣朝。仍資分陝之行。實允憲邦之望。具官龐籍。精明異稟。英博多通。自通服于邇僚。旋敷聞于大政。沈謀至策。蔚懷人傑之姿。碩德壯猷。曷爲王室之老。日者種羌負固。邊部繹騷。將武庫之精兵。護延安之絕塞。資其智略。宣我威靈。逮河山之懷柔。屬邊亭之撤警。沿其雅意。置諸本朝。文武參施。顯偉才之絕備。台樞迭踐。見盛業之交修。彘均逸于近藩。邁進儀于祕殿。教條所賦。苛慝以消。休有勤勞。孚于羣聽。屬以長安闕帥。西夏須才。圖雄俊之寶臣。疇綏予衆。正嚴莊之師律。僉曰汝賢。是用按上黨之封。因名闕之固。析茲茅瑞。徹彼土疆。仍光傳道之名。兼實陪敦之數。前驅六纛。外冠十連。洎茲鶉首之郊。頒我虎符之政。以寬西顧。爰屬老成。於戲。茲乃舊都。厥惟全雍。爾其將節制之命。審控帶之宜。從外折衝。矧羈縻之有素。居中作扞。惟安輯之在初。善撫朕師。往對休命。

除龐籍依前尙書戶部侍郎知鄆州仍改賜推誠保德翊戴功臣散官勳封食邑實封制

門下圖治之世。宜本至公。預政之門。合防嫌疑。矧居四輔之首。尤在百僚之先。苟罹干請之名。殊失仰成之意。兼沿章削。俾解政機。具官龐籍。志度淵沖。業宇明劭。韞才謨而敏達。更事典以淹通。早翼務于本朝。洵服勞于近職。雅有風采。蔚著猷爲。乃者西州用兵。延安近寇。屬輕裘之謀帥。煩籌筆以制邊。戎索以清。

夏人來附。乃眷西顧。予嘉乃勳。始召置于樞庭。旋擢參于宰府。闔外無事。頗見于匪躬。天下旣安。允膺于注意。遂正斗樞之號。邁升邦鉉之名。固宜厲以正方。繩于羣下。而乃親聯交構。私謁彰聞。逮有司之訊詞。合杜門而待罪。及行弊斷。乃失重輕。致公議之弗容。在人言之莫遏。尙矜舊德。兼覽奏函。聽避位于台司。俾均勞于藩服。委東平之安輯。便樂土之康嘉。於戲。罷免之科。蓋拘于典制。進退之禮。用正于臣鄰。勉賦寬條。弗忘曩效。

文恭集卷二十四

內制

議樂詔〔案〕是詔在皇祐一年閏十一月。

朕聞古者作樂。本以薦上帝。祀祖考。三五之盛。不相沿襲。然必太平始克明備。周武受命。至成王時。周公始大合樂。以和邦國。漢初亦沿舊樂。至武帝時。始定秦一后土樂詩。光武中興。至明帝時。始改大予之名。損益前後。以制樂節。唐高祖造邦。至太宗時。孝孫文收。始定鍾律。明皇方成唐樂。是知經啓善述。禮樂重事。須三四世聲文。乃定。國初亦循用王朴竇儼所定周樂。太祖患其聲高。遂令和峴減下一律。眞宗始出聖意。大祠用樂。又議隨月轉律之法。屢加按覈。然念樂經久墜。學者罕傳。歷古研覃。亦未究緒。頃雖再三攷定。博訪知音。終未有的。究古今知聲知經可信之人。嘗爲更改。未適茲意。如其制作。益須切當。宜委中書門下集兩制。及太常禮樂官。將天地五方。神州日月。宗廟社蜡祭享所用登歌宮縣。審更定奪聲律。是非按古合今。調諧中和。務要議論允適。經久可用。垂信不朽。使祖功宗德發揚無窮。神祇感格。善氣來應。苟獲至當。何憚改爲。但審聲驗書。二學鮮竝。互詆胸臆。無所援據。慨然希古。靡忘于懷。尙賴洽聞。共圖盛

節故茲詔示想宜知悉

諸后祫享依舊詔

朕惟春秋大事在于禘祫前詔太常崇按舊禮期以孟冬之吉躬祀祖廟庶因合食聖靈相接以廣烝烝之孝而一二禮官因別廟四后有疑論焉訂之諸儒議久未一深惟祖宗之制至重至尊祖宗以來有司攝事行之久矣祥符中復經聖考著明詔當時禮官講求已云莫可廢也矧茲眇末甫崇孝享其敢廢先妣之舊典常禮重違先帝之聖志哉今親享在邇未可輕議其孝章孝惠淑德章懷皇后祫享且依舊典候過大禮令禮官重加討論咨爾輔臣務于仍貫故茲詔示想宜知悉

孟冬親詣太廟行祫享之禮御札

朕願循菲質膺守聖圖潔幣玉以事乾祇嚴圭鬯而奉宗廟惇修將禮舉秩無文亦嘗復耕藉于靈壇恢宗祀于路寢斯牲匪愛靡神不尊用能誠志達于幽明馨香格于上下靈休見擁至治用康永言孝思有懷先烈惟祫享之義著經禮之文大祭先王合食祖廟盛迪嘗之薦深肅僂之懷追孝奉先莫斯爲重茲享之廢歷年旣多有司所存出于假攝禮之將墜朕甚惜焉卜以孟冬備茲法駕款于太室親薦嘉籩宜示先期以伸誕告朕取今年十月內擇日親詣太廟行祫享之禮其今年冬至親祀南郊宜卽權罷所有合行諸般恩賞竝特就祫享禮單一依南郊例施行至日朕親御宣德門宣制仍令所司詳定儀注以聞務遵典禮勿俾煩勞咨爾多方咸體朕意故茲札示想宜知悉

皇祐五年南郊御札

敕內外臣僚等。夫四時常祀。戒在有司。三歲親祠。敢稽舊典。迪惟列聖。光施沖人。獲執牲瑄。以事郊廟。永惟欽慄。弗敢怠遑。間亦耕藉而供粢盛。宗祀以虔。珪幣合祛天地。參侑祖宗。庶幾告誠。豈曰能饗。惟時上帝。賜朕有年。嘉生順蕃。黔細滋殖。豈瑣涼之致此。抑右序之俾然。矧今區夏謐如。風雨時若。鐘石甫就。壇場在望。四海助祭。埃蒼壁之舉。百神受職。係皇邸之設。思欲裸鬯酒于世室。進純犧于泰時。因以昭孝範。俗延祉庇民。敢憚必躬。而廢大報。朕以今年十一月四日。有事于南郊。咨乃攸司。相予肆祀。各揚爾職。勿懈于位。諸道州府。不得以進奉爲名。輒行科率。務循靖壹。勿使煩勞。咨爾庶邦。當體朕意。

禁內降詔

朕紹承駿烈。祗服先猷。蹈道以臨庶邦。謹憲而持大柄。馭之予奪。正以賞刑。悉任至公。靡容案法。比有憐幸。肆興妄圖。或違理覬恩。或負罪希貸。率求內出。間亦奉行。蠶政虧風。莫斯爲甚。雖屢頒于詔約。曾未絕于斯途。兼慮臣庶之家。近貴之列。交通請託。巧詐營爲。陰致貨賕。密輸珍玩。夤緣結納。侵撓權綱。方務澄清。當嚴禁詰。儻復違犯。斷在必行。重念成湯以六事責躬。女謁苞苴之先戒。管氏以四維正國。禮義廉恥之具張。矧宗祀之涓成。屬祥釐之均被。嘉與中外。緇此非衰。勉于自新。以隆至治。今後應內降指揮。特與恩澤。及原減罪犯者。竝仰中書樞密院。并所承受官司。具前後詔條執奏。不得施行。及臣庶家。如有潛行賄貨。結託貴近者。並令御史諫官覺察論奏。咨爾丞弼。體朕意焉。故茲詔示。想宜知悉。

賜百僚乞御正殿復常膳不允批答

朕奉承聖業。循守政綱。夙夕固勤。冲晦罔識。謹告自上。壤食爲災。日月之行。誠有常度。春秋之戒。則在正陽。遠觀前王。臨制大器。或遇裁而懼。或罪己以興。莫不深蹈兢危。躬自菲薄。僅能消復。或底和平。矧在寡涼。敢妄降搢。是用避路朝之坐。損大官之庖。庶幾感通。有所開右。卿等義均休戚。情深愛戴。願臨正寢。祈復常珍。雖嘉乃誠。難徇斯請。勉思勿懈。以輔不及。書不云乎。無疆惟休。亦無疆惟恤。

賜宰臣富弼以下上第二表乞皇帝御正殿復常膳不允批答

夫元者。三朝之吉日者。衆陽之宗。厥有食焉。茲用惕若。豈予弗類。在治未昭。天其警諸。變或在是。探觀前載。敷求哲王。或罪己以興。或遇災而懼。庶幾菲薄。以昭抑畏。是用損去常膳。退即便朝。期底和平。以消災慝。僅踰旬浹。未覺勤疲。而卿等率籲臣工。繼陳章表。請御正寢。求復庶珍。雖愛君之心。良篤于義。而應天之道。要當在誠。第嘉乃陳。難議其可。

賜皇兄允讓等上表乞皇帝御正殿復常膳不允批答

朕纂膺乾統。劬勞日昃。思乂庶政。以登至平。寡昧典昭。未識厥路。上天降咎。正陽有食。豈非明不能燭。治有大虧。天其警予。慎思其闕。是用避正朝之坐。損內饗之膳。恭默計過。恐懼寘懷。庶感通于昊蒼。獲消救于氛戾。卿任居宗翰。情均休恤。勉修所職。以輔不逮。皆乃御法宮之黼座。復大官之鼎味。雖嘉誠愛。難俞章削。

賜皇親批答

夫月書王正表年之所謹日象君德秉陽而弗虧惟端朔之辰有壤食之異豈智臨之或爽將道化之未孚發見陽明開示乾戒用損去庖品避居路朝惕厲以寘懷淵默而思咎庶消陰慝以底天和而卿等地在親賢義同休恤繼形章請再達予聞願臨正屏之朝祈進常珍之品誠存愛載辭甚懇勤姑務省修以圖消復雖嘉美意難俞來請

賜北海郡王允弼上表謝皇帝御正殿特賜俞允批答

初炎紀朔大明致虧日官以言天象垂戒是以避路朝之坐損膳宰之差冀緣惕厲之誠庶通消救之道而羣公庶尹宗邸親良迭敷乃誠稔達予聽請御當陽之坐祈復兼珍之餐章削紛盈誠節款到已嘗開許煩有敘陳

賜宰臣文彥博以下上表賀今月四日皇帝御崇政殿疏決刑獄五日降雨批答

近以春土可耕時澤猶爽密雲屢族宿麥將瘁申禱未驗用思孔疚顧哀都獄豈無冤人夙興便朝分條繫者親加慮問率俾降原沖志獲通休應來表纔翊日而協氣至未崇朝而甘施洽消百苛之欲作紓三農之勤望感召潛契朕誠悅焉雖協哀矜之期亦緊敷燮之助卿等心存理物善在稱君亟剡奏函願書信策深昭將順之意尤多嘉尚之懷

賜宰臣陳執中以下爲上表賀崇政殿疏放刑獄卽時降雨批答

朕以粵祀既虔。時澤未效。秋種所急。夕惕用勤。願哀邦氓。牽陷都邑。其中繫者。豈無冤焉。傷和致災。或恐在是。因臨便殿。親爲慮囚。且示哀矜。悉從原降。書不云乎。與其殺不辜。寧失不經。未旋晷而和氣通。弗崇朝而嘉澍洽。驕陽以屏。豐歲可期。卿等地在弼諧。志敦將順。遽閱奏函之上。願從信策之藏。載省寅恭。良多愧尙。

賜文武百僚陳執中以下上表賀爲今月一日太陽當蝕虧分不及算數并陰晦微見詔

邪慝侵陽。推步在朔。肅若乾戒。惕于朕心。退卽便朝。損御菲食。寡味所值。愓懼弗寧。天維顯思。月旣晦止。雲氣簇于甲夜。雷雨降其中天。逮翊日之將晡。纔微陽之見象。驗諸食壤。減于算分。此皆上穹輔持。列聖開右。旣惠朕以膏澤之施。復警予以曜靈之虧。俾無怠荒。敢弗抑畏。夫應天以實。感人在誠。期與臣工之良。永思政治之要。用消厥咎。益孚于休。卿均是憂勤。志于將順。煩有稱慶。良增愧尙。

賜宰臣富弼以下上第三表乞加上尊號不允批答

昔孔子達者。辭不稱仁。光武賢君。禁諸言聖。朕每覽前典。莫不嘉此。且帝王之道。安在于彌文。而天人心所助者。資順謙乃益之本。損者德之修。矧以眇身。承茲大業。仍以菲德。享諸鴻名。猶懼弗任。居常自惕。幸羣元之隕祉。荷累世之延洪。治無甚虧。時則咸靖。思欲致四海之祭。合七廟之靈。考卜孟冬。躬行大禘。豈曰能事。抑惟舊文。而卿等率籲羣司。推高眇質。將順其美。鋪衍厥章。願饗寶文。益上徽稱。極大仁之丕冒。昭至化之巍成。美溢而浮。志慚且悸。再嘗批諭。猶執控陳。况乃愛戴所深。形容已至。宅帝皇之大。席神

聖之高固已華出古先。徽兼上睿。若俯徇于誠請。更益施于號榮。既乖本心。恐累台德。

賜宰臣文彥博以下賀老人星出見批答

景霽秋旻。氣分商仲。南極呈于秘象。清臺獻其壽占。卿等道著弼諧。任居毗燮。喜聞吉語。頗有賀章。請以天官之言。屬諸史氏之掌。體誠同于元首。義足表于愛君。載省寅恭。良深嘉尙。

賜宰臣富弼以下賀壽星出見批答

金氣中分。珠躔上見。清臺設候。疇人獻占。述昭爛之乾文。告壽昌之福兆。卿等義存將美。志在祝延。因垂象之薦休。頗刻章之稱慶。寅恭斯在。嘉尙良深。

賜樞密使宋庠等賀壽星出見批答

南極見象。上天垂休。太史獻占。歸福于朕。夫以壽昌之慶。豈敢專饗獨美。當與俊乂大臣。億兆之衆。同均斯祉。永錫難老。卿等欣聞書語。頗有賀章。將順之誠。良增嘉尙。

賜感德軍三軍將吏僧道百姓等詔

朕以允初。德器早成。天屬爲近。適總司于留務。俾節制于中權。進領藩方。留宿京邸。且念賢王之子。用伸敦族之懷。矧茲美原。抑乃名士。按之析瑞。壯厥維城。汝等遙被撫臨。諒多欣懌。今特授允初。依前檢校尙書。右僕射。持節耀州諸軍事。耀州刺史。兼御史大夫。充感德軍節度。耀州管內觀察處置等使。仍加食邑七百戶。食實封三百戶。散官勳封如故。故茲示諭。想宜知悉。夏熱。將士等各得平安。參佐官吏。僧道。耆壽。

百姓等竝存問之。遣書指不多及。

賜山南東道三軍將吏僧道百姓等詔

朕以賈昌朝、葉茂公、台器全文武。命建牙于南紀。仍主籥于北門。冠于九侯。時惟伯舅。屬以首樞缺職。前箸咨才。召還溫省之嚴。入冠本兵之任。朝言協比。國論倚成。緬想吏民。久承節制。自聞朕命。諒愜爾情。

賜河陽三城三軍將吏僧道百姓等詔

朕以宋庠、文儒之宗。台宰惟舊。近解樞衡之重。俾兼袞鉞之榮。言念盟津。前經坐鎮。命茲書社。利以建侯。俾寰輔以作藩。庶京師而蒙福。眷言士吏。以及軍民。聞孚號之已行。諒輿情之胥悅。今特授宋庠、依前檢校太尉、同中書門下平章事。使持節孟州諸軍事。行孟州刺史。充河陽三城節度孟州管內觀察、處置、河堤等使。判鄭州軍州事。故茲示諭。想宜知悉。

賜建雄軍三軍將吏僧道百姓等詔

朕以許懷德、少歷戎行。老知軍志。早持齋鉞。久衛寢戎。頗積勳勞。用加恩數。俾侯中冀。書社平陽。緬想吏民。同嘉師帥。今特授許懷德、檢校司徒。使持節晉州諸軍事。晉州刺史。兼御史大夫。依前充殿前都指揮使。建雄軍節度晉州管內觀察處置等使。加食邑七百戶。食實封三百戶。功臣散官勳封如故。故茲社諭。想宜知悉。

賜彰武軍三軍將吏僧道百姓等詔

朕以李昭亮、門濟忠猷，世承勳烈，薙澄氛于保塞，命書社于濟陰，升冠內微，倚臨北道，顯庸惟茂，令聞逾昭。進兼宰鉉之名，就司留鑰之務，輔藩惟舊，臺鉞有光，緬想吏民，遙承節制，嘉聞異數，增慰輿情。

賜淮康軍三軍將吏僧道百姓等詔

朕以張茂實早分將鉞，嘗帥騎兵，參圖前勞，召還舊物，解符書于郢上，進茅瑞于淮西，遙制藩宣，入司宿衛，緬惟有衆，嘉此建侯，今特授張茂實檢校吏部尚書，使持節蔡州諸軍事，行蔡州刺史，兼御史大夫，充侍衛親軍，馬軍副都指揮使，淮康軍節度使，蔡州管內觀察處置等使，加食邑七百戶，食實封三百戶，功臣散官勳封如故，故茲詔諭，想宜知悉。

賜寧國軍節度使北海王允弼摹勒御書飛白上進詔

省所上表，蒙賜御書飛白二字，謹摹勒上石，上進事，具悉。朕以聽朝之餘，寶茲寸晷，自惟翰墨之尚，猶賢博奕之爲，聊因飛毫，于以結字，式將意眷，且寵親賢，卿有兩獻之風，躬二南之美，喜宣上德，樂盡忠規，忘蟬翼之匪工，煩龜趺之立刻，爰緘墨本，乃刻奏封，深陳感遇之懷，且顯游揚之志，本于信厚，嘉乃恭謙，省覽以還，愧尙無已。

御書賜龍圖閣直學士權知開封府蔡襄摹寫賜御書刻石事敕書

省所奏，伏蒙特賜御書，臣齋戒摹寫，刊著于石，次錄獎詔及臣所獻古詩，兼載後序，以紀遭遇，裝一軸上進事，具悉。卿體行清方，才謨詳正，通于學術，粹是風業，朕選諸近侍，佳有名臣，因暇日以撥毫，命中璫而

賜字蓋以將朕異睦成卿令名退思匪工追用自慙而乃深于感遇篤在游揚形頌歎之長言溢尙〔案〕集有御書碑序其載勒石摹進始末在至和元年六月二十四日共結銜稱起居舍人知制誥與此不同者致襄本傳自起居舍人遷龍圖閣直學士知開封府蓋其勒石作序也為起居舍人時而賜敕則已在轉官後也襄集不載敕書此下闕文無考

賜右神武大將軍陸州團練使宗諤進太平盤維錄敕書

敕宗諤省大宗正司奏汝纂歷代宗屬事蹟勒成上下二帙總六卷分一十二門仍請名曰太平盤維錄上進事汝迪德自先蒙廕于後能外紛華之習頗勤教學之方聞繹舊聞尋研本系類成編次竄有綱條撮諸胄緒之華光我神明之祚奏篇來上乙牘以觀有嘉規為良深歎尙

賜宗室磁州防禦使承亮進給享受釐頌敕書

敕承亮省大宗正司奏繳汝表今撰給享受釐頌并序投進事朕勳者法一閏之氣講三歲之祀孟冬吉酉給于祖廟陳歷代之寶奏大安之樂神靈嘉饗雲景杳冥朱燎既升正陽顯見豈予能感抑祖宗右焉汝肅雍侍祠將順為志中有和樂發于頌歎大宗獻狀奏篇登御流藻以揚主依義而顯君省覽之餘歎尙兼至

賜翰林侍讀學士知徐州呂公綽進明禋詩敕書

朕勳以祗飭齋輅肅奉陽郊合祛乾祗登侑祖考秩上下之祀則靡神不宗致精微之產而惟帝時享錫朕休福惠茲羣黎夫豈寡德之能實繫先烈之茂卿職參經幄任總藩符志在游揚形于頌歎思致婉錯

典裁淳深。省覽不忘。嘉尙兼至。

賜知濟州李及之進唐雅敕書

省上表所撰唐雅十篇。謹繕寫附遞上進事。具悉。汝職居延閣。符守列城。宜詔條而弗苛。服文史以爲樂。研尋前載。追述雅風。文采深純。典裁詳密。奏篇來上。留牘于中。省覽之餘。不忘嘉尙。

賜交趾李日尊進異獸敕書

卿仍世守藩。乃心向國。越滄波而述職。奉異獸以致誠。在遠彌忠。願勤可紀。式將頒賚。爰寵傾輸。當體眷懷。益思恪順。

賜宗室叔哀進異獸歌敕書

近者。交州遣使。以麟底貢。私怪物色之異。且驗載籍之傳。通儒碩生。多云非是。朕方懷柔彼俗。重違其情。與見于庭。命納諸囿。汝以宗藩之秀。時豫觀者。喜毛羣之馴優。美鳥夷之稽服。昭我德政。形于頌聲。副以編聯。乙于省覽。游揚兼在。喜尙弗忘。





3
4
1887

文
恭
集
五

卷之五




成集書叢

編初

者編主
五雲王

行發館書印務商



文 恭 集
(五)



3 0649 7796 4

胡 宿 撰

文恭集卷二十五

內制

賜新除參知政事曾公亮詔

國朝之制。設陪貳之職。以輔翼台宰。名數之重。下丞相一等。朕之選任。必屬賢髦。卿志度深沈。識裁詳密。以道術侍朕講。以典冊宣王命。請治寰輔。擢尹京師。厥績茂焉。其試效已。是用升廁公府。參聞政道。采于議者。固無間然。冲挹之懷。遠形囊奏。雖謙風可尚。而命綍已行。勉思大猷。勿為曲讓。

賜參知政事曾公亮乞退不允批答

省表具知。卿志行修明。風業夷遠。通習治具。洽練朝章。間繇禁聯。陪貳宰路。毅然有守。知無不為。夙夜嬰煩。晦明虧裕。暫從謁告。適此養恬。即當善平。入奉參決。忽得章請。來謝政塗。頗用憮然。寧當議此。況廟堂之上。具有規隨。而機務之間。未至停瘞。勉輔藥石。宜安精神。勤味恬和。速期康復。

賜參知政事曾公亮乞退第二表不允批答

卿性度淑均。才謨隱濟。預聞大政。陪貳上公。夙夜宣勞。晦明嬰恙。暫從頤衛。日冀善平。何遽貢章。乃求謝



085
112
2:1888

職。且周官垂法。有寬疾之文。漢家養恩。著賜告之令。卿其少思省慮。味恬養和。勿有疑焉。急就良已。

賜參知政事曾公亮乞退第三表不允批答

卿以耆明之姿。參黷闇之政。謀謨匪懈。陟恪良勞。偶爽節宣。暫從頤衛。茲有生之未免。亦憂職之使然。賜告所存。養恩斯在。比觀章請。求謝宰聯。批諭已勤。控陳未已。況朝無闕政。而世方須才。勉圖粹和。速就康復。

賜參知政事曾公亮乞退第四表不允批答

卿精誠雅行。至範明猷。佐時矢謨。貳公圖政。偶嬰甚美之疢。適聞良已之音。比及暄辰。固加常膳。日期朝謁。跂聞話言。前已批章。復有今奏。懇求解罷。殊異眷毗。卿其研味真腴。屏息煩慮。期于勿藥。慰茲側席。

賜參知政事曾公亮生日禮物口宣

陪貳宰司。贊襄治道。惟陽中應律之朔。乃閭左設弧之辰。政在尙賢。禮存嘉惠。侑茲燕喜。體我寵恩。

賜鎮安軍節度使行尙書右僕射檢校太師兼侍中判許州賈昌朝生日禮物詔

時惟舊德。位冠元侯。京室是陪。藩符攸總。誕期斯至。慶賜用覃。俾爰子舍之良。得致家庭之命。侑茲宴禮。示乃朝恩。

又

喬岳吐符。巖廊誕器。周旋二府。陟降三階。季商協辰。左弧在且。馭貴有典。加惠著文。爰錫餼牽。以及醪酒。

式將恩意，往侑宴私，當體壽儀，卽祗慶賜。

又

陶元精之和，躬威德之美，蔚爲俊老，殿我輔邦。六射記辰，九秋肅氣，加惠隆于國典，爲壽盛于家情。俾爰似續之良，式將賚予之意，用資族宴，姑示朝恩。

賜山南東道節度使同中書門下平章事賈昌朝敕書

朕獲天人之助，乘畿夏之驩，祓除路朝，崇講祠事，以順衆志，以答靈休。日吉辰良，氣調時豫，熙典云究，慶賜是孚。卿王室元耆，人倫先覺，早冠居于鉉席，首敷變于化成。三讓彌沖，一德逾劭，居保釐尹正之重，有安輯勞徠之功。朕饗告成，乃眷斯在，進胙以爵，加惠于田。雖曰舊章，抑以疇德，已頒告于庶位，復往宣于朕懷，當體休成，同均慶賚。

賜山南東道節度使檢校太師同中書門下平章事賈昌朝口宣

卿德冠時宗，地居寰輔，躋遘誕辰之節，泛推任子之恩，乃選上駟，來充內廄，羨名駒之奮發，煩駿足之效牽，載省寅恭，良增嘉尙。

賜賈昌朝口宣

朕虔諏景至，恭事天明，禋典迄成，祥釐均被。卿朝家俊乂，藩岳儀刑，體貌所先，寵光宜厚。襲元功而進號，益多賦以衍田，馳遣使軺，奉將命綽，用敷休渥，當體眷毗。

賜賈昌朝赴闕茶藥口宣

卿留籥再司介圭入覲爰屬秋暘之候用勤參御之行耆哲是勞眷毗增厚式頒藥劑庸示寵私

賜觀文殿大學士判亳州陳執中乞致仕不允批答

省所上表陳乞致仕事具悉卿俊乂大臣耆明碩老再冠朝首比讓台元輔泰象財成之宜得大雅進止之度往治于亳實陪厥京偃藩在茲蒙福多矣如聞攝衛稍虧和平已出見于屬官諒再加于常膳舊德所至臥理有餘何乃上言欲求謝事是未亮憑賴之意而規適宴之私卿專精神近醫藥納養善氣保固太和避第仕塗未可議也

賜觀文殿大學士判亳州陳執中再乞致仕不允批答

卿器采精明體韻方重奕世濟德先朝納忠逮充舊貫之居再處阿衡之首將明典度勵翼官師朝有公言朋無私謁比辭政柄屢避台階靜勝柅于澆風偃休寄于密甸均勞近止蒙福在焉微有苦于足腓遽見求于身退茲豈藩鎮優耆德之意朝廷待元老之心耶卿其養精神省思慮淮陽臥理西河偃藩是所望于大雅也

賜鎮海軍節度使判亳州陳執中待罪特放敕書

夫道隱不還民散已久刑之設惟五而惡之討有十敗俗之自從古則然卿舊老壯猷俊德哲望近辭時柄事偃价藩宣風有初頒教尚淺民之從違政何加損遽形引責殊異眷毗且諒寅恭彌嘉慎畏

賜昭德軍節度使知并州龐籍口宣

省所進奉賀正馬貳匹事。具悉。朕因三朝之吉。受四方之圖。方貢畢陳。朝慶大集。卿時惟俊老。殿我強藩。寅修述職之文。遠效充庭之禮。載馳上駟。來貢承華。有諒勤恭。良增嘉尚。

又

省所進奉謝恩賜牌印并公使及到任馬共六匹事。具悉。卿文武兼劬。風德竝優。業載賢公。望居俊老。朕以壺關襟帶。并土股肱。崇以高牙。殿于大鹵。甫頒條詔。初見吏民。宴犒有儀。公帑惟舊。至煩稱謝。乃有效牽。滋顯勤恭。弗忘嘉尚。

賜新授觀文殿學士知鄆州龐籍口宣

卿國之耆俊。材號將明。二府迭更。一德咸有。薊辭時柄。倚臨東藩。得茲老成。居然治靜。圖中階之宿望。進書殿之偉名。異數有加。師言允穆。乃馳上駟。來實內閑。有嘉傾輸。良增歎矚。

賜工部尚書同中書門下平章事集賢殿大學士韓琦生日禮物詔

惟天所寶。若時相予。甫屬開秋。實惟誕日。稽諸朝範。寵于邦家。于是有牢醴蕃庶之錫。所以侑族宴而將壽嘏也。斯禮則舊。厥命惟新。祇若其承。體茲乃眷。

又

蔚以傑才。相予大政。首秋云吉。誕日在茲。俾按彝文。式將渥賜。庸示宰朝之寵。且爲族宴之榮。往惟欽承。

體茲眷矚。

又

體茲間氣。誕是傑才。素律云秋。左弧在旦。餽率加惠。醪醴侑懽。佐族宴以在茲。稽臺恩而惟舊。

賜武康軍節度使韓琦口宣

卿識業夷通。謀謨高正。早參內密之近。比更方面之煩。器望益隆。誠績兼茂。擢升書殿之重。就增儀職之華。殿乃戎翰。崇茲朝範。爰效上駟之貢。式充內廐之羣。載閱勤恭。良深歎尙。

又

朕親郊修報。升燎告成。覃惠臣工。均釐藩岳。卿居傑望。濟以忠圖。方倚幹垣。用優名數。進崇階而馭貴。疏多邑以昭庸。馳命軺車。往頒命綍。惟茲茂渥。宜卽欽祗。

又

卿風致高劭。識寓宏通。宣翼藩朝。明暢文武。外易戎翰之重。就升師鉞之雄。乃睠在茲。僉言允若。爰貢上駟。來賓內閑。益亮誠勤。彌欽意尙。

賜新除觀文殿學士知河陽富弼對衣金帶鞍轡馬口宣

卿忠惟許國。任屬陪京。書殿升聯。地官進貳。式將眷倚。往致匪頒。

賜除富弼起復禮部尙書同中書門下平章事昭文館大學士赴闕敕書

卿大名宰國。宏業熙朝。遠略有開。高謨未究。遭艱去位。銜恤在家。上鉉曠才。冢卿缺職。永惟在疚。亦已累旬。涼瑣虛懷。蒼黔待起。朝有舊制。國念前徵。須伸權奪之文。庸副仰成之意。庭有孚號。物無異言。義固掩恩。忠本移孝。勉思美業。就成茂功。尚抑餘哀。來慰勤佇。

賜宰臣富弼生日禮物口宣

象炳中階。業隆上鉉。維申誕日。行夏紀時。俾孚子舍之良。奉若家庭之賜。式增榮觀。當體寵恩。

又

挺生時傑。光輔本朝。眷乃首春。慶惟誕日。爰舉優賢之典。用頒加惠之恩。侑族宴以是宜。寵台司而斯在。

又

元傑稟氣。英瑋誕才。若時奮庸。代工變化。三元首序。六射在辰。國有賚恩。家榮宴喜。餼牽將禮。醪酒侑懽。舉是寵章。體茲渥眷。

又

吐符喬岳。居守阿衡。建构于寅。設弧在旦。眷言彝典。尊禮冢司。有醪酒之頒。兼餼牽之錫。助家庭之爲壽。廣嫺族之合懽。慶賜是將。祇受惟允。

賜忠武軍節度使知永興軍文彥博口宣

彝以九里之祀。陟配天丘。三朝之元。會同王歲。宗公先郊類之澤。羣岳有朝慶之文。卿業著蕭規。地崇陝

弼舉禮祀而爲勞。願賞策而則當。爰及首正。茲惟獻節。竝效名駒之貢。莫非上駟之良。有美款誠。尤多歎

賜河陽三城節度使檢校太師同中書門下平章事文彥博生日進馬口宣

卿辰象粹精。台衡俊舊。懸緣誕日。申舉賚恩。命仲氏以奉將。助家庭之式宴。仰惟彝範。煩有奏函。爰馳上駟之良。來實內閣之祕。恭勤斯至。嘉尚弗忘。

賜保平軍節度使檢校太師同中書門下平章事判大名府文彥博生日禮物詔

公台舊德。俊哲大臣。適居主籥之司。爰屬設弧之日。俾將慶賜。命遣使人。當體寵加。所宜祗受。

賜新授龍圖閣直學士張昇口宣

卿體行直清。才局明劭。政爲邊最。譽浹朝端。升委強藩。就遷禁職。爰貢籥雲之駿。來舒就日之誠。有美勤斯。良用嘉尚。

賜參知政事張昇上表乞致仕不允批答

夫年之貴于天下。德之先于人倫。尚矣。況乞言憲老。存諸典刑。圖政任人。寄在耆哲。至于進退。豈局于彝制哉。卿老成司直。清忠篤行。閱古今之義理。歷內外之事任。蔚有風采。稔聞謀猷。憑賴忠規。參毗政道。雖年途云及。而志力尚全。何遽挾章。乃欲謝事。是未亮眷倚之意。而自取宴安之適。使朕何望焉。

賜參知政事張昇上第二表乞致仕不允批答

夫治朝柄任。豈局以年。良臣忠規。不遺其力。卿蔚爲俊老。翼于沖人。黃髮無愆。清德有素。雖年塗云及。而志力不衰。陟恪肆勤。精明暢理。方陪大政。適倚老謀。比閱奏于公車。願還事于宰旅。已嘗批諭。猶此控陳。是未炤委成之懷。而自圖安佚之利。雖佳知止。難從恬退。

賜參知政事梁適生日禮物口宣

體資上節。地亞中階。自參翊以宣謨。號通明而任職。屬開秋之統序。協誕日之吐符。朝有彝恩。禮優近弼。爰舉匪頒之式。用將眷倚之懷。俾洽宴私。且昭榮遇。

賜定國軍節度使知太原府梁適口宣

省所進奉端午馬二匹事。卿利建高牙。倚臨雄關。爰遵浴蘭之節。來效籥雲之良。姑美勤恭。尤增嘉尚。

賜彰信軍節度使判成德軍李昭亮敕書

地濱北落。月旅西成。沖氣薦和。下滋于寶稼。靈苗合穗。交蔭于綺陸。昭萬寶之順成。示三登之長楸。卿兼榮麾鉞。長治戎翰。覩擢穎于遐疆。喜同符于異畝。倂圖來上。列牘以聞。將順在茲。欽歎曷已。

賜彰信軍節度使新授同中書門下平章事判大名府李昭亮赴闕茶藥口宣

卿召言侯藩。入覲王所。歷嚴途之阻越。諒旅從之勤劬。爰舉匪頒。以將眷勞。

又

卿外自國藩。入修王覲。歷悠長之官道。冒嚴厲之時寒。言念勤斯。固應勞止。爰伸迎賚。用示眷恩。

賜新除昭德軍節度使同中書門下平章事充景靈宮使李昭亮赴闕敕書

卿參中階之象。帥北落之師。煩我老成。亦已久次。方升庸于旌鎮。命總職于琳庭。亟奉介圭。促祇召節

賜馬軍副都指揮使淮康軍節度使張茂實赴闕茶藥口宣

卿遠從旌鎮。入衛巖除。廣莫風高。嘉平臘近。特頒良劑。用示寵恩。

又

卿召言歸國。緬想遵途。屬此凝寒。勞于匱薄。式將奩賜。庸示臺恩。

賜相州觀察使知邢州劉從廣赴闕茶藥口宣

敕從廣。合符去郡。效駕還臺。冒闕暑以甚勤。歷脩程而良苦。式頒珍劑。用洽寵私。

又

卿載馳藩節。近次都畿。佇延矚之有初。諒興居之無爽。用頒饋禮。式洽恩私。

又

卿言趨觀闕。適次郊衢。瞻受玉之有初。諒據鞍之匪易。用頒良劑。式示寵私。

賜侍衛親軍步軍副都指揮使涇州觀察使定州路駐泊副都署王凱赴闕茶藥口宣

卿總治師干。輯寧邊部。特降璽書之召。用頒藥劑之良。以表眷存。所宜祇奉。

又

卿肅奉更書還司衛職初無辦嚴之日〔案〕後漢書·吳漢傳·嚴·每當出師·避·明帝諱故·改之·引·此制·初
引辨·全句·原·本·辦·良深跋履之勞飲劑所殞恩禮斯在

文恭集卷二十六

內制

賜福建路轉運使秦玠平江西賊敕書

嶽者盜興江西。勢接閩嶺。延入爾部。驚騷吾民。汝善布教條。能設方略。協比州將。帥厲兵官。開募勇夫。剪戮姦黨。兇渠遂殄。生聚以安。使指告還。章封言狀。眷茲勤略。良可嘉焉。

賜提點刑獄施元長平江西賊敕書

汝早稱才名。外提憲寄。日者他盜侵于本部。勢頗屯結。衆甚繹騷。而能躬履險難。星言馳赴。奮厲衆力。開募短兵。剪戮兇渠。離散支黨。屬城以肅。外臺上言。協奏勤庸。甫知明略。有懷謙默。益用歎嘉。

賜知汀州藍丞平江西賊敕書

日者逋寇弄兵江西。小驚朕師。逸入比境。汝捍固本土。協議外臺。開募短兵。帥厲衆力。休有方略。訖致殄平。爾勞居多。使者言狀。有懷忠力。良切嘉焉。

賜京東路轉運使董沔殺散河北賊敕書

敕董沔省龐籍奏河北過來軍賊兇勢不小齊州兵甲殺敗後若不急行剪除或散入鄉村卽復爲民患汝尋披帶兵士徑往兗齊二州往來催督諸頭下兵甲接續殺獲事汝強濟有聞廉清自勉夙將漕節受任外臺而齊魯之疆濱接勝土潢池斯在姦盜是依屯結其中寇攘爲患擿發陰伏伺知起居親糾合于環兵廣設施于明略剪除支黨清定部封吏息追胥之煩民去驚騷之患茲惠孔碩厥庸爲多東藩帥臣刻章言狀有嘉勤懇良深歎矚

賜判大理寺郭申錫及審刑詳議官等敕書

敕郭申錫等省權知審刑院事張揆奏據大理寺日奏司申十月十六日以前送下公案茲已斷奏了畢無見在事外郡請讞繫囚待報況茲寒苦朕甚閔焉汝等法術通深才資開敏平亭疑奏附致比例咸適側成之愼而無几案之留有副欽矜良增嘉尙故茲獎諭想宜知悉

又

羣氓多辟庶獄滋豐用存疑讞之科以廣平反之施爰書來上累牘實繁汝等持法甚平以文無害究研惟允操決靡留遂停丹筆之書盡釋黃沙之繫適當歆毒良副哀矜爰覽奏陳尤多嘉尙

又

國家刑典用中獄疑許讞決平寄于列寺審克存于禁局相爲表裏參適重輕用愼側成庶無壅濫汝悉心處當持議詳明論報弗留開敏可尙閱茲奏述深于歎嘉

賜權判大理寺陳太素等敕書

朕日見羣臣親覽庶政。惟諫官論事。法官奏讞。雖復旰食。猶爲之論決。所以者何。防壅蔽而慮留獄也。汝等竝以一時之選。典茲三尺之法。能以明慎。敏于弊斷。鞠書隨傳。列牘告殫。益彰宿業之勤。良副欽刑之寄。永言嘉尚。弗忘于懷。

賜權大理少卿王惟熙等敕書

昔林光斷獄。歲止三四。貞觀大辟。裁二十九。嗚呼。何施而臻此乎。朕道化未孚。刑禁且衆。鞠書比上。請讞亦繁。汝善體哀矜。敏于弊斷。不使留獄。頗副欽刑。言念恪勤。弗忘嘉歎。

又

夫刑罰之于化民。未矣。然至治之世。不能去刑。朕燭理未明。躬化猶爽。鞠書狎至。治讞尙繁。汝等善體哀矜。良勤弊斷。丹筆無滯。几案爲空。爰覽削陳。弗忘嘉歎。

賜皇兄寧國軍節度使同中書門下平章事同知太宗正事北海郡王允弼敕書

卿任隆藩翰。地處親賢。參耀台文。董司宗牒。克諸公族。允穆朝言。近以宗說等瀆于人倫。陷此邦憲。迹惟可醜。理莫得容。卿首秉宗司。乃同官守。骨肉薄罪。乃養于私恩。名教大防。難隱于公議。深惟舉白。良合糾虔。屢上奏封。具昭謙畏。誠防閑之不逮。匪訓導之有愆。當體眷懷。勿煩敷述。

賜平江軍節度使兼侍中知太宗正事允讓敕書

卿藩國表儀。宗室賢亮。體行明潔。器範端修。資六德之夙成。賴九宗之治正。本支以睦。譽望孔昭。近以公族之中。愆于至行。弗率乃教。自陷匪彝。猶以家情。屈于邦憲。茲固愚鄙之稟。所謂不移。殆非訓導之方。有所未至。何用防嫌而上奏章。求解大宗之司。殊乖尙德之寄。當念燕貽之重。姑懷慎敍之仁。懋勉居諸。益勵來者。

賜起復雲麾將軍濟州防禦使王仁敕書

卿制邊部之雄。控大鹵之重。比因朝慶。且拜臺恩。遠傾就日之誠。來效籥雲之駿。有彰勤叩。良用歎嘉。

賜新授憲州防禦使劉渙敕書

汝以沈敏之才。得拊循之術。擢升軍禦。董治戎昭。亦緣端始之辰。併有效率之貢。載懷勤叩。良用歎嘉。

賜撫州刺州滄州鈐轄董貴敕書

汝遙剖左符。出鈐尺籍。遴茲景至。欽乃燎熏。能竭寅恭。交修貢助。彌昭誠恪。良用歎嘉。

賜侍衛親軍步軍都虞侯王從政敕書

汝參司親衛。出護邊兵。遴乃升陽。會茲報贖。修其貢助。奉此效率。有加勤恭。良深歎矚。

又

汝世濟勳勞。材推果壯。領巖除之禁衛。升侯奄之榮名。尙委強藩。實繫忠力。爰輸上駟。來寶外閑。載諗款勤。良增嘉尙。

賜鳳州團練使高順等敕書

汝出總戎翰內參親衛。力于經武。志在輸忠。爰因端節之良。乃選上駟之駿。效牽闕下。底貢中。載閑閱勤。劬尤增嘉尙。

賜知建昌軍曹觀敕書

汝職在劬農。土惟宜穀。修列郡經常之貢。省大官導擇之勞。言念效勤。良增嘉尙。

賜原州刺史知涇州安俊敕書

三朝受籍。萬玉在庭。汝擁衛邊隅。拱懷朝次。效名駒于龍友。實華廐于藁泉。眷茲虔恭。弗忘嘉尙。

賜海州團練使史吉敕書

汝肅綰戎團。分持軍簿。並緣任子。來貢維駒。慶賞所延。勤誠可尙。

賜潭州通判李丕緒等修子城敕書

敕李丕緒。省知潭州任顥。奏汝都大提舉管勾修築子城。用甄整砌。並得完備事。汝受任湘中。服勞官下。志存經遠。慮及居安。能協守官。率和旅力。增完城壁。就濬池隍。悅使有宜。樂成無射。條聞來上。嘉歎良多。

賜新除資政殿大學士吳育對衣金帶鞞馬口宣

卿籍起洛臺。詔藩陝服。偉名增職。左右陪卿。庸示眷毗。就頒錫與。

賜觀文殿學士田況乞致仕不允批答

卿素秉忠規。早司樞筦。經營百物。通知四夷。懋以愆和。久茲移疾。交章求解。批諭弗從。尋亮至誠。姑授閒職。庶熙神于事外。得味道于環中。就乃平康。副茲眷矚。何乃遂求。挂冕。荐貢奏函。卿雖身災所嬰。而年塗未艾。宜息煩慮。更謁善醫。及此暄辰。早復常膳。

賜參知政事王堯臣生日禮物口宣

才具之美。高映時髦。識業之明。坐陪國論。屬此仲商之序。協于誕日之良。舉是朝恩。助茲族宴。抑乃匪頒之式。體予眷賚之私。

賜新授右諫議大夫皇甫泌口宣

卿稔服吏文。兼資識致。擢升諫列。移領藩條。爰擇上駟之良。來奉內閣之貢。有懷勤叩。茲用欽嘉。

賜兵部員外郎知制誥吳奎知壽州口宣

省所進奉新茶芽事。具悉淮土上腴。園茗繁植。春英所掇。時品爲良。方貢是勤。嘉尙無已。

賜鎮潼軍節度觀察留後知鄆州李端懿口宣

省所進奉阿膠事。藥劑所須。膠品斯在。區產云記。阿井曰佳。卿守在藩條。述茲方貢。謹于熬治。協乃精良。足諒寅恭。誠增嘉尙。

賜新授禮部郎中充天章閣待制陳暘叔口宣

卿體業冲劬。器宇夷通。有意本朝。允宜內閣。乃眷北道。姑委要藩。爰貢良蹄。用嘉美志。

賜鎮安軍節度使判陳州程林口宣

赫以拜貺于郊。覃渥在位。而我王室之老。實殿輔邦之雄。賞策所班。朝範惟舊。俾爰子舍。往錫命書。卿出于忠純。篤爲誠節。選上駟之驟耳。實中廐之承華。載閱勤恭。彌深歎尙。

賜鎮東軍節度觀察留後知潁州李端愿口宣

省所進奉端午馬一匹。具悉。卿總司留印。長治帥藩。爰因采艾之辰。乃效傾葵之志。獻之上駟。奉厥內閑。有嘉勤恭。弗忘歎矚。

賜新授閣門使康德輿口宣

汝歷護塞兵。見稱武幹。適重別都之委。用優上閣之遷。當勵忠規。以虔恩數。

賜河陽三城節度使檢校大師同中書門下平章事王德用口宣

卿地美忠門。位聯宰路。聞于兩社。夙兆于祥占。乘彼八鸞。適敷于惠化。爰因誕日。用示錫恩。俾爰似績之良。奉乃匪頒之品。抑惟彝禮。遽閱奏函。選屈產之名駒。實承華之內廐。載惟款至。良切欽嘉。

賜五臺山十寺僧正順綰等敕書

省所進新正功德疏事。具悉。吉祥刹土。名勝伽藍。淨衆所棲。元正斯屆。大營蒲塞之饌。廣演貝多之文。用集妙因。來陳壽祝。勤恭彌顯。嘉尙良多。益在薰修。副茲嚴奉。

賜五臺山十寺僧知今等敕書

省所進新正功德疏到闕事具悉。汝等宴坐名山，安棲淨衆，曷遭三朝之吉，來祈千福之祥。用嘉乃勤，且命以賜。茲乃前矩，厥惟彝恩。咨示薰修，體予崇奉。今賜知今等紫僧衣一對，絹二十疋。故茲獎諭，想宜知悉。

又

汝等薰修巖谷，宴坐道場。因王歲之紀端，奉梵文而歸福。有嘉精志，用錫顯恩。宜服圓乘，益勤勝業。

賜回西蕃獎州團練使霞展敕書

汝欽奉聲文，恪修誠志。遠效踰沙之貢，載從易地之遷。庸示茂恩，益圖忠款。

賜西蕃獎州團練使霞展男都君主霞智敕書

汝族高邊部，志拱諸華。載馳上駟之良，來奉內闕之貢。有嘉款到，特示頒宣。

賜交趾李曰尊敕書

卿忠存奕世，義戴本朝。善繼藩稱，能靖封守。朕博臨庶國，普愛羣氓。爰覽啓陳，用嘉恭順。

賜占城國王敕書

卿志慮深純，誠節款到。邈居溟漲之外，馳系闕庭之間。嗣守忠規，述修世職。遣茲使介，奉乃表章。越沃日之驚波，致旅庭之貢物。傾輸斯至，勤叩可嘉。用示眷懷，特蕃錫與。益思祇順，當體寵優。

賜占城國王俱舍利波微收羅婆麻提楊卜敕書

省所差人進奉生象二頭。象牙二百二株。藥犀大小一百九十一株。下色紫礦一百九十一斤。中色煎香五百斤。下色煎香五百斤。事具悉。卿長治國藩聿修王職。地雖居于遐外。世彌篤于恪忠。匪忘存闕之誠。來效占風之貢。俾爰使指。載越溟津。亟覽表章。深嘉誠節。式將乃眷之意。特推加惠之恩。當體寵優。益思欽順。今回賜卿銀三千兩。錢一百貫。文至可領也。其差來蒲息。陶琶等到闕。各支賜對見朝辭衣物銀器衣著等。令于殿前都使衙安下。及差鴻臚少卿劉舜臣等。館伴令御廚翰林儀鸞司往彼祇應酒食鋪陳。其所乞白馬。已支賜二匹。訖。故茲示諭。想宜知悉。秋涼。卿比平安好否。遣書指不多及。

賜夏國主進奉賀正馬駟口宣

王歲肇新。人正伊始。眷乃世藩之舊。主茲邦土之封。爰效忠規。聿修貢式。緬懷款至。良用歎嘉。

賜夏國主生日禮物口宣

紹復前徽。述修貢職。素秋建始。良日誕彌。用示眷恩。式將慶賜。無忘朝寵。益濟世忠。

又

奕世資忠。承邦濟美。三朝開序。六射協辰。爰導壽祺。式將惠賜。益思恭德。庸對寵章。

賜回夏國主口宣

省所奏母薨訃告事。具悉。不圖閔凶。奄失慈怙。忽聞來訃。用怛于懷。棄背以還。哀摧難處。惟當抑割。無致殞傷。撫念所深。喻言何旣。

贈太師中書令貽永祭文

卿體行淑均。志慮忠篤。久毗內密。蔚爲老成。甫解繁機。俾究遐福。奄忽不愆。傷悼于懷。適及攢塗。裁致薄酌。餘哀所寄。明識當知。

贈太尉兼中書令濮王祭文

惟靈地居宗戚。德乃令王。遘于綿疴。奄然長逝。茲用恫悼。不忘于懷。卹典申加。攢塗暫闕。爰修奠酌。其鑒追哀。

又

早繇近戚。參賴敏材。領帥藩房。留治都局。年塗雖晚。志力尙強。奄及云殂。初不開疾。永言茲悼。有歎常懷。馳遣信臣。裁致薄酌。緬想營識。儻能歆斯。

又

籍在外屬。帥茲列藩。歷侍近嚴。比更煩委。適奉朝請。奄至喪亡。先遠有期。永懷無已。俾爰伸酌。冥識追哀。

文恭集卷二十七

內制

皇帝賀大遼太后生辰書

義重陸鄰。禮敦誕日。企徽慈之凝範。因慶育之履祥。爰命使軺。式將信幣。祝茲壽嘏。表乃誠忱。

賜契丹人使茶藥口宣

卿信函修睦。誕節講權。載勤使隰之行。諒有夕冰之愼。用頒湯飲。式示眷懷。

又

卿對持瑞節。參奉信函。來慶誕辰。載涉長道。用頒飲劑。式表眷恩。

又

卿等對持節旄。遐涉疆亭。紹修誕日之權。夙戒暄辰之御。有少賜物。用表至懷。

又

卿等奉將信節。馳慶誕辰。固多跋履之勞。用頒齊和之品。副之良茗。咸表眷恩。

又

卿陸鄰將命。誕節修懽。惟原隰之驅馳。有風塵之匱薄。俾爰往賚。用示眷恩。

又

卿式將赴告。載越阻脩。固多跋履之勞。宜厚撫存之眷。用頒良劑。以示至懷。

又

卿等對銜使指。交慶歲元。久冒寒凝。良勞跋履。式將賜物。庸表至懷。

又

卿奉將使指。載整華輶。惟匱薄於風寒。諒勤疲於原隰。就仲頒賚。庸助綏將。

又

卿參陪上介。並駕輶車。深惟跋履之勞。固積疲勤之思。往伸勞賜。用表眷存。

又

卿首銜使指。交慶王正。惟匱薄于盛寒。諒勤疲于脩陸。致茲賚物。昭乃眷恩。

又

卿信節副行。端辰入慶。登岐云逸。攬轡良勞。宜有匪頒。以昭眷囑。

又

卿蔚居使首祗慶歲元。屬風霜之凜如。諒原隰之勤止。式將予賚。俾澤爾勞。

又

卿陪貳使華。講修鄰好。慶三元之嗣歲。歷百舍之在塗。宜有賚焉。且嘉勤止。

又

卿等竝持國節。紹講鄰懽。勤勞累驛之程。匱薄餘寒之氣。式將賜物。用示眷懷。

又

卿對銜使命。紹講鄰懽。率旅從以來斯。冒脩塗而勤止。往伸賚物。用表眷恩。

又

卿等蔚爲使首。遙奉國函。來修誕節之懽。良苦長塗之涉。特伸頒賚。庸表眷懷。

又

卿陪貳使聯講。修鄰聘。爰得謁關之告。用嘉馳隰之勤。往致匪頒。式昭眷勞。

又

卿蔚爲使首。聘茲歲端。載迂晨霧之行。諒有夕冰之愼。用頒良劑。以表至懷。

又

卿因三元之首。講二國之懽。率旅從之甚勤。冒祁寒而良苦。俾爰賜物。以示眷懷。

又

卿以二國之好。充備于使華。三朝之元。踐修于儀聘。載勤馳隰。仍冒凜冬。良劑所頒。沖眷斯在。

又

卿協恭使指。爰率于烝徒。奉聘歲元。式將于信幣。寒凝甚苦。匱薄良勞。茲用寵頒。以昭深眷。

恩州賜北使茶藥口宣

卿等來慶誕辰。適當維夏。駕乘駒而云逸。馳使隰以良勞。特示寵頒。用伸至眷。

又

卿等對將聘節。胥泊烝徒。來修誕日之歡。載涉迺疆之迥。特伸頒勞。用示寵嘉。

白溝驛撫問北使口宣

卿等張是使旛。講于懽聘。來慶誕彌之吉。諒多匱薄之勤。用示眷慈。特頒宴賚。

白溝驛撫問北使兼賜御筵口宣

卿等嗣修鄰好。甫次溝封。載勤使隰之行。宜有詔筵之錫。用嘉冒涉。特示眷存。

又

卿等銜奉信辭。講修誕好。惟載馳于使乘。諒甫次于疆亭。用示眷慈。聿伸宴勞。

白溝驛撫問遺留人使兼賜御筵口宣

卿等式將遺意爰奉訊函次境舍以方初駕軺車而良苦宜伸宴勞庸示眷懷

雄州撫問遺留人使口宣

卿等奉將末命來致遺儀馳原隰以良勞次溝封而云始用伸撫諭宜體眷存

雄州撫問北使口宣

卿等言冒脩程來尋舊好且以嗣君之慶續茲與國之懽緬念勤疲用伸撫諭

又

卿等對銜君命聯飾使輶惟境上之甫臨計道中之良苦俾爰勞問示乃眷私

又

卿等交慶歲元甫臨境首顧寒凝之方盛在跋履之良勞用撫乃誠式將予眷

又

卿等交修鄰好胥慶歲元適冒寒塗良煩旅從有嘉勤篤特示眷存

又

卿等被選使華務修邦聘涉溝封而伊始戒徒御而甚勤特示撫綏用伸眷矚

北京賜北使御筵口宣

卿等肅將君命祇講鄰懽願旅從之寔繁屬祁寒之斯盛用伸宴賜式示眷綏

又

卿等踐修篤好。馳冒遐塗。爰偕旅從之行。適次別都之近。用嘉勞止。是錫燕胥。

又

卿等慶茲誕節。奉乃聘儀。來修與國之懽。適次別京之近。爰伸燕勞。用表眷懷。

又

卿等載馳使隰。爰講鄰懽。眷駿邁以勤斯。諒脩程之勞止。就仲詔撫。庸示宴慈。

班荆館賜北使赴闕御筵口宣

卿等肅將君命。俯次都門。跋履良勞。敏勤可尙。特頒宴惠。用示眷懷。

又

卿等銜命新君。駕言遠道。來奉纂承之告。諒多跋履之艱。適次近亭。用伸勞宴。

班荆館賜北使到闕酒果口宣

卿等睦隣持聘。嗣歲講懽。飭車馭以良勞。次國門而伊邇。用頒勞賜。式示寵恩。

又

卿等紹修鄰好。交慶歲元。如聞使乘之馳。已次都門之近。式將予賜。庸勞乃勤。

又

卿等奉聘講權。祝延修慶。載馳使隰。近次都門。爰命寵頒。式昭渥眷。

又

卿等載脂使乘。言屆都門。講權聘以惟勤。申宴慈而既渥。用嘉行邁。式示眷優。

又

卿等踐修時好。聯慶歲元。俯次近郵。良勤長隰。縹醪甘實。用寵示恩。

又

卿等預選使華。交修權聘。惟嚴塗之載涉。諒旅從之甚勤。用均御府之甘。以勞輶車之恪。式昭眷寵。宜在祇欽。

又

卿等奉將遺指。言次近鄰。爰屬炎辰。載勤遐路。宜伸勞賜。以表眷恩。

就驛賜北使內酒果口宣

卿等久馳使隰。甫憩都郵。惟按轡之良勞。且解裝之方適。用頒甘品。式示寵懷。

又

卿等使旛來聘。里館載寧。用頒膺寸之醪。兼錫上腴之果。侑茲宴勞。體乃眷恩。

又

卿等講修誕慶。協比使華。冒暄溽以良勤。宜偃休之爲適。特伸頒賚。用示眷嘉。

又

卿等使指遙銜。歲元交慶。爰錫甘腴之品。仍頒醇旨之醪。以侑樂胥。當欽眷寵。

就驛賜北使生餼口宣

卿等將命乘軺。告言纂服。涉疆亭而惟邈。授里館以云初。勞至有儀。所頒非腴。

又

卿等對銜君命。胥慶王正。爰當定館之初。用舉饋牢之舊。頒茲餼禮。表乃眷恩。

就驛賜北使銀沙鑊唾盂等口宣

卿等奉若信函。慶茲獻節。解裝伊始。授館有初。爰命頒恩。以昭眷待。

又

卿等震誕修懽。遠華將命。言念乘軺之久。屬當授館之初。特示寵優。用伸頒錫。

又

卿等使乘聯華。慶函講好。求祝延于誕節。方休舍于都郵。爰命寵頒。式將渥眷。

又

卿等來慶誕辰。載馳長道。在勤勞而可尙。屬休舍之有初。用示恩頒。以昭眷寵。

就驛賜北使春幡勝春盤等口宣

卿等慶屬歲元。紹修邦好。嘉逢春節之立。喜見年芳之新。用示眷恩。式昭禮意。

玉津園賜北使弓箭御筵口宣

卿等來修邦好。方舍都郵。聊折俎以致懽。命司弓而延射。用伸宴勞。式表眷恩。

正月一日北使入賀畢歸驛賜御筵口宣

卿等受言君所。講好王正。方從里館之寧。且示詔筵之賜。用伸勞飲。式表需恩。

又

卿等奉將使節。來慶王春。展聘幣以成儀。頒詔筵而示惠。用昭乃眷。于以勞動。

又

卿等來慶歲元。奉修邦好。爰卽安于都舍。乃就錫于詔筵。用洽懽愉。當知眷寵。

正月一日北使入賀畢就驛賜花酒果口宣

卿等銜指嗣君。繼好先日。來赴惟新之慶。爰屬履端之元。申命寵頒。式將渥阿。

又

卿等通懽二國。修慶三朝。爰因休舍之辰。載錫甘醇之品。用嘉惠好。當體寵恩。

又

卿等使車將命。王歲通權。授館有初。解裝少憩。宜伸惠賜。以表眷懷。

又

卿等式將好幣。已達訊函。方退息于都郵。宜就頒于良醞。副之甘實。體我眷恩。

正月二日北使就驛賜宴花果口宣

卿等持聘已成。履元伊始。久驅馳于華隰。適休舍于都郵。芳翠甘醇。式將眷賜。

契丹賀乾元節人使朝辭訖就驛賜酒果口宣

卿等夙持鄰聘。申慶誕辰。嘉成禮之有儀。在眷懷而增厚。宜頒優賚。式示寵章。

賜北使朝辭訖歸驛御筵口宣

卿等慶屬歲元。寅修鄰聘。訖奉報書之禮。還脂使乘之行。用錫宴慈。式將眷寵。

又

卿等奉聘訖儀。駕言復命。將載脂于歸轍。爰用錫于詔筵。渥眷是將。言還斯在。

又

卿等王歲修權。使華成禮。已入辭于宸陛。命就宴于都郵。用示眷慈。式敷契好。

又

卿等奉聘成儀。駕言復命。率烝徒而駿邁。詔祖輟以寵行。且有頒宣。以伸眷待。

又

卿等與國修歡。誕辰畢禮。將復乘輅之命。用頒折俎之恩。俾洽宴胥。式將眷矚。

又

卿等竝緣誕節。來講至歡。會訖邦儀。言旋使乘。用頒宴勞。式厚眷懷。

班荆館賜卻迴北使御筵口宣

卿等展成信幣。還駕使車。用勤祖輶之行。特舉詔筵之餞。以將惠好。當體寵私。

又

卿等擁節交歡。稱觴究禮。屬言旋于使乘。用伸餞于詔筵。且寵成勤。式昭異眷。

又

卿等持聘訖儀。駕言復命。飭使裝而告邁。仲祖輶以寵行。用嘉爾勞。式予眷賚。

又

卿等將命講歡。駕言迴馭。爰卽近郊之館。命修載輶之儀。式啟燕胥。以伸眷勞。

又

卿等訖奉函題。還脂輅乘。出次長亭之近。眷言旅從之行。就錫甘醇。用昭寵渥。

又

卿等展幣成儀。還轅復命。近郵云餞。輾轍且行。宜示頒恩。以將渥眷。

北京賜卻迴北使御筵口宣

卿等肅將時幣。交慶春元。飭歸馭以載馳。次別都而伊始。用伸宴勞。當體眷恩。

又

卿等爰斂聘圭。載脂歸轍。眷別都之云屈。在旅從之良勤。特示勞還。用伸詔餞。

又

卿等誕節講儀。使華成命。言脂車轄。載涉川疆。用錫詔筵。以勤還馭。

又

卿等震誕修權。旅歸致命。竝馳使牡。戾止別京。特示宴胥。用伸眷寵。

雄州賜卻迴北使御筵口宣

卿等展成聘幣。促駕歸轅。載惟原牡之馳。俯屬疆亭之次。特伸詔餞。以洽寵恩。

賜北使迴至瀛州御筵口宣

卿等修好成儀。駕言復命。適屬歊炎之候。諒多履跋之勞。爰錫宴慈。用伸眷渥。

又

卿等惟新稱嗣。來赴于續承。載轄歸期。聿勤于駿邁。往頒慈宴。用示需恩。

又

卿等將命陸鄰。紹敦于舊好。駕言歸國。載涉于脩岐。爰錫宴胥。用伸眷勞。

瀛州賜卻迴遺留人使御筵口宣

卿等被遺舊君。奉修遺好。冒至寒而歸國。率旅從以在塗。申厚燕胥。庸昭眷矚。

白溝驛賜卻迴北使御筵并撫問口宣

卿等爲壽誕辰。戒言歸國。歷疆亭而載邈。率旅從以良勞。特示宴慈。用昭寵餞。

文恭集卷二十八

帖子詞

皇帝閣春帖子

〔案〕本集諸帖子亦宜有之。殆爲傳寫缺佚。

三元鳳歷當春始。萬壽龍扈進御前。綵勝朱幡宜此日。金枝玉葉慶新年。
蒼玉新旂祀木神。今朝太皞始司春。農墮漸覺星辰正。壽歷長隨日月新。
翦綵房中新勝出。披香殿裏早春回。祥雲更傍南山起。來對君王萬壽杯。
苑中芳樹條風細。天上黃衢杲日遲。仙果定生千歲實。祥烟長護萬年枝。
春官青鳥司開啓。星舍蒼龍主發生。甘雨惠風資帝力。杏花蒲葉勸民耕。
玉殿香絲縈綵縷。金盆白雪間紅花。子孫千億無疆壽。盡逐東風入帝家。

皇后閣春帖子

羲仲司暘谷。塗山佐夏王。六宮師儉德。四海化躬桑。
中禁千祥集。東方萬象新。綵幡迎喜氣。寶字鏤宜春。

東陸韶光先四序。周南風化被羣芳。資生萬物昭坤德。嘉慶千春集紫房。
東風初入長春殿。碧溜新融太液池。社遠未當迎燕日。川晴先近浴蠶時。
白綠仙雲雜紫雲。長生靈氣護元君。已膺虎劍司陰教。更珮金璫奏寶文。

妃閣春帖子

日向陰虬永。春隨綵鳳歸。玉京多燕喜。金殿滿光輝。
宮中玉漏迎遲日。天上珠躔麗次星。軒頂聖圖光億載。皇英賢範奉千齡。
音官始奏融風至。御水初傳曉凍開。寒漏催將仙臘盡。春旂飛入貴宮來。
翦綵平明出藝房。長生殿裏百花芳。書銜燕子青春早。劍拂仙衣白日長。

夫人閣春帖子

綵樹春芳滿。仙萸晝景長。早花依玉砌。初溜漾銀塘。
浴種宜蠶事。修禊盡燕祠。資生迎木正。蕃衍納春祺。
醴酒淳神水。延年飲露華。八風朝聖日。三境住仙家。
雪晴宮樹有新梅。來報東郊淑氣回。春令先從天上起。年芳初向日邊開。
迎氣青幡獵曉風。九門佳氣鬱葱葱。日華初在樽桑上。春色先歸御柳中。

皇帝閣端午帖子

南極注生氣。晉官協夏鈞。良辰五日永。景福四時新。
曉霽澄天宇。離明敞帝閭。靈符千福集。神印百邪奔。
剛日逢端始。炎辰屬長贏。君王仁且聖。慈旨卻梟羹。
殿戶還颺入。宮池御水涼。綵舟人競渡。化國日偏長。
四時乘大德。五日敞金扉。陽晷移南陸。天光盛紫微。
商管徵陰動。良辰午正端。三光扶聖壽。億載奉皇歡。
三殿茲辰奉御觴。薰風梅雨好年光。炎天更作奇峯勢。來表南山壽歷長。
後宮馭鳥將雛樂。上苑安榴著子新。嘉節已將天合數。明離還覩日重輪。
南方炎帝本乘離。長育羣生在此時。命縷綵花傳故事。風光天上更相宜。
南方朱鳥司時令。東闕蒼龍護禁扉。萬壽御觴端日舉。祥風三殿繞雲旂。
九霄嘉節重端辰。命縷靈符粲寶文。虞舜無爲心自正。五絃琴上奏南薰。
寶岐麥色黃雲重。御苑榴花丹焰深。已顯豐年資帝力。更憑佳節悅天心。

皇后閣端午帖子

川館親蠶後。宮房獻繭初。香繒爭點畫。綵縷競垂舒。
棟葉迎新候。菖花發美祥。憂勤宣內則。嘉宴助時陽。

靈艾傳芳遠。仙萸吐葉新。配乾資厚德。介祉集嘉辰。
星火朱光熾。繒絲采物華。謹謠宜聖日。王氣協皇家。
紫禁端辰晝。漏長朱陵生氣盛。南方長秋此日。司陰教。皇極同時納壽皇。
壽觴百福融。甘露寶索千祥鏤。彩雲五日永逢佳令節。億年長奉睿明君。
香爐角黍傳三楚。丹篆靈符辟五兵。更有龜臺仙藥在。河洲賢德保長生。
靈苗遠採三山藥。仙篆高飛六甲符。此日萬神同翼衛。長秋洪算與乾俱。
蕤賓干氣盛炎方。坤德資生茂百昌。西域葡萄初蔓衍。成周瓜瓞更綿長。
楚粳雕盤九子香。綵絲朱索更迎祥。坤元此日扶皇極。偉兆先時協壽房。

夫人閣端午帖子

五絲通遺問。百草鬪輸贏。神印能祛惡。靈符解辟兵。
天家饒物采。華節有光輝。明月裁歌扇。輕霞翦舞衣。
禁苑年光麗。端辰物象華。天風結桃實。火德盛榴花。
蓮葉抽芳際。榴房結子初。長年鬪百草。舊俗祭三閭。
廣殿回雕輦。滄池漾綵舟。堯心順時令。不是重嬉遊。
魚龍曼衍夸宮戲。湘慮浮沈銜水嬉。齊上聖皇千萬壽。飄然仙樂在瑤池。

故事順時差角黍。舊儀乘節浴蘭湯。人間涼麥欣時豫。天上薰風愛日長。
續命由來宜綵縷。辟邪相向佩靈符。夏鈞調樂長生酒。歲歲宮中祝聖圖。
宮中應節垂金鏤。天上迎祥捧玉卮。更奏開元羽衣曲。年年長願侍瑤池。
彩艾相傳禳故氣。香茅競愛結靈芳。炎洲正覺仙遊盛。化國偏知日景長。

上梁文

醴泉觀涵清殿上梁文

兒郎偉。國家出神明之後。濬發靈源。受天人之歸。勃興炎歷。軼夏商而拓迹。介河洛以造邦。混并八紘。傳
序四葉。皇帝紹祖功。宗德之烈。躬神武聖文之姿。大明燭于六幽。至仁孚于羣品。運陶甄而範俗。丕變中
和。偃戈革以靖民。洽臻昭泰。大秩百神之祀。上躡三靈之休。天瑞格思。坤珍至止。眷言京室。粵在巽隅。有
龜蛇合體之精。顯水土北方之異。蟠居息壤。愆湧榮泉。色華清以蕩邪。味甘飴而蠲疾。祥聞神隕。惠洽都
人。有悅宸心。爰稽瑞牒。卽其爽塏。峙厥靈祠。嚴香火之薰修。極規模之壯麗。鬱攸勿戒。豈冥數之有常。建
章乃營。在舊文而可作。集班倕之巧匠。飭荆楚之美材。攷工程能。庶民獻力。天老練其日策。石申候其星
經。抗華殿以正基。架修梁而結宇。雄虹晨挂。采翟朝飛。聳層構以凌雲。成新宮于不日。道旁盛于輿馬。觀
者同于堵牆。飫賜之豐。旣覃于微阜。驩謠之美。敢采于游童。且慶落成。用陳善祝。

兒郎偉。拋梁東。石橋觀日任施功。三韓百濟歸封內。方丈蓬萊在日中。
兒郎偉。綴梁西。青雲可上不須梯。雪山葱嶺人無外。宛馬蒲桃路不迷。
兒郎偉。拋梁南。赫赫王靈海外覃。薰風養物深仁被。鯤壑無波至德涵。
兒郎偉。拋梁北。天子威靈操斗極。單于攬酒奉驩盟。潢水占風朝有德。
兒郎偉。拋梁上。路近銀河翻碧浪。陽鳥戢翼過猶疑。金雀栖觚鎖相向。
兒郎偉。拋梁下。鬱鬱祥氛徧朝野。九龍于此護靈泉。六甲相將扶大廈。
伏願拋梁以後。帝圖益大。天歷彌長。區宇嘉靖。歲物蕃昌。乾剛增九五之吉。本支茂千億之祥。惟威神之
館御。佑鼎祚以無疆。

集禧觀大殿上梁文

兒郎偉。我國家席真祖之慶源。受上穹之駿命。誕膺炎歷。昭啓黃圖。設都河洛之間。廣朝萬寓。建號房心
之次。大撫八紘。威稜震于鬼方。聲文燁于海裔。訖惟人面之類。達于王土之濱。莫不重九譯以來庭。執萬
珍而入貢。奉昭華之玉琯。獻弱水之神香。如衆星之拱北辰。若百川之赴巨海。三代土疆之制。悉統京師。
五岳神靈之祠。並居封域。欽屬先真之聖。尊加帝者之居。爰就國陽。載嚴館御。奉真游而惟永。歷年祀以
彌長。皇帝上聖。難名至人。冠古纂睿。圖于三后。接遐武于九皇。仁厚之風。誕孚于億聖。齊明之志。昭達于
萬神。謹聖志以奉先。穆淵衷而居上。欽山岳崇高之祀。勤歲時朝謁之誠。徐御乾龍。疑瞻粹像。爰攷斯干

之制。載新大壯之模。選文梓之偉才。卽坤靈之寶勢。千章工度。庶民子來。詔郅手而督繩。命日官而推策。駕修梁之百丈。引建木之千尋。歡聲沸于皇衢。喜氣浮于絳闕。輒采與人之頌。以廣游童之謠。

兒郎偉。拋梁東。三韓鼓舞樂華風。扶桑海樹朝暎上。方丈仙山瑞霧通。

兒郎偉。拋梁西。舳舨迢遞與雲齊。海中渤澥還驚淺。天外崑崙更覺低。

兒郎偉。拋梁南。萬壽山光滴嫩嵐。伏波銅柱王靈遠。虞舜薰琴帝澤覃。

兒郎偉。拋梁北。天子聲明通斗極。日南朝貢識天光。塞外耕蠶知帝力。

兒郎偉。拋梁上。日月星辰近相向。雲中僊語近還聞。天上銀河明可望。

兒郎偉。拋梁下。鬱鬱祥煙浮碧瓦。柔桑蔽日徧羣方。多稼如雲平九野。

伏願上梁之後。邦基鞏固。天業暉昌。元元躋于富壽。日日擁于休祥。少海重潤。前星載光。惟鼎祚之云遠。

與嶽鎖而無疆。

修蓋陸親宅吳王院神御堂上梁文

兒郎偉。我國家真祖開先。靈基憑厚。太微正氣。上稟于列精。臨代寶符。早恢于王略。惟天眷命。奕世多神。乘火勃興。紹乾闡繹。祖功宗德。造統葉于億年。武略文昭。茂本支于百世。今皇帝至仁溥博。上聖登閔。利澤浸于懷生。文告柔于異類。極三光之均照。逮九譯之所通。莫不賓從。悉蒙覆冒。惇敘唐堯之族。展陸宗周之親。大列宅于京師。廣析藩于茅瑞。踰郇滕之啓胙。厚魯衛之建封。時乃維城。請營原廟。圖奉烝嘗之

薦申懷霜露之恩。勉從郡邸之章。特置諸儒之議。曰咨大匠。往飭衆材。攷北拱之極星。順方中之營室。裁茲崇址。詔厥清臺。練日策以維良。瞻霄衢之云霽。大鳴鼙鼓。上架脩梁。治建木之千尋。引長虹之百尺。盈車載酒。有肉如陵。賜上林之錢。茲焉山積。頒織室之錦。爛爾霞鮮。工徒悅使以忘勞。人士縱觀而竊歎。仰天子烝烝之孝。美公侯振振之風。克成壯棟之規。永保絳瓜之祚。式揚駿烈。用紀聖猷。

兒郎偉。拋梁東。秋霽三山氣象通。近窺日觀升雲白。平瞰天池浴日紅。
兒郎偉。拋梁西。葱雪聲文萬國齊。昭華玉瑄今仍獻。注水龍媒日更嘶。
兒郎偉。拋梁南。重譯來朝美化覃。越裳獻雉昭無外。江鬱捐珠示不貪。
兒郎偉。拋梁北。戴斗通驢懷以德。偃兵武庫表王靈。躋俗華胥資帝力。
兒郎偉。拋梁上。鬱鬱葱葱扶大壯。喬雲雕竊互呈鮮。合璧連珠近相向。
兒郎偉。拋梁下。華黍有秋盈綠野。湯孛飛走洽深仁。堯壤謳歌被純嘏。
伏願拋梁以後。聖圖日熾。宸算天長。導迎善氣。感育少陽。璇源逾遠。玉榦彌強。天休滋至。地寶蕃昌。惟兔焉之粗構。等歸若之靈光。

文恭集卷二十九

策問

御試賢良王彰夏噩策題

皇帝若曰。朕纘祖宗之洪業。撫區夏之重器。臨政思治。于茲三紀。何嘗不中夕惕厲。昧且丕顯。延訪茂士。詢求讜言。冀臻治平。以垂永久。子大夫哀然充賦。咸造在庭。得不欲摠發智蘊。開沃朕心耶。方今庶務小康。至化猶鬱。兵戎雖戢。饋餉頗勞。學校雖興。禮讓殊鮮。官冗而浮食者衆。民疲而失職者多。陰陽爽和。眚沴間作。經濟弛于常道。淫雨溢于舊防。賦調尙繁。昏墊靡息。豈朕明有未燭。德有未孚。致咎之來。在于爲懼。自昔繼體守文之君。承前聖之烈。藉累世之資。致圖空之隆。騰頌聲之美。惟建武中興。亟修文德。貞觀特起。驟致太平。豈天時之協符。將人事之胥濟。功業遲疾。奚其不同。側席永懷。望古盈愧。夫聖王之制世也。必本于仁義之統。師道德之說。飭以儒雅。頒其教令。尋孝宣之治。尙于刑名。迹顯宗之政。本于理法。當二后之際。信賞必罰。刑清國富。鳳凰屢下于郡國。神雀比集于京師。致茲美祥。繄何然哉。今公卿大夫。與朕總方略。美風俗。而吏治未甚淳。民德未甚厚。豪右踰制。姦猾冒禁。以至守宰之任。循良罕劬。廚傳移于

使客徭役迫于下貧。殆有愁嘆之聲。未弭鬱堙之氣。豈躬行之弗類。而圖治之匪章歟。昔晁錯舉于賢良。公孫對以文學。深陳政道。竝先術數。仲父治國之器。內史詔王之柄。咸垂格訓。當安設施。至于春秋之稱一元。洪範之推九類。何行而正其本。何施而建其極。子大夫習先聖之術。熟當世之務。識古今王事之體。究天人精禘之原。所以蕩穢致祥。革弊興利。受策應問。咸以正對。毋諱有司。稱朕詳延之指焉。

御試武舉策題

皇帝若曰。夫威武者。文德之輔功也。雖復至治。疇能去兵。比詔有司。圖講常武。博延方略之士。參閱材技之能。冀崇善經。以馭長轡。子大夫曉習兵策。賁然造庭。質于前聞。佇乃明辯。夫兵本于仁義。戰畜于慈愛。而曰詭道。危事。何耶。邦國之法。雖曰制軍而詰禁。帝王之兵。曷云以全而取勝。司馬之體。閔廓謂何。霸者之師。節制安在。昔晉侯之伐秦也。誰氏知其有功。楚子之救鄭也。何人料其必敗。兵法貴拙速。而譏巧久。若然。則亞夫失破吳之策。充國無制羌之功也。小堅大敵之禽。什圍倍戰之法。曹公官渡之克。何關于衆寡。晉文城濮之戰。試言于奇正。直入武庫。策本孰施。先趨北山。法何以勝。朕嘗讀良史之傳。疑各將之功。以孫武子之才。僅能入郢。有樂毅之略。不卽下齊。豈乏奇謀。諒有深旨。前代車戰。其來尙矣。後世以武剛而自衛。以偏箱而致討。或行則載于戈甲。止則爲于營陣。宜條利害。若爲設施。悉心以陳。朕將親覽。

試南省進士策題

問天道陰陽。實通政事。王者生殺。宜循時令。自秦任法理。漢尙經術。太初推歷。甫用夏正。故事報囚。必盡

冬月乃著經常之制。初無淹繫之煩。建武中興。率遵舊典。元和下詔。始改孟冬。議者頗贊其然。通儒復譏其否。執助陽順生之論。持議獄緩死之說。咸有經據。著明言之。國家道粹前王。刑孚中典。炎歷斯握。則與漢同。丹筆所論。尚仍唐舊。姑欲順三微之用事。去四時之行刑。凡當大辟之科。悉限季冬之斷。用遵卦氣。以攷天心。然而積習生長。更張慎始。固惟明識。雅富多聞。幸商摧于古今。願詳陳于義理。

問、國家謹四夷之守。飭三邊之備。百萬之衆。領在將屯。什一之租。糜于支計。居常餉道。仰糴富賈。凡入粟于塞下。例受錢于都內。贏息莫計。乾沒無涯。歲或不登。人且勞止。道塗有捐瘠之歎。郡邑煩振業之方。深惟從權。規欲濟事。攷諸周典。甫侯有贖刑之法。稽于漢世。晁錯有免罪之策。所以厚民收怒。實邊弭患。且欲詳按舊制。闊略輕科。自非犯盜殺人。受賕撓法之類。理不得捨。意在必誅。餘竝差次免刑之條。申明入穀之贖。以實邊境。以防災潦。雖復失之有罪。不猶賢于賦民。勗思張敞之言。留省望之之議。條陳利病。開示話言。

問、八卦繇策而起。九疇以數而興。河洛之書。相爲表裏。天人之際。莫不該貫。固以究性命之韞。著禍福之效。包括三極。陰陽下民者也。何則。輔嗣解易。孔氏釋書。六爻文辭。止明人事。五種性行。專推王者。迨至上經下經。離爲二說。五福六極。合爲九類。斯文若此。其義安適。申尋前世。博存衆業。京氏之術。列于學官。夏侯之經。治于博士。咸以儒者。明于天道。前賢多習。舊史具存。厥後蔑然。其故何也。且欲兼崇其學。使名其家。庶幾精義之弗淪。或謂異端之斯害。遲聞明辯。用釋疑懷。

問、經莫大于易。坎之象曰：王公設險以守其國。丘明之傳曰：恃險與馬，無與國焉。吳起對魏文侯曰：在德不在險。後世拘文之士，莫不歎息起言，引爲鑒照。按堯都中冀，舜都蒲阪，夫豈乏德耶？曷爲竝據河山之勝哉？豈易之書故不及春秋戰國一時之辯乎？蒙竊惑焉。願問經傳交戾之說，折以至當。

銘頌

烈文卽政頌

聖文睿武仁明孝德皇帝御大器之踰年，改元乎天聖，協華寶歷，承光祖統，親朝長信，用漢家五日之儀，委成家宰，修商帝三年之制，德心克廣，孝思不匱，又明年新火再出，祥琴且御，皇帝慕孺軫悼，明發忘寐，顛居靖冥之館，眇思恭默之道，于時有位卿弼，樂親戶牖之坐，彼都人士，渴聞警蹕之音，懷思皇皇，若有求而未得，于是三府元老，諸邸皇屬，外廷表著之俊，周衛環拱之士，相與叩延英之閣，奉需頭之奏，且曰：上天之載無聲，樹君而司牧，聖人之寶曰位，代工而統治，先王知駿命之不易也，故光裕大德，以席先靈之休，知賢業之可久也，故卜建冢嗣，以系萬世之統，所以尊一王之大，固九鼎之重，三代之君，綽有令問，善繼志而述事，能祈天而永命，大橫啓兆，隆弈世之基緒，小心嗣位，昭前人之光明，用能登格皇穹，翁受遐福，詩書所嘆，簡墨攸在，陛下起元嫡，握神寶，典主震器，協星海之輝潤，紹休乾圖，恢天日之覆照，靜淵敦敏之性，泰定于德宇，緝熙光明之學，優入于聖域，播憲循于軌物，賦政諮于哲艾，躬承積累之慶，奉持

燕翼之謀。是以六飛御辨之辰。兩宮布度之際。表裏悅穆。上下安安。五土柔嘉。悉保于正色。萬物森植。咸極于崇丘。而陛下天姿粹溫。聖性謙亮。亦既禪除之制。彌懷孺慕之愛。金冊顯號。推洪代而弗刻。玉牀貴位。虛長秋而未建。上帝山川百神之祀。久俟翠華之來。咸池英莖六代之樂。未登端冕之聽。萬方企竦。羣臣迷撓。噴有夏蟲之疑。鬱懷旱雲之望。是宜推策迎日。先天奉時。攷帝典肆類之儀。舉王祭升中之禮。按元封刻石之事。建明堂受記之歷。紹建先憲。拱揖羣神。因斯而談。不亦休歟。上乃回精易慮。煥發隆旨。且曰。羣公元宰。告朕以祖宗錫羨之美。郊丘報貺之事。敢不親執圭鬯。以允天人之意。芾乃陟仙閣。探神策。薦功魄寶。同符先帝。此事體大。未遑經畫。姑俟十五物來。徐議其可。乃命太史練日。儀曹具禮。因羲車之南至。薦吉土之精享。御時龍之乘。備法物之駕。百靈扈蹕。齋于高廟。翼日寶校。次于帷宮。天光晏溫。日華明練。陳玉帛二精之物。建金石九奏之樂。聲氣遠條。坑谷皆滿。薦鬯之夕。絳光肅然。照乎馨黍之薦。奉以委山之瑞。神具醉止。禮成告罷。回一就之大輅。御百常之豐樓。大賚多方。與物更始。命廷尉。錫殊死之罪。詔大農。削逋租之籍。條中藏之緡帛。出上林之泉刀。第賞六師。均渥四極。旣而按羽林之寶仗。卽正陽之祕殿。華芝對蔭。暉幄竝開。陛戟交于百重。軒樂周乎四面。萬國上計。儼貢篚而駢臻。諸蕃來朝。端寶摯而森列。桓桓螭虎之士。峩峩鴻鸞之黨。儼假無言。相趨勳色。因愆祀之訖禮。譏徽名而紀德。丞相常伯。伏而奏曰。陛下日靖中邦。道躋先軌。率循大卞。附麗皇極。粵若右文稽古者。爲邦之丕教。而陛下陶化染學。崇四術六藝之風。不曰聖文乎。寧武圖功者。制世之深略。而陛下紮戎綏華。得五表五餌之術。不曰睿武乎。

仁者道之極摯。而陛下勤恤民隱。惠養含生之倫。不曰仁明乎。孝者行之難能。而陛下躬奉天經。宗樹錫類之本。不曰孝德乎。重以哀對上靈。申嚴大祭。煥揚盛則。丕擁龐休。冠德卓蹤。格天光表。而乃遵養景饗。逡巡懿號。是道大無強名之字。而天保失報上之誼也。謹疏淪靈臍。俾揣盛德。攷文金匱。鏤章玉寶。昧死再拜。奉徽號。上萬年之觴。帝曰。昔我三后。以聖神紀物。聰直在天。覆蔭本支。保右命歷。資承長世之善。充入舊貫之居。尚賴股肱之良。同扶樞極之重。天正穀旦。拜貺于郊。休氣薰蒸。福物萬舉。抑乃長樂寶慈之攸感。清廟先德之所及。而近臣庶尹。謬相歸美。不斷來表。俾享鴻名。一日萬幾。重增乎兢業也。于時倚裳而歌呼。望雲而連抃。清光照于咫尺。佳氣浮乎鬱葱。皇儀慶成。謁者贊罷。上猶懼涉道之未淵。基德之未厚。漏泉之未及。覆盆之未照。退乃訪道宣室。程書衡石省。詳裁治體。總攬權綱。視墨家節用之文。見老氏寶儉之語。將矯華靡之弊。獨宗簡樸之化。清心以聚政。絜矩以固本。底慎財賦。勸課農桑。存恤鰥寡。務休力役。減尚方工巧之伎。卻外府珍麗之貢。明慎庶獄。省察偏奏。文書調度。務從于簡寡。號令風采。顯尚以寬大。水衡舉池籟之地。公給細民。縣官疏鹽鐵之禁。抑從未減。譽髦斯士。悉取于廉孝。賦納以言。咸用于經術。體貌良弼。容受直辭。猶謂天下之安。忘戰不可闕外之制。有備無患。更乃講練兵政。崇國防衛。保大以靖民。竭歡而敦族。吏懷飭篋之潔。家象濯纓之朝。斯人有樂和之聲。緣邊無晏開之警。耕田鑿井。飲食充乎四輔。鳴雞吠犬。煙火接乎萬里。洋洋乎韶盡美矣。郁郁哉文之治也。足以比榮太上。延光方來。億萬斯年。篤天之祐。下臣生長閭巷。霑沐恩教。欲治之主。逢享而甚難。盛德之事。詠歌而不足。私念管以薄技。

拔于諸生。方今採樵之夫，俱善談道。自古賦畝之士，不忘愛君。謹因筆墨之文，恭宣竹帛之美。形容萬一，作爲頌曰：帝宋四葉，祖宗重光。乃神恭默，右序縣昌。承顏長信，御辨明堂。乘率先軌，總括懿綱。報本主昊，肇麗吉士。哀對羣元，斂時皇祐。瑞品紛盈，靈鳳翔舞。精意格神，孝思光古。豐樓霈赦，寶冊施名。龜疇建極，鳧鷖守成。功熙庶事，惠浸羣萌。億萬之世，永光帝紘。

斛銘

勿平其量而平其心。心苟無邪，斯量之嘉。〔案〕攷工記有嘉量之文。原本作斯量之家。誤。今改正。

論辨

四皓論

善乎子房之能納說也。不先事而強聒，不後事而失幾。不問則不言，有言則必當其可。故聽之易而用之不難也。評者曰：漢業存亡在俯仰間，而留侯于此。每從容焉，諸侯失固陵之期，始分信越之地。複道見沙中之聚，始言雍齒之侯。善言子房矣。至于引致四皓，羽翼儲宮。方之齊桓公會合八國，定王世子于首止。事簡而力不勞，其績尤偉。而世之君子，乃致疑焉。謂審有此，是子房爲子結黨以拒父也。夫高祖駕馭，獨立爲帝。其才氣雄傑，豈四老人所能抗于漢廷。大臣力諫之強，豈不賢于四老人之助乎。是蓋未知聖人深許首止之盟，而稱管仲相齊，一匡天下之美也。〔案〕匡原本避宋太祖諱。改作正。今從論語本文。易于坎之九四曰：樽酒簋

二用缶納約自牖。先儒以子房四皓之事明之曰：人心有所蔽，亦有所明。欲立趙王如意者，高帝之所蔽也。聞四老人之賢，願見而莫能致者，其心之所明也。子房用其明以去其蔽，是自牖納約者，宜其從之之速也。夫先賢之學，非世之君子所能及也。今據舊史詳載之，以見高帝免廢嫡之愆，漢家有父子之序，非子房其誰賴。且子房時然後言，言必有益，而前史謂良與上言前後甚多，非天下所以治亂安危者，故不載。嗚呼！良豈有費言哉。

楚王城辨

障南之西北距邑十五里，有古雉堞，曰楚王城。其形如瓠壺，其規千步，其高十尺，形勢存焉。城南隅有神祠數椽，榜曰楚王廟。廟有斷碑，雖剝尚可尋繹，卽唐乾符中，警川進士馬昌寓爲記，指神爲晉司馬休之。當桓靈寶之篡，休之自會稽赴援，築壘駐兵，以俟四方之集。其文穿鑿，無所攷實。余閱晉書，司馬休之雖封楚，居漢中，安得自會稽唱義。復按史記，吳王壽夢二年，楚之亡大夫申公巫臣，怨楚將反而奔晉，自晉使吳，教吳用兵乘車，令其子爲吳行人。吳于是始通中國。吳伐楚，十六年，楚共王伐吳，至衡山。杜預云：吳興烏程縣南是也。土人語訛，呼曰橫山。其上猶有城址遺迹，則鄣南之墟，相去百里，猶有說焉。城之內外，耕者多獲石戈矛箭鏃，余亦得其四五。禹貢，荊州貢砥礪，斨丹。春秋時，隼集陳廷，楛貫之，石斨長尺有咫，時人莫能知，而問孔子，不近取之荊梁，而遠取之肅慎，非獨荊梁不貢此矢，是知中國兵器不用石而用銅也明矣。則楚王安得爲休之耶。更俟博識者辨之。

序贊

靈芝序

噫。天壤之甄化。有自然之妙物。其名曰芝草。世不常產。根無定系。至虛幽贊。太和陶蒸。託寓而葩。表顯有德。豈非靈氣之所回復。神物之所護持哉。侍郎蔣公。性正道全。年耆德茂。往以致官。來還宰旅。天子崇旅。俊乂閔勞。以事進拜。小宗伯。告于吳下。樹石三徑。溪館在焉。癸巳夏六月。地中產芝一枝。挺然發榮。匪荻匪植。芬蓋卻邪。鮮明眩視。一之日。得土之正。其色惟戊。得太玄黃圓之象焉。三之日。受天之和。變彩而紫。得句曲燕脂之色焉。太守李公。賞異之。率賓僚宴其第。奉觴爲公之壽。復以靈芝榜其坊。公醉而賦詩。歸美于春秋之地主。吳士善詩者。隨而頌嘆之。李公見授以書。託志其事。攷之舊史。東陽以孝行。產于廬次。中牟有善政。生于便坐。書之聳動。揭以昭德。公才稱朝廷。名爲時宗。至德中和。表于履道。大雅豈弟。發爲政事。不登衰路。議者惜焉。夫芝。仙草也。道書載之尙矣。其或者以公之德之劭。謀謨弗究。欲其謠綺季之曲。樂羲皇之化。誕錫難老。俾冒遐福。以明大有上吉。无不利也。宿視公丈人行也。聞之欣抃。然不得侍几杖。爲壽于樽下。亦願以芝名公之館焉。

集賢給事俞公送行詩序

春秋之際。卿大夫出聘。鄰國交接受用。微言以相感。必稱詩以見志。若七子之寵趙武。六卿之餞韓起。是也。

風有康公于渭之送。雅有顯父出屠之祖。瓊瑤雜佩之語。以將其珍意。偉革淑旂之詠。以聳其行光。流風之來。所尚邈矣。集賢夕拜。俞公以耆哲之望。履中庸之美。風德器幹。作時從臣。逮事兩朝。間餘三紀。節任之要。則關中京右。載籌其筆。旂鎮之重。則渚宮錢塘。迭佩其紱。荆吳二域。政風相翔。寶元初。上嘉乃賢。特詔以覲。法官延對。勞問移刻。出從革輦。入陪禁幄。參麗正刊修之職。居東臺論駁之任。乃六卿之所履。二樞之與鄰。蓋將若時而柄用焉。公神守獨勝。天均默識。不以榮利滑其太和。頗勞侍從之班。少求偃息之地。謂宣城佳山水。美園館。喬梓在望。案牘差稀。可以瑩煩襟。養妙氣。三進得請。一麾遂行。朝右諸公。聳伏夷退。自禁庭雋乂之老。泊外朝膚敏之彥。或賦藻什。以謠祖帳。敍承明之厭直。美嵇山之還守。莫不鏗純命奏。追琢取成。皆韶武之祕音。荆藍之絕寶。比歌郢之曲。相高于國中。興臨滄之篇。竝傳于江左。足以廣高齋之逸韻。增黃堂之故事。宿承貺授本。辱命冠篇。絕大雅穆如之章。慚未學斐然之累。寶元己卯季冬二十八日序。

臨海梵才大師真贊

梵才大師。以實性會道。以餘力工詩。天聖中。至自台山。館于輦寺。朝之名臣勝士。莫不欣挹其風。日至于室。參評雅道。間印禪理。尋被詔譯館。訂正智者慈恩二教。及同編釋教總錄三十卷。七年書成。奏御。賜紫方袍。未幾歸臨海北山。掃淨名庵居之。慶歷初。予自山出守吳興。師適有苕溪之行。得尋支許之集。自我見將二十年。雖正始之音。泠然在耳。而赤髭之相。邈哉難值。門人有繪其像。持至都下者。宛具眉毫。若與

神對感舊懷遠。爲之贊云。北山大士。梵才錫名。禪離文字。詩陶性情。迹安林刹。聲動王城。學徒傳像。繪筆何精。秀氣閒遠。妙相圓成。此身有報。本體無生。月皎寒水。雲栖太清。龍華後會。聊記宿誠。

文恭集卷三十

書啓

上謝學士

某聞昔士擁薦賢之轂。有味其言。至聖開隘道之門。不與其退。布在方策。貽厥後昆。是以青雲彌高。猶垂可附之氣。洪鐘善應。不聞待叩之音。若夫駿望逸羣。高材拔萃。惠訓不倦。增激于懦夫。教思無窮。有警于淺俗。領先覺之事業。挺諸生之表儀。偃伏下風。講聞高誼。惟日滋久。乃心不忘。逖瞻京兆之門。恭贊許都之刺。伏惟某官。豐規冠世。高藻凌雲。蘊前識之道華。履中庸之德範。神檢清出。降乎崧極之靈。天性少成。鍾乃奎躔之粹。文兼三變之體。學富九家之流。邁天會之寢昌。標卿材之獨秀。平陽充賦。聯大對以飛英。法坐試言。射甲科而得雋。茂恩加等。貢士有開。爰當精汰之朝。式隆出宰之寄。弦歌在御。寬小過而字民。鋒刃有餘。批大卻而從政。聊爲漸陸。式示牽絲。丕變一同之風。洽聞三異之化。屬以堯雲修覲。漢闕拜書。奏東朔之千篇。名聞乙牘。獻子美之三賦。觀若堵牆。更生之言。有補于當世。子雲之論。不詭于聖人。食時之賦立成。洛下之紙翔貴。羣公無出其右。天子喜同其時。故得度越衆賢。對揚景命。校文延閣。動太一之

威神掌故曲臺。顧后蒼之典禮。練達質文之統。周知沿革之綱。矧復奕世賢多。家公望重。處霜臺之鼎貴。奉雲陛之旦朝。周公拜前。更追故事之美。疏傳在後。未羨曩時之榮。會稽之綬。旣懷承明之廬。亦厭函分半刺。聿貳方州。習貫政經。用儒術而飾事。沈研吏道。宗法令以爲師。潔素絲以在公。緩柔轡以馭下。道素自處。刑端益空。然而宣室懷賢。方佇賈生之對。淮南答詔。當用長卿之文。屬兩宮求治之辰。非一郡淹才之日。行聞三節之召。入聯四戶之榮。延企之誠。中外攸若。如某者。實同康瓠。賤比多硯。管仲之器小哉。安能任大。汲黯之戇甚矣。胡可適時。徒以西學隆文。南魚發詠。思樂烝髦之選。勉懷潔己之風。引童刻以自持。壯夫竊笑。學鼠能而雖衆。一技不成。願翰翮以莫堪。飭邊幅而奚用。爰披鳥跡之策。幾換鳳鳴之笛。仍且屢遘家艱。坐更歲舉。叔夜之不堪滋甚。原生之將落可憂。知己未伸。無林宗之三辟。治生不善。荒楊季之一廛。追時好而豈能謀藏身而不暇。姑欲脫名聲之鎖。棄富貴之鞭。遠同魚鳥之羣。退避英髦之域。直以舜華載旦。周命維新。三代同風。克用直心之道。四方有志。未慚橫目之民。庶幾尺蠖之伸。更礪鉛刀之割。伏遇大丞學士。輟從周衛。關掌使符。慶惟桑梓之邦。蒙被潤河之福。加以沖襟玉裕。泰宇淵淳。樂育人材。克盡吹枯之力。獎拔士類。重嘉溢美之辭。咸預屬于徽猷。皆想見于風采。是用掣鈴下館。曳裾高門。不由左右之容。徑伸盤躡之禮。苟或履錐可用。溝木未捐。回珠吐以見私。枉鱗毫而垂飾。圮橋跪履。無成孺子之名。南郡橫經。請誌先生之論。誓將藟薄。辱在品題。

上兩浙均輸徐學士

某聞吾黨小子。仲尼興斐然之嗟。天下英才。孟軻有樂得之歎。斯皆樹微言于不朽。敦惠訓于方來。紀乎油素之間。煥若日星之際。世未喪道。天誘其衷。誕鍾上智之才。卓冠生民之秀。若乃蚤持鉛割。夙奉師嚴。以困蒙難擊之姿。被諄誨惟勤之賜。潛心大業。雖尅核以自修。從事華辭。終濩落而無用。載持篆刻。式叩高明。庶幾一蔽之言。未罪三隅之反。恭惟某官。骨含天粹。氣鑠神崧。直如清廟之絃。溫若白虹之玉。豐規不雜。祭邦直之三英。勝範自居。乘民彝之一德。自頃龍標得雋。鳳諾升華。金管第文。天子重平津之對。石渠建議。諸老伏賈傅之能。雍容著作之庭。密邇清閒之宴。高文豔發。皆張鷟之青錢。湧思橫流。盡君房之妙筆。故得爭臣進秩。右史聯榮。挺漢檻之直躬。筮周官之華選。組垂丈二。且趨紫閣之朝。牘奏三千。日伏青規之地。袞無闕職。朝有正人。大君題柱以記名。羣公奉贄而結好。乃睠三吳之內地。實處九州之上腴。六筦攸司。鹽鐵之任爲重。八材所產。天地之藏實繁。不有計然之謀。誰佐大農之賦。薦膺神璽。出擁使軺。紫橐記言。少別螭頭之陛。緹衣將命。遠輝使節之旌。酌寬大而撫齊民。用峻清而嚴屬部。疑獄所讞。多惻隱而平反。貪吏畏威。盡望風而投効。坐統十連之國。立富九州之儲。不廢清談。蓋出餘地。金華舊業。方任于寶臣。羣玉仙山。適嚴于冊府。行看君節之召。徑入天坡之崇。當密贄于樞猷。豈久商于功利。如某者。資材甚薄。性習不靈。會唐虞稽古之辰。隸鄒魯守經之業。從師鄭校。僅明六甲之書。鬻技吳人。會乏百金之直。往歲以楚材擇秀。魯席聘珍。妄由窮巷之中。駿奔曉闕之下。因緣典謁。獲贄編聯。便坐橫經。許入安昌之館。未行聞道。遂登南郭之門。曲敦提耳之私。屢獲鑄人之問。仍以類優之作。徧加溢美之言。持布鼓以

過雷門。方將辟易。具太牢而饗海鳥。終用憂疑。未接武于諸生。驟纏哀于方寸。筮仕之門不及。歸恩之地無階。心疚自傷。生意殆盡。目見金城之柳。臂垂冥伯之楊。弧矢四方。雖夙齡而有志。蓬蒿三徑。奈短褐之不完。行閱市中之書。勉勤稷下之學。攻堅不銳。叩寂彌空。身世在心。有韓非之孤憤。江山滿目。多庾信之悲哀。追懷圯上之言。益厚胸中之愧。比者國家以襄輪式命。刻鵠旌賢。遴下武之有開。思逃虛而安得。濫攀英軌。勉策驚蹄。懦夫之氣寢衰。大敵之勅可畏。未能引退。竊望利賓。所幸者。學士輟仙殿之凝殿。當外臺之委重。言念維桑之朽壤。獲居分陝之西封。重撫舞雩之冠。更露雕蟲之伎。頑疎自愧。迂闊無堪。重念夫操風斤者。無可棄之材。入蘭室者。被維馨之美。君子之所貴乎道。豈以言而廢人。善歌者使繼其聲。亦有教而無類。倘願盍簪之舊。未韜鄰燭之光。迴珠玉一唾之資。爲風雲萬里之助。左氏膏肓之疾。倚在一鍼。波臣枯涸之危。繫于斗水。誓將白日。庸答所天。卑情不任。祈恩望德。依歸之至。

上劉學士

自補吏中銓。待罪下邑。蟬得蔭而方美。且無執捕之虞。鼠忌器而不投。適在保全之地。俄奉計臺之命。俾臨樵木之醜。以弓見招。頗識皮冠之守。得檄而喜。聊慰寒泉之心。自收迹于下陳。日馳魂于重仞。泛赤萍之江道。換丹桂之月弦。疲馬依依。仰崇軒而有戀。亡羊逐逐。懼多路以成迷。念素志以未伸。慨壯年之甫過。痿人之不忘乎起。抑乃常情。窮者之欲達其言。良難自默。敢布翹危之懇。用塵聰徹之聞。幸曲霽于威嚴。冀少停于神意。某聞士範敦于閭巷。于以育乎人材。柄用歸于朝廷。于以尊于天爵。惟援能而是舉。乃

登善之攸先。漢世列藩之侯。得府檄而作吏。魏基大正之職。以州品而格人。皆所以廣王國之薦。延恢士林之賞拔。既周咨于行實。亦博練于才猷。咸經清論之高。以取當時之重。明試以政。無尹何往。學之譏。薦登諸朝。有公叔同升之美。尙賢爲盛。往簡攸高。降及本朝。覽于前憲。廣籠茂士。上歸英毅之尊。擢引羣才。外委价藩之長。攷詳幹局。參檢行能。激官政以交修。統時風而歸厚。假人之名器。匪易磨世之礪石。在茲內。惟浮賤之蹤。竊庇惠和之政。偃風惟舊。沐德茲深。固慚走俗之微。蔑有託名之所。將激昂于懦氣。願私附于高賢。伏惟學士術業周深。才謨高正。英辭惟敏。吐五河而並流。偉量克寬。吞七澤而不遷。家著元功之籍。世仰清光之臣。而自鷺序參飛。虹光垂照。備典午仙臺之構。掌卯金石室之圖。剖判藝文。講明憲度。獨當臺上之直。徧閱禁中之書。侍史執博山之鑪。日薰賜服。神父秉青藜之燭。夜訪成編。恬榮利以自持。遇沐休而不出。陳威官薄。絕居方進之前。孟光年資。迴處釋承之右。武帳歎積薪之學。廣內厭直廬之勞。擁高箱而出關。肅將靈命。服毳衣而巡國。大按祥刑。平反有京兆之風。決囚多御史之雨。間屬慎求良翰。委重左符。佳夢發占。應獸頭之新舊。樂郊行部。煥車色之朱丹。體寬簡而靖民。篤中和而統事。庚桑用道。大移嶮嶮之風。魯侯尙仁。胥萃泮林之韻。動遵名教之樂。居多暇豫之娛。胡牀坐談。樓上之興不淺。陽春度曲。國中之和幾稀。重以誘接寒流。惇崇雅道。子將之風鑒特出。每持鄉里之評。王澄之才令相高。多爲士人之目。搢紳廢其德宇。當世仰其龍門。矧復最績已凝。上心所注。華林飾館。卽時當發于汝墳。宣室對神。半夜將前于釐席。入侍高門之地。並裁方底之書。罄伸造辟之辭。大展熙朝之業。某姿材甚下。人地並

寒。衡。陋。是。棲。乏。高。符。而。布。世。河。清。既。遇。無。宏。略。以。佐。時。自。託。跡。于。王。塗。旋。服。勞。于。吏。鎖。政。經。耨。味。官。守。放。紛。仕。路。濫。巾。當。宵。雅。肆。三。之。始。銓。臺。攷。課。有。茂。陵。第。六。之。羞。還。守。中。田。之。株。復。仍。長。府。之。貫。幸。依。屬。部。獲。備。末。員。少。游。平。生。只。自。希。于。羣。吏。騶。奴。等。輩。良。無。益。于。縣。官。徒。以。業。在。學。箕。志。存。肯。構。早。竊。幽。邦。之。譽。誤。爲。前。輩。之。知。聞。勝。母。之。里。名。少。諳。趨。嚮。對。於。陵。之。鵝。炙。僅。曉。廉。隅。然。而。力。命。不。侔。功。庸。又。薄。一。躋。仕。版。三。見。閨。餘。貧。室。屢。空。將。從。孤。竹。之。子。槁。容。日。悴。近。同。吟。澤。之。人。私。懷。趨。府。之。初。特。被。均。茵。之。遇。博。以。皇。道。飫。聞。名。理。之。談。接。乃。朱。顏。迴。曝。溫。仁。之。氣。自。非。木。偶。幸。食。土。毛。知。恩。紀。之。罕。階。蓋。生。緣。之。內。迫。惟。此。翻。然。之。改。良。非。獲。已。之。謀。伏。望。知。府。學。士。廕。棘。垂。慈。拔。揚。拒。謗。寬。餽。生。之。不。逮。察。恐。守。之。無。他。均。被。未。光。保。終。前。惠。筦。庫。七。十。少。紆。薦。拔。之。仁。躡。履。三。千。永。有。吠。鳴。之。地。仰。依。曠。度。無。廢。瞽。言。要。以。平。生。繫。于。升。墜。

上陳諫議

去歲入調中銓。駕言上國。匪由介者。得侍師嚴。登南郡之絳堂。生徒甚衆。對安昌之卮酒。禮數特親。固慚極陋之才。久事徒勞之役。奔波仕路。契闊講筵。挾策讀書。且有亡羊之懼。操刀學割。更懷傷錦之憂。寢負空疎。何從諮仰。旋罷休于末局。方欣附于美猷。虔瞻哲艾之姿。頓釋羈離之恨。洪鐘斯叩。每盡春容之音。後車見存。益隆教載之禮。關汪陂之偉度。軫墜履之深情。念鄒木之輪困。未登器用。哀齊牛之穀觶。有惻仁心。延華譽于朝紳。引辟書于相幕。朋游改觀。身跡生光。恩自曲成。本噓枯而及此。事從中寢。絲連蹇之使然。揣薄分以自知。在所天而曷報。窮居京轂。坐隔親闈。不勝烏鳥之情。遂謀升斗之祿。結半通之吏綬。

竊歎喧卑。去數仞之師牆。轉成孤陋。辱五花之判筆。裁二雅之雕章。送子以言。掩雜珮路車之贈。投人于
闇。屈夜光明月之珍。長北斗之虛名。耀南轅之行色。昔汝南舊俗。著子將之評。襄陽故時。重德公之語。皆
巖野窮栖之士。非朝廷素貴之人。言論所推。材品攸定。況夫天民先覺之彥。德爵達尊之英。諾貴百金。望
重九鼎。歛唾足以成寶。獎拔由其致榮。矧伊寒素之流。猥玷品題之目。拜承嘉貺。聳激懦心。自歸環堵之
居。適有負薪之恙。曠馳謝檄。屢換鳴篳。背負刺芒。愧薄夫之不肖。量包山藪。冀大雅之見容。屬春物之芳
妍。仰天倪之恬勝。伏惟諫議器博用大道。周性全足文獻。以居朝基。太平而展業。不吐不茹。氣雄衰職之
臣。有德有言。名冠儒林之右。敷明治體。練達朝經。獻納論思。馴致中和之政。典謨訓誥。裁成深厚之風。將
美居多。進忠匪懈。盡禮容而接物。恢德宇以服人。天懷發中。動循于教令。老成在上。未墜于典刑。方圖黃
髮之賢。共秉紫樞之化。十旬遠至。將登荀爽之台司。百歲康強。更享衛公之壽考。上扶宗稷。大庇蒼黔。庶
此孤生。永棲鈞蔭。勉加良食。行副具瞻。

上徐監丞

中阿著詠。本推美于育材。下體垂言。實戒遺于采菲。苟非躬茂育之至。持博古之心。則何以擢標幹以上
升。慶根莖而致用。垂于風雅。蓋先民激勸之言行。自朝廷實君子生成之德。其有久盤東鄙。偃伏大名。曳
裾會展于嚴趨。改席猥隆于渥厠。一介之善。俾延獎以居多。六尺之軀。誓報償而不忘。敢再稽于前典。將
少述于丹衷。伏惟某官。西園上才。東序祕寶。朱紘疏越。含清廟之遺音。竹箭有筠。挺會稽之秀質。式遘亨

嘉之運。誕揚休令之名。而自玉帛貴賢。弓旌矜俊。紫宸試可。擢構廈之宏材。鴻筆飛英。奉揚廷之大對。黃
香才器。處漢室之無雙。衛玠風流。居晉廷之第一。式膺寵渥。出貳藩防。當三載之陟明。奉十行之細札。彌
茂思皇之舉。益隆乃眷之知。宣室問神。重賈生之應對。中堂落筆。驚子美之文華。旋通籍于蘭臺。復聯榮
于仙殿。陳三山之圖籍。定四部之籤題。著鄭默之中經。洞分朱紫。紉馬遷之實錄。妙際天人。故當自西掖
之升華。由內廷之將命。紫泥封詔。遠追長慶之風。青鎖承宣。密視淮南之草。矧僉謀之所屬。願嚴詔以非
稽。如某也。本乏聲猷。素無翰翮。繩樞少賤。非三川聲利之家。韋帶安貧。異七葉貂蟬之族。徒以真人撫運。
王道興譚。奉鉛槧以自強。願魯魚而不辨。七日隱霧。未遑下食之心。六月搏風。安有排虛之翼。旣服勤而
無狀。從鑽仰以爲勞。適值國家妙選。時英精掄鄉秀。詔書寬大。容庇迹于神臯。文雅縱橫。竟沾名于朝右。
內慚狂斐。旁歎驕孤。蟠木輸困。旣絕先容之助。勅字漫滅。徒興逆旅之嗟。因力綴于編聯。偶上塵于聽視。
祗期倡優方朔。誠有類于枚臯。刻畫無鹽。亦深慚于西子。豈謂某官志敦善誘。道尙謙鳴。愍顏回之不忍。
謂子房之可教。至以名公接席。多士登門。迴月旦之評。曲加題品。傳春秋之字。遽辱褒稱。俾寒灰之復燃。
令困獸而思鬪。矧預最靈之列。豈忘佩服之誠。敢不淬勵。縑緗服從名檢。上以全公卿之奇遇。次則成父
母之榮歡。如泥在鈞。更假良工之手。漆身爲癩。永懷國士之知。

上徐舍人

放歲恪趨神輦。祇調天官。代舍食魚。早託賓榮之列。珍池浴鳳。式瞻鼎貴之姿。因持爵里之名。爰達巾幘。

之侍。均熊引坐。捉麈賜談。久要不忘。迴加于獎拔。一夫未獲。深致于咨嗟。靡矜廉陞之崇。匪聞斗筲之賤。禮容溫穆。德廕恢疎。私慚下之流。本乏芥微之善。出菰蘆之內。安有美材。居韋布之中。早蒙屈體。飾青黃于溝斷。問朱紫于月評。水鑑論才。謬竊襄陽之譽。蒲葵振價。乃成中宿之資。足爲貧女之宵光。豈有家丞之秋實。濫借時俊。猥玷科榮。一命牽絲。預陳咸之官簿。五年隨牒。過管父之瓜時。困膏火之煎熬。有鹽之窮苦。俛眉刀筆之吏。困跡風塵之途。擎蹠曲拳。自厭莊書之禮。伊優骯髒。備嘗秦客之吟。自解去于官聯。旋入參于選格。小材累日。有長調以斯存。高足據津。無遠圖而自致。辱台符之次補。當民版之勾稽。去英雄所躪之都。事州縣徒勞之職。望鄧林而借樹。未獲棲身。歷吳坂以駕車。分甘俛首。其如辱交游之光寵。玷恩紀之薦延。年勢漸高。已嘆東隅之失。河清難遇。恐成大耋之悲。旋辭闕里之牆。歸訪隆中之舍。沈約之病寬。韋帶哀駘之肘臥。垂楊春服既成。邈阻沂童之舞。龍門不見。悅勞記室之心。職由疲薊之姿。絕奉礪磨之間。仰天倪之專氣。協神觀之葆光。伏惟副閣舍人。文炳鉤奩。識伴大蔡。特稟武山之氣。首躋王國之才。丹穴靈姿。絕雲霓而上擊。明堂奇棟。凌霄壑以自高。會東戶之顯時。蘊南臺之賢業。秉筆贊爲于名命。實代聖言。造辟入告乎謨猷。允推君德。已茂寶臣之略。式隆赫尹之瞻。定草淮南。方警玉峯之署。調梅傅野。久虛金鼎之司。佇宣枚卜之求。以迪謨明之業。豈惟蕞質。獲託化鈞。抑亦輿情。僉圖大庇。願加丈食。永輔本朝。

上知府劉學士

近以隆冬聿暮。瑞霰其零。天粹融甘。屏薦瘥之故氣。土膏含潤。發豐懋之嘉占。竊欣時律之和。頗動春蠡之躍。因著鞶鞶之作。仰塵隱几之觀。學將落而有來。文久廢而無次。猪苓至鄙。奚登藥籠之收。鼠璞未屠。甘薦玉人之誚。周章失次。洪墨交并。豈謂知府學士。循誘凝懷。乘彝尙德。枉燕公之妙筆。裁漢將之清篇。灑雲朶以封題。遣犀髯而特遺。筠編悅發。繡段交輝。字截寸金。價超尺璧。少陵韓苑。悚避風騷之壇。咸池大章。鏘流杳默之韻。掩郢樓之絕調。詫梁席之諸賓。忘位貌之威嚴。樂名教之敦獎。過私月旦之品。謬借春秋之評。撫弱質以自驚。眷具僚而胡幸。昔者和尙書之什。樂天不繫于官資。答中郎之詩。盧諶亦由于故吏。著在舊史。用爲善談。悉由高世之才。方隆上笏之呵。孤生何者。素蘊缺然。蚤緊地餅之名。濫竊庭鶉之食。陳完弛擔。庇寬政以爲優。元叔登堂。承高風而有自。素飡無咎。榮况已多。敢紆正始之音。更重屈尊之禮。封殖嘉樹。比甘棠而不忘。投報木瓜。枉英瑤而太厚。伏惟知府學士。仙瀛高彥。王國上才。能讀典墳。過楚臺之倚相。老于文學。類唐室之次山。聊分銀兔之符。未陟金鼈之頂。行趨召節。入綴近班。庶幾珠玉之篇。便爲冠劍之物。藏于魯壁。與經義而並陳。副在晏楹。期來茲而共祕。永言銜刻。匪克摠宣。

上蘇州蔣諫議

近削柔函。恭塵侍閣。仰承左顧。迴篤光謙。託瓊蘊以致言。損玉音而流問。得孟公之牘。素所榮藏。比淮王之書。更逾苑祕。載懷降挹。彌切欽銘。屬時律之戒涼。仰道樞之協勝。伏惟諫議。風猷挺絕。字量粹融。抱式古之上才。厚當陽之渥暉。紫囊著位。蚤陟金坡之崇。綠詔宣風。薦領銀符之寄。甘棠載路。已聽于歡謠。華

黍盈疇。更聞于豐歲。行被節旄之召。佇參鼎席之司。係瞻所深。庇暉有望。煩鞅是拘。傾搖正劇。忽遘飛郵之便。猥流華牘之音。英眇迴殊。仰一謙之斯厚。至言可佩。在三復以攸深。載涉素商之辰。諒安純氣之守。伏惟諫議。體兼四德。識照萬殊。敷休績于本朝。挺豐規于上列。屢分方面之寄。益隆宸極之懷。賦政東藩。適著惠和之化。宣猷南闕。佇歸宥密之司。翹頌所深。序陳匪逮。

上李相公

某聞伊尹之格皇天。恥一夫之有失。周公之贊明辟。務三握以自勤。蓋由保乂王家。總司國柄。鑪錘造物。上代于化工。履履任才。廣量于人品。俾洽至和之氣。用無太息之聲。故能享威德之顯稱。保頌膚之全美。文武未墜。歷百年而可知。聖賢相望。邈千載而非遠。伏惟相公。識探萬奧。體煥三英。強毅簡溫。日以宣乎衆德。和惠忠肅。世實濟其大猷。當永定之席圖。御明臺而訪政。紫宮命相。上配六符之星。黃閣秉鈞。坐調四氣之燭。魁柄斟酌。同北斗之在天。生民竦瞻。若南山之有石。率百官而稱職。育萬物以由庚。桃李無言。布清陰于天下。鹽梅有味。戒公餗于鼎中。間屬金七修明。玉關撤警。廟堂甘寢。無庸樽俎之師。藩閫于宣。益光社稷之鎮。錫山南國。賜履東秦。成功有不處之名。蒼生深未起之歎。旋屬中天降詔。溫洛改轅。卓匹馬而來朝。秉介圭而修覲。禁塗延對。左壺之漏屢移。法座疇咨。龍準之顏載悅。經火辨鍾山之玉。拭土見干將之鋒。元精所生。寶鎮增重。矧以地尊卜洛。府重居留。萬戶帝宮。備時巡而斯在。九金神鼎。奠國壤以備存。煩于謹之行臺。領留侯之管籥。商山調護。早深綺季之思。漢閣規隨。夙盛平陽之業。將還舊德之食。

永固立賢之基。冠鈞席于宰庭。持靈光于永歲。上毗哲后。大鷹斯人。中外所瞻。爲日滋久。某性端幽昧。業蘊枵疎。世閱寒平。略無絨冕之緒。天衢巍煥。切勤方甲之書。棄襪褻之耕衣。習雍容之矩步。思風澀訥。學殖單疎。悼類驚之無成。苦食雞之不飽。年稱甲子。未平絳老之疑。山過具敖。多犯魯君之諱。一昨詔開諸路。州舉羣廉。濫隨三百之筭。切駕一封之傳。遂偕茂士。猥玷榮科。辱吏牒之充員。在賤曹而受事。屑屑斗筲之役。悠悠風塵之塗。成嗇夫之綸章。起家爲幸。效南華之官智。宿業無聲。豈忘飭篋以自修。亦冀椎輪之有漸。嚮緣滿秩。訖獲交官。方隨上計之行。來赴東銓之集。公車下士。正感騶奴之錢。長安諸郊。未獲司農之鐸。幸遇相公。前趨大旆。來侍遂旒。衰衣詠我公之歸。赤烏寵韓侯之入。夙仰宗公之望。想聞風采之嚴。迫位貌之甚微。苦聲猷之素薄。先談木器。早無萬乘之容。北首金臺。甘後四方之至。豈意紫垣之碩老。俯哀黃綬之幽蹤。持箕斗之虛名。達鈞衡之哲輔。聞樂切怵。私懽聳于佳音。懷響必彈。難括囊于中臆。重念某。仕塗艱梗。緒業漂淪。鷲鳥趨時。切媿史公之論。君羹遺母。空持穎考之心。胸臆結約以亡奇。精神蹇淺而可歎。望青雲而在目。悵白日之無津。惟奇高世之賢。再奉持樞之拜。宰平衆職。總覈羣才。塊扎無垠。重啓大鈞之播。柔嘉維則。更流懿德之稱。庶依材館之賓。願預藥籠之物。儻塵銘造。誓竭懦衷。

又

伏承台旆。就統英躔。聆溫綍之有初。企行臺而增慰。伏惟某官。爲國雋老。稟天粹靈。秉懿在躬。濟和及物。星樞席位。居常賴于謨明。帝室作藩。動必資于夾輔。矧龜蒙之巨鎮。乃鉅野之舊邦。實倚元勳。用寬東顧。

近在旦暮。入冠宗公。勉爲廟朝。益敦福履。

文恭集卷三十一

書啓

上江州張殿丞

伏自署吏南淮。整裝東路。背浮雲之高闕。過脩竹之舊園。適逢王國之才。得請天臺之告。上廬齋刺。竊沿雅故之情。密坐邀談。猥厚將迎之禮。言樞煥發。心府洞開。教督諄諄。迴曝秋陽之氣。燕胥侃侃。僅侵夜鼓之聲。迫中路之思歸。歎征車之莫駐。一別如雨。悵身跡之靡停。千里背淮。幾營魂之獨逝。來還堵室。伺守交官。芳桂攀援。山中之思無賴。春梅折贈。隴頭之訊蓋稀。允懷穆若之姿。屢下赧然之汗。自當末局。日力迷書。司民之版。掌實繁。將何批卻。舊尹之政。經尙在。得以伐柯。惟宇廡之恢疎。深仕塗之棲倚。曠仲懿仰。併積瞻翹。諒恬育于貞襟。固動臻于吉履。伏惟殿丞。性資上哲。名俊中州。仕版聯華。蚤協南魚之詠。禁門引籍。聿參翔鳳之朝。端勝範以照人。服清猷而高世。斯言無玷。本願行以相先。所至有聲。蓋試功之惟允。迺者秦川將命。漢傳鞠辭。財利是寬。出仁心之恤隱。訟喧旣解。亦朝論之歸高。屬求刺部之賢。適下舉知之詔。需頭薦削。交集于公車。方底恩章。首頌于東省。矧溢城之名壤。壓江紀之上游。自守東平之廳。已報

營丘之政。追車降命。將聞二節之來。煩幄承光。行轅一臺之妙。某枵疎無狀。庇賴有年。奉言侍以末階。幸葆綏而適願。

上蔡龍圖

再調銓符。遠廢吏綬。山城僻左。謁居淮服之旁。人迹闊疎。鮮去日圍之下。跂旌塵而殊逸。撫鍾律以屢遷。流水託音。久莫馳于尺記。高山仰德。未始忘于寸心。內惟筮仕之年。早詣序賓之館。三握髮而迎士。適振緒風。一引席以與言。猥參末論。仰荷深中之量。曲垂嚮下之風。旋收跡于門庭。聿抗容于塵土。日月云邁。歲星將近。于一終。節物再更。春目屢傷。于千里。逖瞻姿度。遐鬱心魂。仰惟駿嘏之賢。適處保釐之任。鎮雌堂而克靜。保虹氣以彌充。伏惟龍圖學士。德本上成。仁爲己任。元陽高識。出衆議以居多。次道宏才。結萬夫之所望。早侍法宮之側。並參端委之遊。直躬見于王臣。大略推乎國器。爰奉价藩之寄。用寬制閫之謀。南國是疆。倚梁臺而爲重。東郊出尹。降畢冊以爲優。自大旆之肅臨。實樂都之悅化。朝議蓋資于夾輔。師瞻益在于弼達。千室鳴弦。已播陪京之地。十晨易筆。行歸議政之堂。中外所祈。晝宵于是。伏冀順茲炎燠。務乃燕申。上扶宗社之靈。以慰華戎之望。

上馬少保

早隨毛檄。獲仕鄭鄉。仰天臺舊齒之臣。辭仙殿納言之寵。安石就第。獎元老以惟優。行馬施門。旌上卿而惟厚。間趨恩館。曾曳鄒裾。逖瞻哲艾之姿。仰霽威嚴之色。三握髮而迎士。式振前猷。一引席以與言。猥參

下綴屈尊崇而展接。忘浮賤以見收。旋奉役于他邦。因贅名于侍閣。仍賜箋函之召。曲開宴俎之筵。荷盼飾以兼常。在心銘而罔斲。迫尸官之煩溷。惕奏記之淹遠。方義馭之戒炎。仰莊環而處順。〔案〕莊環二字集與孫祕校啓。有勉味莊懷句。疑此環字亦懷字之訛。無爽味腴之道。益隆生福之基。伏惟致政少保。功煥太常。謀高前箸。勤宣一德。有樊侯秉彜之風。逮事三朝。奮林父盡忠之節。寶名照世。惠政及民。方隆維石之瞻。俄請引年之制。三孤進律。峻周典之官儀。五福備身。享箕疇之陰騭。況簡在于上帝。方圖任于舊人。伉雙節之登賢。由小車而命相。永綏眉壽。上翊丕圖。中外所瞻。旦暮如是。伏冀爲國自重。

上祠部謝學士

伏自竊准補吏。亟擁于單車。鱣序橫經。驟遙于文席。流光逾迅。外役煩挈。嚮屬私奴之行。嘗修亭長之間。逮速郵之既至。辱溫教之詞頒。書意甚親。榮降孟公之几。字褒見獎。寵踰尼父之經。銘淑貺以無涯。拜高命而增悸。且有乞靈之意。猥煩下聽之聰。雖推轂之興憐。終觸機之爲累。鷓雛抗志。應增腐鼠之貪。龍斷圖榮。甘竦賤夫之誚。旋攜銳志。來自迷書。賦芋勞神。寢歎狙公之識。折麻寄意。空馳楚客之心。撫愧汗以自流。鬱煩襟而增結。兼審伏延英之上閣。奉永定之成書。聯三府之鉅公。摛一朝之大典。專春秋之筆。門人訥于措辭。奏新語之篇。天子爲之稱善。居然麟作。副在玉京。式均鴻儒之恩。用紀婉微之績。道家藏室。爰止于史官。太微積星。迺升乎郎位。矧靈臺之宏峻。且理窟之精明。清襟之篇。已歸于仲寶。黑頭之望。當在于王公。勉重青冥之期。勤進素絲之食。雅承誨矩。正闕師門。遐瞻貴秀之資。永有庇暉之地。

上小謝學士

闕路師帷奔趨吏局。滔滔江域。阻從一葦之航。冉冉年華。驟易四時之柄。雖復吳舫接尾。晉傳交塗。繭幅抒言。悵嗣音之久絕。鶴天寫望。徒蒿目以增疲。仰恩制之善居。用椎規而自處。載經素籥。克守沖機。恭惟某官。精識超殊。雄辭鼓動。豹文蔚變。駭帝囿之珍羣。璧采混成。冠天壇之粹寶。自聯飛漢牘。更直應廬。國典係其辯章。朝英以之欽服。入陪庭議。常諤諤之匪躬。出佐郡麾。每皇皇而求義。方稜鼎盛。業守俱高。適隆丹展之知。遵結素冠之釁。杯捲如昨。諒至性以奚堪。霜露載均。幸衷懷之少抑。式安履用以叩天光。某猥用薄能。資承惠訓。席間侍坐。飽聞談麈之微。詔下取才。首預歌萃之薦。因緣慰藉。承被甄收。濫按策之分科。叨絲言之補吏。州縣爲職。揣鳧鶴以自安。冰檠在公。愛鶩駘之莫強。庶幾卿蔭。施及危蹤。楚旆搖風。接辭顏而尙邈。汝評改月。求題品以未遑。系頌之誠。實邁常等。

上梅學士

近飭歸裝。爰經樂國。款聲姿而有舊。喜占拜以無窮。更僕乃留。久陪于譚麈。終宴不倦。屢接于朋樽。將迎之禮。過優。洪墨之顏。增甚。適旋冗局。驟隔雋鋒。未遑磨削。以致誠猥辱丁寧。而賜教蓬心所激。荷瓌意以無忘。蘭德彌薰。佩嘉言而不捨。載懷谷養。久格時休。伏惟學士。王國上流。天臺駿望。紳纓胥伏。閱閱居高。夙駕雙轡。未副材于雄寶。走趨二節。行被召于凝嚴。幸公食之勉加。佇恩綸之狎至。瞻懷所劇。布序寧殫。

上胡諫議

近者祇赴敵局。驟闊後塵。瓊樹瞻風。方懷于勞想。銀鈎布體。猥降于華牋。仰荷屈尊。敢忘拜賜。屬景文之貫序。諒沖氣以均和。伏惟省主諫議。密勿宣猷。浚明邁德。吉逢昌會。先展宏圖。總成賦于中邦。克昭丕績。贊大謨于近幄。行冠冢司。辱在獎題。倍深翹頌。

又

濫紆帝綽。關掌國財。一乘敵車。方駐北轅之役。十連大幕。匪遙東路之程。自跼跡于煩拏。闕致誠于靡削。猥蒙輝盼。先損函封。洒鏤管之珍詞。布朶雲之妙蹟。仰承佳臆之貺。俯盈感篆之懷。適臨朱夏之交。諒安純氣之守。伏惟諫議。高岡瑞質。東序瓊姿。識侔大蔡之靈。材任崇臺之幹。出入周衛。斷國論以優長。典領大權。宅王畿而平秩。峻坡上之華級。鎮浙西之巨藩。報政營丘。薦凝于丕績。攷庸大寢。行霈于殊恩。勉葆懿和。用符欽頌。

又

近拜璽符。諒塵鈴侍。屬漕舟之特役。渴大幕之趨風。遠荷懿憐。嗣頒溫教。捧華牋而爲重。披緝旨以增勤。銘悅交懷。悚兢次集。晏陰協序。令朔告辰。諒保順于天倪。必坦寧于福履。岵岵峻望。式注于外朝。噩噩寶書。行催于召節。勉尊寢膳。用副瞻祈。

上馬尚書

榮臨制閫。肅接前旌。奏刺行臺。嘗聳瞻于輝表。參謀支郡。彌薰疊于風猷。屬曹事之敷紛。媿箋問之疎闊。

仰高齋之笑詠。亮粹字之寧和。伏惟某官。識貫神著。材表國棟。練朝章而精密。達治體以該深。帝幄敷言。運嘉謀于漢箸。師垣賦政。得良翰於周邦。圖勳舊以在茲。握鈞衡而孔邇。勉遵福履。行契官占。淪滯之蹤。甄揚有所。企仰之素。寤想弗忘。

上晏侍郎

素籥迎寒。仲商紀候。四時爲燭。發顥氣之清英。萬寶得秋。極崇丘之高大。伏惟某官。對司神化。副掌天鈞。夙夜在公。秉賢猷而克壯。惠和濟世。翊聖政以惟新。居然內輔之臣。實繫蒼生之望。行踐上公之席。永扶太極之尊。蚤荷挺鎔。彌深傾禱。

又

迺者之官利局。假道京華。飾固陋以曳裾。恭修爵里。霽威嚴而開閣。虔接詞顏。嘗欽禮遇之優。稽拜箋封之間。茂涉迎郊之令。蔚爲生福之基。伏惟侍郎。業擅謨明。體包光智。參裁宥密之命。敷融政令之和。萬戶離宮。暫分于管籥。三公神化。方寄于阿衡。佇圭覲之修儀。由師瞻而正席。甄揚所託。系咏尤深。

又

近者漕車上計。爵刺修名。邇台座之榮光。深蒙委照。接山庭之粹表。屢獲承顏。霽鈞軸之威嚴。厚茵憑之禮遇。載旋冗局。驟隔後塵。戀賢館以回瞻。幾馳營魄。仰樞庭之坐論。彌富祺祥。伏惟樞密侍郎。識造動微。才周治體。逢辰萬世之旦。稟氣五潢之精。自入輔于帝圖。彌緝熙于神化。典樞慎密。襄天緯以在茲。賦政

將明位星垣而匪夕。資承鈞造。倍切頌瞻。

上分司李侍郎

近擁單車。適旋敝局。曠致問于左右。寢結戀于朝晡。自清暑之協辰。諒褒光之爲美。伏惟侍郎。望高肅哲。體具誠明。踐歷三臺。阜衣之朝有日。藩宣四國。甘棠之政在民。樂南華繕性之言。慕子文逃富之志。懇辭貴仕。榮保令名。方圖任于勳賢。佇冠居于台屏。夙叨題獎。倍積欣翹。

上安州范侍郎

寶魏全封。乾台舊德。地雄垣屏。朝倚金湯。惟參變于化鈞。諒同休于國體。節焉巖石。久孤師尹之瞻。是有衰衣。行佇我公之復。歎炎甫盛。頤護有加。欽嚮禱悃。誠無喻焉。

上轉輸許祠部

載擁高麾。來巡支郡。棠陰拂地。咸歌召伯之仁。竹騎滿郊。實慰并兒之戀。煦冬曦而愛物。傾丹府以遇人。私慚擊柝之才。竊庇柔嘉之德。宿官以業。旣乏臺駘之能。有文者東。復曠翁歸之美。仰荷汪汪之度。猥矜齷齪之姿。忘持斧之尊嚴。厚分庭之顧遇。其言有味。若炙輠之無窮。厥德之回。同轄毛之克舉。廣冀天而垂蔭。昌燕地以生春。內惟浮賤之蹤。永刻獎提之貺。屬鳴騶之在御。思託乘以無階。悅別旌軒。坐移鍾律。思致箋函之問。想塵几閣之嚴。蕞爾幽悰。居成曠禮。惟溫陽之戒序。諒沖氣之在襟。恭以祠部。性本自誠。體資洵直。太丘道廣。躬博愛以能周。吳公治平。集茂勳而居最。旋領商功之任。蓋資足食之謀。三官之寶。

已充萬乘之知尤異。卽奉追車之命。行歸簪筆之司。日侍清光。冥升貴級。惟祈葆育。以副瞻翹。

上亳州李觀察

伏審觀察。近擁使旌。暫辭天陛。帝旒凝睇。乍別于威顏。侯閫臨戎。適資于機略。寵靈加異。慶慰僉同。伏惟觀察。文雅光朝。簡和濟世。聿修厥德。本戴記之中庸。克壯其猷。協周詩之元老。爰從近列。式將廉車。四牡于游。奠與區于景亳。百壺出餞。聳榮觀于都門。初宣條教之文。已載歌謠之路。哲艾之美。方簡于二宮。將明之材。佇歸于三事。未遑參覲。徒此頌瞻。

上高郵劉國博

近者奉役外邦。經途樂國。修名上舍。瞻傑表以彌溫。筵跡末行。挹清言而有味。軫懷楚履。展接融樽。嬰圖之賓。且賢濫陪射鵠。太學之驕。已醉未許歌驪。篤英眇以迴深。刻幽襟而罔報。屬詣斗筭之任。亟奔星火之程。去丹戟之戎扉。別紫芝之眉宇。乃心增繫。惟日弗忘。在信次之甫經。諒宴安之克暢。伏惟國博。材稟磊砢。器韞高閒。學總羣言。游掌成均之職。政提衆目。遠符循傳之風。佇一節之恭趨。期十旬而遠至。勉精恬育。副是牢悰。

迎呂相啓

茂德格天。精忠貫日。才肩房令。居多應變之功。智比姚崇。允號濟時之相。〔案〕此下有闕佚。

答簽判張監丞謝及第啓

去夏嘗泛吳航。相植淮服。申尋舊好。略諧少日之留。契闊清言。忽成環歲之別。山間之蹊。辟左日下之間。闕稀。但懷想于盍簪。終絕馳于去牘。鳥嚶鳴于山谷。尙或求聲。魚相忘于江湖。無由煦濕。日者通郵馳報。守邸傳音。初聆第課之勞。擢丞大匠。旋審攷文之盛。親策羣廉。升造秀之士名。協方聞之詔選。恩華舉集。才令喧傳。昭王涂拔士之賢。見文代嚮儒之勝。間年得俊。榮玉籍之再升。故事題名。美翠珎之雙刻。仍慶左曹之詔。來從下郡之游。同官爲僚。得名彥而殊樂。因心則友。緣夙契之愈深。矧營道之所同。固首公之無間。實有仰成之望。深慰索居之懷。兼審行已戒裝。將卽赴幕。開秋始肅。闌暑西頽。惟導養之有方。諒燕申之增鬯。恭以某官。才思通敏。格量淵虛。文素擅于天經。學皆優于師法。赴鋒車之勸駕。常被詳延。應拱璧之嘉招。早居參畫。勤績素聞于大府。薦函交委于內臺。會齋伐于東銓。仍充賦于神甸。一登文石之陛。再至太微之庭。謁者臚傳。推湛恩而進秩。太常籍奏。程高藻以升科。用階萬里之途。實養一時之棟。親逢在旦。遠志莫涯。猥辱曩情。首貽榮牘。閱腴辭之溢簡。題淑貺以盈襟。念挹晤之甫諧。實笑抃之交會。行矣自愛。適茲願言。

與孫祕校

承服大名。從來有日。棲遲衡泌。闊略辭顏。豈期天陞之簡良。得預邦英之接迹。高山矧目。頓祛仰止之勞。清風襲人。可量穆如之快。尋沿官牒。來反士鄉。且知星駕之行。已赴瓜時之往。雖忠信之室。近接于雞音。然名理之談。阻陪于犀柄。逖懷神守。妙集天倪。同年某官。識具深明。德華森茂。久著聲于俊域。暫養晦于

英僚巍煥之風。方開于聖旦。峻良之器。宜備于皇家。勉味莊懷。少符丘禱。

徐紫微問候啓

間者修好寶鄰。託蹤後乘。忝無辱命。良自依仁。旋赴局于南州。阻趨風于西省。尺題展問。迫煩鞅之未遑。下館翹心。觀饑度之已甚。載瞻德履。允固道冲。伏惟某官。國棟挺材。天球薦質。抱周時之器用。蘊表世之文華。典命于右曹。裁成大訓。奉思于武帳。祇告嘉猷。被宸睠以方隆。竦師瞻而克峻。行參槐鼎。以右家邦。欽頌之私。度越常品。

樞密侍中間候啓

間者葱鬱之城。格修于王覲。熒煌之壑。恭接于台光。旋回跡于曹司。日搖心于賢館。萬機兢業。方藉于弼遠。五福康寧。允鍾于嘉告。伏惟某官。大修厥德。夙壯其猷。爲一代之宗臣。論三公之至道。樂只流詠。式殿于大邦。良哉作歌。克康于元首。永毗寶統。長處師瞻。凡在幅員。僉同禱望。

知郡郎中啓

頃在內朝。驟瞻峻采。承入辭于幄坐。已夙駕于藩麾。願通謁之匪遙。亦敍遠之莫及。瞻言尊府。素號名城。陶齊魯緒餘之風。居然雅俗。被墜黃寬簡之政。卓爾樂郊。几牘用希。神明增勝。伏惟某官。器能開敏。行義端修。垂紳早列于周班。起草久潛于漢署。西京循吏。甫揚豈弟之風。宣室邇臣。行踐論思之地。永惟系頌。實倍等倫。

運使郎中啓

博約之風。勳達于文。釋悃勞之想。久積于吝。比辱教函。常銘謙眷。屬有羈牽之累。頗稽裁答之誠。必冀寬明。未繩曠慢。自素商之屈序。諒冲氣之臻和。伏惟某官。學迺名家。行惟高世。躬靖康而樂道。體深沈而著書。雅意在于本朝。未躋法從。直指銜于使節。猶滯美材。制異俗之跳梁。成遠民之安阜。佇疇茂績。并迓崇恩。未獲晤言。尤增冲塞。

知郡司封啓

伏自藩府出總。臺舸戒行。忽星歲之載華。悵山川之云邈。阻陪談塵。曠奉書郵。自宣布于教條。諒綏寧于戩福。伏惟某官。簡溫迪德。膚敏懷才。早登進于英髦。亟躋榮于禮闈。佐列侯之受計。歷典要司。領大使以宣風。聯兮劇部。稍滯朱轡之守。猶稽紫橐之持。行奉詔除。入升法從。願言瞻禱。曷旣敘宣。

上淨覺啓


道風斯偃。法會且遙。企三昧之嘖呻。阻親慈相叩。一乘之圓頓。莫挹微言。徒馳資仰之誠。未救悃勞之吝。緬惟宴坐。增集吉祥。伏惟閣黎大士。夙植密因。廣薰衆德。以一音而說法。爲四衆之導師。蹟應三吳。若優曇之出現。孝行諸部。等法雨之普滋。尙阻披承。可涯瞻結。





3
4
1888

文
恭
集
六



叢書集成


初編

主編者
王雲五

商務印書館發行



文 恭 集
(六)



3 0649 7792 3

胡 宿 撰

文恭集卷三十二

書啓

賀鳳翔陳學士轉司勳并階邑

伏念畫節分符。熾邦風而無狀。赤油繫戟。式侯度以偏遙。官箴雖幸于乞靈。談緒概賒于奉教。恭審宸渙。載渥華資。益清升主爵之名曹。典序階之異數。側聆殊擢。增躍叢軀。諒延辰之遵頤。必介祉以洽勝。伏惟某官。標度逾上。襟懷粹沖。精義深繫。教之徽。懿行聳朝列之右。自副慎僚之簡。克宜調俗之規。一德鎮浮。三輔居最。朱轡按部。已安申伯之蕃宣。盤石刻才。竚掌安于之名命。盛節當暑。薰風起辰。爵刺奏儀。造雌堂而茲逸。和倪攝體。納神谷以爲祈。傾系所深。短記奚悉。

賀馬尙書再任亳州

恭審榮驅大旆。再領巨藩。以天臺八座之尊。處東方千騎之長。坐棠猶在。未忘召伯之賢。騎竹相歡。且見細侯之返。逖聆休命。大慰輿情。恭惟某官。卿裔開祥。肅溫成德。居然千載之俊。卓爾萬夫之望。被累聖之知。勳庸懋建。仰元侯之治。風烈猶存。十連蓋重于撫綏。四牡更煩于俞往。優優之政。夙結于民瞻。善善之



083
1121
2:1889

功久隆于帝念。佇聞召節。式覲法宮。庶幾哲艾之姿。永列丞疑之輔。某雅承獎勗。實愧空疎。奏尺記以未遑。辱鈞函之荐委。背芒斯集。袞字增華。拜隆賜以匪忘。刻懦衷而無報。感銜之極。抽述豈能。

賀晏公轉刑部侍郎

伏審紫詔疏恩。白雲登秩。穆清有命。華夏交權。伏惟某官。性貫誠明。德符亮采。識探天人之蹟。氣鍾河嶽之靈。而自陟降帝臺。毗維王室。建周官之六典。治具式張。陳說命之三篇。忠規克壯。功成暫退。道闡彌章。絳侯出就于列藩。令尹坦然無慍色。嘉禾瑞鳳。潁川之賦。政有聞方底。綠綈太室之攷。庸斯在總司。寇外朝之治。峻太師維石之瞻。枚卜功臣。方寄調元之任。疇咨舊德。竚膺熙載之求。辱在甄銘。倍深懼躍。

賀永興安撫何侍郎

近審榮奉徽恩。進膺顯命。絳章惟允。物論攸欽。伏惟某官。性履醇優。猷爲敏濟。早植祕圖之地。屢分籌筆之猷。進秩貳卿。式峻中臺之望。作藩全雍。實資良帥之才。暫奉外游。行當內輔。豈期謙眷。特枉榮函。載玩情辭。增銘惊抱。

賀張太傅轉官

伏審光被徽章。寵升華序。罷廣內藏書之職。秩奉常典禮之司。凡辱睠存。舉增慶慰。伏以某官。懿文絢道。閱識照鄰。韞經國之遠圖。分貳車之優任。局無留事。已彰循吏之能。爵以勸功。實顯大君之任。某恪居下邑。坐遠清藩。〔案〕此下有闕佚。

賀燕諫議轉給事中并加勳

伏審被西清之異渥。擢東掖之崇資。傳聽之間。忻詠如一。恭以某官。藝文該洽。器識融明。才兼包于三長。學通貫于五絕。爲國著令。作時楷模。刑署盡心。夙寬于中典。諫垣分職。久矢于讜言。帝睠已深。具瞻尙鬱。果奉紫宸之命。顯升青瑣之榮。且遇光華。已膺于夕拜。政資圖任。遽告于宸猷。某抗塵滋深。荷願最舊。側聽芝封之澤。第深柏悅之誠。遐企風徽。良增傾躍。

賀王密學加勳爵

伏審祇奉宸恩。榮加勳典。伏惟慶慰。恭以某官。謨明迪哲。柔則居方。懿績紀于廟彞。茂德隆乎國棟。踐揚庶仕。對越盛辰。間升樞侍之嚴。往莅坤維之服。中和樂職。興起于民聲。寬大詔書。布揚于上意。亟承霈澤。聿被徽章。增體貌以迴殊。隆等威而彌峻。佇膺召節。歸掌化鈞。

賀王給事中

伏審寅奉霑綸。撫臨大扉。進圖書之華局。輝方面之行臺。成命之有初。愜心之增慰。伏惟某官。貞亨著節。明允休誠。謨懿德以資贊襄。日宣匪懈。奮謀猷而加啓沃。晝接惟親。屬雄闡之須賢。由中宸而付命。金鑾地峻。暫辭坡上之班。策府望華。式典禁中之祕。簡良克重。鎮雅攸資。寅亮天工。方贊延于哲艾。典司國柄。佇參列于阿衡。系頌之誠。實萬常品。

賀宋內翰

伏審被鳳韶之溫章。踐鼇山之祕府。寵聞休命。抃極輿情。恭惟某官。嶽鎮吐符。奎鉤產氣。西京典策。蔚惟廊廟之高。東魯文章。迴到天人之際。而自入居藥省。專掌芝函。峻體貌之有加。告謀猷而罔伏。益厚中宸之願。爰登內相之崇。占地望于銀臺。已鄰槐府。副民瞻于具闕。卽掌台司。

賀朱祠部

伏審再迂使轡。出按祥刑。奉灑爾之帝書。副恤哉之天旨。斷獄四百。適邁于治平。奉書三千。矧隆于瞻渥。行膺芝璽。入典宮臺。豈謂光謙。首貽華削。仰恩勤之致意。但銘悚之裝懷。

賀和州朱給事中

伏審方底疏恩。象河進秩。伏惟慶慰。恭以某官。器懷優俗。識擅精明。嘗陟降以法官。特便蕃于宸眷。久從郡寄。實爽朝僉。天綍成章。式頒于雅誥。月曹馭貴。爰正于名卿。方圖時棟之才。佇踐良肱之位。傾瞻茲切。抽削匪殫。

又

伏審被獎帝綸。升榮卿寺。伏惟慶慰。恭以某官。識研奧蹟。道貫中庸。秉安節以惟亨。蓄懿文而載郁。內朝賦職。蚤居青瑣之闈。巨屏宣風。屢建赤油之戟。休令之聲。簡帝惠和之化。在民屬綈。檢之攷庸。由月曹而正秩。九卿之下。括河海。式峻榮階。三公之坐。論廟堂。行參魁柄。某夙承輝。呵克聽寵光。託毫幅以未遑。辱函封之荐及。載仰履謙之德。居多克己之辭。感篆匪忘。惟兢增集。

又

伏自濫榮中詔承乏外臺幕府樹風瞻亭臯而匪遠牢盆守器託竿牘之未遑豈期象海之名卿猥降薄雲之高義枉史公之馬走頌鄧守之泥封犀管摛詞驚華文之溢幅玉音借譽覺虛美之熏心榮眊所臨感懷增極屬南訛之長育諒泰宇之燕寧伏惟某官文獻挺才明誠廣業體忠精而濟位秉器略以致君未賦政于兩樞實結望于四國勉寬沖雅之量行宣毗輔之勳參覲尙賒系凝交積

賀徐紫微

伏審榮被綈函寵躋綸閣伏惟慶慰恭以微樞置院伴星掖之垂文綠邸頒書法天風之申令允資時哲克代聖言伏惟某官斷兇雄鋒鳴岡瓌質步玉除而振藻冠仙籍以升名拂霧旦朝早參飛于鴻黨望雲晝接常密侍于龍姿蘊賢業以宏深注聖懷而優厚記言史局納王法于婉微庀職省聯導國財于強富旋紆帝綽再易使麾九賦漕輸不頓芒于恢刃兩宮簡在特申召于追鋒延英旣開宣室斯對芝封郁穆爰隆東觀之書藥署陰岑乃踐曲臺之地典謨攸託名教是瞻雲漢成章布堯言而伊始華蟲觀象裨山袞以在茲佇奮壯猷式參魁柄庶幾翰賤永託甄揚

賀王寺丞

比者賢郎監丞狀元煥揚高藻卓冠羣英恢世德于華宗昭義方于善教寺丞獨持高義遐損珍題仰降抑之敦風但銘藏而匪石永言欣竦曷可舒陳

賀趙監丞

同判監丞。蘊崇懿業。發決榮科。邁東戶之亨嘉。叶南魚之頌歎。寵承天綽。丕佐使麾。徒池之勢方初。儻物之來曷測。猥辱巽牀之禮。先貽置袖之函。感篆交懷。敍宣匪罄。

代賀齊殿丞書

某伏審祇奉明綬。驟躋通籍。側聆新命。竊忭牢襟。恭以某官。品格淳修。業術精奧。父母一邑。殆治狀之洽聞。文章當時。矧物議之僉允。佇繇盾省之局。亟踐書林之游。未列慶函。遽貽榮牘。永言感躍。曷究指云。謹具狀陳賀兼謝謹錄狀上。

賀樞密侍郎

伏審丕膺寵綽。光伏榮階。丹辰用才。仰謀猷之鼎盛。白雲進秩。在名數以益隆。德舉再光。師瞻愈赫。伏惟某官。識窮繫表。道貫時先。翊寶運以飛天。灼清暉而照世。典樞之任。方倚于俊臣。進律之恩。爰崇于貴級。式厚當陽之睦。佇躋論道之司。大副朝僉。益恢帝載。永言竦抃。實倍等倫。

賀樞密左丞

恭審被帝檢之溫文。進天臺之左轄。樞衡是典。式倚于珍賢。名數載加。克光于凝績。伏惟某官。元精降氣。大藪生材。植德本而端方。體道沖而淵邃。承光震邸。有調護之勳。賦政藪庭。極贊襄之美。屬九闈之第賞。亞八座以飛榮。總乃懿綱。毗于至治。巖巖師尹。方接于具瞻。赫赫公台。卽期于延拜。永言慶慰。實邁等倫。

賀參政侍郎

伏審被綠綈之雅誥。進碧落之貳卿。端委星樞。對司王政。法官注意。延禮貌以方高。綿宇承風。企龍光而竊忭。伏惟某官。太和陶粹。奕世生賢。起韋平舊相之家。輔勳華至治之運。歷更貴仕。綽著茂勳。謨九德以熙朝。浚明斯在。參萬樞而濟位。寅亮居多。爰舉進律之文。用煥秉鈞之績。亞秩宗而典禮。式副疇庸。正茂宰以調元。諒應匪夕。某屬當官守。阻覲鈞嚴。徒慶慰以兼深。在趨參而弗獲。

賀參政給事

伏審光被璽章。進崇階級。踐東臺之貴近。貳宰府之謨明。天渥遂行。民瞻胥協。伏惟參政。奮絲直道。光輔本朝。亮節不回。素仰蓋臣之操。嘉謀罔伏。益隆元后之知。思青宮翼贊之勳。佐黃閣倚毗之政。爰疏高爵。式煥大猷。方委重于邦英。佇正司于台席。永言慶忭。度越羣倫。

賀司諫

竊以朝廷置官。七爭爲重。賢俊居職。萬事得言。志策所伸。功利益遠。伏惟某官。克生王國。雅意本朝。方幅獻言。屢抗其疏。宴閒召見。未始不冠。簡繇上心。任以近職。漢世儒者。給事于中。唐制從官。供奉于內。今茲妙選。允穆羣談。伏自拜恩。未遑奉記。出于謙眷。惠以教函。仰諗攜情。益增欣素。衰索參累。敍復甚稽。感戢之私。悚兢無已。

賀陳州太尉相公

伏審肅奉帝俞。升臨輔鎮。伏惟慶慰。恭以某官。氣鍾英粹。道契亨嘉。宣一德以同寅。翔萬機而成化。蔚彰祉稷之衛。允播股肱之良。屬肆類之均禧。首膺圖任。委陪京之舊治。彌表眷懷。而某夙荷挺錫。倍增瞻頌。欣沃之至。有異常均。

賀留守相公

天元復始。王歲開端。寅杓回東陸之春。蕩律贊少陽之氣。茲爲獻節。允納殊休。伏惟某官。性合誠明。道全經緯。協千齡之顛望。爲一代之宗工。坐運鈞衡。秉甄陶于巖廟。出兼袞鉞。方眷倚于留都。佇聞舊德之圖。卽冠前疑之列。某馳情東閣。方欲奉牋。猥屈常尊。首紆台翰。永言感愧。莫克敷宣。

又

天元上日。王歲首正。史策美于端辰。卦氣榮于泰象。伏惟某官。茂動奕葉。碩德佐時。爰履三朝之亨。彌膺百順之祐。出持管籥。暫居都輦之留。入輔本朝。行陟樞台之重。趨承未獲。系頌何深。

賀知

人正著統。王歲啓元。受圖盛于漢京。設樽傳于晉會。伏惟某官。履三陽之吉。膺百順之宜。以漢世外家之親。處周邦良翰之任。總司留印。早分兩使之榮。延拜齋壇。行帥十連之重。方深善頌。猥沐攜情。特貽記室之函。增佩元侯之眷。

賀知郡學士

伏審已承守邸之音。將被解龜之命。騰裝西路。行奉紫宸之朝。降劄中臺。佇峻天坡之位。何乃一謙之益。遠移十部之賢。銘棟交懷。保綏是願。

賀運使郎中

膺奉制函。就遷吏部。煩長淮之漕職。按全楚之提封。賦政有初。治書甫及。曲盡親疎之意。尤多款密之辭。研玩弗忘。感藏斯至。惟嚴疑之邇臘。諒寶練之臻和。強濟之才。尙淹于遠用。清切之任。行陟于近班。未獲晤言。但增遙悚。

賀知府密學

伏審拜瞻宸綍。進職天樞。華煥遂行。中外胥悅。伏惟某官。該練治體。敷洽朝章。革履見于步趨。溫室旌乎慎密。連分制閫之寄。丕昭良翰之風。河災旣平。允資于碩畫。帝心期簡。方赫于茂功。峻名器于有初。參鈞衡而匪遠。勉精調護。副行傾祈。

賀知縣虞部

伏審光奉聖恩。榮遷茂秩。漢臺故事。郎曹是應。于星辰周典。舊文虞官。實掌于川澤。甄升有漸。慶慰惟深。伏惟某官。德尙簡溫。性資通敏。承狐毛忠教之厚。資石建孝德之餘。膺渙綍于宸庭。撫鳴弦于洛邑。莅官行政。固多最迹之稱。奏課攷功。果被深辭之獎。豈謂謙眷。猥示書牘。在欣佩以匪忘。于敍宣而莫旣。

賀新轉官海用啓

伏審光奉帝恩。榮升朝籍。伏惟慶慰。某官清芳駕俗。良具幹時。自撫翼于亨衢。亟榮飛于顯仕。居有懿績。沃乃上心。果膺出綍之恩。榮進中閨之秩。未遑賀牘。先辱飛緘。載形攜抑之謙。交集悚銘之素。

賀新轉京官海用啓

伏審芝檢發中。方延于灑澤。棘曹引秩。序進于榮塗。伏惟某官。夷雅飭躬。中和布慶。頒條貳局。早彰書駉之聲。第課疇勞。亟奉丁寧之旨。某側聞成命。竊忭丹衷。限疆禁之所縈。造賓趨而莫及。

又

螭庭湛渥。渙發于徽章。棘寺分曹。延登于美局。某官躬桓瑞品。杞梓奇材。協贊藩條。早聞于治狀。參評國令。薦啓于榮塗。凡辱依游。俱懷茂悅。未遑晤挹。莫量傾瞻。

文恭集卷三十三

書啓

謝李相公

近卽眞祠。獲趨盛府。半氈均席。濫東閣之翹才。百豆陳儀。辱西園之愛客。撫薄軀而至陋。玷英阿以迥深。旋祇事于殊庭。復回轅于冗局。永懷恩遇。交切震惶。適臨歛暑之辰。邈阻高明之德。伏望上膺毗倚。勉順寢興。宣哲茂功。方圖于碩老。乘均當軸。行冠于宗臣。庶託甄銘。彌深系望。

又

比者肅齋眞像。遐款祠宮。去相幕以匪遙。辱鈞函之胥洎。朵雲媚彩。乍閱于雕華。攢箭在心。頓增于危慄。永懷降挹。曷敢弭忘。

又

邇者虔託短封。扣聞侍閣。重煩記室。遐纘鈞題。形金石之重言。極雲天之高義。發函披彩。飾袞垂褻。誠屈大臣之尊。敢拜嘉命之辱。庚金在伏。季火將中。勉慰萬夫之瞻。載加方丈之食。卽期旦暮。入冠宗公。夙被

甄陶日深翹頌。

又

近者相公奉寶書于方底。冠羣后于東藩。嘗因奏記之文。遠叩當關之吏。有煩鈞重。俯霽威嚴。越從靜練之江。垂賜朵雲之牘。永懷謙亮之德。益增赧汗之誠。

謝宋相公移鎮

近審改藩。旋聞莅府。河濱託乘。徒羨于鳴笳。境上馳郵。未遑于栽牘。屈茲威重。崇以謙饒。洊墜教函。載摛名筆。仰服褻華之飾。彌裝感冢之懷。臘過嘉平。春回東陸。初賦仁平之政。益臻福嚮之宜。伏惟判府太尉相公。先覺照民。宏謨緯國。全德光于出處。盛業著于規隨。謝傅東山。方繫蒼生之望。伊公莘野。行聞舊老之圖。入正中階。益升上袞。三元行始。百順來臻。系頌之私。實倍常品。

轉官謝江寧相公

帝檢宣恩。天臺進秩。祇應崇渥。伏積悻兢。竊以六職肇開。百工是督。東京故事。始建于民曹。典午舊官。爰分于起部。掌繕營而至重。在選擢以爲優。夫何蒙鄙之姿。乃玷光華之命。此蓋相公大謨在德。俯育羣材。神化自私。曲被丹青之飾。天光所濟。遂塵渙渥之恩。仰鎔造以知歸。感生成而有自。

謝相公

祇守成命。方遂赴官。振棹三淮。適臨于任所。引纓數仞。未覘于風規。豈謂阿私。遽頒誨翰。閱高雲之懿義。

踰褒袞之增榮。佩服輝光。曷勝銘篆。恭以相公。鴻猷斧藻。元化羽儀。植德本于羣倫。播仁聲于巨屏。載騰物論。益簡天衷。南部宣恩。疲瘵久蒙于綏撫。中宸溫詔。倚毗佇復于凝嚴。屬清和之在辰。祈繁戩之多祐。

謝馬尙書

近辭象闕。已託甄揚。屬以戒塗之間。猥奉濡毫之賜。俯惟誠踊。尤備德輝。恭以尙書。淵宇育神。天倪粹美。肇履朱曦之候。益臻鴻祐之祥。瞻望軒墉。卑情無任激切。懷懷之至。

又

近者恭率賦輿。恪趨軒陛。旋之冗局。常拜柔函。敬仰元臣。式臨雄闥。欽翹華館。莫叩下風。忽頒記室之書。載馳長鬣之士。藻章巨麗。慰誨隆優。爰披有味之言。更慚拜命之辱。凱風貫序。畏日揚光。在吉履之所安。固福基而彌厚。稟精維嶽。修輔本朝。全德在躬。懋勳在世。出藩王室。式資元老之猷。入贊帝圖。佇總阿衡之任。幅員咸仰。鑒察于茲。訖在甄揚。倍深傾禱。

謝亳州馬尙書

近隨下瀨之船。私出樂郊之地。長波激箭。悵鼓棹之難停。大幕泛蓮。愧趨風之不獲。豈圖行履。遽達聰明。過煩撫問之私。竊動震惶之色。自旋敝局。嘗拜尺題。適瞻樞斗之尊。苦恨米鹽之侈。猥蒙台睇。曲齒外僚。裁記室之榮絨。貺兵廚之珍醖。采雲盈簡。華袞在言。拜賜兼常。洪顏增悚。況中臺之八座。接上袞之三司。實體貌之有殊。豈尊嚴之可屈。此蓋某官俯矜蕞質。特越常倫。不遠脩程。遂流下問。永惟銜刻。何以弭忘。

屬維夏之啓辰。肇景風之育物。勉敦福履。榮保天和。方圖哲艾之姿。行涉煢煌之座。願言跂頌。實託陶甄。

謝副樞侍郎

駟騎風馳。遠降絲綸之命。天恩雨霈。益兼鍾釜之權。循牆莫遂于固辭。臨谷但增于多懼。竊念某。才華不茂。識度非宏。早逢開泰之期。獲預明揚之列。金閨著籍。參諸彥以無聞。粉署聯班。廁仙郎而有覩。矧辱兩朝之采菲。繼叨三仕以飛芻。舜帝明功。宜舉黜幽之典。湯王寬德。忽加懋賞之榮。南連五嶺之區。北接次畿之地。咸均按率。允謂優隆。愧忝冒以非宜。省品題而有自。此蓋伏蒙某官包荒育德。嘉善存誠。因鴻樞密勿之餘。奉黃屋詳延之問。致茲叢品。濫被渥恩。敢不淬礪鉛刀。驅馳駑駕。公忠盡瘁。上酬雷雨之恩。廉潔無瑕。次答鈞衡之施。

謝晏侍郎

朝綽驟頌。使符改洩。祗膺渙渥。伏積凌兢。竊以督貢篚以修方。禹州甚闕。權牢益而商利。漢制尤難。將責實以任才。必簡良而付命。豈茲懦品。猥掌大權。顧忝冒之所來。知獎提之有自。此蓋某官卿雲借蔭。鈞璧分輝。榮轅下之薄蹄。曲令引重。飾溝中之斷木。不使棄才。方竦佩于恩私。忽寵詒于書教。枉郇公之雲采。休眄何深。比陸氏之藁裝。寶持不佞。永言感刻。奚可弭忘。

謝南京晏侍郎

乃者泛下瀨之歸艗。涉陪京之大幕。恭齋刺字。肅欵賓門。瞻台座之煢煌。久塵輝庇。挹兵廚之醞醑。曲被

宴私辱英盼之兼常。撫懦衷而增愧。泊旋冗局。闕拜空函。豈圖樞宥之尊。特尙謙摛之操。猥頒荆紙。躬灑
郇雲。煥華袞以致褻。掩南金以申貺。拜嘉增重。撫己興慚。伏惟留守侍郎。道貫中庸。識精祕奧。聖業資其
潤色。賢德仰乎秉彝。奮庸萬樞。補王職于無闕。接武三事。納天工于太和。進中臺之貳卿。總留都之管籥。
中外宣績。聊出試于价藩。旦暮逢辰。佇入冠于鈞席。系頌所切。餐寢不忘。

謝安州范侍郎

阻奉台儀。坐馳勞慊。逖仰維翰之重。允繫共治之良。伏蒙某官。曲徇鳴謙。特貺芳訊。訂芬椒而有馥。均永
雋之踰滋。竊用中藏。式敦至眷。歲華晚晚。邦政靖嘉。願協頤賢。佇圖熙綽。瞻懷所萃。粗略匪宣。

謝李密諫

謬塵天渥。猥席使權。戾止淮郊。纔駐巾車之役。瞻言江府。未遑免胄之趨。方懷犀額之姿。驟降繭封之問。
金坡著位。匪接于常僚。瓊藻摛文。敢安于榮貺。字置袖而可寶。言飾袞以相輝。心石用銘。背芒增集。仰葆
貞于莊室。諒協福于箕疇。伏惟某官。藥簡刻名。奎鉤稟粹。升華崑閩。蚤參仙蹕之遊。訪道溫宣。屢前帝席
之對。邈避列侯之計。聊屈价人之藩。佇太寢之策勳。副法宮之命相。勉調常膳。式慰巖瞻。矧蚤託于甄揚。
但日深于企頌。

又

乃者某官。輟坡上之近司。奠江西之福壤。車轡所過。壯弩矢于前驅。里閭云歸。耀錦衣于白日。適臨藩翰。

大樹風聲。實雅俗之所瞻。固外臺之胥仰。不費庖刀之利。諒臻莊室之祥。恭惟某官。闕月淪精。楚珩挺質。早升華于貴近。特被睠于聖神。坐進訏謨。日深毗倚。仙瀛之籍。過陟于鼈頭。帝檢之文。嘗批于鳳尾。旋主甘泉之計。大富水衡之錢。允隆師尹之瞻。且議公台之拜。懇辭柄用。聯奏囊封。阮麾暫出于東平。賈席久虛于宣室。大猷協贊。式賴清光之臣。召節延登。卽處前疑之輔。獎題有素。傾頌兼深。

謝梅學士

逋寇卽誅。樂郊罷警。露章南闕。彌束于宸襟。封檢東臺。首膺于襲緯。虔仰薄雲之義。遠行流牘之音。勤三復以敦誠。乘一謙而行己。銘貽來貺。悚刺懦衷。伏惟某官。大雅充朝。仙風拂世。殿門引籍。蚤峻于清班。使斧宣威。屢分于寵寄。謀猷宏博。幹局精明。所至洽于風聲。惟良冠乎郡國。近者淮山聚盜。頗達于黠聰。漢割命賢。遂更于麾守。改轅夙駕。解瑟更張。大振肅于綱條。重明申于購賞。蕩除小醜。安帖齊民。方底之書。或褒于天語。中繩之府。行陟于仙瀛。銘戀所深。述宣匪暇。

又

謬被天光。擢司國賦。一埤從役。方駐于征輪。十舍傾風。匪遙于大幕。瞻言鈴侍。曠託郵音。適懷渙墨之顏。猥貺珍榮之牘。杼英詞而溢美。篤瓌意以兼常。仰荷撫存。交深銘愧。肇戒長贏之序。諒臻沖懿之風。接宴辯以未階。鬱襟惊而增極。勉遵吉履。行霈殊恩。翹詠之私。倦談奚悉。

謝周大諫

近將命于殊疆。方攝官于敝局。屬牽疲役。曠拜柔函。豈期上笏之英。猥損圓封之貺。極謙沖而致意。假題品以抒言。仰推轂之見私。覺集芒而增愧。矧天坡之貴重。處侯閫之藩宣。豈此具寮。可當隆禮。永言佩服。奚敢弭忘。適臨歛暑之辰。尙阻高明之德。勉順粹和之氣。行登宥密之私。傾頌所深。述宣罔逮。

謝胡少卿

言睽韻宇。迅易年華。引襟望風。實除于丹抱。抽毫致訊。罕屬于飛郵。恭惟疇厚之知。遠貺珍華之翰。河南憑几。仰意愛之彌親。孟陵辱書。實欣歡之無極。逖瞻坐嶺。弗爽沖和。恭惟某官。偉望逸羣。宏才御衆。名臣刺部。方總于教條。上帝簡心。將延于體貌。式登二府。用慰輿情。未克承顏。敢祈葆質。

謝睦州朱給事中

自濫霈綸。常馳柔幅。近遘石城之使。遠貽瓊蘊之書。墨妙相輝。迴奪宜官之善。牘珍可寶。斗踰從事之賢。仰蘊藉以居多。辱褒揚而太溢。伏惟某官。宣猷克壯。秉德惟醇。蚤引籍于東臺。乍淹賢于外服。金甌之下。久覆于香名。玉鉉之間。卽調于芳飴。暄蒸未解。系頌滋深。勉覲葆光。竚茲延拜。

謝朱給事中

近者恪修貢職。祇覲宸闈。式瞻幄坐之尊。猥被綈函之命。星鳥結秩。濫造于冬曹。金節均權。復塵于使額。自省儒庸之質。詎堪進擢之恩。此蓋某官。善育人材。曲私風鑒。慕先民之推轂。致卽日之濫巾。遐走伉兵。俯傳真教。披英辭之藻爛。仰瓌意之淵虛。拜命增慚。佩音無斲。永言敢戴。奚克序宣。

謝子莊知郡

願言違摻坐積悵勞。襪被以居。慚禁門之尸職。棲毫且久。缺郵舍之通書。豈謂搗沖。未繩曠慢。遐記朋簪之舊。荐貽訊牘之華。執玩以還。感藏無斃。自炎辰之順履。諒沖氣之保和。伏惟某官。風識清夷。局量開敏。久次道山之籍。夙陪文石之朝。臨摯而顛。未隋橐從之列。不瑕有害。尙淹符守之居。勉思塞馬之言。行進階鸞之綴。末由款睇。益冀珍調。

謝福州袁待制

近者曲被恩章。亞升卿序。省叨踰而誠幸。緊獎引之素深。尙稽書驛之儀。先枉記曹之間。過垂謙眷。增萃感惊。伏惟某官。名世傑才。熙朝俊德。早直祕文之所。復聯拜瑣之榮。江城奧藩。暫資于偃治。斗樞近府。行覩于參毗。尙遠披承。益祈保輔。

謝狄祠部

逸疎宴對。寢結寤思。居多簿領之迷。罕詫書郵之問。猥蒙疇念。遐損珍題。敦隆久之懿誠。延華虛之美譽。迭懷意愛。備積襟悵。屬流火之協辰。諒味腴之加勝。樹風岷益。矧恢刃之有餘。賜對溫宣。佇追車之降召。勉精葆衛。式大寵光。

謝鄭都運

近覲清風。獲攀舊契。奉折楹之禮。叨更僕之延。遵屬卽途。未周素意。忽奉垂訊。彌緝隆私。緬惟計局餘閒。

道腴增集。尤順和倪之理。俟膺大用之恩。其在瞻依。曷勝銷黯。

謝親家寺丞

自睽儀矩。載涉暄涼。方懷捉塵之譚。忽辱偃波之翰。衰敝之族。幸聯于華宗。謙挹之辭。遽形于緝旨。載仰懇勤之睠。彌增感篆之懷。克副瞻依。攸宜葆育。

謝知府密諫

言睽勝範。渴奉仁遊。絕憑操染之誠。第積悃勞之吝。比者隣疆訖聘。輶乘言還。踐首境以方初。違伉兵之忽至。特貽函教。縣布旨辭。欽惠好之匪忘。佩嘉音之無斁。伏惟某官。制致高劬。識業精明。雅意在于本朝。美猷濟于名閔。萬兵督府。聊施羊杜之才。三事冢司。行繼韋平之拜。永惟真禱。實倍常情。方屬緒寒。益期沖齋。

又

都圻孔邇。書舍相望。徒企見于風徽。頗闕通于誠幅。豈謂未忘餘眷。尙軫攜情。比因行李之臨。猥辱函封之貺。絢英辭而累牘。秉高義而薄雲。執翫忘劬。佩藏增至。久苦冗煩之思。稽憑柔削之誠。尙冀并容。未攻逋慢。大冬積凜。元陽甫升。允納善祥。別膺華渚。系頌之至。敷述罔殫。

轉官謝路轉運

比者帝扉修覲。式綴于周班。天詔升華。猥塵于茂級。擢冬曹而結秩。正禮闈以充員。表著增隆。寵輝至渥。

念僥榮之所自。識延譽之有來。此蓋某官道高提衡。志崇推轂。齒牙不惜。遂竊于靈名。爵位相先。俾叨于榮賁。永言感篆。匪克宣陳。

文恭集卷三十四

書啓

知湖州謝兩府

越從凡品。超補列藩。地介江湖之饒。俗兼魚稻之利。溪山勝秀。土風善平。前世稱州。得者謂之佳郡。本朝用吏。初亦選諸名臣。未及孤生。特爲妄施。竊念某稟才空劣。受性愚駑。不通道數之方。罕研世務之要。起于徒步。寘厥周行。寡過未能。常勤思于往行。哀名不令。亦勉勗于前修。幸階制治之辰。猥玷繙經之館。位貌凡近。旣不足以動人。文采荒疎。復無能而表世。衛方多于君子。魯且號于真儒。迫生業之屢殫。加親年之在懼。亟營外祿。薦叨上仁。天子當陽。規樹凱風之化。相君輔世。興憐烏鳥之情。從欲推恩。油然曲盡。往俞敷命。惕若無從。況乃邊梗未夷。戎車方駕。汪童之齒。宜執于干戈。終軍之才。不習于金革。未束置于高閣。尙假守于黃堂。忍愧宴安。懷私熙盛。此蓋伏遇某官。使人以器。代天之工。度用百材。胥協誠陳之矩。曲成萬物。各懷性分之方。施及至愚。謬延良選。惟佩乃賜。以竭其頑。有社有人。不忘于力政。在官在庫。但職于首公。捨是以還。未知所措。

兩浙運使謝兩府

孤外守藩。訖無報稱。東南領使。遠有光華。度越餘州。超按本道。寵過素望。悸集丹衷。竊念某品在下。凡跡繇少賤。早緣寒素之日。偶及仕進之門。謬籍朝闈。濫巾儒館。以鄒魯之鄙朴。值唐虞之欽明。當九官之吁都。聞百工之庶誦。陪廁大夫之末。出入周衛之中。不有忠言。少裨上聽。曾無治策。以拾朝遺。止玷書筵。空塵計闈。昨以私門。遴閱親匱。在撥。因章請以歸躬。幸詔除之。賜補授中吳之右郡。給東省之左符。密邇家園。偃息靡舍。濱帶江湖之利。資承魚稻之饒。視于他邦。最爲豐壤。芻狗萬物。顯繫聖君之靈。坯冶一陶。陰知宰匠之力。然而治無三最。事且百疎。猥賜告寧之恩。聽營舉祔之禮。成區區之小亮。繫蕩蕩之至仁。宿素所期。嘗甘溝壑。存亡爲感。何答丘山。方還舊貫之柄。且謹寬條之布。庶仲久效。庸追羣譏。不圖睿恩。就升使領。降尺一之詔。檢易方寸之印章。服冕巡邦。懼忝朝廷之寄。過家上冢。併成邑里之榮。所封之墳土未乾。告第之泥書尙渥。有懷春露之感。得慰寒泉之思。加以前後十年。周旋三郡。皆叨善地。並在南州。聯蹟二吳。均有湖山之勝。分行八使。復居風土之佳。于已雖豐。在民未泰。大則餘杭一郡。江役繁興。次則浙西數州。人饑流冗。糟糠不厭。杼軸其空。官司之犴獄實繁。部內之賦輿尤重。早衰多病。至陋極頑。宏陟之恩。雖蒙于曲造。負乘之質。終懼于疾顛。此蓋伏遇某官。平秩天工。敷施神化。百材皆度。俾安輪楫之宜。庶尹允諧。克贊簫韶之化。致茲擢序。敢忘昭銘。願竭其愚。少供乃職。過此以往。未知其他。

知制誥謝兩府

名器之公。假人攸慎。車服之賜。章德爲先。施及腐生。恩踰本量。內循空素。交積悻兢。竊以內史官儀。號稱華重。西台資地。進陟邃嚴。演如綸之言。式是羣下。敷渙汗之令。形于幅員。在宣賦之才難。信選掄之任重。安于之善爲命令。隨用宰人。射父之能作訓辭。見誇敵國。宜敷求于髦彥。用典作于詔文。必也冒居。奚逃聳誚。如某文非根道。學不名家。以野生一介之微。玷士鄉三物之學。會皇初之紹宅。濫宵雅之始官。隨牒肆勤。脫巾待罪。治朝博納。務收士幹之良。下國召還。猥玷材林之選。預游雋躅。竊覘祕圖。浩如觀海之莫涯。惕若學山之遽止。徒憊迷于疑闕。奚訂正于謬譌。日費大官之饗。歲重高門之地。自惟空劣。無裨補于本朝。願試劇煩。因馳驅于外服。去文史切劘之益。困簿書聽斷之勞。契闊十霜。竭來三郡。入預計官之聯屬。出膺漕節之治煩。輿賦是經。願才資之素短。吏文所責。去學術而已疎。有原魯將落之譏。乏武仲不休之思。矧雋髦之輩出。願駑蹇之早襄。比來試郡之行。姑避當塗之勝。方受言而刺郡。忽辱召以還台。爰當入謁之辰。俄被已行之命。擢居記史。參備禁聯。應文象于極東。司言動于君側。延英墜典。曾未暇于建明。史觀移文。猶弗遑于序次。會承使乏。出講鄰驩。幸謹彝儀。獲通常聘。迨南轅之復命。辱公府之試言。悅迷制目之淵。僅就詔籀之次。荒疎已甚。擯黜是虞。乃蒙含垢之收。進辱代言之任。仍賁身章之飾。併增神觀之驚。況書詔之煩。當五曹之重。而宿官之業。有四禁之難。藐是瑣材。疲于文俗。心源久翳。病幹弗支。將何以宣究典彝。發揮謨訓。尋權與之所自。知封殖之匪他。此蓋伏遇某官。寬假用人。謨明致主。物有未獲。則曰時予之辜。善或可稱。斯惟我后之德。翊魁杓而上運。持坯冶而曲成。乃因密勿之餘。愛奉詳延之間。致

茲叢品。猥玷清官。雖成命之在茲。愧用才之不值。敢不恪修乃職。祇謹攸箴。考父鼎銘。用服益恭之訓。虞人皮弁。更堅所守之方。某鷄抱危疴。久居寬告。雖偷存于殘息。終稽奉于謝牋。怠慢之尤。心顏靡措。成拔之惠。肝膈弗忘。卑情不任依歸之至。

知制誥謝外任

叨奉制函。謬躋詞掖。預裁方底之詔。復從屬車之塵。祇荷寵甄。交增榮悴。某才資疎劣。器質方愚。感會昌辰。階綠薄技。與游大國之俊。領校外史之書。佔簡畢之謬譌。莫能訂正。守瓶筭之隘局。無所建明。姑避時髦之鋒。斯存拙者之效。比來補外。寢欲退藏。久服吏文之資。殆將學殖之落。竭來都輦。更踐江湖。十稔于茲。百憂可既。出于誤聽。旋被召還。參二史之記言。預一介之修好。徂裝甫褫。試札就頒。邁陞西省之聯。入備右樞之屬。典司名命。主作文辭。宜先膚敏之求。猥厚瑣涼之進。省循甚熟。慰藉有由。此蓋某官扶厚時風。獎成士類。見私品目。得遂恩章。仍敦沖挹之風。首枉褒華之牘。言多溢美。意切相先。第增箴糝之慚。莫罄汗筠之述。

謝知郡考功

言聯德範。阻奉優游。相望荆粵之陬。坐積參辰之嘆。山川云遠。歲月徂長。曩置郵筒。嘗紆函教。屬冗煩之嬰思。惕操染之愆儀。尚恃眷私。未攻瑕短。自商風之協候。諒妙氣之棲襟。伏惟某官。風識夷通。器懷閎敏。克繼名門之韻。聿升禮闈之華。剖符臨藩。早布宣于德教。乘軺握節。復糾正于天刑。薦著平反之風。卽奉

寵休之命。佇祈褻渥。入躋禁嚴。遡德企深。馳誠凝竚。望風懷想。尙阻拜于光儀。飛驛傳郵。辱猥頒于華檢。仰銜惠好。居極銘藏。

謝知郡都官

言阻溫儀。坐更華序。屬伉兵之至止。辱榮牘之見貽。惟顛氣之甫回。諒沖映之彌勝。西陵地密。今者事叢。諒幹裕之煩神。冀保頤之綏福。

又

風期云逸。星序北遷。繇因書驛之臨。常損教函之間。旨辭有溢。謙眷彌沖。以衰藹之病姿。玷深嚴之禁直。居多燥吻。曠致柔誠。自素籥之戒涼。固冲襟之集祉。伏惟某官。器懷明劭。才局周通。早聯畫省之曹。尙滯朱轡之守。能名最目。已推冠于州藩。優詔陟文。佇入翔于臺省。未諧披晤。但切頌瞻。方遡蕭辰。冀綏顛氣。

謝知郡郎中

言違德矩。企挹談叢。屢星舍之云移。曾書郵之莫寓。豈圖謙眷。迴篤情期。流款密之教函。損褻華之文致。久緣衰幹。竊冒禁聯。徒佩服于嘉音。曠裁修于謝幅。尙期寬裕。未卽訶嫌。緬惟班政之餘。保厥頤神之妙。矧才猷之茂著。加治績于洽聞。佇膺溫密之章。進踐高華之任。未諧披晤。但積頌瞻。

謝知郡少卿

暎異風期。淹移歲序。莫遂晤言之適。但馳勤望之勞。猥辱摛情。見尋雅好。遐損八行之翰。增銘三復之言。

承含味于真腴。彌協宜于妙氣。未涯良覲。尙冀精調。系詠之私。敷述奚旣。

謝知郡學士

開宴遠談。浚明企德。坐易暄涼之序。絕馳問訊之音。夙暵匪移。函題荐及。雅情彌腆。榮藻益芬。執玩惟勤。感藏兼積。具承認箚日簡。治目歲凝。文史自強。神明逾粹。道山諸彥。久企俊游。策府羣書。適資訂正。卽奉更書之入。別膺渙綽之遷。系頌所深。願言曷已。

謝知郡中舍

睽奉溫標。遷流華序。方企浚明之德。忽行款密之函。飾衰致褻。折瑤流問。服摛情而斯在。慰衷抱以奚忘。自順履于時寒。惟肆勤于政實。無虧道養。允協福綏。矧惠化之凝成。佇寵恩之舉集。未階宴晤。徒切願言。益冀保頤。用寬馳系。

謝知郡祕監

涓休日策。受事堂皇。因毫驛以寄通。辱書騰之流況。仍加味腴之勝。彌臻綏福之宜。伏惟某官。履德清純。栖神簡素。含金球之質性。蘊韶夏之聲文。進秩大蓬。峻官儀而伊始。宣風列郡。賦臺札以方初。佇聞政最之褒。將大老成之用。傾素增積。造次罔殫。

謝知府學士

祇局匪遑。吮毫寢闕。猥承謙節。曲枉珍題。越百舍之脩塗。託九文之仙跡。獎憐加厚。銜刻匪忘。屬星火之

方中諒風襟之益快。伏惟某官溫文具體。雅尚邁倫。久更畫省之曹。特厚邃旒之睠。約史三長之筆。哲聖翁歸。宣風萬里之沙。治聲藹異。行紆褻檢。卽峻貴塗。勉務葆光。副茲懷戀。

謝知府大夫

自睽溫範。比辱榮函。屬寓直于北門。居常襆被。思寄聲于南國。幾歎栖毫。惟寬裕之見存。幸疵瑕之未露。瞻言靜治。彌宅至和。外屏宣風。暫治別車之任。中臺參務。佇還起草之司。益奉褻華。庸躋要劇。莫由挹晤。但切頌瞻。

謝運使郎中

叨奉宸恩。進兼祕職。以空疎之才品。冒蕃疊之寵靈。方切愧魂。猥承謙眷。枉褻華之訊牘。敦茂悅之襟情。載欽獎借之私。彌切感藏之志。迫于衰拙。局在禁嚴。居多寓直之勞。闕致報章之問。厚意未答。愧汗無從。敢冀并容。莫殫敷敘。

謝提刑中郎

積稔睽風。繫時懷德。勲承挂冕之老。特枉行書之郵。高義服之無窮。厚意久而不答。每惟逋慢。第切兢慙。緬思繕性之方。舉協治神之理。想啓期之三樂。無廢援琴。願衛武之百年。益宜加飯。永言馳系。莫克敷宣。

謝兩制

近者被詔叨榮。亞卿外秩。首辱謙沖之誨。過形褻借之辭。展誦忘劬。寘藏增耀。伏惟某官。魁才閎邁。履德

端方踐荷橐之近班。結藻旒之隆睞。竚符士論。入奉朝咨。尙阻款瞻。徒深馳詠。

謝成都鈴轄

風猷言阻。歲序載華。早愆裁削之儀。尤積瞻馳之素。懸承謙眷。屢枉榮函。比仲款敍之辭。益諗周勤之志。感藏無替。敍答有乖。自順履于寒凝。諒舉臻于休祉。末由披會。尙冀節宣。傾系之懷。造次奚旣。

謝解替

被詔還都。辦裝有日。言念當衢之第。將諧免冑之趨。仰寶練于機神。沓祥臻于吉祉。依仁匪遠。結吝猶多。勉奉本朝。動遵福履。

謝轉輸

近頒明恩。適諧莅任。引領遐增于素悃。順風猥奉于圓封。佩翫攸深。欣慰彌集。恭惟某官。清猷輝鑠。雅度淵沖。流馬之功。洽聞于康濟。蓼蕭之渥。方佇于敷求。隆祐用臻。虔祈無已。

又

比者祗護辟容。恭詣珍館。挹瓌姿而匪遠。浣牢想以居多。仰沐懿憐。俯頒華削。窺英辭之溢幅。辱腆貺之兼常。銘悅交懷。序言寧悉。

謝諸鎮大僚海用啓

謬奉帝綸。擢居使繡。單車從役。適憩于樂郊。大幕瞻風。迴搖于楚旆。未奉赫蹏之紙。猥頒方絮之函。灑五

色之仙毫。時紆妙蹟。乘一謙之懿德。曲賦華褻。荷輝阿之兼常。激懦庸而增感。瞻言吉履。式保太和。伏惟某官秀範冠時。壯猷迪哲。身兼數器。挺國棟之偉材。牘奏千篇。包王臣之大略。禁闈之聲名。籍甚外朝之表著。特高繇上帝之簡心。資良臣之刺部。行膺迅召。式迓霑恩。奉三接之清光。參萬機之大政。雅承慰藉。深頌瞻翹。勉保興居。用宣靈寵。

謝獲羣賊獎諭海用啓

小寇逋誅。偶嘯聚于山谷。大君有命。爰會合于甲兵。未張一目之羅。已覆綠林之黨。如某粗修封管。准奉詔條。空竭愚駑。詎施方略。洎投恢網。益聳威靈。夫何蕞爾之姿。忽被發中之命。此蓋太保道存激勸。言炳丹青。露章深達于穆清。褒詔下敷于幽仄。永言蔭庇。惟極肺肝。敢不益勵寸心。勤修懦節。期于盡瘁。上答所知。

謝都督諸牧

伏以敵滯在辰。企韻堂而不接。缺煩嬰思。奉心畫以尤疎。某仰承謙挹之風。繼損珍榮之牘。丁寧抒意。超十部而並賢。婉約成章。灑五雲而有爛。永懷恩紀。併集襟襟。某官隆棟偉才。宰朝茂器。貳宮協化。方延擢于正人。兩府須賢。佇對持于魁柄。願言系頌。庶越等倫。

謝卿監

茲者叨被詔函。參聯卿省。冒榮過厚。揣己知慚。敢期沖挹之私。先枉褻存之誨。珍藏無斁。裁敍罔殫。

謝人賀

比者叨塵天綽擢正郎曹伏蒙某人命記室以裁書走伉兵而賜教鈞銜荐委慈誨下臨郇國采雲灑筆精而布體孟公榮牘煥言衰以成章捧戴有初凌兢失次況中台舊相貴絕于等倫而外計庶官禮無于匹敵仰荷謙鳴之德但增夕惕之懷感篆所深序宣罔逮

謝人賀冬書

某再拜違奉以來可涯馳系繇以牽鞅曠致誠悞比因行李數蒙教函稽于修答期在見寬長至令辰允納新福猥承寄示華緘感悚之懷無以云喻末由瞻覲益冀珍厚

致仕謝兩府

抱疾乞身甘守垂綸之灑蒙休起廢復彈掛壁之冠洪造何私蒼顏有覩伏念某智迷寡達途遠多窮發策收科倚青陽而款轡辭榮就養懼華髮而循陔旣銜弗洎之悲仍困益侵之疹固當掃迹非敢爲高松菊陶軒悄無車馬箠瓢顏巷尙有琴書微倚樓看鏡之懷習尋壑經丘之陋敢圖淪味猶辱矜憐此蓋伏遇某官量合四溟事兼九德闢振淹之公道崇礪俗之宏規拯拔湮沈與繼千帆之後吹噓朽蠹俾同萬木之春而某瓠落奚堪液滿無用自初聳激猶弗如人向晚衰遲豈能就列遠隨煙霧固非巢父之掉頭近處雲林願效堯民之鼓腹有恩弗報懷德空慙

夫人謝賀封啓

某啓。久違婉範。日企芳猷。空盈思遠之懷。莫致問安之禮。緬惟春首。聿此陽中。無虧沖養之方。益協懿和之美。今者幸會。近忝渥恩。得疏南郡之封。仍進小君之號。適塵溫綽。欲奉謝牋。猥沐仁慈。特賜函翰。形褒華而溢幅。積感篆以在襟。虛涼未獲于瞻。依柔德更祈于保育。

文恭集卷三十五

記

真州水閘記

夫權以濟事。智在利人。鄧訓改石臼之河。石臼河。原本誤作石舊。今改。攷鄧訓傳。因理溥注。史不前史謂有陰德。謝傅築新城之埭。後人比之甘棠。猗忠利之在時。邈今昔而同貫。江漢紀于南國。設地險而稱雄。舟楫濟乎巨川。前民用而爲急。若乃疏巖險之道。貫利涉之津。息肩乎風波之民。盡力乎溝洫之義。則建安水閘之制。其利溥哉。國家神基萬年。天宇一統。海隅日出。具爲帝臣。域中地大。莫非王土。文軫所薄。賦輿攸共。自江之南。寶藏是出。有禹書金璆之貢。兼漢官鹽鐵之利。齒角羽毛之所產。資糧屨屨之所入。固已府無虛用。而國有餘財。維迎鑾之奧區。乃瀕江之劇郡。寶勢橫野。壓楚地之五千。大浸稽天。吞雲夢之八九。南踰五嶺。遠浮三湘。西自巴峽之津。東泊甌閩之域。經塗咸出。列壤爲雄。據會要而觀來。大聚四方之俗。操奇貨而遊市。號爲萬商之淵。淳化中。始建外臺。竝置大使。領山海經畫之重。督星火期會之嚴。九賦斂財。日以商乎功利。萬艘銜尾。歲乃實于京師。先是水漕之所經。頗厭牛犖之弗便。江形

習下。河勢踞高斗絕一方。壁立萬仞。每歲木葉秋脫。天根夕見。七澤收潦。當涸水之有初。萬里連檣。自上流而竝至。將乘高堰之險。必俟靈潮之來。淺涸貽憂。引挽甚苦。守卒達旦而不寐。嚴鼓終夜而有聲。人相告勞。官不暇給。乾興中。侍禁陶侯鑑寅奉辟命。掌臨岸局。槩結必剖。精幹有餘。將剗革于舊方。特起發于新意。按歷長河之曲。行營大江之濬。經始二閘之謀。關白一臺之長。時制置發運使工部方公仲荀文思使張公綸咸以碩望。注于上心。秉牙籌而籠貨財。握金節而宣命令。樂聞經畫。肇敏成功。爰黈益于章程。旋條析于經費。移屬本部。調給治具。時太守都官曾公乾度前倅職。方王公汝能咸秉心勤瘁。協志贊襄。諸賢好謀而成。衆材不戒而備。扼其別浦。建爲外閘。礪美石以整其下。築彊堤以禦其衝。橫木周施。雙柱特起。深如睡驪之窟。壯若登龍之津。引方艦而往來。隨平潮而上下。巨防旣閉。盤渦內盈。珠岸浸而不枯。犀舟引而無滯。用力寢少。見功益多。卽其北偏。別爲內閘。鑿河開奧。制水立防。瞰下澤而迴深。截澄流而中斷。月魄所向。潮勢隨大。上連漕渠。平若置梁。湍無以悍其激。地不能露其險。木門呀開。羽楫飛渡。不由舊埭。便達中河。憧憧斯來。沾沾相喜。商旅息滯淫之歎。公私無怵迫之勞。歲省之費甚多。邦儲之運益辦。自天聖紀號。三年之冬。庇徒皆作。越明年孟夏。僦工大畢。材用所給。取于城守之餘。力役所資。輟于篙工之暇。坯土不奪于穡地。秋毫咸出于縣官。未幾制置二公。秉命圭。覲嶢闕。表其功狀。刻寫規模。由東塗而進觀。自中宸而簡在。復降溫詔。獎勸勤略。且有天旨。申諭郡將。飭其必緝。貽于無窮。噫。自建隆之元。王塗日開。五土反乎正色。天下號爲重開。控于南邦。茲爲北道。總攬衆職。更歷羣公。求民之瘼則多。此川之阻。

未達。豈漢陰抱甕。恥用于機心。將溱水脫車。未周于病涉。承弊達變。踵在今乎。是標輿地之圖。書大事之策。作鎮輿壤。垂法永年。俾神靈而支持。與天壤而相弊。可矣。侍禁陶侯。思紀成績。昭示方來。過聞畫餅之名。俾記他山之石。重迫制置文思之命。史君都官之請。溫教屢下。亟讓弗皇。作器能銘。遠慚于長筆。表年首事。始務于直書云。天聖五年十一月十七日記。

常州興化寺記

晉陵興化院。東南距縣三十里。圖志脫略。了不究創刹之始。按沙門從喜所撰石記。寺本名南蘭。會昌前。寺已有之。厥後例從詔毀。至南唐保大中。始復舊額。易爲禪院。廢址僅在。遺棟蕩然。我之曾門。夙植善本。往以亂故。泊無宦意。治財以專施。修稼以勤貸。糾合鄉義。捍固生聚。他盜引去。茲境賴安。一旦出囊中百金。聚其族而謀曰。方今國步尙擾。人道未夷。幸而宗門得免亂世。吾聞西竺之教。利生接物。因權顯實。使人崇十善。持五戒。去貪離著。尋本究原。復一性之眞常。息萬塗之流競。擺落根境。超出生滅。此神道之極。摯津梁之至妙。無生上法。雖然成于解行。有爲勝業。亦以董于種性。盡興故刹。以勸同開。且爲香火之集。庶厭金革之難。于是上下恭命。壯幼畢力。卽其故處。做爲蘭若。崇門峩峩。高殿岌岌。齋房環合。步廊周旋。像設具嚴。海會來續。煥焉大壯。號爲中興。國初泛恩。詔賜今額。自僞唐保大丁未。本朝乾興後元甲子。凡一周有奇矣。年祀寔久。咸安厥成。風雨所漂。弗支其壞。金碧漫滅。棟梁摧頽。有孫曰震。于某爲伯父行。善持門戶之業。深惟堂構之言。率籲諸宗。議建大殿。哀合衆施。凡得錢若干萬。命寺僧自遷繼。樹額尸其役。

工未及僦而我伯父奄捐館舍。子襄悼先志之不就。痛遺恩之罔極。虔奉治命。誓成夙願。有同里湯見素者。思植善果。樂預能事。亦施五百萬錢。協齊材瓦。復命義圓。法源二僧。關領其事。天聖丁卯十二月。新殿成。觚稜竦峙。欄牙開張。威鳳欲跂。名翬將翔。重轅眈眈。辟容煌煌。左鐘右磬。夜梵晨香。裝嚴百福。鎮茲一方。妣子格跪而前曰。曾大以來。家世樂善。寺已絕而闢起。殿將壓而勃興。宜著文辭。有表後世。復援孔悝銘鼎。論譔先祖之意。辭之弗可。因斐然直紀。且以詒諸雲礽云。

潤州金壇縣清修亭記

縣邑之任。有社稷民人之衆。兼典刑政令之重。春秋齋祠。尚于肅。朝夕聽斷。主于明。大率神過用則疲。形太勞則殆。鄙吝乘間而入。和粹有時而致虧。君子防其然也。故官寺設宴息之所。公日著休澣之令。撥去几案。依于琴壺。宴嘉賓。友多聞。陶冶情性。發舒誠明。節適語默之宜。均齊誼靜之觀。夫然。則神與境會。心將道俱。乃可以彊有涯之生。應一切之用。以之事神治民。則有成志而無違心。疵吝日銷。純白來舍者也。濮陽吳君中復。端粹而文。爲金壇長。縣治三茅之左。密邇勝秀。精氣利澤。延施此郊。山記所載。句金之壇。取是紀邑。而縣寺湫底。承前弗治。廳前數棟。裁容受署。至于委蛇。退食之餘。則無他齋。以息外物。患其若此。議未從出。會民有輒伐護祠材竹者。事發。當籍之入官。計踰百章。足支一構。因宜乘利。究奇選勝。迺得西偏爽塏之地。裁作崇址。揭爲新亭。繞帶清渠。環映碧竹。野色在望。真想滿前。榜之曰清修亭。君寶元初登科。聞喜宴日。上用故事。賜第一人以下御詩。于時斷章有崑爾在清修之句。因摘二字。以名其亭。且

度上化而服官政。亭成不日。書至言狀。求記乃事。欲詒諸後。使知命名之自。而識置亭之本。不止專宴游。資賞眺。樂禽魚。馴閒玩。卉樹華滋而已。靖恭爾位。其有意于大雅者乎。君以緒餘風力。能舉其政。字綏諸氓。不翅己子。勤恤此職。有踰家事。退則發舊書。曩牘。觀前言。往行。間命僚佐。相與觴詠。曹無留事。訟源自閉。引伸此道。奚適而弗裕哉。雖一亭一邑之細。其規爲思致。所存蓋遠矣。

高齋記

南中江山。類多託賞之美。金陵故都。緒餘六代。華人夏士。盛棲此土。雖一丘一壑之細。皆經高賢名輩。嘗所留連。茅許世外之風。王謝江表之德。山林阜壤。號爲名勝。子城東北。趨鍾山爲近。南唐李氏。嘗因城作臺。臺上望月。人相呼爲月臺。下臨濬濠。正面覆舟。南對長干。西望冶城。榛煙漁火。泉華谷氣。川禽山鳥。翔嬉其間。林木噓噓之聲。雪霞起滅之狀。須臾眺聽。萬態遞出。此名勝之內。特又名勝者也。臺傾地荒。介在人外。一境之秀。未有所者。康定辛巳之夏。龍閣南陽公。自三司拜符安輯。江介政尙凝簡。日多休暇。寄意琴酒之適。留好風泉之賞。他日因行後圃。遂登故城。適廢臺。留壞趾。躊躇四眎。愛歎形勝。指言佳麗之觀。此最妙處。因哀材瓦之羨。調兵幹之使。舉蕪穢。養華薄。開逕自下。立齋其上。環植百柱。通敞四軒。高俸譙樓。廣容宴豆。檐宇飛竦。勢將干雲。旁矚郊坰。俯見廬井。句曲之地肺。華陽之洞墟。三峯參差。彷彿在目。雖進躁之士。忱迫之人。暫遊其藩。一踐茲境。其心翛然。猶以爲已登崑崙。涉閩風。澹乎忘歸。有超離昏俗之意。又況真粹之流。平日隱几。反照正性。保御太和。人境相得。其樂如何哉。公旣用鐘鼓落其成。復須金石

記其始。比辱來教。見命記事曰。我作是齋。姑欲榜之佳名。而絕境難募。了不可得。今采謝宣城宴坐之意。直題曰高齋。夫齋戒潔之稱。休舍之所。君子根本于道德。拯墊性命。利用于安身。有餘于治人。不役志以營己。常虛心以待物。其有爲也。精義致用。以經世務之韞。及其無事也。恬熙相養。以濟天均之和。故道用不勤。而氣守自若。庖丁之奏刀。老扁之斲輪。顏生之坐忘。伊公之強德。神機之王。繇此物也。夫抱道混成。栖神高映。初總機劇。未嘗榮華。比辭禁奧。亦忘欣戚。方舍山水之所以穆仁智之性。高情遠尙。焉可跂耶。人之登是齋者。當領會公意。不止邀樂壺觴。取悅于林岫而已。足使軋者忘其名。夸者辭其權。長留清風。以遺永年。慶歷二年四月十九日記。

題湖州西余山寧化寺弄雲亭記

西余山。東出吳興城十八里。初二山介溪兩傍。俱名曰余。土人以東西別其稱。而西余特著。單見于地志焉。支水北引。注于山下。有廢寺十餘棟。律徒不寧其宇。景祐中。沙門寶實。聿來尸之。崇治僧坊。安集禪侶。慶歷壬午。予假守在詔。茲山之勝者。始欲一往。仲冬乘雪初霽。晏溫少寒。因與治中諸僚。泊一二禪老刺舟而造焉。履莓苔。捫蘿葛。凡三休。甫達于上方。蔭長松。坐盤石。躊躇四顧。有翛然遐舉之想。然猶恨登覽之差。晦攀躋之良勞。有亟其還。未盡所適。他日再往。則天風自戢。水波沸揚。嚮之荆榛。翦而爲徑。途昔之土石。累而爲磴道。安行百級。遂至于高頂。復又瞰山西面。結宇十楹。通清遐。開曠之觀。坐已。實師前請曰。山去湖十許里。陵谷何常之有。庸詎知千百年後。此山不在湖之中耶。盍與之名。且志其事。以遺

來者。使知創寺之始。因以弄雲名其亭。亭之妙處。予能言之。卞山當其西。如蒼龍蟠據。勢欲奮挺。太湖在其北。若元氣磅礴。浩無津涯。洞庭林屋。綠毛縹緲。諸峯了了在目。遠帆參差。飛鳥凌亂。溪雲往還。野艇出入。百色映見。如在鑑中。此北眺之勝最也。夫真妄在心。誼靜依觀。上智之用。不泥于物。中人之習。迺牽于境。吾知夫暫登茲山。憩茲亭。可以無誼無妄。惟真惟靜。境與心俱冥。神與氣俱生。又況長栖巖阿。而玩永年者。其真粹之樂。可涯也哉。慶歷癸未三月十八日記。

常州晉陵縣開渠港記

常領四邑。治吳西境。晉陵戶二萬。丁十萬。過江來東。列爲大縣。其土會之法。田第九。賦第七。帛宜絲。臬。穀。宜秔。稻。美。川。澤。饒。魚。鱉。太湖底定。其南。大江繞出。其北。閒民無事。擅魚探之利。以生其生。有二浸之大。而農不能引以灌。迹其所以。民非棄之。願上謀之。未及究。旅力之不能集。爾天時稍或亢縮。人心乘以焦窘。慶歷辛巳。高陽許君恢。以大理丞。治于斯。旣視邑事。審江湖之利。可以活夫田也。迺歎曰。昔西門豹治鄴。漳水在鄴旁。豹不能用。故史起譏之。謂其不足以言智。今茲邑南趣湖。北倚江。據是美利。田其舍諸。委而弗謀。大懼後世之嗤予也。因環按四封。周咨野老。迺得中港。戚墅。竈子三港。皆往時漑田之川。所漑萬餘頃。中間廢不復治。緒餘且在。因俾圖言狀。列于外計。且曰。湖水可以灌戚港。江水可以灌申竈。計司移官。覆視其利。信然。比得符文。報從所請。始籲厥衆。開陳以利。民飭其言。說以承使。不戒而廩食具。未幾而馨鼓興。其集如雲。迺畚迺鍤。自二年冬十月濬申港。凡三十八里。引潮水抵城之西北隅。朝夕再至焉。竈子

港去申港三十里。自江口濬之。凡四十里。斜趨縣之東北。不與申港合。咸墅港東南去縣二十里。自湖口濬之。凡九十里。太湖之舟。觸至焉。三港之溉。申港爲最博。繇三大港之側。聽民自射其便。復引支水分注。運瀆。東函等十九小港。以醜其利。長波之所貫。衆渠之所殺。變堵土成腴壤。稽于大浸。暢于四肢。最凡計工二十六萬。前後凡三月而罷。歲在鶉首。秋夏仍旱。他田不粒。港旁獨稔。華黍蕤蕤。清渠泱泱。耒耨者賴焉。網罟者依焉。爾牛爾羊。來羣來思。噫。江湖以善利利萬物。不私所利。至矣哉。從于政者。猶夫川也。據能濟之勢。操有爲之資。胡利不可興。曷害不可去。棄而弗營者。非力不足。由無志于民耳。從是而觀。高陽之政。其惠之所字于民。至矣。後之長此邑者。當監前人之休。卹百姓之欲。嗣而浚之。繩而廣之。使繼繼不絕。則三港之利。庸可竭乎。慶歷四年正月二十八日記。

流杯亭記

城邑之粹。依于山川。所以通氣象而宣底滯。府寺之勝。寄于亭沼。所以棲神明而外氛濁。許昌之右。其水曰西湖。自東北導。渙水一支。納于湖中。淼漫瀰淪。浸可數里。精氣利澤。秋冬不涸。蓋壁田所依之川也。一名綠鴨陂。唐薛能增廣其泚。作亭其上。所謂綠鴨亭者。名今在焉。大抵湖水脩于南北。狹于東西。芹蘋芡芰。菰蒲菡萏之植。含葩聳幹。或丹或白。羅映洲泚。粲若繪境。秋鷺寒鷓。鼓浪往來。晨鳧夕鴈。乘煙上下。翻去翼。噫噫餘聲。江湖幽情。滿于眺聽。天王都汴。許在寰內。殿藩之重。率用二府。前弼及兩。禁邇臣。于以均執恪之勞。就偃休之適。亦由湖水名勝。可以濯煩襟。而養妙氣也。前後諸公。構亭環其上者。甚夥。釣臺

射棚。左右樓映。隨所而勢。咸極佳趣。其規摹宏大者。有若湖中之堂。曰清暑。錢思公之所作也。橋跨一面。樹環四際。青蒼俯映。潺湲可弄。湖陰之亭。曰會景。呂文靖之所構也。正據北岸。臨瞰泉水。禽魚卉木。形無遁者。會景之北。有梅梨桃杏之園。履中十畝。中有堂曰淨居。淨居之北。有池。曰迷魚。清泉碧樹。幽邃閒靜。有山間林下之思。慶歷丙戌。植直李公給事之治許也。年獲豐茂。日多暇豫。間引參佐。觴于湖上。躊躇四顧。超然獨得。曰湖居之麗。前人系作。究奇選勝。殆窮目巧。然上已修褻。勝集也。念此獨闕。湫水在側。而弗知用。豈未之思耶。乃立亭于迷魚之後。西北置闕。礮石作渠。析湫上流。曲折凡二百步許。彎環轉激。注于亭中。爲浮觴樂飲之所。東西植雜果。前後樹衆卉。與清暑會景參然互映。爲深遠無窮之景焉。亭成。榜之曰流杯。落之以鐘鼓。車騎夙駕。冠蓋大集。賢侯莅止。嘉賓就序。朱鮪登俎。滌醅在樽。流波不停。來觴無算。人具醉止。莫不華藻篤章。間作。足以續永和之韻矣。復卽湖之坤隅。乘羨水以作磴。紆旅力之弊。廣羣游之觀。使漢陰老父見之。其必曰。施于觴酌。遊觀之美。何其佳哉。時友人梅聖俞。參畫郎幙。且導府意。託記亭事。因念小雅鹿鳴之詩。必言燕樂者。所以和人心。而通政道也。李公宣風阜俗。怡神樂職。以餘力治亭榭。以暇日飲賓友。式宴以樂。旣惠且和。引而伸之。河潤九里。政之在物。從可知焉。又惟杭潁二州。西偏皆映帶流水。同得西湖之號。與許爲三。嘗試評之。杭挾武林天竺之秀。而地偏東南。潁占女台林刹之佳。而傳舍居其內。許在三輔。密邇神甸。芟驪作鏡。轅嵩在西。介于二京。嘗遊七聖。春秋重地。尊先京師。神明氣象。湖水之勝。應以陪京爲首焉。慶歷丁亥三月五日記。

常州太平興國寺彌陀閣記

昔迦文于舍衛國宣說妙法稱讚四方之佛曰阿彌陀過十萬億刹居上品勝上其名曰極樂其壽曰無量以莊嚴爲世界以慈悲爲道場六時雨于異花八木涵于奇寶大光普照靈風回翔樹林之聲皆演真諦禽鳥之慧悉談苦空含衆妙而叵量狀羣經而莫盡斯境也從萬行而報彼國也無三惡之趣婆娑土穢衆生根難放逸不返苦惱無安有生老病死之悲有丘陵坑坎之汚備造衆惡牽蹈諸趣夫境勝則欣跋情苦則疲厭故彌陀如來深愍迷子爲現淨土持四十八願拔濟羣品令厭濁惡而欣妙嚴也雖大慈平等饒益一切而于閻浮提之人機緣最熟雖復陵遲末劫具縛凡夫決能精誠稱誦名號修三十六妙觀臨終之際真相締定乘大悲之接引隨喜品而往生境界難思動念卽至眞實佛語四衆具聞廣長舌相諸聖同表神者不疾而速豈謂是哉及捨畏塗得依樂國普賢妙行進登聖果安不退之智地證無生之法忍還入三界營救羣迷同嚮菩提成等正覺則知迦文之現穢彌陀之現淨調柔折伏同示大權延促依正竝歸眞智輔以觀音之慈悲勢至之勇猛悲願參蓮象力總持幽贊咸通其應不一常州太平興國寺蕭齊舊刹吳土名藍大江東流夙擅佳麗香海右轉地稱吉祥大比丘可尊闡釋圓宗循持梵行神栖安養之境志皈度脫之門開幕信根崇修淨業同結生方之社以爲卽實之基上首信士傅廣門人子蘭與其邑中之良夙殖善本勇結勝因樂聞言音歸趣信誓室多忠信之舊戶興禪頌之風而又率額檀那哀合財施飭豫章之峻幹襲他山之密礎選良剖闕究奇塑範營閣于本寺正殿之西偏造阿彌陀佛

丈六金像。居寶蓮華之坐。威德殊勝。相好端嚴。鐘梵落成。金碧宣照。緇素和會。幼艾咸集。大治純陀之具。廣施上妙之珍。咸苦乃心。冀履其域。有通淨名之說者。相與歎言。良匠之依空地。乃成宮室。菩薩之取衆生。以淨利土。觀殖因于卽世。知圓果于未來。又若祖師。何二之有。茲閣也。始事于慶歷甲子。成于戊子。衆緣所集。最凡計泉刀五百萬。尊師以宿。早參道照。託序緣興。綴文匪工。涉教殊淺。寶嚴所載。聖妙難模。雖殫無量之聲。莫讚甚深之典。矧輕毫燥吻。所能庶幾哉。儻助宣流。默祈回向。至和丙申三月十三日。記。

皇姪孫右監門率府率世護墓記

夫析天潢之源。分玉葉之蔭。承雲雨之渥施。託日月之末光。生於其間。貴莫之上。噫。旣榮以地而嗇之年。此造物者不可得而致詰也。右監門率府率世護。左屯衛大將軍秀州團練使榮國公從信之第五子。曾祖吳懿王。大父惟忠。彰化軍節度使舒國公。母富陽郡君孫氏。少而聰悟。過絕于人。所好經書。見輒能誦。亦工篇詠。頗有思致。良玉遵折。靈芝早焚。悲夫。以皇祐二年六月八日。感疾夭闕。年十二歲。初藁殯于奉先之佛刹。嘉祐庚子十月乙酉。改葬于河南之永安。附懿王之前域。謹記。

文恭集卷三十六

誌銘

宋故左龍武衛大將軍李公墓誌銘

昔在漢火之微，焱燄起蜀。其後唐土之圯，餘烈在南。公諱從浦，字可大，本名初謙。〔案〕初謙五代史作從疑誤。憲宗第八子建王恪之後，南唐烈祖之孫元宗之子。後主之貴介弟，江左之佳公子也。後主友愛，異于他弟。開寶中，受言奉幣入貢誕節，太祖皇帝嘉其占對，厚膺蕃錫，迎勞甚渥。休舍未遣，後主嘗因置酒，惻然有勤望之勞，賦青青河畔草一篇，章末有王孫歸不歸，翠色和春老之句。當時士人莫不傳諷，累封宜春吉水二郡王。我真人既興，歸運有屬，臺城隨下，青蓋入侍。太祖記使乎之舊，寵祿將之敏，授右神武大將軍，領漢東郡事。未幾，夏師繼捧，挈河右之圖，舉國內屬，朝廷授以崇信節制，移公江夏。歲滿授代，政號連最，復拜尺一出，典同谷，淳化中，蜀盜竊發，王師致討，郡扼邛笮之要，據泝隴之交，羽檄迅召，王人旁午，資糧屏履之給，文書調度之煩，按以軍興，急于星火，公畢力匪懈，內憤小醜，操心甚危，外防一切，劇煩難給，瞿齋弗支，以疾自陳，有詔聽還京師，且便醫藥，家居滿告，表求分務，優不之許，厚令自持久之，進秩

武勝軍節度行軍司馬，簽書州事，固辭簽書，從之。特賜錢二十萬，非例也。後病寢劇，以至道元年六月癸卯卒于南陽之館舍，享年五十。公體傑且秀，神遠而清，幼習自然，長蹈彌勝，辭有思致，書善真行，不眩紛華，所履恬素，少有學尚，能談禪要，遺去法縛，獨與神會，用能時進退而兩得，履險夷而一致，澄撓不見其際，纖介莫窺其間，自非誠而明之，遂于道者，孰能預于此。享食二藩，歷典三郡，所至必乂，去輒見思，厥初至同谷，郡有重繫，獄已告具，公察囚色，意其有冤，呼之使前，屏人獨問，久乃自言農家子，持糶前行暮夜，亭長錄以爲盜，規贖未獲之負，爲決曹掾吳廷皎，楚掠，因自誣服，公徒繫別獄，剖驗乃實，所全活者十餘輩，人以爲神明，轉運使盧公之翰、鄭公文寶，皆偉人也，以狀條聞，乞加擢序，太宗嘉歎，璽書褒勞焉。少貴率禮，寬中尙恕，折獄多陰德，典城有遺愛，官止環衛，年纔中壽，知其留慶自他有裕也。後以刑部有著于朝，累贈左衛上將軍，夫人徐氏，桂陽郡公邈之女，在江南日，以鄖國封小君之號，次彭城郡君劉氏，亦華腴之選，竝先君而亡，次毓略郡君楊氏，躬柔閒之尙，後公而終，男子七人，長仲儀，左班殿直，仲昕，右班殿直，仲昂，無祿，仲某，三班借職，竝相繼而殞，仲偃，登進士第，以清文雅行，士林向慕，歷踐省閣，參著風業，今任尙書刑部郎中，淮南轉運使，仲連，右侍禁，仲荀，郊社齋郎，三女，長嫁瑯琊王祐之，次二女，內寺出家，爲尼，竝賜紫方袍，善才，號妙智大師，善聰，號崇因大師，嫁王氏，與善聰皆早卒，孫男孝友以下九人，孝友，剡縣尉，孝嗣，試校書郎，公含璧之際，權窆于穰之佛寺，至咸平己亥，仲儀，官龍舒，始遷窆于潛之某里，介于靈仙道館山谷之間，宜體魄之用寧，而慶靈之來復，銘曰：彼公子兮，真李枝，初使我兮，敏有辭，奉禩將兮。

來京師。秩環衛兮屏于隨。政寬惠兮衆以熙。三去郡兮輒見思。茲有數兮不可知。甫知命兮哲其萎。德既充兮壽弗支。來葉茂兮實纍纍。潏山秀兮下有溪。精氣利澤舒所依。三祖往兮靈仙棲。公眞宅兮介于斯。

宋故宣徽北院使奉國軍節度使明州管內觀察處置等使金紫光祿大夫檢校太保使持節明

州諸軍事明州刺史兼御史大夫判并州河東路經略安撫使兼并代澤潞麟府嵐石兵馬都
部署上柱國榮陽郡開國公食邑二千五百戶食實封三百戶贈太尉文肅鄭公墓誌銘

皇祐五年冬十一月甲子有宋儒帥宣徽北院使奉國軍節度使鄭公薨于并。天子震嗟朝不御者二日。以太尉贈冊告其第。大鴻臚賻以常典加等官。上易名之典。請用文肅。詔曰嘻。可。初公以疾聞。上立遣左璫賜殿中湯藥。勅太醫馳視。聞其未有間也。復遣高手乘急置以往。至則無及已。公初疾革。猶力條備邊十數事。謂虜驕難制。邊費益困。勸上詳思至策。規強中國。因言命在漏刻。不復奉望帷幄。不勝至願。願歸塋先隴。以是累陛下。上嘉納遺忠。益哀傷其意。遣使給舸。護喪還東。勅所過治道。詔本郡給塋事。以明年八月二十八日。寧體魂于吳郡大塋之次。成公志也。公諱戩。字天休。其先諸姬之近。封寰內者曰鄭。後世爲大姓。偉人。六世祖肅。經爲唐相。大中末。節制荆南。子孫宦東。僑占吳下。今爲吳縣人也。曾祖諱思正。卒烏程長生大父。諱延紹。終蘇州錄事參軍。大父生考。諱文遂。卒溫州巡官。舊門自令。薄宦不屑。慶氣回復。緊公而發。及陪樞幄。賁寵三世。曾祖贈太子少保。配吳氏。封太康郡夫人。大父贈太子太保。其配沈氏。其繼方氏。封吳興京兆二郡太夫人。祖室累贈太師中書令。以廣平郡爲妣。沈氏夫人湯沐。公少孤。穎特。骨

法峻異。伯氏載吳士之望。器公殊于他弟。從學官下。尤能自力。及壯。志業磊落。不爲諸儒章句。通訓詁大義。莫不造聖賢之轍。屬文雅麗。學者嚮慕焉。遇醉。抵西山下。亡何。暮夜大水失道。有父老自叢祠中出。翼公絕流乃免。已而環顧。忽失所在。久之。從淮海遊京師。時翰林楊文公。號稱辭宗。名有鑿拔。篤于獎進。故賢士大夫日遊其藩。公以縫衣謁前。見賞英時。一面若舊。許以棟輔。延置門下。介于諸公。歎愛其文。謂爲入室。公名所以藉甚。貴勝先達。皆忘年願交者。以文公器而揚之也。干試貢部。輒不在選中。處之泰然。自待益厚。上肇位二年。始延見方聞之士。擢公甲科。釋褐太常寺奉禮郎。簽宣德軍節度判官。親嫌移宣城。故相李文定。時守金陵。薦公材堪器使。秩滿。召試學士院。除光祿寺丞。集賢校理。未幾。通判越州。代還。改太子中允。同知太常禮院。泛恩。遷太常丞。逾年。除三司戶部判官。賜緋衣佩魚。受詔。注釋御製三朝寶訓。遷直史館。景祐初。同修起居注。改太常博士。繼爲開封府發解官。及攷較御試進士。與今翰林宋公子京。建議。禮部所行韻略及廣韻。繁簡失當。訓詁不正。有司攷士。多以聲病被黜。請修三韻。是正音訓。書成。學者便焉。改判鹽鐵勾院。爲聘契丹使首還。以正言知制誥。賜紫。葺綬。時西臺之選。極一時名勝。故景祐中。號令溫雅。辭訓深厚者。公豫唱焉。層構落成。聯章敷請。上親用籀法。書紫微閣三字。以揭詞掖。且旌名臣。領判國子監。以謂教化根本。先京師而後諸夏。乃選明經義。誦說有法者。以訓導胄學。復乞田以給之。又請立學州郡。以廣育才。五年。同知禮部貢舉。多拔名輩。務略小疵。翕然稱爲得人。寶元初。知審刑院。讞天下之獄。原心麗法。值帝長者。多所全活。無留牘。前後四被詔獎。從容訪對。去必目送。自是簡注日隆。未幾。

除起居舍人。龍圖閣直學士。知開封府。豪吏馮士元。挾狡數通貴要。多爲姦利。匪眦必中以禍。操制一府。畏甚于尹。都人目之爲立京兆。公廉知罪惡。窮按姦賊。悉得其受賂撓法之狀。權貴多爲請者。了不以聽。獄具。奏流海島。家沒償贖。首惡旣除。餘皆股慄。詿誤及愚弱。坐法多見貸舍。卽豪右犯法。必連治窮按。無所顧避。而穀下政清。康定初。高選主計。命公權三司使事。先是居計席者。未暖輒遷。不暇講求財策。吏治益弛。計文寢耗。至是。四方用武。急于調度。公檢多門之蠶。抉辟召之非。勅正簿書。參比經入。民不加賦。未久。得羨緡四百萬。轉運使舊有攷課之法。廢格不行。公請復舊制。以振綱領。時邊兵六十餘萬。坐甲待食。軍興期會。急于星火。公迎事輒辦。臨劇益裕。上圖公展成之效。謂終足負重任。斷大事。乃拜右諫議大夫。同知樞密院事。尋改樞密副使。舊制。二府進律。錫予優豐。公以甫畢前恩。堅辭後賜。許之。旣參前箸之訪。所以伐謀制勝者甚衆。嘗入白虎帳。議遣高材使者。就問西北諸將。攻守所宜。使悉條其策謀。且探觀其識略。能否足辦。緩急可任。上用其策焉。時黠羌擾西。縣官旰食。一日上召對二府。問有唐大臣巡邊故事。因言寇難未夷。師老勤戍。欲煩吾一二舊德。往撫西衆。因以圖上方略。大臣未有對者。公自惟布衣。主上拔從羣右。任以本兵。思欲畢力竭忠。圖報乃已。卽時歸第。手疏請行。上亟以公疏付中書。深爲當國者忌。憚卒見沮格。明年。遂以本官。資政殿學士。知杭州。公出無他。不自直。至是過家。乃散百金。悉召見故人親屬。釀牛酒。以上冢。先是詔謹內盜。大籍四方鄉丁。申勅部官。閱習武技。時西師新喪。東人大恐。謂將取以戍塞。日夕悲涕。公檄以諭父老。復奏減其半。使還田業。自是人心甫定。郡中西湖。卽白傅所記錢塘湖。

也。環三十里。溉湖上良田千頃。唐相李泌。卽湖中作陰竇。引水灌城中六井。以資汲者。武肅置撩清軍。以疏其惡。自錢氏納土。至公居郡。凡甲子一週矣。而湖穢不治。豪奪以耕。僧侈其構。浸淫蠶食。無有已時。公按舊記。復故堤。程工無慮十萬。調境內丁夫闢之。湖利中興焉。二年。除給事中。移并州。未行。改鄆州。鄆齊等九州安撫使。冬。移長安。兼本路兵馬都部署。規中入覲。從容言。羌寇逋誅。陝服寢困。宜勅有司計料。調緩急。差爲三等。軍興急。須自如法。他可緩。以期會。非急者。一切可罷。以明恩施。上深然之。至雍。復表西人瘡痍。宜在寬卹。因是曲爲降赦。諸更徭賦。斂傷害于下者。類皆施行公議。以紓民力。又奏罷括糴之法。誘邊人蓄粟。以平穀價。吏自渭涉河。輸木京師。漂沒備償。及不中程者。至破家產。公條冤狀。歲裁減二十餘萬。是時羌未悔過。兵連不解。侵軼疆候。虔劉邊城。天子覽宣王大雅之詩。思召穆中興之將。博採文武。枚卜公卿。進厥帥臣。付以西略。以公有已試之效。有納忠之先。三年。除陝西四路緣邊兵馬都部署。兼經略安撫。招討使。遷禮部侍郎。受命上道。老小叩馬。至暮不得前。因夜半馳去。衆復詣闕。上書願留。時邊將新經定川之敗。士氣益奪。公建上將軍旗鼓。盡護諸將。合衆軍于涇原。健銳者訓勵之。瘡傷者安息之。拊循噢咻。人皆自奮。元昊擁衆黑山。號稱十萬。公行邊抵鎮戎。勒兵趨蓮花堡。進據險要。天寒置酒高會。虜不敢近。自是軍聲始振。邊寇絕入。時邊部將利邊境有事。用公錢亡節。緣路售進。收私入己。無名之費。不啻泥沙。公私疲勞。遠近嗟毒。公撻其尤不奉法者。斥逐去郡。餘稍自戢。四年。疆事稍閒。詔公還治長安。養持威重。雍人若幼。若艾。重趼數百里。拜迎車下。部中適旱。踐境卽雨。衆喜曰。此涇州雨。隨鄭公來也。初。帥四

路。有生氏帥烏寧。率諸帥願奉水邈地入附。諸氏亦獻山林。願得內屬。水邈直隴坻之右。自石門西出臨洮。趨秦中爲近。二水環城。而遶帶河渭。雜氏十餘萬落。無所役屬。往時名將。自曹武穆等。欲城其地而不可得。至是。公遣靜邊戍長劉滬。觀相形勢。滬還。勸公亟城。天贊之機。不可失。以資賊。卽以狀馳奏。遣滬往城。以從軍董士廉。尸其役。會公移雍。涇原帥毀沮其策。卽日檄收水邈兵。趣使罷役。滬士廉守便宜。不從。公爭之甚切。上遣三司副使魚周詢。宮苑使周維德。同都轉運使程戡。行視利害。涇原帥以滬等不應令。遣將械籠于獄。將斬以徇。羣氏遮使者車稱冤。使者卽時出滬等。還奏。城使詔趣訖之。城成。賴其保障。公復謂環慶涇原二路相去道里回遠。緩急首尾勢不相救。又敏珠。彌臧。康努三族。隔閩其間。首鼠援賊。昔孟獻營武牢而鄭人懼。晏弱城東陽而萊子服。若城細腰。奪賊要害。遇有警過師。猶在衽席之上。雜種畏懼。亦且不敢附賊。賊無鄉導。必難內侮。召部將种世衡。蔣偕。程工計日。度三月罷。業已版築。會公解帥。公度失今不治。必開後患。志在憂國。表上其事。未幾。宣撫范公來西。詔下城之。如公所策。凡斥境數百餘里。是秋戎人詣延帥送款。西方益無事。五年。上書乞守內郡。朝廷倚其名重。璽書勞勉。天王都汴。根本兩河。晉迫羌胡。土俗勁悍。大鹵謀帥。無易公者。六年。除戶部侍郎。資政殿大學士。知并州。兼并代澤潞麟府嵐石沿邊經略安撫使。兵馬都部署。時甲馬隸麾下者。凡十二部。部將有貴門。有寒族。所部之兵。及所給鎧仗。其間精怯不等。公慮怯者遇敵。勢必先敗。敗則牽沮大軍。非便。于是均配強弱。合置十將。自往訓勵。并無武鋒精兵。復閱廂軍。精勇者得三千人。遷補清邊。聲其數爲十萬。以夸戎人。潛遣戍兵還京師者數萬。

衆獲休息。幾減邊費半。吐渾守捍尤力。自諸校而下名級。閫外得專補署。不從臺請。庸人建議欲徙補別部。公上言。士出死力者。以有分寸軍賞。人情戀本。不宜輒動。詔趣從舊。制澤潞遼絳之賦。移餉河北。公以瘠土賦不足以自支。奏罷外輸。以寬四郡。帳下吏浮冗者。裁損四十餘人。以省經費。邊將爭遣人覘虜。被遣者貪利財物。實不能得其要領。還卽給言以報虜。欲爲寇邊郡。承謬至發奔命書。以疑誤上聽。已而卒無纖介。了不按問。公懼習玩啓慢。備豫不逮。因下令諸覘虜不實者。論如軍法。自是不敢給報。多得實而還。契丹之將討夏人也。造舟于天德軍。或曰虜態難常。我盍備之。公曰虜出無名。匈奴本以甲馬戰鬪。今爭舟楫之利。是棄長技而取所短。彼將取敗。我焉用虞。後契丹果以敗聞。二虜之將戰也。邊部警奏。重迹而至。獨太原不發羽書。上怪問公狀。且詢之策。公曰。夷狄自相攻討。不足煩中國慮。願勅邊將。務在持重而已。麟府熱落。經寇驅率。略盡。公招還離散。撫綏荒餘。益弓箭五千。浮二萬戶。以實塞下空虛之地。以耕河上良腴之田。以口益增。歲糴彌賤。岢嵐軍東草城川。近壓虜境。隋大業中。置戍以扼賊衝。虜貪地肥。間出田牧。公與約。地距塞二十里內。虜不得預。徙實邊雜戶數萬家。以爲扞蔽。中國限戎。本以豐之。橫陽川爲限。豐州沒後。城主失戍。元昊旣已送款。因遣人請沒寧浪地。公上言。麟府孤立。介在河外。若以美地資賊。二州乃墮其吻。終爲吞噬。臺議遂不肯與。戎人請之益堅。復因使者附奏。具道不可與地狀。卒用策諭還西人。公治尙嚴明。天性疾惡。并土年少喜伺姦便。公設耳目。知其主名窟穴。犯者輒錄。窮按株連。自是姦盜衰息。在杭雍亦然。惡子皆逃之他境。狂卒以甘陵叛。訛言寇且至。晉人乘之洵懼。推迹所起。乃定襄

男子爲之。因戮以徇。遠近帖息。壽陽豪李化。殺人誣郭鸞以規免。鸞不勝楚掠。因自誣服。公察非是。詰化。化詞大屈。鞠之。具得其賕。買真狀。化卒棄市。邊地寒苦。因多噤死于獄。公奏條元魏恤獄故事。上惻然降詔。自是繫者涉冬多活。鐵錢惟輸關右。後河東亦施其法。晉地產鐵。人爭冒鑄。犯者殊死。日報而姦不止。公論作法之弊。請用三當一。以消姦源。上選近臣通政事者。參議經久。咸是公議。改幣令下。姦人不悅。羣訴公所守。卒不納。有噪于牙門者。公坐黃堂使前。諭以幣輕物貴。盜鑄多死。朝廷所以改幣。使重禁民爲非者。正是全活汝輩。何乃敢拒明詔。因執渠魁不率教者。致之于理。是日閭巷無賴者。輒掠奪市物。公勅牙兵收捕。竄首惡十餘輩。自是姦鑄遂息。物價益賤。于今受其賜。秋冬閱材官鄉義二十餘萬。號令明。賞罰信。旌旗鉦鼓。風行電照。故太原遂爲天下勁兵之首。苛慝不作。威名播越。朝廷以公威名累稔。底定有勞。七年除吏部侍郎。未幾拜宣徽北院使。檢校太保。仍判并州事。公表陳孤生感會明主。倉卒之際。謬奉馳驅。幸賴國家之靈。邊隅訖定。兵官猶可併省。微職不宜外除。固辭殊章。願守閒郡。優詔不之許。天子以公忠力外宣。功效尤著。明年就拜奉國軍節度使。復表陳前志。自言衰疾。不任軍事。願還節制。手疏懇到。卒不得謝。久之寢劇。以至薨落。年六十二。士大夫多爲流涕。公外濟以和。內果于斷。倜儻以尙風誼。慷慨而好功名。精力過絕于人。英詞鼓動于物。尹都府幹大計。二職竝劇。萬事倚辦。老吏持案待決。訟者操契滿前。准量錙銖。判別卓白。神無滯用。機應不差。旁接談賓。行答尺牘。毫法俊健。書意婉文。理盡親疏。體甚閒暇。參以善謔。杳然虛舟。前史稱發百函。占十吏。殆無以過也。有一善。旣稱道之不舍。又申以獎拔。故出

門下者。多臺閣名彥。貧賤有舊。接之者驥然有恩。爲振其乏。在宛陵收葬故人孫漢。經恤其孤。楊文公高直忤時。天禧間愈不得志。及卒。賓客益落。公病方困。吳郡日夕馳走赴其葬。義士隳之。伯氏吏部代還。左蜀病卒岐下。公時在西省。請急赴喪。大感于行路。及在軍中。士有疾病。行自省恤。軍市之入。厚于犒軍。下伍有勞。多見拔用。纖微坐法。闊略不問。故衆莫不思奮焉。嘗讀兵書。至謀攻篇。善用兵者。屈人之兵而非戰也。因嘆曰。上兵節制。要在靜勝。故每檄諸將。常以堅重待敵。終能制戎羯。安邊境者。繇此策也。惜其在樞宥日淺。謀謨未究。服勞于外。益徙而北。不得推所蘊于天下。每處邊議。多蒙報可。前後詔書褒寵。凡十八至焉。奉公憂國。遭時得君。若天假之年。授柄以相。其老謀遠業。猶將安生民。強公室。烏肯管晏而休耶。公撰著文章。凡五集。曰制誥。原武。紫溪。長安。太原。總五十卷。才高而兼華實。文雄而有氣骨。蓋人倫之華袞。而材林之傑藻也。攻詩出于餘力。尤極清麗。與故翰林葉道卿。夙期相許。心照莫逆。篤物酬寄。別爲一集。以訂元白。云道卿出守河陽。自太原寄詩四十韻。以將篤好。葉復次韻以答。詩成未幾物故。世傳名句。絕麟于此。公開河陽之訃。慟哭不食者數日。力疾捉筆。以銘道卿之墓。纔百餘日。相繼薨殞。同時葬于吳下。神反郢質。近時少比。范張款款。復存今日。夫人李氏。贈都官員外郎昌言之女。賢有至行。生于名門。協濟高明。參穆內外。累封丹陽郡夫人。男子五。人。民彝。民初。民秀。民慶。民用。竝太常寺丞。太祝。咸有學尚。兼資才令。六孫。估。侑。倬。偃。偁。皆祕書省校書郎。二女。長適三司鹽鐵判官。太常丞。直集賢院。王珪。次未嫁。上錄其家。若子若孫。及別族者。凡十人。及諸婦班簪。鑲者。八人。賜晉陵廨舍一區。以郡幹給使。公九歲卽

失怙恃。念及泫然。常欲以感慈之名。置寺塋側。未及請而薨。家丞綠雅意以聞。詔賜之榜。且有別旨。間歲度苾芻一人。以虔香火。忠義獲寵。哀榮異常。如公者鮮焉。臨薨。語家人見託銘墓。左右或泣下。公諭以至數。勅勿悲。神明若茲。公爲不亡矣。宿疇昔周旋。平生獎勗。見評州里。預游藩牆。契闊限于死生。頽仰成于今古。緒言有屬。感涕無從。輒稽宗譜之傳。與夫宮簿之實。寄通如在。傳信無窮。銘曰。次舍之精。歲昴著明。東南之鎮。秦稽蓄靈。巖巖文肅。王佐之英。精明卓傑。降神及星。惟天右民。付畀間氣。帝初器之。使材諸位。曰訓曰謨。以經以緯。尹茲都畿。相我邦計。萬事倚成。三邊仰濟。名赫厥聞。功昭于試。若時用武。惟密本兵。選衆以舉。好謀而成。憂勞西歎。感慨請行。見排異己。實貫神明。忠圖未究。讒言其興。屏毗于外。允一乃成。前疏未乾。上眷攸注。卒帥于西。授以節度。宣明國威。剷除民蠶。生氏奉圖。析肝願附。水邏往城。細腰白戍。我闢我疆。之策之慮。上緊睿明。弗爲讒沮。荒憬尋柔。壘垣增固。復來長安。益從太原。厥戎孔邇。其武惟桓。臨御以重。拊循則寬。悉復棄地。大徙實邊。歲有高廩。時無姦錢。長城屹若。敵國隱然。惟時念功。節旄卽授。告于文人。租鬯一卣。曾是偉賢。胡不大壽。奄忽棄藩。弗究其有。晉人涕洟。用懷孔疚。如蒼生何。公亡于牖。公雖云亡。名不得朽。雲棲迷兮大鹵。水幽咽兮昌門。從先公之舊兆。啓茂苑之鮮原。穆將安兮真宅。些歸來兮英魂。慨梁木之其壞。感華屋之生存。武丘兮北峙。凝嵐兮夕昏。嗚呼。雄俊。儒帥。鄭公之墳。

文恭集卷三十七

誌銘

宋故奉直郎守侍御史王公墓誌銘

慶歷乙酉、上用太原王公爲侍御史、數進方輻、切劘庶政。又明年、以天禧故事、參領諫職。臺中雜細、一不復省。顛繩違納輔而已。公強學精志、多識前載。孝武時倪寬以經學進、建武中杜林以名德用。公膺時學、其殆幾乎。九月十三日、對延和殿、敷敍未究、疾作遽退。明日卒于家。治命葬于潁。上聞、盡然傷之。法賻有加。復錄其子向、爲三班借職。且曰、使有祿以養其母。恩從特出。例前不著。葬有日矣。諸孤條官閥世譜、託銘于學史者。且云友也。義不得辭。公諱平、字保衡。五世祖唐末避地自徙。居閩之侯官。王審知之據郡也。曾大父、隱晦弗仕。常署大父爲安遠使。已而謝去。考諱居政。以行義稱于州里。娶姚氏。早亡。繼室以陳氏。及公有位于朝。陪祀延漏禰室。官至祕書丞。以昭德、仁壽二號。爲繼姚封邑之寵。公生而穎特。少挺淳至。十二歲丁昭德之喪。號慕焦毀。不能自存。大父敦譬。益更感絕。後與從弟甲、同研席。相友愛。久之游學不利春官試。還客江淮間。所至交其士大夫之賢者。好自整飭。不妄舉動。強于記問。有制度之學。經史汎達。

誦說有法。好學者日至其館。從授大義。諸生奉幣爲謝。初不之卻。痛節游費。還資養具。章聖後元年。以同進士出身。授許州司理參軍。里中女乘驢單行。盜殺諸田間。褫其衣而去。驢逸田旁家。收繫之。覺吏捕得驢。指爲殺女子者。訊之四旬。田旁家認收繫其驢。實不殺女子。公意疑甚。以狀白府。州將老吏素強。了不之聽。趨令具獄。公持益堅。彼乃怒曰。掾懦耶。公曰。今觸奏坐懦。不過一免耳。與其阿旨以殺無辜。又陷公于不義。較其輕重。孰爲愈耶。州將因不能奪。後數日。河南移逃卒至許。核之。乃實殺女子者。田旁家得活。後因衆見。州將謝曰。微司理。幾誤殺人。再爲臨安。扶溝。二主簿。翰林徐公奭。治京府。薦其材。除開封府法曹參軍。董希顏爲推官。持法喜深。公處以正。與之背戾。滿歲當遷。故事。闔府保任。希顏持奏不署。或諷公往謝。公曰。脫遇知我。安用謝爲。如其不知。謝適取辱。使謝而署。奏交有所喪。希顏聞之。慚。索奏亟署。尋除祕書省著作佐郎。在職如故。初。府掾任京司者。見尹廷謁。未幾。泛恩。諸掾悉遷朝秩。公除祕書丞。同府掾佞尹。拜謁廷下。公以朝有定著。引他掾羅拜堂上。識者謂其有體。尹後奏罷諸掾有朝籍者。出知洪州分寧縣。士多強宗大姓。前宰以嫌不之按。公無間然。雖賓興未預。皆以禮迎見。至其家。負法。雖細弗貸。用是衆伏焉。就遷太常博士。入爲審刑詳議官。操憲甚均。持心近厚。景祐四年冬。地震于晉忻。城壞。人多壓死。公上書推災異之變。大抵言陰宜靜而反動。今失其性。四夷之于中國。陰也。戎狄將有搖叛乎。宜勅邊將。豫嚴兵備。歲中蠻寇宜桂二州。殺守將。河西北。元昊入寇。契丹乘間以重兵壓境上。求三關故地。爲言誓外增物。僅乃得止。如公之疏云。除尙書屯田員外郎。通判徐州。未行。丁祕書君憂。免喪還臺。會中執

建議諸七十在官一切致仕之法。公以謂古者養老。所以納民于忠厚。今士大夫雖不能據禮引去。從而斥辱。殆非所以爲國養恩之道。奏養老頌諷焉。不省。出通判荆南府。遷都官員外郎。守臣操政多任便宜。公據法不從。以殿見憚。朝廷高選憲屬。于是有臺端之召。初。石元孫。延州兵敗。傳云已死。縣官舉贈。典錄諸孤已而西人請成。歸元孫于我。議者責其不死節。請戮以厲後。公上言。西戎比年犯塞。將校覆歿幾何。甫歸元孫。隨而見戮。是堅降者之志。而絕內顧之望。非計之便。元孫卒得不誅。監察御史閻詢。治王素獄。讒者言。詢與素姻家。匿不自避。疑其姦。上立黜詢。詢惶懼不敢辯。獨公奏言。詢妻弟娶素從女耳。論情則至疎。在法不當避。業已黜詢。葢河陽酒局。然尋起通判隴州。公議論務大體。略碎煩。所彈應法。嘗乘間爲上言。人情不能無過。且宜闊略細微。問諸忠義何如耳。上深納之。數條白邊關利害。及摘財賦之蠹。他日宰相擇專對者。往迓敵使。公不在選中。上卻奏曰。王某識敵能敏。且辯。胡爲弗遣。遂命爲接伴使。還言河北春月。猶習土兵。違時妨耕。可趨其會。自是鄉兵閱習。以兩月爲限。斷盡冬須罷。除三司戶部判官。尋充契丹國信使。至幽州。敵方蒐兵試戰。聲言伐夏。遣其相蕭忠孝來。云元昊侵侮敵邑。敢以告。諸使唯唯。公違曰。南北盟好。歡固踰于金石。何讒之能間。且治兵有國常事。脫吾邊鄙討貳。庸可間乎。忠孝旣退。公之介曰。彼妄誕非其主意。公曰不然。及見戎王。面諭伐夏事。略與孝忠語同。公拾前對對之。戎王喜。規中還奏。題其所答。廣親邸災。公坐省曹。案領修造。有詔營繕。令主督作。廣親秦悼王邸也。年祀浸久。支庶彌廣。無容室處。至爲樓居。上患其然。方議益邸。會其火。因度取邸旁民家地。以廣其宮。悅勸工徒。省約用費。有

以舊例送錢者。公拒而弗納。尋代賈漸知諫事。延和之對。辭解宮役。曰。臣曷爲修造有司。今爲諫御史。護役于體。非是。上曰。宮役垂訖。煩卿旬日事耳。公病語不及究。猶力疾自退。還于牖下。以至於啓手足。享年六十三。公介而敏。造次必于儒雅。論議依于名節。與朋友信于閨門。孝從弟甲。後登進士第。與今資政范公同年生也。調澧州司理參軍。病卒于京師。公哀慕收斂。不啻同產。范公高其義。往弔之。復以同年齒爲之拜。雅爲故集賢殿修撰曾公會所器。妻之愛女。賢善柔閒。經是二物。以金華爲湯沐邑。男五人。回。岡。向。同。冢。子學有家法。行爲士範。諸子咸保家之令。志局叵量。一女嫁光祿寺丞陳臻古。以皇祐己丑八月十二日葬于汝陰之旌義新安里。辱公最舊。捨我先逝。惜其疏遠。孤進。晚始得供奉諫諍。素所蓄積。曾宣濟之未暇。一旦奄忽。其命也夫。銘曰。公嘗游兮潁之涓。愛潁水兮清且漪。壯有氣兮陵虹霓。冠岌業兮佩陸離。挾時策兮步來西。思綠髮兮殫所施。命與力兮不可支。與一御史兮衰且遲。驥將騁兮蹶之年。不與兮已而。望闔樹兮東南涯。貧不資兮葬不得歸。循故潁兮水依依。丹旆舉兮秋風吹。匪良友兮我孰思。有賢子兮君勿悲。尙逝者兮有知。寧體魄兮于斯。

故尙書都官員外郎丁公墓誌銘

至和甲午六月二十四日尙書都官員外郎濟陽丁公卒于京師之朝集院。年五十四。位不配德。論者傷之。君諱某。字元規。其先齊公伋之後。于姓爲著。中葉遷播。徙貫于晉陵。曾大父匿景。大父衡泌。考諱某。與同產兄力學。比干試于貢部。以不得志先兄而卒。平生友愛。鄉論佳焉。娶清河張氏。其外女兄也。賢善爲

族媚所美。生二子。長卽都官。其後令終。考追贈尙書。屯田員外郎。以仙游爲母湯沐。君幼喪父。羣穉見之。竦然改觀。及長與兄某。俱有才名。學者稱二丁焉。母疾。刲股肉以進。孝行聞于閭里。弱冠而孤。侍世父尤謹。明道中與仲氏比牒充賦。明年建元景祐。春當試于禮部。會予爲大宗伯所辟。預典試事。以親嫌移之別屬。二惠俱在選中。是年同登乙科。里門榮之。釋褐。甘州軍事判官。郡通河西。城惡且甚。獻議州將計功治之。凡期年而役已未幾。夏人果叛。氓大擾。城完而固。衆以不恐。河出州境。歲苦災潦。營石堤以捍二者。州人賴之。鄜城宿兵。悍吏獫。轉運段公。檄使莅劇。邑中大治。再調楚州團練判官。發連使。吏部蔣公舉監。淮岸局。督是漕事。秩滿。遷祕書省著作佐郎。知江寧府句容縣。幼艾懷其惠。老姦憚其明。府檄苛求。一不之聽。徙知雅州名山。以勞免行。遷祕書丞三司。舉知舒州太湖縣。兼榷茶禁。舊制歲市茶八十萬。受上賞。前此居邑者。淫刑取辦。朘民售進。積苦甚虐。舒人無慘。君卽歲減三十萬。或以爲不可。歎曰。吾寧坐不逮之罰。安能邀朘民之賞乎。自是無暴征。無滯積。公私兩便。爲諸邑之最。攷課。遷太常寺博士。泛恩除尙書。屯田員外郎。在官五年。代還。進秩中都。通判定州。暴中風眩。以至含璧。君履行修勅。性資沖厚。犯而不校。介而能通。行己本于信誠。治民先于愛利。未究中壽。僅得臺郎。報施難原。此古人致論于力命也。君娶廣平程氏。胙脂田于安吉。柔閒維則。以經二紀。夭死遘閔。未亡在痛。三子曰某。曰某。曰某。世其家學。休有鄉譽。滋而後大。庸或在斯。女三人。長適進士孫詔。餘在室。孫男一女。一皆幼。哀號奉其柩歸。攢諸室。參議真宅。武進縣懷德鄉薛村原之地。命龜曰吉。以季冬丙申。寧體魄于茲。厥初其孤來赴。以葬。咨予內屬。銘其

前人惟疇昔之晤言。慨頽仰之陳迹。且稽遺範。以誌幽遠。銘曰。篤哉斯士。履德恂恂。氣冲神茂。行安節純。忘生徇孝。紓患庇民。宜餉以福。尙永其身。曾是短歷。殲此良人。爰啓新阡。四郊之側。言駕輜車。來寧兆域。脩夜弗陽。嚴冬將夕。寒日無光。陰雲寡色。永訣千秋。齋咨篆德。深谷有遷。茲石未泐。

故朝散大夫太常少卿致仕李公墓誌銘

宋有清德美行之君子曰李公。至和元年。以七兵郎中典吳郡。治成辭疾。詔以本官分司南京。聽家武進。吳人飲公和政。去有遺戀。後四年。告老。除太常少卿。致仕。以嘉祐戊戌十月二十二日。考終命于牖下。斂以時服。家無餘帛。素絲壹節。嗚呼清哉。于時搢紳先生。相與流涕。痛夫若人之不見已。公諱仲偃。字晉卿。李系隴西。曾祖昇。祖璟。竝爲江南國主。考從浦。右龍武大將軍。公第三子也。生而警異。幼卽藐孤。伯氏仲儀。撫養甚篤。及長。挾策無流志。落筆有奇語。弱冠厲節。游學知名。故翰林梁公頴。文定趙公尙書。咸器其才行。召置門下。所與游者。皆當世知名之士。天骨秀爽。神情閒遠。見之者目爲神仙中人。祥符中。再舉貢部高等。八年。得進士丙科。調楚州寶應尉。邑多無賴少年。喜爲人害。前此吏不能禁。公至。能痛繩以法。惡子相率改行。治以大肅。郡守黃宗旦。薦其材。秩滿。授常州團練推官。未幾。丁內艱。服除。改澧州軍事推官。知蘄州蘄春縣。兼監洗馬茶場。從三司之舉也。會議茶變法。商賈輟行。踰期不得代書。任者四期。及還。攷課。復不應書。大理寺舉充詳斷官。除本寺丞。然非其志也。先是。廷尉丞屬多取經生。泥于執文。不暢法意。惟公儒者。常得中典。時丞相陳公。以綱錯領判。尤加賞待。凡有疑讞。諮以取正。稍遷殿中丞。范公密遣諭。

意且欲薦之臺職。公以索米爲解。亟辭不願。出知越州會稽縣。風政修舉。爲諸邑最。秩滿。除尙書屯田員外郎。通判台州。近臣有薦公才堪治劇。中御史者。初除都官員外郎。用知真州。未幾。召拜侍御史。時三院徑路官進者。最稱要捷。營此職者。多稱道地。公屢表衰疾。乞郡自障。遷秩司封。除淮南提點刑獄司。夷退無競。議者嘉焉。入爲三司度支判官。尋除兩浙轉運使。賜紫章服。居部識大體。總綱目。應書卽舉。遇事敢行。不爲細苛。靡尙皁。除工部郎中。代還。判三司度支勾院。假太常少卿。直昭文館。充契丹國信使。還除刑部郎中。淮南轉運使。翰林金華諸公。薦公有經術行義。當置在左右。不宜外遷。上覽奏。謂執政曰。朕固聞其名。有意且召用之。丞相以德行對。但年已七十。惟陛下裁擇。上默然。章請置第。移蘇州。以便鄉閭。自初筮以至掛冠。其間四十年。所得俸祿。多給族中之貧者。嫁娶孤遺。凡十許人。篤風義。重然諾。未嘗殖產。治第有田。栽一二十廩。謝事後。稅止官舍。泊如也。平生藏書萬餘卷。皆親加校正。多手抄者。日置齋中。閱古今治亂。退閒賓客。文酒不廢。雖晚生候謁。恂恂誘接。忘德爵之在己。前後推轂。拔取寒賤。無慮四百人。有至臺省者。文集十卷。祥符初。瑞物仍降。時文載郁。諸所著撰。華實兼映。詩筆清婉。殊有思致。才焉盡貴。仕德焉盡高爵。終歿少列。豈命也夫。享年七十七。公之配曰楊氏。文定趙公甥也。賢和作合。湯沐原武。冢子孝嗣。秀州崇德令。次子孝直。試校書郎。女六人。長適祕書丞陳操。次進士許佺。期次大理寺丞黃秉。次三班借職靳渭。次光祿寺丞周延年。次長洲尉富鞫。孫元規。太廟齋郎。孫女三人。尙幼。以嘉祐己亥十一月二十三日。葬常州武進縣安善鄉合舍里。〔案〕字書無分字。疑。傍字之誤。音託。初冢子以月日來赴。家老以閱閱見。

屬宿于公。義則師友。情同州壤。銘竈之事。所以不敢辭。且史官以實紀。銘曰。李自開寶。言朝于京。中間踣斃。凋落弗榮。及公穎特。秀世而生。仙風遠韻。人莫不傾。彬彬其章。儀我王國。榮利匪懷。比辭憲職。不耀厥文。有隱其德。夸者退慚。談者歎息。金華薦論。上稔公聞。奈如命何。乃以老云。逡巡逝水。奄忽浮雲。天道力命。幽遠難分。真宅用寧。輔車言引。治命有詒。先慈惟近。背高城之夕陰。遡寒郊之悽緊。些營魄以安之。哀風流兮頓盡。

文恭集卷三十八

誌銘

宋故朝散大夫尚書工部郎中充天章閣待制兼集賢殿修撰知越州兼管內隄堰橋道勸農使
提點銀場公事充兩浙東路屯駐駐泊兵馬鈐轄溫台明越衢婺處州等諸州軍并都同巡檢
兵甲賊盜公事護國軍清河縣開國男食邑三百戶賜紫金魚袋贈工部侍郎張公墓誌銘

嘉祐二年春天章閣待制兼集賢殿修撰張公以靜退之性勞侍從之事聞東南佳山水而會稽第一章
請自效詔俞其往在郡三歲政清民恬方且合符歸奏計于天子無何暴疾以己亥七月丙辰卒于州廨
之寢郡邸奏公訃仁宗盡然傷之亟命錄諸孤賻其家所以惻近侍卹師臣之後焉嗣子奉公喪還京師
權窆城南園舍攷卜龜策得癸卯十月丁酉之吉葬河南之登封從丞相文懿公塋治命也公諱友直字
清卿晚更字曰益之其先世系翰林葉公撰文懿公誌刻詳矣曾祖裕試金吾衛長史葢陰城監院乾德
中榜陰城爲軍今光化是也遂占籍焉大父廷節養素隱德爲鄉丈人及文懿公貴並累贈太師中書令
兼尚書令封楚齊二國公會王妣胡氏追封燕國太夫人祖妣趙氏兩龐氏李氏追封魏韓魯越四國太

夫人禰廟士遜。開府儀同三司守太傅鄧國公致仕。薨贈太師中書令兼尚書令。諡文懿公。王妣蔣氏。黃氏。封鄧鄧二國太夫人。馮氏。許國夫人。公文懿公之長子。母曰黃夫人。公生而骨法奇峻。體性和厚。少小學尚。尤修志介。文懿公任壽春郡王友。友直七歲。以蔭補太廟齋郎。非所好。尋除守將。作監主簿。三遷監丞。館閣讀書。再授詔編三館書籍。天聖中。以本官充祕閣校理。同知太常禮院。明道初。特賜進士出身。遷祕書郎。文懿當軸。自以丞相子。避遠權勢。出通判蔡州。歲餘。移倅鄭下。時文惠陳公以碩老鎮圃田。屬公以州事。公以悉心無所遺力。及文惠入相。薦公于朝。直史館。遷太常博士。同管勾國子監事。康定初。充三司鹽鐵判官。改判都磨勘司。慶歷初。除尚書祠部員外郎。知襄州。甫至郡。而張海賊起。且壓境上。公治州兵。募丁壯。得敢勇願行者數百輩。令邀擊穀城。多斬首級。賊潰去。後爲比郡。禽翦首。挫銳氣。繫公之力。丁內艱。去郡。褫服。除舊官與職。歷判戶部鹽鐵二勾院。遷刑部員外郎。史館修撰。文懿公薨。釋服。除刑部。仍前修撰。嘗感蔣氏妣。卹典未及。表讓史職。移慰先慈。從之。詔以鄧爲太夫人。封國。上以捐己爲美。仍換公集賢殿修撰。成美志也。糾察在京刑獄。改判尚書刑部。嘗與侍講學士錢象先奏事便殿。已而上目送公。謂象先曰。張友直占對容止宛如其父。其見賞待如此。以先公冢舍甫就。表碣未立。章累上。求便郡。出知鄧州。入辭之日。仁宗遣中使至第。以舊德之碑四字篆文。懿公神道。又賜公御書飛白及鳳茶。以將其意。眷焉。南陽民饑。捐瘠者衆。官有儲麥。轉運使以便文自營。而不知卹。公發廩以救。多所全活。還朝。除天章閣待制。修撰如故。尋出知陝州。代還。侍宴于集英殿。公坐侍臣。猶衣五品服。仁宗見之愕然。遽命取三品。

服。卽御前以賜。公拜手謝。殿上觀者榮之。至是。出知會稽。越俗奉竺乾法爲龍華。每歲又大祭天于塔廟。僧俗士女雜然並會。施金帛者趨走之。惟恐其後。公下教。一切禁止。舉籍羨數入學。談者躓之。卒時年五十八。至今會稽父老猶懷其清。公莊重介直。濟之以和。明道寶元之間。文懿公三入相。進退天下士。公時在子舍。應接賓友。談間未嘗及時事。雖密昵屬。不敢委以私。無他恩紀。故譽亦鮮焉。惟雅識者重其潔慎。文懿旣上相印。告老子家。公晨夕侍旁。將順顏色。孝性謹如也。家人入息。乃敢寢焉。文懿公薨時。年過八十。公哀毀骨立。生平薦任子弟。必先疏屬。及其亡也。幼子未有官。公精小學。能篆籀。喜楷法。尤好篇詠。得美書善本。必手自傳寫。色無倦焉。仁宗在東宮。起居語默。文懿公必疏記之。祕世未有知者。及薨。公類以成篇。目之曰資善錄。出南陽日。從容面獻之。上甚悅。詔藏諸太史氏。有文集十卷。公娶劉氏。度支郎中明恕之女。柔慈賢善。凝範六嫔。封宜陽縣君。嘉祐明堂。以子在朝著。進封長壽縣太君。贈公工部侍郎。子八人。德淳。尙書屯田員外郎。德潤。內殿承制。德源。大理寺丞。德溫。大理評事。德演。太常寺太祝。三子早喪。女十二人。長適起居舍人知諫院呂誨。而亡。次刑部郎中集賢殿修撰陸誥。未嫁而卒。次適司封員外郎梅清臣。次適太常寺太祝王端臣。次適宋彭年。三人夭亡。四在室。公之將葬。冢子以日月來赴。且求銘于石。宿雅出門下。復與公游。册府以茲分義。誠不可讓。文斐無次。今但直記其實云。銘曰。巖巖鄧公。俊德之雄。三陟台袞。告老顯終。有哲者嗣。時惟冢子。雅行敦修。端誠率履。炎炎相閣。赫赫洪爐。視權弗有。處勢若無。和而匪流。介然弗倚。四臨厥藩。其清如水。年塗才半。志力尙強。曷云與善。乃爾殲良。履鼎原兮。開阡面松。

峯兮寧體陪真宅于先公尙慶靈之彌啓。

宋翰林侍讀學士朝請大夫尙書右丞提舉萬壽觀公事勾當三班院上柱國隴西郡開國公食邑二千五百戶食實封六百戶賜紫金魚袋禮部尙書諡恪李公墓誌銘

嘉祐己亥冬十月上將給享太廟前三日庚午齋于大慶殿翰林侍讀學士尙書右丞李公入侍帷幄次屬疾大困有詔易人侍祠告許還家治疾乃輿歸崇慶坊之舊第翼日上命謁者臨問復馳賜湯劑聞其未平也又敕中使太醫往視既而寢劇癸未卒于正寢訃聞上恫悼之命內史納書以禮部尙書告其第法賻加等公諱昭述字仲祖其先鎮陽人也曾祖沼國子毛詩博士贈太子太師祖昉太宗朝宰相司空致仕薨諡文正累贈太師尙書令韓國公考宗諤章聖時翰林學士累贈太尉並國史有傳公第二子也幼而風性機警神清穎秀文正公常以吾家寶器目之居母清河郡太君張氏喪刺血寫佛經毀過成人年十五能屬辭學通志立太尉屢欲任之官比辭不就移讓近屬卒被敦迫起家守祕書省校書郎其侍親也孝于承順省視飲食起居無不適其意者典幹家事大小皆有倫脊丁太尉憂號瘠在疚恩例改太常寺太祝服除召試學士院賜進士出身監內香藥庫嘗奏局事進對詳敏真宗目送之既而謂左右曰積善之家固有餘慶遷光祿寺丞薦充刑部詳覆官秩滿除祕書省著作佐郎通判越州遷祕書丞樞密使曹利用薦其材召爲羣牧判官汝人隱障牧地吏不能究受詔按視舉籍鉤校凡括實數千頃時議伏其精遷太常博士知開封府開封縣未幾遷屯田員外郎爲本府推官坐舉將曹利用被譴出知常州治

稱仁平。稍遷都官員外郎。入爲三司度支判官。上言五事。朝廷嘉獎。充契丹國信使。再遷封。泛恩除工部郎中。出爲荊湖北路轉運使。荆南屯禁卒。譁言倉粟腐不堪食。公命掌廩者給爲己俸。因會客曰。試取作飯。舉匕而盡。曰。孰謂不可食耶。譁者遂息。范諷貶武昌。公素厚善。以嫌移湖南路。虎翼戍卒。長沙監軍遇之酷。一軍憤欲搆亂。或指公廨舍曰。奈李公何。我不可以負長者。事遂寢。公聞然猶未信。因戒監軍不復敢暴。他日還都。其衆遮道羅拜。指妻子曰。向非公無噍類矣。因感泣而去。還朝。除淮南轉運使。兼發運事。直史館。賜紫章服。奏計京師。以漕職修舉。移陝西轉運使。邊柝久弛。元昊以夏臺叛。至是增屯戎馬。五倍于前。上慮邊餉不支。遣近璫問狀。公潛計度。以必辦對。晝則與賓客談宴。閒泰如平時。暮夜立吏于前。口占以策。黎明移文盡出。兵食乃集。移河北轉運使。覲日。上諭其勞。留糾察在京刑獄。尋除三司戶部副使。受詔經制陝西糧草。因以安集士兵。還爲鹽鐵副使。嘗乘間奏事。疏笏爲記。上屢目之。公指笏以對。條奏益詳。除諫議大夫。河北都轉運使。至澶淵。值河決。斷浮航。具舟欲濟。而風甚。公禱于河。風息。遵濟。至北岸。而風復作。後舸皆不得渡。未幾。契丹非次馳書。遣劉六符來使。朝議懲澶壁之惡。公受旨。以完隄爲名。選將吏調兵農八萬。城之。踰旬而畢。初。戎使之過澶也。第且治隄。及還。觀雉堞。城守之具。頗備。甚駭愕。初。詔置義勇。人情訥懼。公乘疾置日行十舍。所至開諭父老。置軍之意。卒置義勇如詔書焉。安平有文正公膏腴上產。歲租入簿。深守按鄉原租例。索主者質劑。歲願附益二十萬錢。公辭之曰。租乃大門所定。脫有遺利。義不敢受。郊吏獻計。減保塞軍濫食。公重于裁損。遂弗納。及公移澶後。保塞軍亂。如公所慮焉。宣撫使

任中師，表治行，詔書嘉獎。除龍圖閣直學士，移知澶州。遷給事中，代還，領三班院。秦州言糧道且乏，不足支數月，除公樞密直學士，陝西都轉運使。至卽開入粟之策，發輶車之運，塞下實焉。尋及近藩未報，無何掘地得古銅符，文曰許昌，詔下治許郡中西湖名勝，引爲曲水，日與參佐觴詠亭下，餘力治禮，迄今賴焉。期歲，移亳州，河北四鎮初置安撫，以公充使，領真定路兵馬都部署之職。知成德軍，歲饑，籍僧廩羨粟萬斛，官作淖糜以救，所全活者甚衆。武衛悍卒亡爲盜，城中恐懼，公密遣帳下十卒翦戮之，信宿被遣者梟六首而至。自是將屯肅然，無敢逸者。西山聚盜，肆害累稔，下教諭以禍福，未幾以罪自歸。除尙書工部侍郎，龍圖閣學士，充秦鳳路兵馬都部署，經略安撫使，未行，詔再任成德。其後秦中闕帥，范祥城古渭，戎落大騷，議者謂公若在秦，決不生事擾邊。遷刑部侍郎，還朝，領三班院，會置三輔，除翰林侍讀學士，知鄭州。是年秋，歸侍邈英閣，知通進銀臺兼門下封駁事，判太常寺兼禮儀事，提舉萬壽觀，領三班院，再遷兵部侍郎，尙書右丞。至卒，年九十九。夫人曹氏，故楚王彬之孫，贈中書令璨之女，賢明令淑，以經內外。湯沐鉅鹿，爲夫人之封。先六月而逝，息男六，冢子正卿，卒大理寺丞，直卿，左班殿直，宜卿，尙書職方員外郎，上卿，殿中丞，二子幼亡。巨卿，未仕，益卿，守祕書省正字，息二女，長適文思使任昱，次適東上閣門使張希一。孫士彥，士方，士立，士燮，並太常寺太祝。士亨，士褒，士褒，士稟，士爽，並將作監主簿。士恣，未仕。公夷粹開敏，外寬中勁，怒而不校，和而不流，生于貴勝，恂恂如也。朝廷儀範事典，多所該識。家世七葉，爨無異煙，門內之治有規，治尙仁恩，休澣宴集，昆弟姪在焉，必以孝弟學行，從容勸導，未嘗言及資產，清素孝謹，爲舊族。

之冠。嘗言我家三世學士。論者以爲美談。吾歿後。汝等勉之。無墮素業。性有巧思。精于曲藝。通音律。善弈棋。家有名園。尤善種樹。珍叢嘉植。周阿而生。親朋之來。罇酒相對。歌詩筆翰。自守家法。不爲時變。有文集二十卷。領使凡七。臨州者六。識大體。略細苛。不以儼覈取名。主于忠厚而已。薦引多拔寒賤。往往不識其面。推穀數百。訖無謬舉之累。豈非誠歟。族黨治喪。墨龜以告。卜明年正月七日。惟食舉。鉅鹿夫人柩。合葬于河南府河南縣諸葛村之原。祔太尉之塋。兆于昭位。家丞以世系官次。請銘于石。宿辱公之舊。得撫其實。銘曰。李之根系。或紀姑臧。滋而後東。趙郡贊皇。益從而北。厥惟鎮陽。日西者李。仍世其昌。有覺賢公。時惟文正。相我太宗。光明熙盛。英英翰林。風華是映。器于真宗。垂付以柄。慶源之濬。回復在公。行本諸孝。性安于沖。正固以幹。開敏而通。治家有篤。順睦其風。六殿于藩。七漕其職。北土置兵。西師調食。旣勤諸神。亦勞厥力。治略其苛。政幾于德。蚤更近職。晚侍邇英。禁林三葉。未有茲榮。同庖七世。弗忝爾生。闔棺于寢。愍策以卿。曷不期頤。遽然窀穸。九鼎舊原。萬安先域。體魄寧茲。輟嵩在側。爾雲爾來。重圭亡極。

右監門衛率府率世堅墓誌銘

太祖皇帝三世孫、右監門衛率府率世堅、字溫其。慶歷戊子、十二月二十六日、以疾卒于睦親之吳邸、年若干、有司以品卑、不在詔葬之例、上憐之、惻然見于玉色、特命入內供奉官梁克明、往護喪事、以黃金五十兩、白金三百兩、賻之、令內史卹詔、贈以右監門衛將軍、公會祖吳懿王、大父某、永清軍節度觀察留後、安定郡公、烈考從審、寧國軍節度觀察留後、宣城郡公、母渤海郡君吳氏、公幼性敏悟、長有學、尙筆札、工

賦詠有恭順之志。無怠惰之容。日奉內朝。翼如也。稱爲老成。謂將遠到。初命猶隸三班廷臣。景祐初。大更宗室官制。纔除率府率。至是再遷而卒。君以天屬生王家。不秀而苗。旣榮而隕。痛矣夫。公娶李氏。贈尙書令隴西郡王繼勳之女孫。東頭供奉官舜舉之息女。育二女。並幼。初葬葬于某所。嘉祐庚子十月癸酉。葬于河南。祔永安之封城。〔案〕此下當有原本缺。

虞曹郎中妻〔案〕郎中不詳姓氏。諱文亦略而不載。疑有脫漏。故陳留縣君鄭氏墓誌銘

慶歷乙酉二年甲寅。陳留縣君鄭氏卒。明年。自晉陵舉其柩歸族南譙之墓。且祔先姑之次。以十月十五日辛酉。窆之于清流縣蓼湖之原。筮日甫定。家老以鄭之世系。請銘諸窆。謹按宗牒。鄭蓋厲王之支子。始疏華下之邑。乃在寰列之內。周之東遷。我實從焉。再闢虎牢之封。厥居榮圃之地。春秋之後。布漢蕃衍。漢晉之際。叵赫盛大。或革履見識于上。或雲屏分間其坐。司農二學。名于當世。有唐四姓。號爲盛閥。因亂僑寓。今籍定平。曾祖纓。贈漳州團練使。祖彥華。仕南康。領九江節制。歸朝。歷右千牛衛大將軍。贈上將軍。父文寶。兵部員外郎。累贈工部尙書。沈毅倜儻。好談兵策。淳化至道間。總領陝計。經略河曲。功不及究。議者惜之。事具國書及南陽文公所撰之銘。縣君諱信陵。字仙儀。卽兵部之息也。閒華令淑。稟諸自然。端粹莊修。蓋有餘裕。以守龜之吉。年十六。歸于今虞曹郎中清河公。偕哲人歸。冢婦虔共上下。參和內外。德性之尚。不妄喜愠。以禮防持。動適中節。召南采蘋。所謂能守法度者。陳留有焉。天禧初。以郊類之慶。用朝闈之例。封滎陽縣君。前後泛恩。進封管城。永樂。千乘。陳留。最凡五邑。享壽六十五。三子。長次津。太子中舍。次次

立擢進士第。試祕書省校書郎。次次道。太廟齋郎。咸貞惠以承世德。開敏而續門業。孫三人。塾、堅、學。皆幼。一女。適著作郎直集賢院呂溱。虞曹之止臨海郡印。歸老晉陵。陳留深鑿。止足。內相然贊。及得可詔。相隨。還西。翩翩二雛。接翼而歸。方將優閒家門。含飴弄孫。先露奄忽。惠風已而。豈至數之常然。信天時之不齊。銘曰。榮圃之姬。國曰鄭。後世衣冠爲大姓。東南避地藉延年。累葉相仍。覃厚慶。惠風勝範。在陳留。姿度莊修。循德性。清門合作三紀餘。內外參和資輔正。川上之水何悠悠。韶華委逝不復留。人間華屋去北里。江外丹旄還西州。仍從先姑安舊隴。永託松柏山之幽。

文恭集卷三十九

碑表塔銘

宋故朝散大夫尙書禮部侍郎致仕上柱國樂安縣開國侯食邑一千三百戶賜紫金魚袋贈吏部侍郎蔣公神道碑

宋有大雅全德之老。尙書禮部侍郎致仕蔣公。以皇祐六年三月辛酉。考終于吳郡靈芝坊私第。以至和元年九月乙酉。葬于吳縣堯峯之魯塢。門人邵必。誌其壙。議者謂公朝廷偉人。東南首望。宜有石刻以表神道。旣葬十年。宿得以申尋遺烈。章示于後。公諱堂。字希魯。常州宜興人。弋陽本系。出于周公義興。至唐蔚爲盛閥。累世絳冕。訖于五代。本朝未有達者。先大夫賢。常有中興門構之志。聚書延客。以教諸子。公在伯仲間。穎特秀整。不勉而學益進。旣冠而業大成。西遊京師。遍交英俊。卓然文行。見稱諸公。名聲飛翔。迅于六翮。祥符五年。登進士甲科。授楚州團練推官。嘗權州事。閱器仗。牙門軍校不待白。已輒啓庫鑰。公械而治其罪。郡中肅然。丁先大夫憂。服除。吏部試甲乙判。文在優等。陞見日。章聖命取所試判視之。嘉賞焉。改大理寺丞。知撫州臨川縣。縣有大姓李甲。積爲民害。乃復僭擬。囚制。動作不法。前宰無敢撻其罪。公至。

緣事捕治之。盡得其姦狀。卒坐棄市。害根鋤去。闔境慰悅。歷眉吉楚三通判。改太常博士。知泗州。惟眉差小而三郡類劇。沛然神用。治罔弗舉。召爲監察御史。時樞密使張耆。章聖藩邸舊臣。嘗有德于獻后。后方臨朝者。數移疾弗治務。公以其慢朝虧職。宜加顯黜。疏比上。不省。及仁宗復辟。同僚語公。盍辯前疏。答曰。彼已失勢。言之傷薄。吾弗爲也。未幾。同僚躡公前跡而言。疏入之明日。仁宗見稱敢言。擢居近侍。執政知公抗疏在前。他日見之。有慰安之語。公曰。言責本職。豈規賞耶。禁中火。有司欲文致其事。委罪宮人。公上言。火災天意也。陛下恐懼修省。猶恐未至。如聞吏議。欲以宮人爲解。女子一問卽承。然天可誣乎。上悟。遽命原之。日官上言。內酒坊直國家福德所在。宜徙置他所。宦者喜興作。希土木之賞。隨而贊然。事下公府。公逆奏曰。內酒坊枕大內西北隅。四世矣。祖宗以來。少福德耶。無名改作。所宜慎重。事遂寢。歲餘。遷歷三院。判三司度支勾院。賜緋衣銀魚。時三司使范諷。高虛廢務。公以爲憂。頃之以侍御史出爲江南東路轉運使。辭日。而陳諷放逸不事事。大墮厥職。仁宗頷之。未幾。諷罷。至江東數月。會朝廷廢江淮發運使。均歲漕錢帛之數。取辦六路。以公爲淮南轉運使兼發運使。更張甫至。綱目未立。凡百經制。出于心術。歲終。奏計六百萬。蠶書褒美焉。未幾。就除尙書吏部員外郎。復以勞。賜金紫。坐部吏犯法。按舉失實。移知越州。漢太守馬臻。所治鑑湖在焉。無慮溉田八千頃。至是。越人奪湖水以名己田。故水日堙。湖田日廣。貧民失水利。豪姓擅地產。公條奏利病。詔復爲湖。俗信姦巫。奉淫鬼。境內所祀非舊典者。皆翦治之。取其像棄湖中。材瓦悉送官。衆初駭以爲蔑神。公乃尊禹祀。新馬侯故祠。歲時齋薦之。民靡然而趨正享。知淫祀之無福。

焉。徙知蘇州。代還。判尚書刑部三司戶部勾院。歷戶部度支鹽鐵三司副使。乘西師之後。關中困乏。及夏人送款。疆事略定。公建白一切蠲去橫賦。以紓其民。東川饑。受詔爲梓州路安撫使。勞徠安定。全活甚多。還朝。除戶部郎中。天章閣待制。充江淮發運使。承前居是職者。每歲上計。必取大鵬載奇物。輸權門。以售進。公再任前後五年。未嘗一至都輦。章奏皆附驛而上。除河東轉運使。未行。徙知洪州。又改應天府。兼南京留守司。歲餘。遷左司郎中。知杭州。會高選名臣。以殿右蜀。遷樞密直學士。知益州。蜀人儉浮。不識敦本。前守如乖崖。承寇亂甫平。一切權宜。務安遠俗。後之來者。以爲治蜀適然耳。而又增益侈費。十倍于前。公彘官于眉。習知敝俗。常曰。國家承平百年。聲教萬國。蜀士學尚。不減鄒魯。惟此習俗。尙安餘風。二千石恬而不怪。豈承流宣化意耶。乃興學校。省廚傳。凡過泰無名之費。姑息不正之事。多所裁革。未始顧慮。耆舊有識者。竊喜公所爲。咸言庶幾數年。吾俗且變。貪吏醜正。惡不利己。復有肺腑舊族。逋責列肆。累政不敢治。公裁之以法。遂入訴近習。且造險語。飛聞于上。謂公變亂舊制。蜀士且搖。遽移公知河中府。迄今蜀人歌思之不已。公至蒲。嘗感危疾。表求便郡。再知杭州。遷左諫議大夫。復徙知蘇州。明堂泛恩。改給事中。公治杭與蘇。俱有遺愛。及重臨二州。幼艾相攜。迎拜道路。吳人于虎丘生爲立祠。明年。表還官政。朝廷崇禮耆碩。閔煩事物。以小宗伯秩。聽行其志力。是時年耆者類不卽退。公在杭州日。業已治第吳下。旣而得請。角巾休舍。搢紳高其識。平生愛客。應接不倦。亦旣告老。精力尙強。佳賓至前。清談不廢。所居溪館。有芝草產焉。一孫少孤。二子皆幼。至是參侍左右。咸以爲陰德之報。感疾旣革。遺言誨以力學。口占後事。命弟之

子之奇、疏于牘背、已與親友訣、神色不亂、含玉之日、壽七十五、吳中士大夫、若吏與民、莫不相與流涕、朝廷公卿、表其德範、宜加旌賁、天子惻然、命以優恤、特贈尚書吏部侍郎、未三品、非例也、公學問道本原、論議依名節、其行己也直、其從物也裕、人之有善、不啻己出、孜孜獎進、須成就乃已、所至以拔才薦士爲己任、或譏以太廣、勉之少峻、公以峻則遺物、卒不易其守、歷典會府者七、所至之治、必先美風俗、扶名教、不專于簿書聽斷而已、治蜀日、常召高才碩生、會試府寺、親校才等、勸成學者、于府學之側、別建西學、以廣諸生齋室、訖成而公移蒲中、其後轉使毀之以增廨舍、旣而常山宋公尙書至府、聞其事、歎惜久之、且欲成公意、乃卽其舊趾、建文翁祠、祠之內、圖嚴君平、鄭子真、司馬相如、揚子雲、蜀土先賢、凡九、及公之像、而十常山公爲之贊、至公略云、蔣侯挺挺、天與嚴方、健而文明、不逢不將、迹其風德、從可知耳、公有高情、富清藻、多所綴述、尤邃于詩、其間所得、往往清絕、善作尺牘、思致簡詣、時人得之、藏爲名筆、及退居林下、神機日旺、雖飲食寢處、未嘗忘詩、亦天性然、有文集二十卷、初義興家墅、濱鬲湖之右、蔣氏大宗之碑在焉、公之曾王父、諱幼蟾、大王父、諱宏謹、皆隱德弗官、王父、諱九臯、以公貴、贈尙書刑部侍郎、妣史氏、追封廣陵郡、尙氏、宣城郡、二俱太君、公出史氏、娶錢氏、封壽昌縣君、先庚辰十二年而、匹、後舉以合葬焉、子三人、長羣玉、早卒、次長生、次長源、皆爲大理評事、女四人、長適刑部郎中、知制誥邵必、次適都官員外郎王景芬、次早卒、次適處州青田縣尉宋寬、孫續、任大理寺丞、通判利州、初、公捐館、遺恩以續、簽書平江軍節度判官廳公事、自言少孤、育于祖、乞服衰巖、以報朝議、以公有子、不許、遂辭疾、謁醫、去職行服、雖不如禮、識

者重焉。吁哉。道之難行。以公吏師治蜀。美績弗究。不登三事。其命也夫。宿早依門牆。稔聞閎闕。茲用傳信。亶無愧辭。庶使三吳吏民。過堯峰者。爲賢公墮淚云。銘曰。公之志潛于斯民。平昔蘊蓄。曾弗大伸。公之才足經當世。華皓卷藏。未能殫試。刀州之學。有像是圖。君平子雲。盛德不孤。虎丘之趾。有詞特起。太伯季札。高風孔邇。嗟嗟尺璧。長掩山阿。神明潛翳。恫若之何。震澤東漸。靈巖西峙。公雖可亡。德音不已。

故祕書王公墓表

故祕書王君諱樞。字慎之。姓出魯之屬邑。其先句須爲之宰。後因焉。漢有丞相衡。晉有將軍衡。乃其苗裔。播遷之餘也。累世占數常州之無錫。以避太祖諱。上之字改稱王焉。曾祖克模。祖建寧。俱仕南唐爲偏將。以驍果聞。周師圍壽春。國主令君祖齋密詔。至守將劉仁贍所。致命而還。後積功勞。卒于信州刺史。考德政仕南唐。爲資明庫使。歸朝。卒。右侍禁。君第四子也。幼警悟。有學。工于屬文。體裁典蔚。天性善書。喜爲楷法。其落紙也如飛。人望之。意以爲草。卽之。眞美可愛。十三歲。侍父征南海市舶。故工部侍郎凌公策。時爲轉運使。賞其神俊。妻以愛女。凌公後典成都。得任異姓爲官。以蔭試將作監主簿。非其好也。錄廳就本郡之舉。取爲首選。明年中丙科。守祕書省校書郎。知湖州長興縣。治有風迹。嚴而不殘。丁內艱。去官。焦毀成疾。以祥符丙辰。十二月十一日。卒于京師。伯氏函其骨歸吳。寓于惠山精舍。三十九年。子翔。爲陸州建德令。感幼藐失恃。僑寓未葬。赴郡謁告。乞治喪事。以書來赴。曰。我先君將葬。日月孔邇。願得銘諸壙中。以謹行閔。會予受詔。聯知貢舉。逮已事而出。則過期弗及。遂以皇祐癸巳四月十五日。卜葬于無錫縣神龍鄉。

義昌里大瑩之次。是時再世。猶在淺土。至是舉葬者。凡六喪。緊克家之幹也。祕書某人從外兄也。總角時。以伯氏之命。得依其舍爲學。君太夫人范陽盧氏。山東舊閥。賢而有範。閨門之內。不肅而成。視祕書子。均同子姓。君之伯氏植。器業磊落。綽有風義。凡所論議。必依名節。吳中士大夫。日游其門。某以餽生。受教君子。恩故彌厚。歲不我與。忽然四紀。二惠競爽。抱志不伸。伯氏嘗舉進士。以親老不遑擇祿。後卒于右侍禁君之易簀。纔二十五歲。貌古神秀。行安志美。時人咸期遠到。不幸夭闕。其後同時儕類。多至顯仕。使君且壽。未易涯耶。長子曰翔。進士擢第。葬之明年。冢嗣以最。遷祕書省著作佐郎。知河南府壽安縣。得告展省。咨予以前銘有闕。且曰。表其墓可也。追惟平昔。受訓伯氏。義不可辭。故同其伯氏云。

故右街副僧錄普印大師賜紫昕公塔銘

有宋大士。賜號曰普印。居景德蘭若。以至和丙申。四月甲戌。宴坐示滅。容采若生。壽七十有四。臘五十有九。都城緇俗。燎香膜拜者。日盈其室。越仲夏甲申。弟子文顯等。奉其全身。立塔于都門之外。寶慈寺之別園也。師諱昕。姓曹氏。世占數于丹徒。六歲出家。奉金山沙彌幼仁爲師。十五染法衣。明年受具戒。挺然節尚。拔于時類。未幾。臺恩以例。賜紫方袍。年二十餘。通華嚴。起信等經論。雅好易學。長誦說。山中晨起講經。午後說易。如此累年。未始有懈。已而聞五祖山戒禪師。有佛知見。往求印可。咨決心疑。法要啓聞。空門遺解。自爾按趾。莫非于海印。舉足皆是于道場。一錫隨緣。僑止輦寺。行願純備。名稱普聞。王公大人。傾向其風。以謂挹之彌沖。淵然而粹。莫不服其清遠。去疵吝。咸願叩繫表之益。申方外之款。龍潭潯陽之勝利也。

遣徒迎致。求轉法輪。師承請驩然。業已決矣。會兩街上首。與名勝百數。詣京府薦留。願廢以僧職。乃署左街。守闕鑒義。稍遷右街。副僧錄。雖居大衆之地。不異寂默之境。定鑑有來而則照。洪鐘隨叩而斯鳴。素琴寶書。蓋泊如也。晚邃于易。參京氏著論三篇。造至韞。常曰。三聖極摯。本無言說。淨名不二法門。乃至無有言語文字。仲尼亦云。予欲無言。又曰。天何言哉。老子西出關。尹喜曰。子將隱矣。強爲我著書。于是述道德上下二篇。由此觀之。默指可見。然不離文字。而說般若。于是有三教會同之論焉。未圓寂前一月。手疏履迹。見託狀其淨行。緒言猶在。而哲人已萎。豈非靈知逆照其來乎。追踐前言。姑銘其塔云。有皇庖羲。思索其極。觀化至神。畫而爲易。有師少林。妙解甚深。逗機諸祖。印之以心。三極精微。一乘圓頓。孰會其宗。導師普印。覺門者俊。智地妙明。昔來江城。留舍都城。緇素欽風。王公挹德。定慧參持。威儀孔力。毗耶示疾。趺坐云亡。感深茲土。迹應他方。神明曷之。話言已矣。塔闕全身。狀攜隻履。背宜春兮下苑。卽逝迹兮外園。噫。大士兮普印。寧委蛻兮茲原。

文恭集卷四十

行狀

太傅致仕鄧國公張公行狀

令公本系清河。五世祖唐任刺史。因僑于漢南。曾祖諱某。以廷尉平總襄鄂七州都計。居襄帥趙凝府。疑。唐書作趙匡凝。此避宋太祖諱。缺之。凝爲梁所敗。走江南。因避地鄖鄉。卒葬于斯。祖諱裕。字某。試金吾長史。嘗莅陰城監院。遂占數焉。後榜陰城曰軍光化是也。考諱廷朗。恬曠卷道。翔去弗仕。咸以醜德厚行。品于州曲。慶靈回復。克開厥嗣。其後公貴。三世竝追贈開府儀同三司。太師兼中書令。尙書令。以郟楚韓三國公啟之。封曾祖之配曰郭氏。祖之配曰胡氏。封燕國。晉國。太夫人。妣趙氏。封魏國。太夫人。繼母二。曰龐氏。曰李氏。以韓魯越竝加太夫人之號。初魏國產公七日。疾且革。有姑適全氏。以公屬其姑曰。娠是兒。覺有異。今疾不支。以是長累姑矣。語訖。卽絕。姑感慨鞠養。同于己生。公生百餘日。甫能啼。幼卽穎特。習貫如素。及其長也。身長七尺。天骨峻擢。隤然志量。莫搢其際。受經于嵩陽張恕先生。恕有道之士。見公學尙根本。行中儀矩。歎謂之曰。子天機如法。未易可涯。後與濟北戴國忠。廬陵歐陽慶。學于鄴城。淳化初。本土勸駕。端圍覆

試于時取士。優先舊人。初詣公車者。臚傳報罷。公颺言曰。襄漢人士。陶化尙少。必欲諷勸學者。乞從隗始。占奏條暢。太宗聳然異之。卽賜公第。解巾鄖鄉簿。先墓在焉。初政有條。衆畏且愛。秩滿。除射洪長。蜀盜甫平。瘡痍迄起。賦重俗惡。不堪長治。或恤公曰。得射洪何哀。盍易他邑。公曰。事不避難。志不求易。有民與社。吾何懼焉。至卽安集勞徠。恩意甚著。夏旱。郡邑馳禱。靡神不舉。公初至邑。齋被外次。禱于白崖山陸使君之祠。旣奠而踐。斂版以俟。時陽驕熾。天無纖陰。須臾繁雲大合而雨。連屬三日。遠近霑足。涓辰報貺。刻文識其祠下。剽輕聚盜。保匿境內。公廉知主名。陰設方略。詭以輕事。一切捕繫。數日。州果符下。牙將提兵捕劇賊陳漢。遇八人。至則賊已獄矣。咸稱神明。轉運使檄請治郵。便道詣郡。射洪民數百。追路邀持公馬首。以歸曰。我邑官人也。郡以其狀白外臺。檄至聽還本治。其得民心如此。張貳卿守左蜀。有採訪使至郡。詢屬吏之賢否。雍曰。本郡十邑。屈得一指。惟張射洪耳。後除襄陽長。內艱不赴。除喪趨冬集。出許下。故內閣查公道時。領漕京左。嘗更守蜀郡。高公射洪之政。館致累日。以書薦于楊文公大年。文公遂于風鑒。少所許可。一見大加器賞。便期以公輔。促公獻文闕下。自攜其副。介于執政。業有俞旨。行給試札。會有澶淵之幸。事從中寢。以薦例應格。除祕書省著作佐郎。知邵武縣。民喜訟。吏詆欺前後。宰守經常繫者。不減一二。百公平處。悉當劇易。迎解訟。源自閉。牢戶至空。軍帥武白訪公。詢今昔煩簡之殊。致以何道。公啓曰。前以精密致煩。後以疎略成簡。白尤歎語致之美。嘗手植海棠于庭中。後之爲邑者。欲伐去。老吏以爲不可。泣諫乃止。迄今訂之甘棠焉。遷祕書丞監。在京折中倉。除御史臺推直官。楊文公薦才堪御史。兼除察視。時

貢舉新格始用糊名。張設科防。間有未密。公受詔巡鋪。巡經學。已。因白主司。有親戚在進士中。明當引試。于巡體非便。請出以避嫌疑。主司以令甲無有。公自表引去。不俟可報。真宗覽奏。深加歎息。因記名于禁屏。自是著令。與主司有雜嫌者。移試別頭。江南轉運司闕。中書兩上擬目。已再見却矣。特有宸旨。越次用公。封禪汎恩。就除殿中侍御史。在江南歲餘。除侍御史。移廣南路轉運使。公以南海饒寶。薏苡足鑿。雖所須藥物。皆自北營致。而南到部市。無私焉。章聖意在試用。故嘗以公番禺一二所爲。伺知治行。時朝家獲元命之符。因覬馭之格。訪四方州郡。置觀榜。以天慶。公上言。嶺服僻陋。不堪大役。建議諸舊有觀處。宜改用金額。別增一殿。以虔朝謁。朝廷從之。班下著比。時太尉王文正當國。歎其有體識。西祀慶成。就除尙書兵部員外郎。被召入對。延見數四。言皆意合。去輒目送。以將漕之重。除河北轉運使。詔徙棣州。以避水害。城中糧餉滯積。議者難于遷運。時濱河諸郡。歲飢艱食。公裁留支計。餘竝貸以與民。約以來歲輸還新州。公私便之。如期率集。明年。主上出閣。高選僚友。召還。除戶部郎中。充壽春郡王友。規中入謝。上面諭選卿來久。幸煩友教。公俯伏祇詔。恪勤授經。敷譯聖言。開導元良。德必依孝。動則循禮。上徇齊而敦敏。學緝熙而光明。卓然日躋。繫于體訓。授詔。充契丹國信使。辭于便坐。趨入殿戶。馳遣中人召入。引至上前。諭以元子煩卿誨接。朕嘗以卿語宰相。最愨于訓導。輟卿不可以使材之難。少逾卿者。公因敘謝。趨下再拜。復召升殿。再諭此行出境。惟當執禮。答問以實。若關兵要。辭以他語。賜坐啜茗。謁者贊罷。復趨。陞右對揚。天子之休命。公初入壽邸。及主上一經之畢。真皇皆賜御詩褒美焉。至是聘北。復有宸藻寵行。朝野榮之前無。

此比使還稱職。以國藩初啟，除昇王府諮議參軍。東宮既建，除右諫議大夫，兼太子右庶子。未幾，昇左同知審官院事。四年，兼太子賓客，知審刑院判，史館兼樞密直學士，審官如故。真宗治定淵然，凝監太清機政參裁，旁倚儲德。始以二府正弼，通領官職。除公太子詹事，會靈觀判官，餘如故。五年，以本官拜樞密副使，尋遷給事中。皇初紹宅，三遷戶部吏部侍郎，尚書左丞，充祥源觀使，竝居內密之職。六年，拜禮部尚書，同中書門下平章事，集賢殿大學士。明年罷相，遷刑部尚書，知江寧府。九年，來朝京，除定國軍節度使，鎮許下。十年，拜刑部尚書，行中書侍郎，同中書門下平章事。明道之元，落成宮寢，職在使領。二年，遷兵部尚書，升冠宰席，兼門下侍郎，昭文館大學士，監修國史。獻懿二后祔洛，以公充使領護園陵。尋除山南東道節度使，同中書門下平章事，判許州。景祐二年，有保釐西洛之命。五年，復以夏官尚書升序上袞。寶元郊類，充大禮使，籌相儀之勞，進封鄧國公。上方倚任舊德，挹仰耆訓，機務大小，一一咨決。公亦竭精盡慮，彌補察讜言善策，隨事獻納。自以儲帷階進，感會聖恩，思潔進退之分。全君臣之美，欲後世莫窺其間。于是七露章，推言己意，求還時柄。天子憑賴中旨批諭，有公無困我之歎。進見乘間，又懇懇乞骸。上亦感悟其言，閱勞職事，册拜太傅，致仕。進封鄧國公。許朝朔望，及大朝會，綴中書門下班。都城出入，許施青蓋，師瞻主睠。終始尊顯，國朝宰相，自中書致仕，惟公一人而已。艾服官政，五十餘載，內修孝悌，以廣親親。外崇禮樂，以接天下。保誠任素，履中蹈和。乾興受遺，繼乘相軸。皇初遵晦，獻后參制。近習藉寵，勢有放焉。公與一二雋弼，同心彌縫，闕漏消弭，間隙援進。忠睿選用，儒碩備諫。正勸講之任，開益神睿。綱紀疊穆，厥功茂焉。

冀州上曹某急變，構碁者規中樞老，二宮召質，諸弼俱無言者，獨公保任大臣無異志，言色詳正，卒指以厚善，罷公政事，出金陵，上終眷之，後復其爵，上還所籍田廬，甄其子孫，公中不自欺，大較如此，凡所解釋，多見全度，好獎進士類，喜掩覆人過，不念舊惡，特稟純孝，感姑撫育，事之如母，姑亦早寡，一子文秀，後卒，復棺之際，公適在外，及還，盛暑，堅求發棺，已而視之，哀慟殆絕，姑爲之輟泣曰：吾子雖死，汝在，固無憂矣，公悉心奉養，先意孝順，姑後病死，行服營葬，身相舁柩，徒跣墓次，行路觀者，歎息純至，及在樞宥，表陳前恩，特贈姑南陽縣太君，姑之子文秀，贈太子左贊善大夫，刻石以紀其事，今宣猷原武鄭公之文也，每語及姑兄，泫然流涕，武當鄖鄉，先塋在焉，嘗表求置寺，以紓罔極，詔以乾興賜之額，營築之際，工徒艱水，溪路回遠，疲于行汲，一旦墳側靈泉自出，役夫持鍤隨而浚之，淵澮甘清，絕異常水，飲者皆足，衆不病渴，日月引長，施及墟落，公刻文志，異名其泉曰：孝感，錢思公美而作頌，併序其事，公弈世滋善，深奉竺乘，公學力之強，妙悟性理，寂默常照，疵吝隨遣，不使纖芥，點于太清，以至歷四方，經百物，神明無滯，機應不差，干將莫邪，所至立斷，隋珠和璧，未嘗自珍，初服小官，晚都大位，久幽不改常操，三入而無喜色，所謂器博用大，道周性全者也，出殿大邦，克勤小物，不養虛體，務收實迹，所至有愛利之風，無苛留之獄，許田患水，築隄以捍，堅完峻厚，歲息愁墊，許人至今蒙其賜，及得謝，神明克壯，旦起玩易，老閱華嚴諸品，與赤髭白足之士，對談法要，得名教之樂，忘形役之累，城南賜園，殊爲名勝，暇日後車載客，相從文酒，雅題探賦，清篇庶屬，野興所適，或累日忘返，公綴文根道，尤邃于詩，峻整平淡，通有二體，登科日，嵩陽張先生，以詩寄公

云。全篇合雅道。一舉得仙枝。乖崖張尙書。以雅道自處。少所推挹。嘗覽公詩云。巨峻如天設。看來字字精。功夫能到此。心意可知清。酷愛張水部籍詩。嘗評之云。語雖似近。思致清遠。淺于詩者。不足游其藩閥。保釐西洛。有三游嵩少詩。及還政事。與故相宮師陳公。角才聯唱。詩筒日至。搢紳多傳諷焉。況之劉白。公嘗受詔。主作皇太子及寶元尊號二冊文。典厚深重。世稱名筆。撰集。則有明道籍田謝廟二記。箋註御集。譯潤經文。公咸預焉。文集十。曰應制。曰春坊。曰舊帶。曰江嶺。曰許洛。曰歸政。曰過家。曰小集。曰雜文。曰表章。內七集自作序冠其前。行書遒勁。毫法殊逸。尺牘所作。人競藏弄。歲時伏臘。太官珍甘。班賚兼優。勞問不絕。元會誕節。參綴宰聯。抃舞稱觴。百僚聳觀。龍光體貌。爲時元老。上嘗遣近璫。持賜公飛白千歲二字。神毫奮迅。天然攸縱。公進長歌二百言稱謝。優詔賜答。模以琬琰。龜于西堂。翰林學士宋公子京爲之序。前後所賜宸翰。積百餘軸。居常祕奉。公以乾德甲子。九月二十一日生。于皇祐元年。正月己酉。晡後薨。年八十六歲。上聞而震悼。詰旦車駕臨奠。哀慟數四。賻中金三千兩。輟視朝三日。冊贈太師。兼中書令。翼日便坐決事。上顧宰相曰。張某可惜。昨日有言庚戌是朕正本命。未可致奠。朕以其師臣舊德。首于藩邸輔導。遂定志而往。宰臣進而言曰。陛下如此。過于唐太宗辰日哭張公謹也。茲事不惟張某之幸。實爲陛下聖德之美。乞宣付史館。庶幾光輝行遠。上從之。二月某日。皇帝出哭于外次。百官奉慰。哀榮之極。人臣少比。初公卜葬父母。遇觀之蠱。卜者曰。易所謂幹裕其父母。吉孰大焉。上九不事王侯。高尙其志。公將終身履之。貴而有壽。其後三師就第。十年棄事。養和綏福。得上九之象焉。聞歲一還鄖鄉。拜掃塋墓。三世墳典。皆

至極品。卜者幹裕之說。不其信歟。未薨前二日。猶之園墅。晨起感疾。初不甚苦。方答親客書簡。俄而委順。公起布衣。爲王者師。三持化樞。再領台鉞。任德爵之重。爲典刑之老。易之大有上吉。書之五福嚮用。公皆全而履之。初無缺者。初娶蔣氏。追封晉陵郡夫人。再娶黃氏。追封英國夫人。三娶馮氏。封舒國夫人。皆賢明婉靜。儀諸中閫。男子四人。長友直。任尙書刑部員外郎。直史館。友僞。殿中丞。友正。將作監丞。友誼。奉禮郎。蚤卒。四女。長適工部郎中安稹。次適刑部員外郎集賢校理李昭遘。次適太常博士呂公孺。次適刑部郎中王素。適安氏。王氏者。先公而亡。龜筮襲吉。日月有期。周咨家臣。參稽官閥。敢陳有覺之行。願摛無愧之辭。謹狀。

李太夫人行狀

後封沂國太夫人

太夫人姓李氏。占數晉陵。世爲賢家。曾大以來。敏德厚行。名諸州曲。考諱某。力學早殞。不階宦達。娶強氏。生三女。太夫人卽其第二息。幼挺淑質。長蹈雅性。姆教匪習。自安于中行。女功不勉。皆臻于妙趣。以守龜云吉。遂歸于我先君。寺丞。逮事大門。及侍公姑。朝夕恪共。儀止淑慎。躬親執煩辱之事。造次亡喜愠之容。旁絕間言。動得餘裕。及大門捐館。尊姑在堂。時年八十餘矣。能候慈色。不失美意。時先君患舊華隘甚。謀攷新室。或計土木之資。旁沮其議。太夫人曰。不然。今姑年迫矣。脫有不諱。外姻且來。是問何能周旋。治第庇族。差勝他費。及姑生存。得安斯寢。饘于是。粥于是。歌于斯。哭于斯。足矣。乃出奩中之糶。得金數百。趨市材瓦。落而成之。未幾而祖母亡。于是弔祭有所焉。洎先君不祿。泰山其頽。泣奉几筵。親持門戶。訓諸子以

學。昂諸女以順。歲時伏臘。祠祭必誠。諸物內外。姻族廢弔。皆躬其事。或有匱乏。至爲經恤。外祖之亡。一子尚幼。自零丁孤苦之中。使之成就。樹立皆出。昂養之勤。遂承其家。逮至暮年。數見重孫。篤羊棗分遺之慈。盡鵲鳩均一之愛。持禮由于繩墨。用心過于丹青。黎明以興。盛服而坐。習知四諦之苦。歸信一乘之法。神珠百餘。誦觀音名號。持般若心經。像前焚香。日繫其合。藐是諸子。尸諸外官。至于賦政緒餘。立身本末。莫不提耳蒙教。持心俾厚。奉戢悔尤。得免罪戾。實繫慈訓。平反之故。寶元中。郊類泛恩。啓封上元縣太君。慶歷三年。孟夏交。吳興郡章奉版輿。寧里開。昊天不弔。大禍奄至。以中秋八日。感疾終于常州孝仁坊之私第。享年七十有五。臨終神色如常。初不怛化。願視諸子。徐以手握某之臂。良久合掌加額曰。願汝無忘善性。諸子以有爲之法。乞營佛事。頷而許之。言訖。卽終。初太夫人以丙申八月壬寅。生于某。復以癸未八月壬寅。委棄諸孤。至慈無窮。大恩未報。追誦寒泉蓼莪之什。劬勞願復之施。恨不得先從地下。驅馳螻蟻。苟延視息。亦何忍焉。子五人。長曰某。至性淳至。次曰宿。任太常博士。集賢校理。曰飾。曰實。曰賓。舉進士南省下。女二人。長適進士朱況。〔案〕况姓名。見唐詩鼓吹。所選胡宿七言律中。元好問既誤以宿爲唐人。于況自不暇深被。此足以證其失。次適桂州司理參軍葛武。皆先太夫人而亡。孫宗度。宗陽。宗堯。凡二十四人。宗堯擢進士第。任饒州團練判官。餘或干試有司。或纔習緒業。重孫元規而下。凡六人。日月有期。諸孤相與追記平生狀實。乞



編主五雲王

編初成集書叢

集 恭 文
册 六

中華民國二十四年十二月初版

撰 者 胡 宿

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

*O六二六六

大

錢



3
4
1889